



# Buk Baibel long tokples Kandas

Kandas New Testament

Contents

|                     |     |
|---------------------|-----|
| .....               | 1   |
| Matiu .....         | 2   |
| Mak .....           | 44  |
| Luk .....           | 70  |
| Jon .....           | 112 |
| Aposel .....        | 143 |
| 1 Korin .....       | 183 |
| Pilipai .....       | 201 |
| 1 Tesalonaika ..... | 206 |
| 2 Tesalonaika ..... | 210 |
| 1 Timoti .....      | 213 |
| 2 Timoti .....      | 218 |
| Taitus .....        | 222 |
| Pilimon .....       | 225 |
| Jems .....          | 227 |
| 1 Jon .....         | 232 |
| 2 Jon .....         | 237 |
| 3 Jon .....         | 238 |
| Jud .....           | 239 |

## Buk Baibel long tokples Kandas

Portions of the New Testament in the Kandas Language of Papua New Guinea  
Sampela hap Nupela Testamen long tokples Kandas long Niugini

copyright © 2011-2016 Wycliffe Bible Translators, Inc.

Language: Kandas

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright information.

You do not sell this work for a profit.

You do not change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-11-06

ISBN 978-1-5313-0355-6

---

PDF generated on 21 Sep 2016 from source files dated 21 Sep 2016

c26408e7-0f52-572d-84cb-b9f49eb40621

---

This print-on-demand edition of Scripture is designed, produced, and provided at cost by the Digital Bible Society. This is made possible through partnerships with the Bible League of Canada, Open Doors International and other missions and translation agencies. We are deeply grateful for the sacrifices made in translating this edition of Scripture and the generosity of others in making this Bible available to you.

To order additional copies of this Bible or hundreds of translations like it or to learn more about our ministries and the mission of Scripture distribution in every language, we invite you to visit [www.DBS.org](http://www.DBS.org) (USA), [www.BibleLeague.ca](http://www.BibleLeague.ca) (Canada), and [www.OpenDoors.org](http://www.OpenDoors.org) (Europe). May God bless your work in sharing and teaching these Scriptures, until, as it is written, the earth is “*filled with the knowledge of the glory of the LORD, as the waters cover the sea.*” (Habakkuk 2:14)

---

Buk Baibel long tokples  
Kandas  
Portions of the New Testament  
in the Kandas Language of  
Papua New Guinea

Sampela hap Nupela Testamen  
long tokples Kandas long  
Niugini

*Buk Baibel long tokples Kandas*  
Portions of the New Testament in the  
Kandas Language of Papua New Guinea

Translation by Wycliffe Bible Translators

© 2012, Wycliffe Bible Translators, Inc.

Print publication, 2012 by Wycliffe Bible  
Translators, Inc.

Web version  
2016, Wycliffe Bible Translators, Inc.  
[www.Wycliffe.org](http://www.Wycliffe.org)

<http://pngscriptures.org>

[www.ScriptureEarth.org](http://www.ScriptureEarth.org)

This translation is made available to you  
under the terms of the Creative Commons  
license (Attribution-Noncommercial-No  
Derivative Works).

<http://creativecommons.org/licenses/by-nc-nd/4.0>

Your are free to share — to copy, dis-  
tribute and transmit the text under  
the following conditions:

- Attribution. You must attribute the work to *Wycliffe Bible Translators* (but not in any way that suggests that they endorse you or your use of the work).
- Noncommercial. You may not use this work for commercial purposes.
- No Derivative Works. You may not alter, transform, or build upon this work.
- In addition, you have permission to port the text to different file formats,

as long as you don't change any of the text or punctuation of the Bible.

Notice — For any reuse or distribution, you must make clear to others the license terms of this work.

Tok Orait

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem yu ken givim kopi long narepela manmeri. Yu ken wokim kopi na givim long husat i laikim. Tasol, yu mas tok klia dispela samting i kam long <http://tokplesbaibel.org>. Yu no ken kisim mani na salim dispela. Yu mas givim nating. Na tu, yu no ken senisim Tok.

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa.

Sapos yu laik stretim samting i no orait long dispela tok orait, stretim tok, salim Buk Baibel, o tainim Tok bilong God long nupela tok ples, yu ken askim mipela.

Olgeta tok orait na lo long tok ples English i stap long <http://creativecommons.org/licenses/by-nc-nd/4.0/legalcode>.

Sapos yu gat askim long dispela, plis askim mipela.

## A Wakak na Wasiso uno Iesu Karisito o Matiu i tumusi

*A wasiso talapor mugu*

O Matiu i tumus a buk ri, i ara tagun a noino ma aru nat na ususer anun o Iesu, ma ara risano kai o Liwai. Numugu i a tene los takis, ma i papam tomo nama gapman Rom. Numur o Iesu i kabo pasi, ra i wanpat a nat na ususer (tama Mt 9:9-13).

O Matiu i tumus a buk ri torom anun a taro, a taro Juda. A taro Juda det kis langlang sur a inawan pat anun a musano ra o God i pilok pasi, sur in king anundet. Una wasiso Ibru di watungi nama Mesaia, ma una wasiso Grik di watungi nama Karisito.

O Matiu i nemi sur in inanos det lena, o Iesu ut ra a Karisito, a King anun a taro Juda. Sur i mo ra i wasiso una inawan pat anun o Iesu ra i elar nama king.

Ma i watung puaso i kai a ramano kum wasiso tagun a Mugano Buk Tabu una Karisito. A inawan pat anun o Iesu i uling-mulus a kum wasiso ri. O Matiu i tumtumus kai una etowo anun o Iesu una matanitu anun o God.

A inawan ina buk Matiu:

A usus ino Iesu (1:1-2:23)

A pinapam anun o Jon a Tene Baptaiso (3:1-12)

Di baptaiso o Iesu ra numur o Satan i lari (3:13-4:11)

O Iesu i papam tong o Galili (4:12-18:35)

O Iesu i wan usapat o Jerusalem (19:1-20:34)

A tintinip na wik ma a minat in o Iesu (21:1-27:66)

A katkatatur melet anun o Iesu tagun a minat (28:1-20)

*A risan a kabotaro anun o Iesu Karisito  
(Lk 3:23-38)*

<sup>1</sup>Iri a risan a kabotaro tagun numugu ra o Iesu Karisito i wanpat tagun det. O Iesu, i a nutun o Dewid, o Dewid i a nutun o Abaram.

<sup>2</sup>O Abaram i o taman o Aisak,

O Aisak i o taman o Jekop,  
ma o Jekop i o taman o Juda ma a kum tistisino.

<sup>3</sup>O Juda i o taman o Peres der nam o Sera,  
ra a nander o Tamar.

O Peres i o taman o Esrom,

o Esrom i o taman o Ram,

<sup>4</sup>ma o Ram i o taman o Aminadap,

o Aminadap i o taman o Nason,

ma o Nason i o taman o Salmon,

<sup>5</sup>o Salmon i o taman o Boas, ma o nano a risano o Reap.

O Boas i o taman o Obed, ma o nano a risano o Rut.

O Obed i o taman o Jesi,

<sup>6</sup>ma o Jesi i o taman o Dewid, i ra a king.

O Dewid i o taman o Solomon, ma o nano a ino ra i nolin pas nam o Uria.

<sup>7</sup>O Solomon i o taman o Roboam,

o Roboam i o taman o Abia,

o Abia i o taman o Asa,

<sup>8</sup>o Asa i o taman o Josapat,

o Josapat i o taman o Joram,

ma o Joram i o taman o Usia,

<sup>9</sup>o Usia i o taman o Jotam,

o Jotam i o taman o Akas,

ma o Akas i o taman o Esekia,

<sup>10</sup>o Esekia i o taman o Manase,

o Manase i o taman o Amon,

ma o Amon i o taman o Josaia,

<sup>11</sup>o Josaia i ulabo o Jekonia tomo nama kum tistisino. Numur tano, a taro Babilon det dat pas a taro Israel utong

o Babilon sur det in kis na karabus.

<sup>12</sup>Numur tan a inawan utong o Babilon:

O Jekonia i ulabo o Salatiel,

o Salatiel i o taman o Serubabel,

<sup>13</sup>o Serubabel i o taman o Abiut,

o Abiut i o taman o Eliakim,

ma o Eliakim i o taman o Asor,

<sup>14</sup>o Asor i o taman o Sadok,

o Sadok i o taman o Akim,

ma o Akim i o taman o Eliut,

<sup>15</sup>o Eliut i o taman o Eliaser,

o Eliaser i o taman o Matan,

ma o Matan i o taman o Jekop,

<sup>16</sup>o Jekop i o taman o Josep, i ra i nolin nam o Maria. O Maria i usus o Iesu, ra di watungi o Karisito, i ra o God i tulu ru i.

<sup>17</sup>A kum taun taro turpasi tagun o Abaram tuk un o Dewid i elar nama noino ma wat det, ma tagun o Dewid tuk una inawan na karabus tong o Babilon a noino ma wat kai det, ma tagun a inawan na karabus tong o Babilon tuk un o Karisito a noino ma wat na taun taro kai.

*A saksakutna un o Maria ra i usus o Iesu Karisito*

*(Lk 2:1-7)*

<sup>18</sup>Di usus pas o Iesu Karisito lenri: O nano, o Maria, di sa ubek bat tari sur anun o Josep, ikut numugu tan anunder a nolin o Maria i sa tasmani lena i tianan tan a Tokodos na Nion. <sup>19</sup>O Josep ra di sa ubek bat tar o Maria toromi, i a tene tokodos, ma ke nemi sur in ban umaimai o Maria umatan a taro. Ra i nuki lena in kutus eno ru anunder a uliliman sur a nolin.

<sup>20</sup>Ra i nuknuk utmakai una utna ri, a ensel anun a Labino i wanpat toromi una ririon ra i watungi lena, "Josep, a nutun o Dewid, gong u wur nuknuk un o Maria, un ben pasi kut sur anum a ino. Uni a nat ra i tianan pasi, i wanpat tagun a Tokodos na Nion. <sup>21</sup>In usus pas a nat na musano, ma un pasor a risano nam o Iesu, uni in ulaun pas anun a taro gusun anundet a kum sakino petutna."

<sup>22</sup>A kum utna rop ri i wanpat sur din pam sot pas a kum wasiso anun a Labino ra anun a poropet i sa upuaso tari lenri, <sup>23</sup>"Tama i, a toraro ra ke inep tomo nam tu musano in tianan, ma in usus pas a nat na musano ra din watungi nam o Emanuel," *Aisaia 7:14* a kukuraino lena, "O God i kis tomo nam dat."

<sup>24</sup>Ra o Josep i tuangun, i muri lenutra a ensel anun a Labino i sa inanos tari nami, ra i ben pas o Maria sur anun a ino. <sup>25</sup>Ikut ka der inep tomo pas tuk ra o Maria i usus pas a nat na musano. Ma o Josep i pasor a risano nam o Iesu.

## 2

*A kum tene mananos det etabor torom o Iesu*

<sup>1</sup>Di usus o Iesu una tamon Betliem tiro una papor Judia, una kilalo ra o Erod i king. Numur a ramano kum tene mananos tagun a kum nangnang det wan tagitiro una nubual ra in matanas i pusu pat iai, ra det wanpat sapat o Jerusalem. <sup>2</sup>Ra det iting lena, "Awai i a nat ra di ususi, sur in king anun a taro Judia? Uni met tama anun in nangnang tiro una nubual ra in matanas i pusu pat iai, ra iri met wan urin sur met in lotu toromi."

<sup>3</sup>Ra o king Erod i longoro i, i talara a nuknukino ma a nuknukin a taro Jerusalem rop kai. <sup>4</sup>Numur i ben tomo rop pas a kum lamlabino tene etabor torom o God ma a kum tene ususer tagun a Warkurai. Ra i ting det lena, "A Karisito ra o God in tulu ru i,

din ususi awai?" <sup>5</sup>Det balu i lena, "Tong o Betliem una papor Judia, uni a poropet i sa tumus tari lenri,

<sup>6</sup>"Ma ui o Betliem una piso anun a kabotaro Juda,

Ui ko natino bing tan a kum mugu-  
mugu anun a kabotaro Juda,

Uni a mugumugu in nanpat tagun ui,

ra in mugu anung a taro Israel elar  
nama tene tamtamabat anun a kum  
sipsip.'" *Maika 5:2*

<sup>7</sup>Numur o Erod i itula eno pas a kum tene mananos tagun a kum nangnang sur in talapor pas tandet lena, nangisin mulus ra in nangnang i wanpat. <sup>8</sup>I tulu ru det utong o Betliem nama wasiso lenri, "Mot nan ma mot in sisio wakak sur a natlik. Ma ra mot sa sio pasi, mot in inanos iau, sur iau bulung an nan ma an lotu toromi."

<sup>9</sup>Det sa longoro tar a king ra det wan. Det tama melet pas in nangnang ra det sa tama tari una nubual ra in matanas i pusu pat iai. I mugu nanan det tuk i tur sapat una nubual ra a natlik kura iai. <sup>10</sup>Ra det tama in nangnang ra, det taramo a labino gasgas. <sup>11</sup>Det ruk una rumu ra det tama pas a natlik, ma o nano o Maria. Det kis butkeke ra det lotu torom a natlik. Numur det papos pas anundet a kum bek ma det tabori nama kum etabor ri: a gol, a paura di tuni ra a mis ino i sangnain wakak ra di watungi nama insens, ma a torok sangsangnain kai ra di watungi nama mira. <sup>12</sup>O God i sa utumarong tar det una ririon, sur gong det milet taru sur o Erod. Ra det milet sur anundet a tamon una se kisapi mukut.

*A inawan eno utong o Ijip*

<sup>13</sup>Ra det sa wan taru, a ensel anun a Labino i wanpat torom o Josep una ririon ra i watungi lena, "Un katuttur, un ben pas o nader nano, ma motul in kalabor eno utong o Ijip. Ma motul in kis tong iai tuk una bung ra an inanos ui melet, uni o Erod in sisio sur a natlik sur in um doko i." <sup>14</sup>Ra i katuttur, i ben pas nader nano una mirum, ma detul wan utong o Ijip. <sup>15</sup>Detul kis tiro iai tuk o Erod i mat. Una anundetul a kinkinis tiro, di pam sot pas a wasiso anun a Labino, ra a poropet i sa wasiso mugu taru uni lenri, "A kabo pas a nutunglik tagitong o Ijip." *Os 11:1*

<sup>16</sup>Ra o Erod i tama i lena a kum tene mananos tagun a kum nangnang det sa toro tari, i kankan doko ra i itula sur din um doko

rop ru a kum nat musano tong o Betliem ma una kum tamon kai ra det kis milau. I pitar a warkurai sur din um doko det ra aru kilalo anundet, ma det kai ra ke ru kilalo utmakai anundet, uni a kum tene mananos det sa inanos tari una kilalo anun a natlik. <sup>17</sup> Ra di sa pam sot pasi maragom a wasiso ra o Jeremaia a poropet i wasiso mugu taru uni lena,

<sup>18</sup>“Tong o Rama di longoro in nalngan ara, a tintinangis ma a unguagaia,

O Raket i domos a kum nutnutunu liklik, uni det sa mat rop, ma ka di umarip lar pasi.”

*Jer 31:15*

*O Josep detul tamano milet melet utong o Nasaret*

<sup>19</sup>O Erod i sa mat, ra a ensel anun a Labino i wanpat torom o Josep una ririon tiro o Ijip.

<sup>20</sup>Ma i watungi tano lena, “Un katutur, un ben pas der nano, ma motul in nan utong o Israel, uni det ra det nem na um doko a natlik det sa mat.” <sup>21</sup>Numur i katutur, i ben pas der nano, ra detul wan utong o Israel.

<sup>22</sup>Ikut i longoro i lena, o Akelaus i keles o tamano o Erod, sur i bulung in king tong una papor Judia, ra o Josep i ngara sur in nan utong o Judia. Ra detul wan mukut utong una papor Galili, uni o God i turbat tar o Josep una ririon, sur gong detul wan utong una papor Judia. <sup>23</sup>Ra detul wan ma detul kis una tamon a risano o Nasaret. Una anundetul a kinkinis tiro, di pam sot pas a wasiso anun a kum poropet lena, “Din watungi lena i a te Nasaret.”

### 3

*O Jon a Tene Baptaiso i warawai*

*(Mk 1:1-8; Lk 3:1-18; Jn 1:19-28)*

<sup>1</sup>A ramano kum kilalo numur, o Jon a Tene Baptaiso i wanpat, ma i warawai una nubual kalako taro uni una papor Judia, <sup>2</sup>ra i watungi lena, “Mot in nukpukus, uni a matanitu tagisapat una langit i sa milau.”

<sup>3</sup>O Jon ut ra, ra a poropet Aisaia i sa wasiso puaso mugu taru uni lena,

“Una nubual kalako taro uni, in nalngan ara i kakabo lena,

‘Mot in waninar a kisapi anun a Labino, mot in pam kodos anun a kum kisapi.’”

*Aisaia 40:3*

<sup>4</sup>O Jon i ser emar nam in namalu di pami nama iwu na kamel, ma i ser ker wati nam in pino bulumakau. I ser wan a kum ko ma a polono tatos. <sup>5</sup>A taro tagisapat o

Jerusalem, ma tagun a kum tamtamon rop una papor Judia, ma tagun a kum tamon ra det kis milau a danim Jordan, det wan toromi. <sup>6</sup>Det watung puaso anundet a kum sakino petutna, ra i baptaiso det una danim Jordan.

<sup>7</sup>O Jon i tama a susut na Parisi tomo nama kum Sadusi det wan sur in baptaiso det, ra i watungi tandet lena, “Ai, mot a kum nutnutun a kum sui! Ka inanos mot sur mot in kalabor eno gusun a warkurai na minabalu anun o God, ra in nanpat?” <sup>8</sup>Mot in pam a kum utna ra in upuaso i lena, mot sa nukpukus. <sup>9</sup>Ma gong mot nuki lena, o God ken warkurai mot uni mot a kabotaro anun o Abaram. A inanos mot lena, o God in pet lari sur in pam pat pas a kabotaro anun o Abaram tagun a kum watat ri. <sup>10</sup>Di sa ubek tar a nawu nisan a kum kibino duwai, ma a kum duwai rop ra ka det wu lako wakak na windet, din tau ru det, ma din woro tar det una sungun. <sup>11</sup>Iau, a baptaiso mot nama danim sur in upuaso i lena mot sa nukpukus. Ikut o naro ra in mur tang a dekdekino i labo taun a dekdeking. Ka elar sur an los anun aru su, uni a natino doko tano. In baptaiso mot nama Tokodos na Nion ma a sungun. <sup>12</sup>I pam pas anun a pok nam aru lamano sur in lakro susuaro a pino wit gusun a wino wit. Numur in ubek tomo anun a wino wit una nuna rumu na wit, ikut in tun ru a kum pinino una sungun ra ke ser mat.”

*O Jon i baptaiso o Iesu*

*(Mk 1:9-11; Lk 3:21-22)*

<sup>13</sup>O Iesu i wan tagitong una papor Galili utiro una danim Jordan torom o Jon sur in baptaiso i. <sup>14</sup>O Jon i nem na turbati, ra i watungi tano lena, “Ilai ra u wan torom iau sur an baptaiso ui? In wakak sur ui un baptaiso iau.” <sup>15</sup>Ra o Iesu i balu i lena, “Un baptaiso iau kut. I wakak ra a pami, sur dar in pam sot pas asau rop ra i tokodos umatan o God.” Ra o Jon i tarom tano.

<sup>16</sup>Ra i baptaiso tari. Uniutra o Iesu i saur gusun a danim, ra a langit i papos, ma i tama a Nion o God i wan pirso elar namin natabun ma i kis taru netes uni. <sup>17</sup>Numur in nalngan ara tagisapat una langit i watungi lena, “Iri a Nutunglik, a nat na wakak, a gas doko nami.”

### 4

*O Satan i lar o Iesu*

*(Mk 1:12-13; Lk 4:1-13)*

<sup>1</sup>Numur a Tokodos na Nion i mugu o Iesu usa una nubual kalako taro uni sur o Satan in lari. <sup>2</sup>Ra i sa wewel pas a wat na noino bung na mirum ma a wat na noino bung na waspi, i murak. <sup>3</sup>Ra a tene ululam i wanpat toromi, ma i watungi tano lena, "Ra ui a Nutun o God, un inanos a kum watat ri sur det in nanpat a beret." <sup>4</sup>O Iesu i balu i lena, "Di sa tumus tari una Buk Tabu lena, 'A taro ka det ser laun nama utna na inangon kut, det ser laun nama kum wasiso rop ra i pirso gusun a wan o God.'" *Lo 8:3*

<sup>5</sup>Numur o Satan i ben pasi usapat o Jerusalem, a tamon anun o God, ra i utur tari sapat netes sakit una rumu na etabor. <sup>6</sup>Ma i watungi tano lena, "Ra ui a Nutun o God, un sirok pirso, uni di sa tumus tari una Buk Tabu lena, 'In tulu ru anun a kum ensel sur det in tamtamabat ui. Det in pam pas ui nama kum lamandet, sur gong u tuka a kikum un tu wat.'" *Buk Song 91:11-12*

<sup>7</sup>O Iesu i balu i lena, "Di sa tumus tari kai una Buk Tabu lena, 'Gong u lar a Labino anum a God.'" *Lo 6:16*

<sup>8</sup>O Satan i ben melet pasi usapat netes una labino tangai, ra i ese tar a kum tam-tamon rop una rakrakon bual tomo nama kum minamar indet rop kai tano. <sup>9</sup>Ra i watungi tano lena, "Ra un kis butkeke ma un lotu torom iau, a kum utna rop ri an pitar tari tam." <sup>10</sup>O Iesu i watungi tano lena, "Satan, un nan gisen, uni di sa tumus tari una Buk Tabu lena, 'Un lotu torom a Labino anum a God, ma un tarom kut toromi.'" *Lo 6:13*

<sup>11</sup>Numur o Satan i wan pas gusuni, ra a kum ensel det wan toromi, ma det waruti.

*O Iesu i turpas anun a pinapam na warawai una papor Galili*

*(Mk 1:14-15; Lk 4:14-15)*

<sup>12</sup>O Iesu i longoro i lena, di sa uruk tar o Jon una karabus, ra i millet melet utong una papor Galili. <sup>13</sup>Ra i wan tagitong o Nasaret, i kis tiro o Kapernaum, a tamon ra i kis una usalin nisan a du tasi Galili, una piso anun a kabotaro Sebulon ma a kabotaro Naptali, <sup>14</sup>sur in pam sot pas a wasiso anun o God ra o Aisaia a poropet i sa wasiso mugu taro uni lena,

<sup>15</sup>"A piso anun a kabotaro Sebulon ma a piso anun a kabotaro Naptali, milau a kisapi ra i wan unago utasi, una papor danim Jordan utong,

der kis una papor Galili, ra a taro ra asur a taro Juda det kis iai.

<sup>16</sup>A taro ra det kis una dumirum det sa tama a labino talapor, ma det ra a dumirum na minat i pulus bat det, a talapor i sa wanpat torom det." *Ai-saia 9:1-2*

<sup>17</sup>Turpasi una kilalo ra, o Iesu i warawai lena, "Mot in nukpukus, uni a matanitu tagisapat una langit i sa milau."

*O Iesu i kabo pas a wat na mugano nat na ususer*

*(Mk 1:16-20; Lk 5:1-11)*

<sup>18</sup>Ara bung o Iesu i usal una usalin ina du tasi Galili, ra i tama pas o Saimon, di watungi kai nam o Pita, ma a tisino o Endru. Der woro a uben sa utasi, uni der aru tene woro uben. <sup>19</sup>I watungi tander lena, "Mur in mur iau, sur an ususer mur sur mur aru tene ben taro." <sup>20</sup>Uniutra, der katutur pas gusun anunder a kum uben, ma der muri.

<sup>21</sup>Ra i wan tagitiro, i tama pas o Jems ma o Jon dersino, aru nutnutun o Sebedi. Detul tamano kis taru una pot ma detul mabon anundetul a kum uben. Ra o Iesu i kabo der. <sup>22</sup>Uniutra, der katutur pas ma der wan gusun a pot ma a tamander, ra der mur o Iesu.

*O Iesu i ulangolango a kum misait*

*(Lk 6:17-19)*

<sup>23</sup>O Iesu i wan tuptupukus una papor Galili rop, ma i ususer a taro una nundet a kum rumu na lotu. I warawai nama Wakak na Wasiso una matanitu anun o God. Ma i ulangolango pas a taro gusun a kum wur ngas na misait. <sup>24</sup>Ma a wasiso un o Iesu i wan sarara una papor Siria rop. Ra det ben rop pas a taro ra a kum wur ngas na misait i banlaulau det, a taro ra a dekdek na ngunungut i banlaulau det, ma det ra a kum laulau na nion kura un det, det kai ra det ser mat lalang ma det ra a pinpinindet i mat. Ra o Iesu i ulangolango pas det rop. <sup>25</sup>Ma a labino kunur na taro taginin una papor Galili ma tagitiro una papor Dekapolis, ma tagisapat o Jerusalem, ma tagun a papor Judia ma tagitong una ara papor danim Jordan det mur o Iesu.

*O Iesu i warawai un osi det ra det dan*  
*(Lk 6:20-23)*

<sup>1</sup>O Iesu i tama pas a kunur na taro, ra i wan toto una tangai, ma i kis. Anun a taro

na ususer det wan toromi. <sup>2</sup>Ma i ususer det lena,

<sup>3</sup> “Det ra det tasmani lena det sibo una niondet, det dan, uni anundet a matanitu tagisapat una langit.

<sup>4</sup> Det ra a balandet i tangis nama tupunuk, det dan, uni o God in umarom det.

<sup>5</sup> Det ra det unatino pas det, det dan, uni det in los pas a rakrakon bual sur anundet.

<sup>6</sup> Det ra det murak ma det muruk sur a tokodos na petutna, det dan, uni numur det in masur.

<sup>7</sup> Det ra a kum tene marmaris, det dan, uni o God in maris det kai.

<sup>8</sup> Det ra a nuknukindet i talapor ma katu dur, det dan, uni det in tama o God.

<sup>9</sup> Det ra det ser umolmol a taro, det dan, uni o God in watung det a kum nutnutunu.

<sup>10</sup> Det ra di banlaulau det uni det mur a tokodos na petutna, det dan, uni anundet a matanitu tagisapat una langit.

<sup>11</sup> “Mot dan ra di watung laulau mot, ma di banlaulau mot, ma di watung a kum torotoro na wasiso un mot lena mot pam a kum sakino petutna, uni mot tagun iau.

<sup>12</sup> Mot in gas, uni i labo sakit anumot a ikul sapat una langit. Uni di sa banlaulau mugu a kum poropet ra det laun mugu tamot, lenkut kai ra di pami un mot.

*A wasiso elelar una sol ma a talapor (Mk 9:50; Lk 8:16; 14:34-35)*

<sup>13</sup> “Mot a sol una rakrakon bual rop. Ikut, ra a makasman ino i sa rop, din umakasman meleti mo pepetlai? Katu utna mo i gas uni. Din woro upirso ru i unago utamon, ma a taro det in papapas mukut netes uni.

<sup>14</sup> “Mot a talapor una rakrakon bual rop. Tu tamon ra i kis netes una tangai, ken parau lar pasi. <sup>15</sup> Katutaio in ungangon tar tu lam ra in wop bat tari nama paket. Awu! Din ubek tari ut netes una nuna turtur, sur in talapor torom det rop ra det kis una rumu. <sup>16</sup> Lenkai ra, anumot a talapor in upuaso i umatan a taro, sur det in tama anumot a kum wakak na pinapam, ma det in watung ulabo pas a Tamamot ra i kis sapat una langit.

*O Iesu i ususer a taro una kum Warkurai*

<sup>17</sup> “Gong mot nuki lena a wanpat sur an rakon ru a kum Warkurai anun o Moses ma a kum etowo anun a kum poropet, awu. Ka wanpat sur an rakon ru det, a wanpat sur an pam sot pas det. <sup>18</sup> A inanos mot nama lingmulus, katu nat na tumtumus lik o tu ukinalong lik tagun a kum Warkurai ri in rop, tuk ra a bakut ma a rakrakon bual der in rop. A kum Warkurai det in kis ut, tuk ra din pam sot pasi. <sup>19</sup> Osi ra in lakai tu nat na warkurai tagun a kum Warkurai ri, ma in ususer raro a taro sur det kai det in lakai i, din watungi lena, i natino doko una matanitu sapat una langit. Ikut osi ra in tarom una kum Warkurai ri, ma in ususer a taro uni, din watungi lena, i labo una matanitu sapat una langit. <sup>20</sup> Lenra, a watungi tamot, ra anumot a tokodos na petutna ken wakak taun a tokodos na petutna anun a kum tene ususer tagun a Warkurai ma a kum Parisi, mot in lagano ruk una matanitu sapat una langit.

*A wasiso una kankan*

<sup>21</sup> “Mot sa longoro tari ra numugu di sa watung tari tan a taro lena, ‘Gong u um doko taio. Osi ra in um doko taio din warkurai i.’ <sup>22</sup> Ikut iau, an watungi tamot lena, osi ra in kankan torom tu tisinolik, din warkurai i, ma osi ra in watungi un tu tisinolik lena, ‘Katin lorim,’ din warkurai i umatan a taro na kiwung. Ma osi ra in watungi un tu musano lena, ‘A longlong ui,’ kutiro a warkurai toromi, ra din woro i una labino sungun.

<sup>23</sup> “Ra un nan sur un pitar anum a etabor una kabulu na tuntun etabor, ma u nuk pas tu utna ra o tismilik i takun ui uni, <sup>24</sup> un ubek tar anum a etabor tiro nisan a kabulu na tuntun etabor. Un nan munung, ma mur in emarom mugu pas nam o tismilik. Numur un millet melet, ma un pitari maragom anum a etabor.

<sup>25</sup> “Ra taio in ubek tar ui una warkurai, mur in emarom mugu ra mur wan nanan utmakai una kisapi, sako in pitar tar ui torom a tene warkurai. Ra a tene warkurai in mulaot ru ui torom a tene tamtamabat ra in uruk tar ui una karabus. <sup>26</sup> A inanos ui nama lingmulus, kon pirso lar pas tuk ut ra un pitar rop ru a tintinip na toia ina num a kunukul.

*A wasiso una sakino ninunuk sur a ino*

<sup>27</sup> “Mot sa longoro tari ra di sa watung tari lena, ‘Gong u pam a sakino un tu ino

anun taio.’<sup>28</sup> Ikut iau, an watungi tamot lena, ra tu musano in tama tar tu ino ma a nuknukino i laulau toromi, una nuknukino, i sa pam tar a sakino petutna una ino ra.<sup>29</sup> Ra in nosot na matam in ben raro ui sur a sakino, liok ru i, ma un woro gisen ru i. In wakak ra ara du pinim kut din woro ru i, sur gong di woro a pinim rop una labino sungun.<sup>30</sup> Ra a sot na lamam in ben raro ui sur a sakino, kutus ru i, ma un woro gisen ru i. In wakak ra ara du pinim kut din woro ru i, sur gong di woro a pinim rop una labino sungun.

*A wasiso una kutus nolin*

<sup>31</sup> “Di sa watung tari kai lena, ‘Osi ra i lakro ru anun a ino, in pitar tari kai a dono buk na kutus nolin tano.’<sup>32</sup> Ikut iau, a watungi tamot lena, ra a ino ke pam a sakino nam tu musano, ma anun a musano i lu oros ru i kut, ma a ino i nolin melet, i pam a sakino. Ikut anun a musano, i kibino una sakino ra. Ra tu musano in nolin nam tu ino ra anun a musano i lu ru i, i kai i sa pam a sakino, uni a ino ra, i nolin ut.

*A wasiso una uliliman*

<sup>33</sup> “Mot sa longoro tari kai ra numugu di sa watung tari tan a taro lena, ‘Gong u liliman torotoro. A utna ra u sa liliman taru uni torom a Labino, un pam sot i ut.’<sup>34</sup> Ikut iau, a watungi tamot lena, gong mot udekdek a liliman nam tu ngas na wasiso kai. Gong mot liliman nama langit, uni a langit i a kiskis na king anun o God.<sup>35</sup> Gong mot liliman nama rakrakon bual, uni a rakrakon bual a nubual ra i ubek aru kikino uni. Gong mot liliman nam o Jerusalem, uni o Jerusalem a tamon anun a labino King.<sup>36</sup> Gong u liliman nam in lorim, uni kon pam pukus lar pas tin iwu na lorim sur in kabang, o in mirum.<sup>37</sup> Mot in watung kut lena ‘ma’ o ‘awu’. Uni, ra mot in watung tu ngas na wasiso melet, i ra i wanpat mukut gusun a Tene Sakino.

*Gong mot balu a sakino anun taio*  
(Lk 6:29-30)

<sup>38</sup> “Mot sa longoro tari ra di sa watung tari lena, ‘Ra taio in liok ru tin matan taio, din balu i kai toromi, din liok ru i kai tin matano. Ma ra taio in tubul pak ru tin lokon taio, din balu i kai toromi, din tubul pak ru i kai tin lokono.’<sup>39</sup> Ikut iau, an watungi tamot lena, gong mot balu a sakino anun taio ra i pami torom mot. Ra taio in pasor tar a papor sot na wam, un pukus ara papor

bulung toromi.<sup>40</sup> Ra taio i nemi sur in dat tar ui una warkurai ma din pitar a warkurai tam sur un pitar anum a siot tano, un pitar tari kai anum a saket.<sup>41</sup> Ra taio i ungongos pas ui, sur mur in nan tomo, sur tu tamon ra i milau kut, un nan tomo nami sur a tamon ra i kis bakbak lilik.<sup>42</sup> Un tabor taio ra i saring ui. Ma ra taio in saring ui sur in los pasi munung tu utna gusun ui, un pitari kut munung tano.

*A marmaris torom a kum ebar*  
(Lk 6:27-28, 32-36)

<sup>43</sup> “Mot sa longoro tari ra di sa watung tari lena, ‘Un nem a pasam, ma un nget anum a ebar.’<sup>44</sup> Ikut iau, an watungi tamot lena, mot in nem anumot a kum ebar, ma mot in wararing un det ra det banlaulau mot.<sup>45</sup> Ra mot in pami lenra in ese i lena mot a kum nutnutun a Tamamot, ra i kis sapat una langit. Uni i pitar tar a suan sur in talapor una kum tene sakino ma a kum wakak na taro kai, ma i pitar tar a bato torom a kum tene tokodos ma torom det kai ra ka det tokodos.<sup>46</sup> Ra mot nem det kut ra det nem mot, asau mo anumot a ikul? A kum tene los takis, ra ka det lason una marmaris det pampami kai lenra.<sup>47</sup> Ra mot gas pas a kum paspasamot kut, mot in wakak pepetlai taun ara taro? A taro kai ra ka det nurnur, det ser gas pas a kum paspasandet kut.<sup>48</sup> Ikut, mot in tokodos mulus, elar nama Tamamot ra i kis sapat una langit, i tokodos mulus.

6

*A ususer una etabor*

<sup>1</sup> “Mot in tumarong mot sur gong mot pam anumot a wakak na pinapam umatan a taro kut, sur det in tama i ma det in watung ulabo pas mot. Ra mot pami lenra, katu ikul anumot tan a Tamamot ra i kis sapat una langit.<sup>2</sup> Ra un tabor a kum sibo na taro, gong u wasiso mugu sur a taro det in tama ui. A taro ra ka det etabor nama lingmulus una balandet, det ser wasiso mugu nam anundet a etabor una kum rumu na lotu ma una kum kisapi kai, sur a taro det in watung ulabo pas det uni. Gong mot pami elar nam det. A inanos mot nama lingmulus, ra a taro det ulabo pas det, i ut ra anundet a kudulano ikul.<sup>3</sup> Ra un tabor a kum sibo na taro, gong taio i tasman a utna ra u pami, un pam eno i kut.<sup>4</sup> Ra u pami lenra, o Tamam

ra i tama a utna ra u pam eno i, in pitar a ikul tam.

*A etowo una niaring  
(Lk 11:2-4)*

<sup>5</sup> “Ra mot in wararing, gong mot elar nama kum tene torotoro. Det nem doko i sur det in tur ma det in wararing una kum rumu na lotu, ma una kum nubual ra a taro det wanan tomo iai, sur a taro det in tama det ma det in watung ulabo pas det. A inanos mot nama lingmulus, ra a taro det ulabo pas det, i ut ra anundet a kudulano ikul. <sup>6</sup>Ikut ui, ra un wararing, un ruk una num a rumu ma un tagar bat pas ui, ma un wararing torom o Tamam ra kataio i tama i. Ma o Tamam ra i tama a utna ra u pam eno i, in pitar anum a ikul.

<sup>7</sup> “Ra mot in wararing, gong anumot a wasiso i walos ma mot wasiso oros kut, elar nama kum niaring anum a taro ra det lotu torom a kum torotoro na god. Uni det nuki lena din longoro det ra det watung a susut na wasiso. <sup>8</sup>Gong mot elar nam det, uni a Tamamot i sa tasman tar asau rop ra mot sibo suri, ra ka mot wararing utmakai.

<sup>9</sup> “Mot in wararing lenri,  
“Tamamet sapat netes una langit,  
i wakak ra din ru a risam.

<sup>10</sup> I wakak ra anum a matanitu in nanpat.  
I wakak ra din mur anum a nemnem nin  
una rakrakon bual,  
elar nami ra di ser muri sapat netes una  
langit.

<sup>11</sup> A bung ri un tabor met nam amet a utna  
na inangon.

<sup>12</sup> Un unus ru anumet a kum sakino petutna,  
elar nam met dumano ru anundet a kum  
sakino petutna torom met.

<sup>13</sup> Gong u ben met una ululam.

Un ulaun met gusun a Tene Sakino.\*

<sup>14</sup> “Ra mot in dumano ru a kum sakino  
petutna ra a taro det pami torom mot,  
a Tamamot, ra i kis sapat una langit, in  
unus ru anumot a kum sakino petutna kai.

<sup>15</sup> Ikut, ra ka mot dumano ru a kum sakino  
petutna, ra a taro det pam tari torom mot,  
a Tamamot kai ken unus ru anumot a kum  
sakino petutna.

*A etowo una winewel*

<sup>16</sup> “Ra mot in wewel sur mot in wararing,  
gong mot tamtama tumtumul elar nama

kum tene torotoro, uni det tamtama tum-  
tumul sur a taro det in tama i lena det  
wewel. A inanos mot nama lingmulus, ra  
a taro det ulabo pas det lena det a kum tene  
lotu mulus, i ut ra anundet a kudulano ikul.  
<sup>17</sup> Ra un wewel, un kom in lorim, ma un gos  
in masarim, <sup>18</sup> sur gong a taro det tasmani  
lena u wewel. O Tamam kut, ra kataio i  
tama i, in tasmani. Ma o Tamam ra i tama a  
utna ra u pam eno i, in pitar anum a ikul.

*A kum wakak na utna sapat una langit  
(Lk 12:33-34)*

<sup>19</sup> “Gong mot ubek tomo a kum wakak  
na ululeng nin upiso, uni a koropos ma a  
moroto der in banlaulau ru det kut, ma  
a kum tene wolong kai det in rege pas  
anumot a kum rumu ma det in los a kum  
ututna. <sup>20</sup> Mot in mur a kum tokodos na  
petutna sur in elar nama wakak na ululeng  
sapat una langit, uni a koropos ma a moroto  
ka der in banlaulau i, ma a kum tene wolong  
kai ka det in wolong lar pasi. <sup>21</sup> Uni anum a  
nilaun in kis una nubual ra anum a wakak  
na ululeng i kis iai.

*A lam tagun a pinindat  
(Lk 11:34-36)*

<sup>22</sup> “Arin matandat der elar nama lam una  
pinindat. Ra arin matam der wakak, a  
pinim rop in buku nama talapor. <sup>23</sup> Ikut,  
ra arin matam der laulau, a pinim rop in  
buku nama dumirum. Ra anum a talapor  
i dumirum kut, a dumirum ra in labo sakit!

*Gong mot nuknuk doko sur tu utna  
(Lk 16:13; 12:22-31)*

<sup>24</sup> “Katutaio in pet lar pasi sur in papam  
torom lako ru mugumugu. In nget ara  
pasander, ma in nem ara pasander, in nem  
doko ara, ma in rosumur gusun ara. Ka mot  
in papam lar pas torom o God ma torom a  
mani kai.

<sup>25</sup> “Iri a kibino ra a watungi tamot lena,  
gong mot nuknuk doko una numot a nilaun  
sur asau mot in nani, ma asau mot in inumi.  
Ma gong mot nuknuk doko una pinimot kai  
sur asau mot in emar nami. A nilaun i labo  
taun a utna na inangon, niko? Ma a pinindi  
kai i labo taun in namalu, niko? <sup>26</sup> Mot in  
tama a kum piko. Ka det marut tu utna, ma  
ka det pasong tomo lako utna, ma ka det  
umubek tomo un tu rumu, ikut a Tamamot  
ra i kis sapat una langit, i ser tabor det. Ma

\* <sup>6:13</sup>: A ramano kum tene mananos una Buk Tabu det nuki lena a ramano kum wasiso kai i kis una rino ri. I lenri:  
*Uni anumi kut a matanitu ma a dekdek ma a minamar, ma ken rop. Amen.*

mot, mot labo doko tandet. <sup>27</sup>Osi tamot ra i nuknuk doko una nun a nilaun, in pet lari sur in tugus walos lilik anuna nilaun? Awu!

<sup>28</sup>“Ilai ra mot nuknuk doko sur a mal-malu? Mot in tama a kum purpur tagisa ubual, ra det lubang pepetlai. Ka det ser papam ma ka det ser pam malu. <sup>29</sup>Ikut a watungi tamot, a ememar rop anun o King Solomon ut i tamtama wakak bing, ikut ke tamtama wakak elar nama kum purpur ra. <sup>30</sup>O God i mar a kum wuliso sa ubual nama kum wakak na purpurindet, ra i puspup uniri, ra markan din tun ru i una sungun. Ra i pami lenra una kum wuliso, pepetlai, ken mar mot kai? Anumot a nurnur i natino doko. <sup>31</sup>Gong mot nuknuk doko ma mot watungi lena, ‘Asau ra dat in nani?’, o ‘Asau ra dat in inumi?’, o ‘Asau ra dat in emar nami?’ <sup>32</sup>Uni a taro ra ka det nurnur det nemnem doko sur a kum utna rop ri, ikut a Tamamot ra i kis sapat una langit i tasmani lena mot sibo sur a kum utna rop ri. <sup>33</sup>Mot in nuknuk mugu sur anun a matanitu ma anun a tokodos na petutna, ra in tabor mot kai nama kum utna rop ri. <sup>34</sup>Ra gong mot nuknuk doko sur a bung markan, uni markan in nuknuk ut suri. A ninunuk sur ara bung taktakai i to pasi ut a bung ra.

## 7

*Gong mot takun taio*  
(Lk 6:37-38, 41-42)

<sup>1</sup>“Gong mot takun tar taio, sur gong kai o God i takun tar mot. <sup>2</sup>Uni a warkurai ra mot takun taio nami, i ut ra o God in takun mot melet nami. Asi na ngas na warkurai ra mot takun taio nami, ra i tokodos o ke tokodos, i ut ra o God kai in takun mot melet nami. <sup>3</sup>Ilai ra u tama pasi kut a burbururup kura un in matan o tisim, ikut ko nuk pas a nuduwai pi kura ut un in matam? <sup>4</sup>Ra a nuduwai pi kura kut un in matam, un watung petlani torom o tisim lena, ‘An rakon ru a burbururup gusun in matam?’ <sup>5</sup>Ui a tene torotoro, un los mugu ru a nuduwai pi gusun in matam, ra un tamtama wakak, sur un rakon ru a burbururup gusun in matan o tisim.

<sup>6</sup>“Gong mot tabor a kum pap nama utna anun o God, sako det in tupukus ma det in karot ginogino mot. Ma gong mot woro anumot a dusaro tan a kum boro, sako det in pas ginogino i kut nama kum kikindet.

*Mot in sasaring ma o God in tabor mot*  
(Lk 11:9-13)

<sup>7</sup>“Mot in sasaring, ra din tabor mot, mot in sisio, ra mot in sio pasi, mot in pinpidik, ra din papos pas mot. <sup>8</sup>Uni det rop ra det sasaring din tabor det, ma osi ra i sisio in sio pasi, ma osi kai ra i pinpidik, din papos pasi.

<sup>9</sup>Osi na pasamot, ra a nutunulik in saringi sur tu beret, in tabori kut nama wat? <sup>10</sup>Ma ra in saringi kai sur tin kiripo, in tabori kut nam in nusui? <sup>11</sup>Mot a laulau na taro, ikut mot tasmani ut a kum wakak na etabor sur mot in tabor a kum nutnutumot nami. Ra mot ser pami lenra, i lingmulus sakit lena, osi ra in saring a Tamamot ra i kis sapat una langit, in tabori ut nama kum wakak na utna. <sup>12</sup>A kibin a wasiso na Warkurai anun o Moses, ma a kum etowo anun a kum poropet i lenri: A kum utna rop ra mot nemi sur a taro det in pami torom mot, mot kai, mot in ser pami torom det.

*A kisapi sur a nilaun ma a kisapi sur a iniru tukum*  
(Lk 13:24)

<sup>13</sup>“Mot in ruk una nat na matansako lik. Uni a matansako ma a kisapi ra i wan sur a iniru tukum, i perere ma i langolango, ma a susut na taro doko det ser ruk uni. <sup>14</sup>Ikut a matansako ma a kisapi ra i wan sur a nilaun, i natino, ma a pak na taro kut det ser sio pasi.

*In nanai ma a wino*  
(Lk 6:43-44)

<sup>15</sup>“Mot in tumarong mot gusun a kum torotoro na poropet. Det ser wan torom mot nama wakak na magirandet elar nama kum sipsip, ikut tiro ubalandet, det nem na banlaulau mot elar nama kum ngalngalia na pap. <sup>16</sup>Mot in tama lele a kum torotoro na poropet tagun a windet ut. Pepetlai, din git pas in niwino wain tagun in kandas, ma in niwino fig tagun in suksuk? Awu, ken elar! <sup>17</sup>Lenkutkai ra a kum wakak na duwai rop det ser wu a wakak na windet, ikut in laulau na duwai i ser wu a kum laulau na wino. <sup>18</sup>In wakak na duwai ken wu lako laulau na wino, ma in laulau na duwai kai ken wu lako wakak na wino. <sup>19</sup>A kum duwai rop ra ka det wu a wakak na windet, din tau ru det, ma din woro tar det una sungun. <sup>20</sup>Ra mot in tama lele a kum torotoro na poropet tagun a windet ut.

*A Labino in ipul lena, "Ka tasman mot"*  
(Lk 13:25-27)

<sup>21</sup> "Det ra det watung iau lena, 'Labino, Labino,' ausur det rop det in ruk una matanitu sapat una langit. Det sot kut, ra det ser mur a nemnem anun o Tita, ra i kis sapat una langit, det in ruk una nun a matanitu. <sup>22</sup> Una bung na warkurai a susut det in watungi tang lena, 'Labino, Labino, met wasiso na poropet nama risam, ma met lakro ru a kum laulau na nion kai nama risam, ma met pam a susut na utna na ukisin nama risam.' <sup>23</sup> An balu det lena, 'Ka tasman mot. Mot a kum tene sakino, mot in nan gisen gusun iau.'

*Aru tene pam rumu*  
(Lk 6:47-49)

<sup>24</sup> "Det rop ra det longoro anung a kum wasiso ri, ma det muri, det elar nama tene mananos, ra i pam tar anun a rumu netes una wat. <sup>25</sup> A bato i puku, ra a lomom i wanpat, ma a wuwu i ragoti ra i um a rumu ra, ikut ke toropo lar pas, uni di utur tari netes una wat. <sup>26</sup> Det rop ra det longoro anung a kum wasiso ri, ikut ka det muri, det elar nama longlong, ra i utur tar anun a rumu netes kut una woio, ma ke por dekdek a kum pos. <sup>27</sup> A bato i puku, ra a lomom i wanpat, ma a wuwu i ragoti ra i um a rumu ra, i toropo, ma i terege mut."

<sup>28</sup> Ra o Iesu i sa watung rop tar a kum wasiso ri, a kunur na taro det kisin una nuna kum etowo, <sup>29</sup> uni i ususer det elar nam ara, ra a warkurai kura ut tano. Ke ususer det elar nam anundet a kum tene ususer tagun a Warkurai.

## 8

*O Iesu i ulangolango pas a lepra*  
(Mk 1:40-45; Lk 5:12-16)

<sup>1</sup> Ra o Iesu i wan pirso tagisapat una tangai, a susut na taro det muri. <sup>2</sup> Ara musano, i misait nama lepra, i wan toromi, i kis butkeke nisano, ma i watungi lena, "Labino, ke ngangitin torom ui. Ra u nemi, un ulangolango pas iau." <sup>3</sup> O Iesu i kodos a lamano, ma i pam a pinino, ra i watungi tano lena, "A nemi ut, un langolango." Uniutra a lepra i rop gusuni. <sup>4</sup> Ra o Iesu i watungi tano lena, "Gong u inanos tar taio nami. Un nan ma un ese mugu tar ui torom a tene etabor torom o God, ma un pitar a etabor torom o God elar nami ra o Moses i

sa watung tari. Ra un pami lenra, a taro det in tasmani lena u sa langolango."

*A nurnur anun a mugumugu anun a kum tene inaim*  
(Lk 7:1-10)

<sup>5</sup> Ra o Iesu i sa wanpat tong o Kapernaum, ara mugumugu anun a kum tene inaim tagitong o Rom i wan toromi, ra i inansi sur in waruti. <sup>6</sup> I watungi lena, "Labino, ara tultul anung kurong ut una rumu i inep, a pinino rop i mat, ma i taramo a dekdek na ngunungut doko." <sup>7</sup> O Iesu i watungi tano lena, "An nan ma an ulangolango pasi." <sup>8</sup> A mugumugu ra i balu i lena, "Labino, ka tokodos sur un ruk una nung a rumu. Un watung tu wasiso kut, ra anung a tultul in langolango. <sup>9</sup> Uni iau a musano ra a ser tarom una warkurai anundet ra det labo tang, ma di pitar tar a warkurai kai tang sur a taro na inaim. Ra an watungi tan taio lena, 'Un nan,' in nan kut. Ma torom taio kai lenri, 'Un nan urin,' in nan kut urin. Ma torom anung a tultul lena, 'Un pam a utna ri,' in pami kut."

<sup>10</sup> O Iesu i longoro anun a wasiso, ra i kisin doko uni, ma i watungi torom a taro ra det muri lena, "A inanos mot nama lingmulus, ka tama tar tu te Israel ra anun a nurnur i labo elar nama musano ri. <sup>11</sup> A watungi tamot lena kura numugu a susut na taro det in nan tagitiro na matmatano tobar ma a matmatano lubur, ra det in kis tomo nam o Abaram, o Aisak ma o Jekop una lukaro una matanitu sapat una langit. <sup>12</sup> Iikut, a taro Israel ra numugu o God i pilok pas det sur det in kis una nuna matanitu, in lu pirso ru a susut gusun det utiro una dumirum. Ra det in tangtangis ma det in ungingit lokondet iai." <sup>13</sup> Ra o Iesu i watungi tan a mugumugu anun a kum tene inaim lena, "Un nan kut. Din pam a utna ut ra u nurnur suri." Una du bung ut ra anuna tultul i langolango mut.

*O Iesu i ulangolango pas a susut na misait*  
(Mk 1:29-34; Lk 4:38-41)

<sup>14</sup> O Iesu i ruk una rumu anun o Pita, ra i tama a ino, a inumun o Pita, i misait nama pino mararong, kura i inep una kabulu. <sup>15</sup> O Iesu i pam a lamano, ra a mararong i rop mut gusuni. A ino ra i katutur, ra numur i tabor o Iesu mo nama utna na inangon.

<sup>16</sup> Ra in matanas i sa sup taru, di ben pat a susut na taro torom o Iesu ra a kum laulau

na nion kura un det. I lakro ru a kum laulau na nion nama wasiso kut, ma i ulangolango pas det rop, ra det misait. <sup>17</sup> A utna ri i wanpat sur din pam sot pas a kum wasiso, ra a poropet Aisaia i sa wasiso taru uni lenri, "I ut i los pas anundat a kum misait,

ma i rakon ru anundat a kum ngunungut." *Aisaia*  
53:4

*Det ra det nem na mur o Iesu*  
(Lk 9:57-62)

<sup>18</sup> Ra o Iesu i tama a kunur na taro ra det tur talilis pasi, i watungi tan anun a kum nat na ususer lena, "Dat nan utong una ara papor tasi." <sup>19</sup> Ma ara tene ususer tagun a Warkurai i wan toromi, ra i watungi tano lena, "Tene Ususer, an mur ui una kum nubual rop ra un nan iai." <sup>20</sup> Ra o Iesu i watungi tano lena, "A kum lomlom na pap anundat a kum tung ut, ma a kum piko kai anundat a kum pios ut, ikut a Nutun a Musano katu rumu na ininep." <sup>21</sup> Ma ara musano kai, tagun anun a taro na ususer i watungi tano lena, "Labino, un mulaot ru iau munung sur an nan, sur an por ru tar o tita." <sup>22</sup> Ikut o Iesu i watungi tano, "Un mur iau, ma un madek ru a kum minat det in por anundat a kum minat."

*O Iesu i turbat a wuwu ma a top*  
(Mk 4:35-41; Lk 8:22-25)

<sup>23</sup> Ra o Iesu i kas una pot, anuna kum nat na ususer det kas numurunu. <sup>24</sup> Numur a dekdek na wuwu doko i wanpat kisin ma i ragoti una du tasi. A top i tapak sapat netes una pot. Ikut o Iesu i inep dumun, <sup>25</sup> ra det wan toromi, det wangun pasi, ma det inanos lena, "Labino, un ulaun dat. Dat na iru." <sup>26</sup> Ma i watungi tandet lena, "Anumot a nurnur i natino doko. Sur asau ra mot ngara?" I katutur ra i turbat a wuwu ma a top, ra i mililo rop. <sup>27</sup> Ra a kum nat na ususer det kisin uni, ma det watungi lena, "Osi na ngas na musano mulus ri? A wuwu ma a top der mur anun a wasiso!"

*O Iesu i lakro ru a kum laulau na nion gusun aru musano*  
(Mk 5:1-20; Lk 8:26-39)

<sup>28</sup> O Iesu i sot una ara papor tasi, una papor anun a taro Gadara. Aru musano ra a kum laulau na nion kura un der, der wan gusun a kum kulam na minat, ra der wan barato i. Der ngalngalia doko, ma kataiao i ser wan sakit tiro una kisapi ra. <sup>29</sup> Der woiwoi lena, "Nutun o God, asau ra u nem

na pami un mir? Pepetlai, u wan urin sur un ukadik met? Ke sot utmakai a bung na warkurai." <sup>30</sup> A kabo liur na boro det wangon milau kut tiro iai. <sup>31</sup> Ra a kum laulau na nion det saring o Iesu lena, "Ra un lakro ru met, un tulu ruk tar met utiro una kum boro." <sup>32</sup> O Iesu i watungi tandet lena, "Mot nan!" Ra a kum laulau na nion det pirso gusun aru musano ra, ma det ruk taru una kum boro. A kum boro det kalabor pirso una palis sur a du tasi, ra det kongo rop.

<sup>33</sup> A taro ra det ser tabor a kabo liur na boro ra, det kalabor tupukus melet sur anundat a tamon. Ra det wanpat, det inanos una kum utna rop ra i wanpat, ma un der kai, ra a kum laulau na nion numugu kura un der. <sup>34</sup> A taro rop tagun a tamon ra, det wan sur det in tama o Iesu. Ra det tama pasi, det saring sur in nan gisen gusun anundat a papor.

## 9

*O Iesu i ulangolango pas a musano ra a pinino i mat*

(Mk 2:1-12; Lk 5:17-26)

<sup>1</sup> O Iesu i kas una pot, ra i wan kutus utiro una ara papor du tasi sur anuna tamon. <sup>2</sup> Ra a ramano kum musano det los pat ara musano toromi, a pinino i mat, ma i inep taru kut una lu. O Iesu i tama anundat a nurnur, ra i inanos a musano ra lena, "Nuntunglik, gong u ngara, di sa unus ru anum a kum sakino petutna." <sup>3</sup> A ramano kum tene ususer tagun a Warkurai det wasiso etalai torom det ut lena, "A musano ri i watung laulau o God, uni i elaro i nami."

<sup>4</sup> Ma o Iesu i tasman a nuknukindet, ra i ting det lena, "Sur asau ra mot nuknuk laulau?" <sup>5</sup> Asi na wasiso ra an watungi, sur an ese a dekdeking nami torom mot? Pepetlai, an watungi lena, 'Di sa unus ru anum a kum sakino petutna,' o, an lena, 'An katutur, ma un nan?' <sup>6</sup> A wasiso ra an watungi, an watungi sur mot in tasmani lena, o God i pitar a warkurai torom a Nutun a Musano, sur in unus ru a kum sakino petutna nin upiso." Ra i watungi torom a musano a pinino i mat lena, "Un katutur, un los anum a lu, ra un nan sur anum a rumu." <sup>7</sup> I katutur mut, ra i wan sur anum a rumu. <sup>8</sup> A kunur na taro det tama i, ra det kisin doko uni, ma det rakon lekeleke pas o God, uni i pitar a dekdek lenri torom a taro.

*O Iesu i kabo pas o Mati u  
(Mk 2:13-17; Lk 5:27-32)*

<sup>9</sup> O Iesu i wan tagitiro iai, ra i tama pas ara musano, a risano o Mati u, i kis una rumu na los takis. O Iesu i inanosi lena, “Un mur iau.” Ra o Mati u i katutur ma i muri.

<sup>10</sup> Numur o Iesu ma anun a kum nat na ususer, det wangon tiro una rumu anun o Mati u. A susut na tene los takis ma a kum tene sakino det wan torom o Iesu, ra det wangon tomo nam det. <sup>11</sup> Ra a kum Parisi det tama i, det ting anuna kum nat na ususer lena, “Sur asau ra anumot a tene ususer i wangon tomo nama kum tene los takis ma a kum tene sakino?”

<sup>12</sup> O Iesu i longoro i ra i watungi lena, “A dokta ke wanpat sur det ra det langolango. Awu! I wanpat sur det kut ra det misait. <sup>13</sup> Mot in nan, ma mot in ususer sur mot in tasman a kukuraina wasiso ri tagun a Buk Tabu, ‘A nem a marmaris, ma ka nem a etabor ra di ser tuni.’ *Os 6:6* Uni ka wanpat sur an kabo pas a kum tene tokodos, awu. A wanpat sur an kabo pas a kum tene sakino.”

*A iting una winewel  
(Mk 2:18-22; Lk 5:33-39)*

<sup>14</sup> A kum nat na ususer anun o Jon det wan torom o Iesu, ra det tingi lena, “Sur asau ra met ma a kum Parisi met wewel, ikut anum a kum nat na ususer awu?” <sup>15</sup> O Iesu i balu det lena, “A kum paspasan a musano ra i nolin matok, det in domos pepetlai, ra kura utmakai i tomo nam det? Ikut tu bung in nanpat, ra din ben ru i gusun det, ra det in wewel maragom.

<sup>16</sup> “Katutaio in mabon a du matok na malu tomo nama turai ino ra i tararos, uni a du matok na malu in raros a turai na malu, ra in tararos bing. <sup>17</sup> Kataio in titior a matok na wain utiro un in turai na koto ra di pami nam in pino meme, sako in nokoto in tupurus ma in laulau, ra a wain in tilingis. Din titior a matok na wain ut utiro un in matok na koto na wain, sur der rop der in kis wakak.”

*O Iesu i ulaun pas a ino lik, ma i ulangolango pas ara ino  
(Mk 5:21-43; Lk 8:40-56)*

<sup>18</sup> Ra o Iesu i wasiso utmakai torom det, ara mugumugu i wan toromi, ra i kis butkeke sa numugu tano, ra i watungi lena, “A nutunglik a ino, unikutri i mat. Aiap, dar in nan ma un ubek a lamam sapat netes

uni, sur in laun.” <sup>19</sup> Ra o Iesu i katutur ra der wan, det tomo nam anun a kum nat na ususer.

<sup>20-21</sup> Ara ino ra i misait nama gap elar nama noino ma aru kilalo i nuki lena, “Ra an tuki kut anun a saket, an langolango.” Ra i wan numur tan o Iesu, ma i tulana tar a sinisir na saket anunu. <sup>22</sup> O Iesu i tur tupukus ra i tama a ino ra, ra i watungi tano lena, “Nutunglik, gongu ngara, anum a nurnur i sa ulangolango pas ui.” Ra una du bung ut ra a ino ra i langolango mut.

<sup>23</sup> O Iesu i wanpat una rumu anun a mugumugu, ra i tama a taro ra det ese anundet a tupunuk una minat. Det wup a kum tulal, ma a susut na taro kai det domos. <sup>24</sup> I watungi tandet lena, “Mot in pirso saro i. A ino lik ri ausur i mat, i inep dumun kut.” Ra det urongon kut uni. <sup>25</sup> Ra o Iesu i sa tulu pirso ru a taro, i ruk ra i pam a laman a ino lik, ra i katutur mut. <sup>26</sup> A wasiso una utna ri i wan sarara una papor rop ra.

*O Iesu i utamtama pas aru pulu*

<sup>27</sup> O Iesu i wan tagitiro, ra aru musano, aru pulu, der muri, der kakabo sapat lena, “Nutun o Dewid, un maris mir.” <sup>28</sup> Ra i ruk una rumu, aru pulu der wan toromi, ma i ting der lena, “Pepetlai, mur nurnur ut un iau sur an pam sot pas a utna ri?” Der balu i lena, “Ma, Labino.” <sup>29</sup> Ra i pam arin matander ma i watungi lena, “Din pami torom mur elar nami, ra mur nurnur suri.” <sup>30</sup> Uniutra der tamtama. Ra o Iesu i sabbat dekdek tar der lena, “Gong mur inanos tar taio nami.” <sup>31</sup> Ikut, der wan ra der inanos nanan nam o Iesu una papor rop ra.

*O Iesu i lakro ru a laulau na nion gusun ara ngat*

<sup>32</sup> Ra aru pulu der wan nanan utmakai gusun o Iesu, di ben tar ara musano bulung toromi, i ngat, ma a laulau na nion kura uni. <sup>33</sup> O Iesu i lakro ru a laulau na nion gusuni, ra a musano ra i wasiso maragom. Ma a kunur na taro det kisin, ra det watungi lena, “Telek ri di tama a utna lenri nin o Israel.” <sup>34</sup> Ikut a kum Parisi det watungi lena, “I ser lakro ru a kum laulau na nion nama dekdek ina labino anun a kum laulau na nion.”

*A kum tene pasong ka det susut*

<sup>35</sup> O Iesu i wan una kum lamlabino tamon ma a kum natnat na tamon rop. Ra i ususer a taro una nundet a kum rumu na lotu, ma i warawai nama Wakak na Wasiso una matanitu anun o God, ma i ulangolango pas

a taro gusun a kum wur ngas na misait. <sup>36</sup>Ra i tama a kunur na taro, i maris doko det, uni i talara a nuknukindet, ma det pot na marmaris, elar kut nama kum sipsip ra katu tene tamtabat anundet. <sup>37</sup>Ra i watungi tan anun a kum nat na ususer lena, “A kinobot i sa makus, ma i sa labo doko, ikut kalako susut na kum tene pasong. <sup>38</sup>Mot in saring a Labino, i ra a taman a kinobot, sur in tulu ru a kum tene pasong sur ana kinobot.”

## 10

*A noino ma aru nat na ususer anun o Iesu (Mk 3:13-19; Lk 6:12-16)*

<sup>1</sup> O Iesu i kabo pas anun a noino ma aru nat na ususer ra i pitar a dekdek tandet sur det in lakro ru a kum laulau na nion, ma sur det in ulangolango pas a taro gusun a wur ngas na misait.

<sup>2</sup> Iri a kum risan a noino ma aru aposel: A mugano, o Saimon ara risano kai ra o Pita, dersino nam o Endru, o Jems ma o Jon der sino, aru nutnutun o Sebedi, <sup>3</sup> o Pilip, o Batolomiu, o Tomas, o Matiu a tene los takis, o Jems a nutun o Alpius, ma o Tadius, <sup>4</sup> ma o Saimon ara tagun a taro Silot, \* ma o Judas Iskariot, i ra i usobar tar o Iesu.

*O Iesu i tulu ru a noino ma aru nat na ususer*

*(Mk 6:7-13; Lk 9:1-6)*

<sup>5</sup> O Iesu i tulu ru a noino ma aru nat na ususer, ra i watungi tandet lena, “Gong mot wan torom a taro ra ausur a taro Israel, ma gong mot wan una kum tamon anun a kum te Samaria. <sup>6</sup> Mot in nan kut torom a taro Israel, ra det raro elar nama kum sipsip. <sup>7</sup> Ra mot nan, mot in warawai nanan lenri, ‘A matanitu tagisapat una langit i sa milau.’ <sup>8</sup> Mot in ulangolango pas a kum misait, ma mot in ulanun pas a kum minat, mot in ulangolango pas a kum lepra, ma mot in lakro ru a kum laulau na nion. Di tabor oros mot kut, lenkai ra, mot in etabor oros kut. <sup>9</sup> Gong mot silapo tu mani una numot a kum malu. <sup>10</sup> Gong mot los tu rat una numot a inawan, gong tin namalu na kelkeles, gong tu su, ma gong tin nubuku. Uni i tokodos sur din tabor a tene pinapam nama ana utna.

\* 10:4: Silot i a risan a taro, ra det tur tomo, uni det nemi sur det in lakro ru a gapman Rom. † 10:14: A petutna ra di tang ru a kubus gusun a kikindi, i a utumarong torom det, ra ka det nurnur una wasiso anun o God, det in tur una nun a warkurai.

<sup>11</sup> “Ra mot in nan una kum lamlabino tamon, ma a kum natnat na tamon, mot in sisio sur taio ra i wakak, ma mot in kis nisano tuk una bung ra mot in nan gusun a tamon ra. <sup>12</sup> Ra mot in nanpat tiro un tu rumu, mot in wasiso na ugasgas pas det. <sup>13</sup> Ra a taro tagun a rumu ra det in gas pas mot, mot in ruk ma mot in watungi lena, ‘A malmal in kis torom mot.’ Ikut ra ka det in gas pas mot, anumot a malmal mot in los melet pasi. <sup>14</sup> Ra taio ke gas pas mot, ma ke longoro anumot a wasiso, ra mot in nan gusun anun a rumu, o a tamon ra, mot in tang ru a kubus gusun a kikimot.† <sup>15</sup> A inanos mot nama lingmulus, una bung na warkurai, a warkurai torom o Sodom ma o Gomora in dekdek, ikut torom a tamon ra, in laulau doko.

*A kum ngas na ngunungut ra in nanpat (Mk 13:9-13; Lk 21:12-17)*

<sup>16</sup> “Tama i, a tulu ru mot elar nama kum sipsip epotor tan a kum ngalngalia na pap. Mot in mananos wakak elar nama kum sui, sur gong taio i ben raro mot, ma mot in tokodos elar nama kum tabun, sur gong taio i takun mot. <sup>17</sup> Mot in tumarong mot, uni a taro det in pitar mot ulaman a kum tene warkurai, ma det in miras mot una nundet a kum rumu na lotu. <sup>18</sup> Ma din dat pas mot sur a warkurai usa numugu umatan a kum lamlabino mugumugu ma a kum king, uni mot anungi. Mot in wasiso talapor un iau torom det ma torom a taro ra ausur a taro Juda. <sup>19</sup> Ra din dat pas mot, gong mot nuknuk bing sur asau mot in watungi, ma mot in wasiso pepetlai, uni una du bung ut ra, o God in unuk tar mot nama wasiso ra mot in watungi. <sup>20</sup> Ausur mot ra mot in wasiso, a Nion a Tamamot ut in unuk tar mot nam asau ra mot in watungi.

<sup>21</sup> “Taio in mulaot ru tu tisino sur din um doko i, ma tu musano in mulaot ru tu nutunu sur din um doko i. Ma a kum nat det in tur na inaim torom a tamandet ma a nandet ma det in mulaot ru a tamandet ma a nandet sur din um doko der. <sup>22</sup> Ma a taro rop det in nget mot uni mot anungi, ikut osi ra in tur dekdek tuk anun a nilaun in rop, o God in ulauni. <sup>23</sup> Ra det in banlaulau mot un tu tamon, mot in kalabor utiro un tu tamon

gisen. A inanos mot nama lingmulus, ra ka mot in nan rop utmakai utiro una kum tamtamon nin o Israel, a Nutun a Musano in nanpat.

<sup>24</sup> “A nat na ususer ke labo taun anun a tene ususer, ma a tultul kai ke labo taun anun a labino. <sup>25</sup> I to pasi sur a nat na ususer in elar kut nam anun a tene ususer ma a tultul in elar nam anun a labino. Ra di sa watung iau nam o Belsebul,<sup>‡</sup> mot kai ra mot kis tomo nam iau, din watung mot nama kum rising i sakino taun a rising ra.

*Mot in ngara sur o God kut*

*(Lk 12:2-7)*

<sup>26</sup> “Gong mot ngaran a taro. A kum utna rop ra di munu tari, numur in kis taltalapor, ma a kum utna rop ra i kis eno, numur in nanpat pupuaso. <sup>27</sup> A wasiso ra a inanos mot nami una dumirum, mot in inanos nami una waspi, ma a wasiso ra di wasisik kut nami torom mot, mot in tur sapat netes una rumu, ma mot in watung puaso i. <sup>28</sup> Gong mot ngaran det ra det um doko i kut a pinindi, ikut ka det in um doko lar pas a niondi. Mot in ngara sur o naro ra in pet lar pasi sur in banlaulau a pinindi ma a niondi kai una labino sungun. <sup>29</sup> Di ser kul arin nipiko liklik nama nat na mani kut, niko? Ikut ka tino lik tagun der in iru, ra a Tamamot ke mulaot uni. <sup>30</sup> I lingmulus sakit, o God i sa luk rop tar a kum tekteken iwu na lorimot, ma i sa tasman tari. <sup>31</sup> Ra gong mot ngara, uni mot labo sakit umatan o God, taun a susut na piko.

*Osi ra i watung puaso o Iesu ma osi ra i ipul ru i*

*(Lk 12:8-9)*

<sup>32</sup> “Osi ra in watung puaso i umatan a taro lena, i tagun iau, iau kai an watung puaso i umatan o Tita ra i kis sapat una langit lena, i tagun iau. <sup>33</sup> Ikut osi ra in ipul ru iau umatan a taro, iau kai an ipul ru i umatan o Tita, ra i kis sapat una langit.

*O Iesu ke wanpat sur in pitar a molmol*

*(Lk 12:51-53; 14:26-27)*

<sup>34</sup> “Gong mot nuki lena a wanpat sur an pitar a malmal una rakrakon bual. Awu, ka wanpat sur an pitar a malmal, a wanpat nama totok na inaim. <sup>35</sup> A wanpat sur a taro det in kis na inaim, kibino un iau.

‘A nat musano in nget o tamano, ma a nat na ino in nget o nano,

ma a nolin na ino in nget o tubunu.

<sup>36</sup> Det tamano det in ebar etetalai tomo nam det.” *Maika 7:6*

<sup>37</sup> “Osi ra i nem doko o tamano ma o nano, ikut anun a marmaris torom iau ke labo, ke to pasi sur i anung a nat na ususer. In wakak ra anun a marmaris torom iau in labo taun anun a marmaris torom o tamano ma o nano. Ma osi ra i nem doko o nutunulik, a nat na musano o a ino, ikut anun a marmaris torom iau ke labo, ke to pasi sur i anung a nat na ususer. In wakak ra anun a marmaris torom iau in labo taun anun a marmaris torom o nutunulik. <sup>38</sup> Osi ra ke rakon pas anun in nanai kutus sur in mur iau, ke to pasi sur i anung a nat na ususer. <sup>39</sup> Osi ra i maris bat anun a nilaun, in iru, ma osi ra ke maris bat anun a nilaun uni i mur iau, in laun.

*Osi ra in gas pas tu nat na ususer anun o Iesu in los a ikul*

*(Mk 9:41)*

<sup>40</sup> “Osi ra in gas pas mot, i gas pas iau utkai, ma osi ra i gas pas iau, i gas pasi utkai o naro ra i tulu ru iau urin. <sup>41</sup> Osi ra in gas pas a poropet uni i tasmani lena, i a poropet, in losi utkai a ngas na ikul elar nama poropet in losi. Ma osi ra in gas pas a tene tokodos, uni i tasmani lena, i a tene tokodos, in losi utkai a ngas na ikul elar nama tene tokodos in losi. <sup>42</sup> Osi ra in tabor anung tu nat na ususer, ra ke sot umatan a taro, nam lakalik kotokoto na danim, uni i tasmani lena, i anung a nat na ususer, a inanos mot nama lingmulus, i kai in losi ut anun a ikul.”

## 11

*O Iesu ma o Jon a Tene Baptaiso*

*(Lk 7:18-35)*

<sup>1</sup> Ra o Iesu i sa wasiso rop taru torom anun a noino ma aru nat na ususer, i wan tagitiro sur in ususer a taro ma in warawai una kum tamon, tong una papor Galili. <sup>2</sup> O Jon i kis una karabus ma i longoro a kum pinapam anun o Karisito. Ra i tulu ru anun a kum nat na ususer sur det in tingi lena, <sup>3</sup> “Ui mo, ra di wasiso mugu taru un ui lena, un nanpat, o met in kis langlang utmakai sur taio?”

<sup>4</sup> Ra o Iesu i balu det lena, “Mot in milet melet, ma mot in inanos o Jon una asau ri mot sa longoro i ma mot sa tama tari: <sup>5</sup> A kum pulu det sa tamtama, det ra a kikindet i mat det sa wan tokodos, a kum lepra det sa

<sup>‡</sup> 10:25: Belsebul i ara risan o Satan kai.

langolango, a kum kutkut det sa longoro, a kum minat det sa laun, ma di warawai nama Wakak na Wasiso torom a kum sibo na taro. <sup>6</sup>Osi ra i tama a kum utna ri a pami, ma anun a nurnur ke puku, i sa dan."

<sup>7</sup>Ra a kum nat na ususer anun o Jon det wan, o Iesu i inanos a kunur na taro un o Jon lena, "U ra bung ra mot wan una nubual kalako taro uni torom o Jon, asau ra mot tamtama suri? Kutiro in nere ra i erere una wuwu? Awu. <sup>8</sup>Asau ra mot wan sur mot in tama i? A musano ra i emar nama kum wakak na malu? Awu. Tama i, det ra det ser emar nama kum wakak na malu det ser kis una kum rumu na king. <sup>9</sup>Asau ra mot wan sur mot in tama i? A poropet? Ma! A watungi tamot, o Jon i labo sakit ut taun a kum poropet. <sup>10</sup>Di sa tumtumus taru uni una Buk Tabu lena, "Tama i, iau an tulu ru anung a tene los wasiso sur in mugu tam, i ra in waninar anum a kisapi numugu tam." *Mal 3:1*

<sup>11</sup>A inanos mot nama lingmulus, o Jon a Tene Baptaiso i labo sakit taun a taro rop taginin upiso. Ikut osi ra i natino sakit una matanitu tagisapat una langit, i labo taun o Jon.

<sup>12</sup>"Turpasi una kilalo ra o Jon a Tene Baptaiso i turpas a warawai ma tuk uniri, a matanitu tagisapat una langit i dekdek sur in lubang, ma a dekdek na taro det dekdek doko nama inaim sur det in turbati. <sup>13</sup>A kum poropet ma a kum Warkurai anun o Moses det upuaso a wasiso anun o God, tuk una kilalo ra o Jon i turpas anun a pinapam uni. <sup>14</sup>Det wasiso una poropet Elaija ra in nanpat. Ra mot nem na nurnur una wasiso ra, uniri, o Jon i sa pam sot pasi, uni i a poropet Elaija ra in nanpat. <sup>15</sup>Osi ra arin talngano kura, i wakak sur in longoro nami.

<sup>16</sup>"An elaro a taro tagun uniri nama sau? Det elar nama kum nat liklik ra det kis una balano tamon ma det kakabo torom a kum paspasandet lena,

<sup>17</sup>"Met wup tual,  
ikut ka mot lagori,  
ma met kele a kelekele na tupunuk,  
ikut ka mot tangis uni."

<sup>18</sup>O Jon i wanpat, ke wan tu wakak na utna ma ke inum a wain, ra det watungi uni lena, 'A laulau na nion kura uni.' <sup>19</sup>A Nutun a Musano i wanpat, i wangon ma i inum, ra det watungi uni lena, 'Tama i, a musano ri a tene inangon ma a tene ininum, a pasan a kum tene los takis ma a kum tene sakino.'

Ikut a kum pinapam anun o God i upuaso i lena, anun a mananos i a mananos mulus."

*A warkurai na minabalu torom det ra ka det nukpukus*

*(Lk 10:13-15)*

<sup>20</sup>O Iesu i wasiso na kankan torom a taro una kum tamon ra i sa pam tar anun a susut na utna na ukisin doko tiro iai, uni ka det nukpukus. <sup>21</sup>I watungi lena, "In laulau torom mot a taro Korasin, ma in laulau kai torom mot a taro Betsaida. Ra gunuk di sa pam tar a kum utna na ukisin ri torom a taro Tair ma a taro Saidon, elar nami ra a sa pam tari torom mot, kanapi det in nukpukus lakit ma det in tobo, det in emar nama kum malu na tupunuk ma det in talus a pinpinindet nama kubus na sungun. Ikut mot, ka mot nukpukus. <sup>22</sup>A watungi tamot lena, una bung na warkurai, a warkurai torom mot a taro Korasin ma a taro Betsaida, in laulau doko taun a warkurai torom a taro Tair ma a taro Saidon. <sup>23</sup>Ma mot kai a taro Kapernaum, pepetlai, mot nuki lena din ulabo pas mot usapat netes? Awu, din woro pirsu ru mot kut una labino sungun. Gunuk ra di sa pam tar a kum utna na ukisin torom a taro Sodom, elar nami ra di sa pam tari torom mot, kanapi o Sodom kuri utmakai i. <sup>24</sup>A watungi tamot lena, una bung na warkurai, a warkurai torom mot a taro Kapernaum in laulau doko taun a warkurai torom a taro Sodom."

*Dat in nan torom o Iesu sur in umana dat*  
*(Lk 10:21-22)*

<sup>25</sup>Una du bung ra, o Iesu i watungi lena, "Tita, ui a Labino tagun a langit ma a rakrakon bual rop. A watung ulabo pas ui, uni u munu a kum utna ri tan a kum tene mananos ma det ra det tastasman, ma u upuaso i kut, torom det ra det elar nama kum nat liklik. <sup>26</sup>A lingmulus, Tita, uni anum a nemnem i lenutra.

<sup>27</sup>"O Tita i sa pitar tar a kum utna rop torom iau. Katutaio i tasman o Nutunu, o Tamano kut, ma kataio kai i tasman o Tamano, o Nutunu kut, ma det kai ra o Nutunu i nemi sur in upuaso o Tamano torom det.

<sup>28</sup>"Mot rop ra mot pino ngoro ma a kum mamaut i monong mot, mot in nan torom iau, sur an umana mot. <sup>29</sup>Mot in los anung in nikip, ma mot in ususer gusun iau, uni a magirang i wowowon ma a ser unatino pas iau. Mot in los in nikip ri sur a niomot in

mana. <sup>30</sup> Uni in nikip ri an pitari tamot ke ngangitin, ma a nilolos ino ke maut.”

## 12

### *O Iesu i a Labino tagun a Bung na Sabat* (Mk 2:23-28; Lk 6:1-5)

<sup>1</sup> Numur, un ara Bung na Sabat, o Iesu i wan potur una kum kinobot na wit. Anun a kum nat na ususer det murak, ra det turpas a kumut a ramano kum turunu wit ma det wani. <sup>2</sup> Ra a kum Parisi det tama i, det watungi tano lena, “Tama i, anum a kum nat na ususer det pam a utna ri, ra ke tokodos elar nama warkurai tagun a Bung na Sabat.” <sup>3</sup> O Iesu i balu det lena, “Pepetlai, ka mot luki utmakai asau ra o Dewid i pami? Det nama taro ra det wan tomo det murak, <sup>4</sup> ra i ruk una rumu anun o God, ra i wan a beret ra di sa pitar tari torom o God. Ma det kai ra det wan tomo nami det wangon taguni. A beret ra, a warkurai taguni, i lenri, a kum tene etabor torom o God kut det in nangon taguni, ma a taro ororos awu. <sup>5</sup> Pepetlai, ka mot luk utmakai a wasiso tagun a Buk na Warkurai? I watungi lena, a kum tene etabor torom o God det ser papam una rumu na etabor una Bung na Sabat, ikut ka det raro uni. <sup>6</sup> A watungi tamot lena, ara kuri nin i labo taun a rumu na etabor. <sup>7</sup> Di sa tumtumus tari una Buk Tabu lenri, ‘A nem a marmaris, ma ka nem a etabor ra di ser tuni,’ *Os 6:6* Ra gunuk mot sa tasman a kukurain a wasiso ri, ka mot in takun det ra ka det raro. <sup>8</sup> Uni a Nutun a Musano i a Labino tagun a Bung na Sabat.”

### *O Iesu i ulangolango pas a musano ra a lamano i kong* (Mk 3:1-6; Lk 6:6-11)

<sup>9</sup> Numur o Iesu i wan tagitiro, ra i ruk una nundet a rumu na lotu. <sup>10</sup> Ara musano kura iai, a lamano i kong. Det sisio sur tu utna det in takun o Iesu nami, ra det tingi lena, “Pepetlai, i tokodos ut elar nam anundat a kum Warkurai sur din ulangolango pas taio una Bung na Sabat o awu?” <sup>11</sup> Ma i balu det lena, “Ra taio tagun mot anunu tu sipsip in puku taru un tin nutung una Bung na Sabat, pepetlai, ken pam ukai pasi, ma ken dat toto melet pasi?” <sup>12</sup> A musano i labo taun a sipsip. Lenra i tokodos sur din pam a wakak ino una Bung na Sabat.” <sup>13</sup> Ra i inanos

a musano lena, “Kodos a lamam.” I kodosi, ra a lamano i tokodos melet, elar nam ara lamano ra i wakak. <sup>14</sup> A kum Parisi det pirso, ma det epak pas sur tu kisapi det in um doko o Iesu uni.

### *A tultul ra o God i pilok pasi*

<sup>15</sup> Ra o Iesu i tasmani lena det epak sur det in um doko i, i wan gisen tagitiro iai. A susut na taro det muri, ma i ulangolango pas det rop ra det misait. <sup>16</sup> Ma i turbat det, sur gong det inanos tar taio lena, i osi. <sup>17</sup> I watungi lenra sur in pam sot pas a wasiso anun o God ra o Aisaia a poropet i sa wasiso mugu taru uni lena,

<sup>18</sup> “Iri i anung a tultul ra a sa pilok pasi, anung a nat na wakak, a gas doko nami.

An uruk tar a Niong uni,

ra in upuaso a warkurai ra i tokodos torom a taro ra ausur a taro Juda.

<sup>19</sup> Ken wasiso na kankan, ma ken ugaia, ma ka din longoro in nalngano una kum kisapi.

<sup>20</sup> Ken pak in nere ra i tulukun, ma ken wup doko a lam ra ke kunabor wakak.

In pami lenra tuk a tokodos na warkurai in winim pas a sakino.

<sup>21</sup> A taro ra ausur a taro Juda det in nurnur una risano ma det in kis langlang sur in ulaun det.” *Aisaia 42:1-4*

### *O Iesu ma o Belsebul* (Mk 3:20-30; Lk 11:14-23)

<sup>22</sup> Det ben pat ara musano torom o Iesu, i ngat ma i pulu, ma a laulau na nion kura uni. O Iesu i ulangolango pasi, ra a musano ra i wasiso ma i tamtama kai. <sup>23</sup> Ra a taro rop det kisin, ma det iting lena, “Kutiro a Nutun o Dewid\* ut ri?” <sup>24</sup> Ikut a kum Parisi det longoro i ra det watungi lena, “A musano ri, i ser lakro ru a kum laulau na nion nama dekdekin o Belsebul, a labino anun a kum laulau na nion.”

<sup>25</sup> O Iesu i sa tasman a nuknukindet, ra i watungi tandet lena, “Ra tu gapman det melet ut det in waim etalai, a gapman ra in rop kut. Ra tu tamon, o lako taro tagun tu rumu, det in waim etalai melet kut, ka det in kis tomo melet mo. <sup>26</sup> Ra o Satan in lakro ru anun a kum tultul, det in nan sarara. Ra i lenra, anun a gapman in tur dekdek pepetlai?” <sup>27</sup> Ra iau an lakro ru a kum laulau

\* 12:23: A taro Juda det ser watung a Mesaia a Nutun o Dewid.

na nion nama dekdekin o Belsebul, anumot a taro det ser lakro ru a kum laulau na nion nama dekdekin osi? Anundet a pinapam ut in upuaso i lena anumot a etakun i raro.<sup>28</sup> Ikut, ra an lakro ru a kum laulau na nion nama dekdek in a Nion o God, in ese i lena a matanitu anun o God i sa wanpat torom mot.

<sup>29</sup> “Kataio in pet lar pasi sur in ruk una rumu anun tu dekdek na musano, ma in los pas a kum utna tagitiro una nun a rumu, ra ken ker ukai mugu tari. Ra ut in ker ukai mugu tari, in los a kum utna maragom anun a musano ra.

<sup>30</sup> “O naro ra ka mir tar pasano ka mir ser emalara tomo. Ma o naro ra ke warut iau u eben, i lu sarara ru a taro kut.<sup>31</sup> Ra a watungi tamot lena, din unus ru a kum sakino petutna rop anun a taro, ma anundet a kum sakino wasiso kai un o God, ikut a wasiso laulau una Tokodos na Nion ka din unus lar pasi.<sup>32</sup> Osi kai ra in watung tar tu sakino wasiso una Nutun a Musano, din unus ru i kut, ikut osi ra in wasiso laulau una Tokodos na Nion, ka din unus lar pasi, una nilaun uniri ma una nilaun numur kai.

*In nanai ma a wino  
(Lk 6:43-45)*

<sup>33</sup> “In nanai ra i wakak, i ser wu a wakak na wino, ma in nanai ra i laulau, i ser wu a laulau na wino. Din tama lele in nanai tagun a wino.<sup>34</sup> Mot a kum nutnutun a kum suil! Mot ra a laulau na taro, mot in watung petlan tu wakak na wasiso? Uni a wan a taro i watung puaso a petutna ra i bukus una nundet a nilaun.<sup>35</sup> A wakak na musano i ese anun a wakak na petutna tagun a wakak ino ra i kis una nun a nilaun, ma a laulau na musano kai, i ese anun a sakino petutna tagun a sakino ra i kis una nun a nilaun.<sup>36</sup> A watungi tamot lena, a kum wasiso laulau rop ra a taro det sa watung tatari, kura munung din ting det uni una bung na warkurai.<sup>37</sup> Ra una bung ra, anum a wasiso ut in ulangolango ui, o in banlaulau ui.”

*Det saring o Iesu sur in pam tu ukinalong  
(Mk 8:11-12; Lk 11:29-32)*

<sup>38</sup> Numur ara taro tagun a kum tene ususer tagun a Warkurai ma a kum Parisi det watungi tano lena, “Tene Ususer, un pam tu ukinalong sur met in tama i.”<sup>39</sup> I

balu det lena, “A taro tagun uniri, a sakino taro, anundet a nilaun i bakbak gusun o God. Det sasaring sur tu ukinalong, ikut ka din pam taio torom det. Din pam a ukinalong kut elar nam i ra di sa pam tari un o Jona a poropet.<sup>40</sup> Elar nam o Jona i laun a tulu bung un in balan a labino kiripo, lenkutkai ra a Nutun a Musano in inep pas a tulu bung ubalan a piso.<sup>41</sup> Una bung na warkurai, a taro Niniwe det in tur ma det in takun dekdek a taro tagun uniri, uni det nukpukus una warawai anun o Jona, ma o naro ra i labo taun o Jona kuri ut nin, ikut ka mot longoro i.<sup>42</sup> Una bung na warkurai, a kwin tagitong una matmatano tobar in tur ma in takun dekdek a taro tagun uniri, uni i wan ut tagitiro bakbak sur in longoro a mananos anun a King Solomon, ma o naro ra i labo taun o Solomon kuri ut nin, ikut ka mot longoro i.

*A laulau na nion i milet melet  
(Lk 11:24-26)*

<sup>43</sup> “Ra tu laulau na nion in pirso pas gusun tu musano, in nan una kum nubual ra kalako danim iai, sur in mana, ikut ken sio pas tu nubual sur in mana uni.<sup>44</sup> Ra in watungi lena, ‘An milet melet sur anung a rumu, ra a sa pirso pas gusuni.’ Ra in nanpat, in tama i ra i sa belbel, di sa surupu tari, ma di sa ukodos tari.<sup>45</sup> Numur in nan ra in ben melet pas a wonom mawit na laulau na nion, ra det laulau sakit tano, ma det in ruk rop taru una rumu ra, ma det in kis uni. Ma a nilaun anun a musano ra in laulau sakit mo tan a nilaun ra numugu i utur ukai i. In lenkutkai ra torom a laulau na taro tagun uniri.”

*O nan o Iesu ma a kum tistisino  
(Mk 3:31-35; Lk 8:19-21)*

<sup>46</sup> Ra o Iesu i wasiso utmakai torom a kunur na taro, o nano ma a kum tistisino det wanpat, ma det tur taru kut nago upiso, uni det nem na wasiso tomo nami.<sup>47</sup> Ma ara i inanos o Iesu lena, “O nam ma a kum tistisim kunago det tur nago upiso. Det nem na wasiso tomo nam ui.”<sup>†</sup> <sup>48</sup> Ra i balu i lena, “Osi o nang, ma osi det a kum tistising?”<sup>49</sup> Ra i kodos a lamano torom anun a taro na ususer ma i watungi lena, “Tama i, det ri o nang ma a kum tistising!”<sup>50</sup> Uni osi ra i ser mur a nemnem anun o

† 12:47: A ramano kum tene mananos una Buk Tabu det nuki lena o Matiu ke tumus a dino 47. Det nuki lena taio gisen i tumus tari numur.

Tita ra i kis sapat una langit, i ra a tising a musano, ma a tising a ino, ma o nang.”

### 13

*A wasiso elelar una tene minarut  
(Mk 4:1-9; Lk 8:4-8)*

<sup>1</sup>Una bung ra, o Iesu i pirso gusun a rumu ra i wan ma i kis tiro nisan a du tasi Galili. <sup>2</sup>A labino kunur na taro det tur talilis pasi. Ra i kas una pot ra i kis taru uni, ma a taro rop det tur nago una usalin. <sup>3</sup>I wasiso torom det una susut na utna nama kum wasiso elelar. I watungi lena, “A tene minarut i wan sur in sapro a kum pitino wit. <sup>4</sup>Ra i sapro nanan a kum pitino wit, a ramano det puku una kisapi, ra a kum piko det ro pat ma det wan ru i. <sup>5</sup>A ramano kai det puku una nubual na watat, ra kalako susut na piso uni. Det lubang pat lakit, uni a piso ke but. <sup>6</sup>Ikut ra a suan i sisio pat, i rang det ra det main ma det marang rop, uni kalako wakakor indet. <sup>7</sup>A ramano kum pitino wit det puku epotor una kum kuikui, ra a kum kuikui det lubang ma det rau bat pas det. <sup>8</sup>Ikut a ramano kum pitino kai det puku una wakak na piso ra det wu. A ramano det wu ara mar na windet, a ramano kai a wonom na noino, ma a ramano a tulu noino. <sup>9</sup>Osi ra arin talngano kura, i wakak sur in longoro nami.”

*Iri a kibino ra o Iesu i wasiso nama kum wasiso elelar  
(Mk 4:10-12; Lk 8:9-10)*

<sup>10</sup>Anun a kum nat na ususer det wan toromi ma det tingi lena, “Sur asau ra u ususer a taro nama kum wasiso elelar?” <sup>11</sup>Ma i balu det lena, “O God i sa pitar tar a mananos tamot, sur mot in talapor una kum wasiso na pidik una matanitu tagisapat una langit. Ikut, ke pitari torom a taro rop. <sup>12</sup>Uni osi ra i pam ukai a mananos uni, din tabor meleti nama labino, ma in mananos bing. Ma osi ra ke pam ukai tu mananos uni, din rakon ru i utkai asau lik ra kura i pam ukai i. <sup>13</sup>A ususer det nama kum wasiso elelar, uni det tamtama ma det tamtama, ikut ka det tama lele i, det longoro ma det longoro, ikut ka det longoro lele i, ma ka det tasmani.

<sup>14</sup>A wasiso na poropet anun o Aisaia i sa sot un det, ra i watungi lena, “Mot in longlongoro, ikut ka mot in longoro lele i,

mot in tamtama, ikut ka mot in tama lele i.

<sup>15</sup>Uni a taro ri a kum balandet i dekdek, a kum taltalngandet i kutkut, ma a kum matmatan det i pulu. Ra gunuk det in tamtama lele nama kum matmatandet, ma det in longoro lele nama kum taltalngandet, ma det in mananos nama kum nuknukindet, ma det in tupukus, ma, iau ut an ulaun pas det.” *Aisaia 6:9-10*

<sup>16</sup>Ikut mot, mot dan, uni mot tamtama ut nama kum matmata mot, ma mot longlongoro ut nama kum taltalngamot kai. <sup>17</sup>A inanos mot nama lingmulus, numugu a susut na poropet ma a susut na tene tokodos det kalkal doko sur det in tama a kum utna ri a pami umatamot, ikut ka det tama i. Ma det kalkal doko kai sur det in longoro a kum utna ri mot longoro i, ikut ka det longoro i.

*O Iesu i palos a kukurai na wasiso elelar ina tene minarut  
(Mk 4:13-20; Lk 8:11-15)*

<sup>18</sup>“Mot in longoro a kukurai na wasiso elelar ina tene minarut. <sup>19</sup>Osi ra i longoro a wasiso una matanitu tagisapat una langit, ma ke mananos uni, i elar nama kum pitino wit ra det puku una kisapi. A Laulau na Musano i wanpat ra i rakon ru i melet a wasiso ra di sa marut tari un in balano. <sup>20</sup>Ma a kum pitino ra det puku una nubual na watat, det elar nama musano ra i longoro a wasiso, ra uniuutra, i pam ukai i nama gasgas. <sup>21</sup>Ikut a wasiso ke kis un in balano, ma a musano ra ken tur suano i, elar nam in wit ra kalako wakakor ino. Ra a kum mamaut in nanpat, ma din banlaulau i, uni i nurnur una wasiso anun o God, in puku lakit. <sup>22</sup>A kum pitino ra det puku epotor una kum kuikui, i elar nam ara musano ra i longoro a wasiso, ikut a labino nuknuk sur a wakak na kinkinis nin upiso, ma a kum usobor tagun a kum ululeng taginin una rakrakon bual, i rau bat a wasiso anun o God, ra ke wu lako wino. <sup>23</sup>Ikut a kum pitino ra det lubang sapat una wakak na piso, det elar nam ara musano ra i longoro a wasiso, ma i mananos uni. In wu ara mar, o a wonom na noino, o a tulu noino wino.”

*A wasiso elelar una wit ma a karapa*

<sup>24</sup> O Iesu i watung ara wasiso elelar bulung torom det lena, "A matanitu tagisapat una langit i elar nama musano ra i sapro a kum wakak na pitino wit una nun a kinobot." <sup>25</sup> Ra a taro det inep, anun a ebar i wanpat ra i sapro tar a kum pitino karapa ubalan a kum wit, ra i wan. <sup>26</sup> A pitino wit i lubung pat ma i ling na wu, ra di tama i utkai a karapa i lubung ubalano. <sup>27</sup> A kum tultul anun a taman a kinobot det wan toromi, ma det watungi tano lena, 'Labino, pepetlai, a kum wakak na pitino wit rop kut, ra u sapro tari una num a kinobot? Tagai kai a kum karapa?' <sup>28</sup> I balu det lena, 'A ebar i pam a petutna ra.' Ra det tingi lena, 'U nemi sur met in nan, ma met in gat rop ru det?' <sup>29</sup> I turbat det lena, 'Gong munung, sako mot in gat tomo ru i nama kum wit. <sup>30</sup> Madek ru i, der in lubung tomo tuk una kalang na pasong. Una bung ra, an watungi tan a kum tene pasong lena: Mot in rakon mugu ru a kum karapa, mot in ker tomo tar a kum kamkabino sur din tun ru det una sungun. Ra numur mot in los tomo i bulung a kum wit una nung a rumu na ululeng.'"

*A wasiso elelar un in pitino mastad ma una is*

(Mk 4:30-32; Lk 13:18-21)

<sup>31</sup> O Iesu i watung ara wasiso elelar bulung tandet lena, "A matanitu tagisapat una langit i elar nam in pitino mastad, ra ara musano i los pasi, ma i marut tari una nun a kinobot. <sup>32</sup> I natino taun a kum pitino duwai rop, ikut ra i lubung, i labo taun a kum duwai na inangon rop. Ma a kum piko det ser pam pios una kum kanokano."

<sup>33</sup> O Iesu i watung ara wasiso elelar bulung tandet lena, "A matanitu tagisapat una langit i elar nama is, ra ara ino i rakon pasi, ma i pam tomo tari nama labino palawa, ra a palawa rop i mubus nami."

<sup>34</sup> O Iesu i ususer a kunur na taro nama kum wasiso elelar, ma ke wasiso torom det nam tu se wasiso, a wasiso elelar rop kut. <sup>35</sup> I watungi lenra sur din pam sot pas a wasiso anun a poropet lena,

"An wasiso nama kum wasiso elelar,  
an watung a kum utna ra i kis eno,  
turpasi numugu utmakai, ra o God  
i ukis a rakrakon bual." *Buk Song*  
78:2

*O Iesu i palos a kukurai na wasiso elelar una wit ma a karapa*

<sup>36</sup> Numur o Iesu i wan gusun a kunur na taro, ra i ruk una rumu. Anun a kum nat na ususer det ruk toromi ma det inanos lena, "Un palos a kukurai na wasiso elelar ri ta met una karapa ra i lubung ubalan a kinobot." <sup>37</sup> I balu det lena, "O naro ra i sapro a kum pitino wit i a Nutun a Musano. <sup>38</sup> A kinobot, i a rakrakon bual, ma a kum wakak na pitino wit, det a taro tagun a matanitu tagisapat una langit, ma a kum karapa, det a kum nutnutun a Laulau na Musano, <sup>39</sup> ma a ebar ra i sapro det, i o Satan. A kalang na pasong, i a tintinip ina rakrakon bual, ma a kum tene pasong, a kum ensel. <sup>40</sup> A kum tene pasong det los tomo a kum karapa ra det tun ru det una sungun. In lenkutkai ra din pami una tintinip ina rakrakon bual. <sup>41</sup> A Nutun a Musano in tulu ru anun a kum ensel, ma det in rakon rop ru a kum utna ra i ben raro a taro, ma det kai ra det ser pam a sakino. <sup>42</sup> Ma det in woro det una labino sungun. Det in tangtangis ma det in ungingit lokondet iai. <sup>43</sup> Ma a kum tene tokodos det in sisio elar nam in nusuan una matanitu anun a Tamandet. Osi ra arin talngano kura, i wakak sur in longoro nami.

*A wasiso elelar una utna ra a matano i ka*

<sup>44</sup> "A matanitu tagisapat una langit i elar nama utna ra a matano i ka doko, ra di munu tari una kinobot. Ma ara musano i sio pasi ma i munu melet tari. Ra i wan nama gasgas, ma i siuru rop ru anun a kum utna, ra i kul pas a kinobot ra nami.

<sup>45</sup> "A matanitu tagisapat una langit i elar kai nam ara tene siuru, i sisio sur a kum wat kura ubalan a kabokabol, ra a matandet i ka.

<sup>46</sup> Ra i sio pas ara wat ra a matano i ka doko, i siuru rop ru anun a kum utna, ma i kul pas a wat ra nami.

*A wasiso elelar una uben*

<sup>47</sup> "A matanitu tagisapat una langit i elar kai nama uben, ra di woro tari sa u tasi, ma a wur ngas na kiripo det iru taru uni.

<sup>48</sup> Ra i bukus a uben, a kum tene woro uben det dat mamaso tari una usalin. Det kis ra det timilo ru a kum kiripo utiro una kum rat, ma a kum laulau ino det woro ru det.

<sup>49</sup> Una tintinip ina rakrakon bual din pami ut lenri: A kum ensel det in nanpat ma det in isuaro ru a kum tene sakino gusun a kum tene tokodos. <sup>50</sup> Ra det in woro ru a kum tene sakino una labino sungun. Det in tangtangis ma det in ungingit lokondet iai.

<sup>51</sup> “Pepetlai, mot sa mananos una kum kukurai na kum utna rop ri, o awu?” Anun a kum nat na ususer det balu i lena, “Ma! Met sa tasmani.” <sup>52</sup> Ra o Iesu i watungi tandet lena, “A kum tene ususer rop tagun a Warkurai, ra det sa ususer pas una matanitu tagisapat una langit, det elar nam ara musano ra i uleng a kum wakak na utna una nun a rumu. Ra i upirso a kum wakak na utna ra, gusun anun a rumu sur in papam nami, a ramano kum utna, a kum matokino, ma a ramano kai, a kum turaino.”

*A poropet ra ka di ru i*  
(Mk 6:1-6; Lk 4:16-30)

<sup>53</sup> Ra o Iesu i sa watung rop tar a kum wasiso elelar ri, i wan tagitiro iai, <sup>54</sup> ra i wanpat una nun a tamon, tong o Nasaret. I tur pasi sur in ususer a taro tiro una nundet a rumu na lotu, ma det kisin doko ra det watungi lena, “A musano ri i los a mananos tagai? Ma tagai kai a dekdek ra i pam a kum utna na ukisin ri nami?” <sup>55</sup> O Tamano a tene pam rumu kut, ma o nano o Maria. A kum tistisino kai, o Jems, o Josep, o Saimon ma o Judas <sup>56</sup> ma a kum bunu kai ano kuri ut dat laun tomo nin. Ma tagai a dekdek ra a musano ri i pam a kum utna ri nami?” <sup>57</sup> Ra ka det nemi ut mo. Ra o Iesu i watungi tandet lena, “Di ser ru a poropet una kum se tamon, ikut det ut una nun a tamon ma anun a rumu ka det ru i.” <sup>58</sup> Ra ke pam lako susut na utna na ukisin tiro iai, uni ka det nurnur uni.

## 14

*O Erod i nuki lena o Iesu i o Jon a Tene Baptaiso*

(Mk 6:14-29; Lk 9:7-9)

<sup>1</sup> Una kilalo ra, o Erod a mugumugu tagun a gapman i longoro a wasiso un o Iesu, <sup>2</sup> ra i watungi tan anun a kum tultul lena, “A musano ra, i o Jon a Tene Baptaiso, i sa laun melet gusun a minat. I mo ra i pam a kum utna na ukisin.”

<sup>3-4</sup> Numugu o Erod i tulu ru anun a kum tene inaim sur det in dat pas o Jon. Ra det dat pasi, det ker pasi, ma det uruk tari una karabus. O Erod i pami lenri, uni o Jon i inanosi lena, “Ke tokodos ra u nolin nam o Erodias, a urim.” I watungi lenri, uni o Erod i sa sal pas o Erodias, a ino anun o tisinio, o Pilip, ra i nolin nami. <sup>5</sup> Ma o Erod i nemi sur din um doko o Jon, ikut i ngaran a taro, ra det tasmani lena o Jon a poropet.

<sup>6</sup> Una bung ra di ukinalong a bung na usus anun o Erod, a nutun o Erodias a ino, i lagor nisan det. O Erod i gas doko nami, <sup>7</sup> ma i uliliman dekdek tar a nutun o Erodias lena, “Asau mukut ra un saringi tang an pitari ut tam.” <sup>8</sup> Ra i inanosi lena, “Un pitar kut in lorin o Jon a Tene Baptaiso tang un tu pelet.” I watungi lenri uni o nano i sa inanos tari nami.

<sup>9</sup> A king i tupunuk doko. Ikut i tulu a kum tene inaim sur det in tarom una sasaring anun a toraro ra, uni i sa uliliman tari lena asau mukut ra in saringi tano in tabori ut nami, ma a taro ra det kis tomo nami una inangon, det sa longoro tar anun a wasiso.

<sup>10</sup> A kum tene inaim det wan utong una karabus ma det tau kutus pas in lorin o Jon. <sup>11</sup> Det ubek pas in lorino una pelet ma det pitari torom a toraro, ra i losi torom o nano.

<sup>12</sup> Ra a kum nat na ususer anun o Jon det wanpat ma det los pas a minat ino, ra det pori. Numur det wan torom o Iesu ra det inanosi nami.

*O Iesu i tabor a limo na arip na musano*  
(Mk 6:30-44; Lk 9:10-17; Jn 6:1-14)

<sup>13</sup> Ra o Iesu i longoro i lena o Jon i sa mat, i kas taru una pot ra i wan tagitiro sur a nubual kalako taro uni, sur i sot kut in kis. Ra a taro tagun a kum tamon det longoro i, det wan murmuri una kisapi sur a nubual ra. <sup>14</sup> Ra i sot, i tama a labino kunur na taro. I maris doko det, ma i ulangolango pas det rop ra det misait.

<sup>15</sup> Ra i sa lirop anun a kum nat na ususer det wan toromi, ra det watungi tano lena, “A nubual ri i bakbak gusun a kum tamon, ma i sa lirop kai. Un tulu ru a kunur na taro sur det in nan sur a kum tamon, sur det in kul pas andet lako utna na inangon.” <sup>16</sup> O Iesu i balu det lena, “Det in nan sur asau? Mot ut mot in tabor det.” <sup>17</sup> Det watungi tano lena, “A limanin beret sot kut, ma arin kiripo kuri met losi.” <sup>18</sup> I watungi tandet lena, “Mot in losi urin torom iau.”

<sup>19</sup> Ra i itula sur a kunur na taro det in kis una wuliso. I los pas a limanin beret ma aru kiripo, i tamtama usapat una langit, i watung wakak pas torom o God uni, i tibik a limanin beret, ra i pitari tan anun a kum nat na ususer. Ra det tibo a kunur na taro nami. <sup>20</sup> Det rop det wangon ma det masur. Numur det song bukus pas a noino ma aru rat nama utna ra det wangon kopos pas uni.

<sup>21</sup> A wardain ma a kum nat liklik ma a kum

musano det rop det wangon. Ikut a niluluk ina kum musano kut, i elar nama limo na arip.

*O Iesu i wan sapat netes una tasi*

*(Mk 6:45-52; Jn 6:15-21)*

<sup>22</sup>Uniutra, o Iesu i tulu ru anun a kum nat na ususer, sur det in kas una pot, ma det in mugu utong sur ara papor tasi. Ma i, i kis utmakai sur in tulu ru a taro. <sup>23</sup>Ra i sa tulu rop ru det, i sot mukut i wan tito usapat una tangai sur in wararing. Ra i sa lirop matano mirum i sot mukut i kis. <sup>24</sup>A pot i sa wan potora i tinako nanan una top, uni a wuwu i waim tagisa numugu. <sup>25</sup>Una lar, o Iesu i wan sapat netes una du tasi torom det. <sup>26</sup>Ra anun a kum nat na ususer det tama pasi ra i wan netes una du tasi, det ngara doko ma det watungi lena, "A nion kut ra!" Ra det woiwoi nama nginara. <sup>27</sup>Uniutra o Iesu i watungi tandet lena, "A kosom taru tamot, iau kut ri. Gong mot ngara."

<sup>28</sup>O Pita i watungi tan o Iesu lena, "Labino, ra ui ut ra, un inanos iau sur iau kai an nan sapat netes una du tasi torom ui." <sup>29</sup>O Iesu i inanos lena, "Un nan urin." Ra o Pita i sirok gusun a pot, ra i wan sapat netes una tasi torom o Iesu. <sup>30</sup>Ikut, ra i tama a kum lamlabino top, i ngara. Ra i murung nanan, i kakabo lena, "Labino, un ulaun iau." <sup>31</sup>Uniutra, o Iesu i kodos a lamano toromi, i dat toto pasi, ra i watungi tano lena, "Anum a nurnur i natino doko. Ilai ra u nuknuk larlar?" <sup>32</sup>Ra der kas una pot, a wuwu i mana mut. <sup>33</sup>Ra det ra kis taru una pot det lotu torom o Iesu, ma det watungi lena, "I lingmulus ut ra ui a Nutun o God."

*O Iesu i ulangolango pas a kum misait tong una papor Genesaret*

*(Mk 6:53-56)*

<sup>34</sup>Ra det sa wan kutus un ara papor tasi, det sot tiro una papor Genesaret. <sup>35</sup>Ra a taro tagitiro det tama lele pas o Iesu, det pitar wasiso utiro una kum tamon. Numur det ben rop pas a kum misait toromi. <sup>36</sup>Ma det saringi sur a kum misait det in pami kut a sinisir ina nun a saket. Ra det rop ra det pami, det langolango mut.

## 15

*A taro det unatino pas a wasiso anun o God (Mk 7:1-13)*

<sup>1</sup>A ramano kum Parisi ma a kum tene ususer tagun a Warkurai det wan tagisapat o Jerusalem torom o Iesu, ma det tingi lena,

<sup>2</sup>"Ilai sur anum a kum nat na ususer ka det ser mur a kum etowo anun anundat a taro tagun numugu? Ra det wangon, ka det gos mugu pas a lamandet." <sup>3</sup>Ma i balu det lena, "Sur asau ra ka mot mur a Warkurai anun o God? Mot muri kut a kum etowo anun anumot a taro tagun numugu. <sup>4</sup>Uni o God i watungi lena, 'Un ru o tamam ma o nam,' *Kisim Bek 20:12*

ra i watungi kai lena, 'Osi ra in wasiso laulau un o tamano ma o nano, din um doko i.' *Kisim Bek 21:17*

<sup>5</sup>Ikut mot, mot ususer a taro lena, i wakak kut ra taio in watungi tan o tamano ma o nano lena, 'Asau ra an warut mur nami, a sa tabor tar o God nami.' <sup>6</sup>Ikut ra ke warut o tamano, ke ru i. Ra mot pami lena, mot unatino pas a wasiso anun o God sur mot in muri kut a kum etowo anun anumot a taro tagun numugu. <sup>7</sup>Mot a kum tene torotoro. A wasiso anun o Aisaia i lingmulus ut, ra i wasiso na poropet mugu taru un mot lena, <sup>8</sup>'A taro ri det ru iau kut nama wandet, ikut a balandet i bakbak doko gusun iau.

<sup>9</sup>Det lotu oros kut torom iau, un det ususer kut nama kum warkurai anun a taro.'" *Aisaia 29:13*

*A kum utna ra in udur a taro umatan o God (Mk 7:14-23)*

<sup>10</sup>O Iesu i kabo pas a kunur na taro toromi, ra i watungi tandet lena, "Mot in longoro iau ma mot in tasman lele anung a wasiso. <sup>11</sup>Asau ra in ruk una wan tu musano, ken uduri umatan o God. Ikut, asau ra i watungi nama wano, i ra in uduri umatan o God."

<sup>12</sup>Numur anun a kum nat na ususer det wan toromi ra det tingi lena, "Pepetlai, u sa tasmani lena a kum Parisi det balano mamaut una num a wasiso?" <sup>13</sup>I balu det lena, "A kum duwai ra o Tita, ra i kis sapat una langit, ke marut det, din gat rop ru det. <sup>14</sup>Mot in madek ru a kum Parisi. Det a kum pulu na mugumugu. Ra tu pulu in ben tu pulu, der rop der in puku dorong un tin nutung."

<sup>15</sup>Ma o Pita i tingi lena, "Un palos a wasiso elelar ri torom met." <sup>16</sup>Ra o Iesu i watungi lena, "Mot kai ka mot talapor utmakai? <sup>17</sup>Ka mot tasmani lena, a kum utna rop ra i ruk una wan a musano, i ruk un in balano ma i upirso melet ru i? <sup>18</sup>Ikut a kum wasiso rop ra i watungi nama wano, i wanpat gusun a nuknukino, i ra in uduri. <sup>19</sup>Iri a kum utna ra i ser wanpat tagun a nuknukino: a kum

sakino nuknuk, um doko a taro, di sal pas a ino anun taio gisen, a kum petutna na pamuk, a wolong, a etakun torotoro, ma di mang laulau ara. <sup>20</sup> A kum utna ri det udur a taro. Ikut ra det wangon ma ka det gos mugu pas a lamandet, ausur in udur det umatan o God.”

*A nurnur anun a ino ra i ausur a ino Israel (Mk 7:24-30)*

<sup>21</sup> O Iesu i wan tagitiro, ra i wanpat milau a tamon Tair ma o Saidon. <sup>22</sup> Ara ino Kanan tagitiro una papor ra, i wanpat ma i kabo o Iesu lena, “Labino, a Nutun o Dewid un maris iau. A nutunglik a ino, a laulau na nion kura uni, ra i ser banlaulau i.” <sup>23</sup> Ikut o Iesu ke balu i. Anun a kum nat na ususer det wan toromi, ma det inanos dekdeki lena, “Un tulu ru i mukut, uni i woiwoi numur un dat.”

<sup>24</sup> O Iesu i watungi lena, “O God i tulu ru iau urin sur a taro Israel kut, ra det raro elar nama kum sipsip.” <sup>25</sup> Ikut a ino ra i wan torom o Iesu, i kis butkeke numug tano ra i watungi tano lena, “Labino, un warut iau.” <sup>26</sup> Ra o Iesu i balu i lena, “Ke tokodos sur din los a utna ana kum nat, ma din woro i tan a kum pap.” <sup>27</sup> A ino ra i balu i lena, “Labino, a lingmulus ut ra. Ikut, a kum pap kai det ser wan a kum mumumut na utna ra i ser puku tagun a kabulu na inangon anun a kum tamtamandet.” <sup>28</sup> Ra o Iesu i balu i lena, “Le, i labo doko anum a nurnur! A utna ra u nemi, an pami ut torom ui.” Ma una du bung ut ra, a nutunulik i langolango.

*O Iesu i ulangolango a kum misait*

<sup>29</sup> O Iesu i wan tagitiro, ma i usal nanan una usalin una du tasi Galili. Numur i wan toto una tangai ra i kis sapat. <sup>30</sup> Ma a labino kunur na taro det wan toromi. Det los det ra a kikindet i mat, ma det ben a kum pulu, a kum pio, a kum ngat, ma a susut na misait utkai toromi. Ma det inep tar det nisano, ra i ulangolango pas det. <sup>31</sup> A kunur na taro det tama a kum ngat det wasiso, ma a kum pio det tur, ma det ra a kikindet i mat det wan tokodos, ma a kum pulu kai det tamtama. Det kisin doko ra det watung ulabo pas a God anun a taro Israel.

*O Iesu i tabor a wat na arip na musano (Mk 8:1-10)*

<sup>32</sup> O Iesu i kabo pas anun a kum nat na ususer toromi ma i watungi tandet lena, “A maris doko a taro ri, uni det sa kis tomo nam iau nin a tulu bung, ma kalako utna na inangon sur det in nani. Ka nemi sur an tulu ru det kut nama munurak, sako det in bengbeng nanan una kisapi.” <sup>33</sup> Anun a kum nat na ususer det inanos lena, “A nubual ri, kalako taro uni. Tagai mo lako utna na inangon sur dat in tabor a kunur na taro ri nami?” <sup>34</sup> O Iesu i ting det lena, “A isin beret kura mot losi?” Det balu i lena, “A wonom mawit na beret ma a kabanin natnat na kiripo.”

<sup>35</sup> Ra i inanos a taro rop sur det in kis piso. <sup>36</sup> I los pas a wonom mawit nin beret ma a kabanin kiripo ra, i watung wakak pas uni torom o God, i tibiki ma i pitari torom a kum nat na ususer sur det in tabor a taro nami. <sup>37</sup> A taro rop det wangon ma det masur. Numur det song bukus pas a wonom mawit na rat nama kum utna ra det wangon kopos pas uni. <sup>38</sup> A kum ino tomo nama kum nat liklik ma a kum musano det rop det wangon. A niluluk ina kum musano kut i elar nama wat na arip.

<sup>39</sup> Numur o Iesu i tulu ru a kunur na taro, i kas una pot, ra i wan sur a papor Magadan.

## 16

*Det saring o Iesu sur in pam tu ukinalong (Mk 8:11-13; Lk 12:54-56)*

<sup>1</sup> A kum Parisi ma a kum Sadusi det wan torom o Iesu, ra det lari sur in pam tu ukinalong umatandet, sur in ese i lena, i tagisapat una langit. <sup>2</sup> Ra i watungi tandet lena, “Ra i ser lirop mot ser watungi lena, ‘Markan ken bato, uni a bakut i sa merek rop.’ <sup>3</sup> Ma una kobot mot ser watungi kai lena, ‘Uniri in bato, uni a bakut i sa merek, ma i sa bagubagu rop.’ Mot mananos sur mot in palos a tamtama ina bakut, ikut ka mot mananos sur mot in palos a kukurai na kum ukinalong tagun uniri.\* <sup>4</sup> A taro tagun uniri, a sakino taro, anundet a nilaun i bakbak gusun o God. Det sasaring sur tu ukinalong, ikut ka din pam taio torom det. Din pam a ukinalong kut elar nam i ra di sa pam tari un o Jona.” Ra o Iesu i wan gusun det.

\* 16:3: A ramano kum tene mananos una Buk Tabu det nuki lena o Matiu ke tumus aru rino 2 ma 3. Det nuki lena taio gisen i tumus tari numur.

*A utumarong una is anun a kum Parisi ma a kum Sadusi*

*(Mk 8:14-21)*

<sup>5</sup> O Iesu tomo nam anun a kum nat na ususer det wan kutus a du fasi, ma a kum nat na ususer ka det los lako beret, det dumano ru i kut. <sup>6</sup> O Iesu i watungi tandet lena, “Mot in tumarong mot una is anun a kum Parisi ma a kum Sadusi.” <sup>7</sup> Ra det wasiso etetalai torom det una kukurai na wasiso anun o Iesu, ma det lena, “I watungi lenra uni ka dat los lako beret.” <sup>8</sup> O Iesu i tasman anundet a wasiso ra i watungi tandet lena, “I natino doko anumot a nurnur. I lai ra mot wasiso etalai un mot ra ka mot los lako beret?” <sup>9</sup> Pepetlai, ka mot mananos utmakai? Ka mot nuk pas a limanin beret ra a tibiki torom a limo na arip na musano? Ma ka mot nuk pasi kai aiso rat ra mot song bukus pasi? <sup>10</sup> Ka mot nuk pas a wonom mawit na beret ra a tibiki torom a wat na arip na musano? Ma ka mot nuk pasi kai aiso rat ra mot song bukus pasi? <sup>11</sup> I lai ra ka mot mananos? Ka wasiso una beret. Mot in tumarong mot una is anun a kum Parisi ma a kum Sadusi.” <sup>12</sup> Ra det tasmani maragom lena ke turbat det gusun a is ra i kis una beret, ikut i watungi lenra, sur det in tumarong det una etowo anun a kum Parisi ma a kum Sadusi.

*O Pita i wasiso talapor un o Iesu*

*(Mk 8:27-30; Lk 9:18-21)*

<sup>13</sup> O Iesu i wanpat milau a tamon Sisaria Pilipai. Ra i ting anun a kum nat na ususer lena, “A taro det watung a Nutun a Musano nam osi?” <sup>14</sup> Det balu i lena, “Ara taro det watung ui o Jon a Tene Baptaiso. Ara taro det watung ui o Elaija, ara taro det watung ui o Jeremaia, ma ara taro kai det watung ui, ara tagun a kum poropet.” <sup>15</sup> I ting det lena, “Ma mot, mot watung iau nam osi?” <sup>16</sup> Ra o Saimon Pita i balu i lena, “Ui a Karisito, a Nutun o God ra i laun.”

<sup>17</sup> Ra o Iesu i watungi tano lena, “Saimon, a nutun o Jon, u sa dan, uni kataio i inanos ui nama wasiso ra. O Tita ut ra i kis sapat una langit i unuk tar ui nami.” <sup>18</sup> Ra a watungi tam lena, ui o Pita, † a wat kis. An utur anung a taro na lotu una wat ri. A dekdek ina minat ken winim pas anung a taro na lotu. <sup>19</sup> An pitar a kum ki tagun a matanitu tagisapat una langit torom ui, ma asau ra u kubusi nin upiso, din kubusi kai sapat netes

† 16:18: Pita a kukuraino a wat.

una langit, ma asau ra u palosi nin upiso, din palosi kai sapat netes una langit.” <sup>20</sup> Ra o Iesu i turbat anun a kum nat na ususer sur gong det inanos tar taio lena i a Karisito.

*O Iesu i inanos mugu nam anun a minat*

*(Mk 8:31-9:1; Lk 9:22-27)*

<sup>21</sup> Tur pasi una bung ra, o Iesu i utalapor anun a kum nat na ususer lena, in nan ut usapat o Jerusalem. Ra in taramo a susut na mamaut ulaman a kum mugumugu, a kum lamlabino tene etabor torom o God, ma a kum tene ususer tagun a Warkurai, ma din um doko i. Ra a tulu bung in rop in katutur melet. <sup>22</sup> Ra o Pita i ben gisen pas o Iesu ma i turbat dekdeki lena, “Gong Labino! Gong ut di pam tar a utna ri un ui.” <sup>23</sup> O Iesu i tupukus torom o Pita ra i watungi tano lena, “Satan, un nan unago numur tang! U ubatbat iau, uni, u muri kut a nuknukin a taro, ma ko mur a nuknukin o God.”

<sup>24</sup> Ra o Iesu i watungi tan anun a kum nat na ususer lena, “Ra taio i nemi sur in mur iau, gong i mur a nuknukino. In los pas anun in nanai kutus ma in mur iau. <sup>25</sup> Osi ra i maris bat anun a nilaun, in iru, ikut osi ra ke maris bat anun a nilaun uni i mur iau, in laun. <sup>26</sup> Osi ra in utur ukai a kum ututna rop taginin una rakrakon bual, ma a niono in iru, in wakak pepetlai toromi? In kul keles a niono nam asau? <sup>27</sup> Uni a Nutun a Musano in nanpat nama minamar anun o Tamano, det nam anun a kum ensel, ma in pitar a ikul torom ara ra taktakai elar nam anun a pinapam. <sup>28</sup> A inanos mot nama lingmulus, lako taro tagun mot ri mot tur nin, ka mot in mat utmakai, ra mot in tama a Nutun a Musano in nanpat tomo nam anun a matanitu.”

## 17

*A pinin o Iesu i tamtama senene*

*(Mk 9:2-13; Lk 9:28-36)*

<sup>1</sup> Numur tan a wonom na bung, o Iesu i ben pas o Pita, o Jems ma o Jon, i ra a tisin o Jems, ra i ben gisen pas detul usapat una tangai ra i tur toto bing. <sup>2</sup> Tiro iai, detul tama a pinin o Iesu i wanpat senene. In masarino i sisio elar nam in matanas, ma anun a kum malu kai i kabang doko elar nama talapor. <sup>3</sup> Uniutra, a tulu nat na ususer detul tama pas o Moses ma o Elaija der wanpat ra detul wasiso tomo nam o Iesu. <sup>4</sup> O Pita i watungi tan o Iesu lena,

“Labino, i wakak ra dat in kis nin. Ra u nemi, an pam lako tulu turturup, ara anumi, ara anun o Moses, ma ara anun o Elaija.”

<sup>5</sup> Ra i wasiso utmakai, a du bakut ra i talapor doko i pulus bat pas det. Ma in nalngan ara tagisapat una du bakut ra, i watungi lena, “Iri a Nutunglik, a nat na wakak, a gas doko nami. Mot in longoro i.” <sup>6</sup> Ra a tulu nat na ususer detul longoro i, detul ngara doko, ra detul puku pirso nama matandetul una piso. <sup>7</sup> Ikut o Iesu i wan torom detul, ra i pam detul ma i watungi lena, “Motul katutur, gong motul ngara.” <sup>8</sup> Ra detul tamtama toto, ka detul tama melet mo taio, o Iesu sot mukut kura i.

<sup>9</sup> Ra det wan pirso nanan tagisapat una tangai, o Iesu i turbat tar detul lena, “Gong motul inanos tar taio un asau ri motul sa tama tari, tuk una bung ra a Nutun a Musano in katutur gusun a minat.”

<sup>10</sup> Ma anun a tulu nat na ususer detul tingi lena, “Sur asau ra a kum tene ususer tagun a Warkurai det watungi lena o Elaija in nanpat mugu?” <sup>11</sup> I balu detul lena, “A lingmulus ut, o Elaija in nanpat mugu ma in ukodos melet a kum utna rop. <sup>12</sup> Ikut uniri a watungi torom motul lena, o Elaija i sa wanpat taru, ma ka det tasman lele i, det pam a kum sakino petutna uni, elar ut nam anundet a nemnem. Lenkutkai ra torom a Nutun a Musano, in taramo a ngunungut una laman a taro.” <sup>13</sup> Ra a tulu nat na ususer detul tasmani maragom lena, i wasiso torom detul un o Jon a Tene Baptaiso.

*O Iesu i lakro ru a laulau na nion gusun ara natlik*

*(Mk 9:14-29; Lk 9:37-43)*

<sup>14</sup> O Iesu ma a tulu nat na ususer det wanpat nisan a kunur na taro, ra ara musano i wan torom o Iesu, i kis butkeke numugu nisano, <sup>15</sup> ma i watungi lena, “Labino, un maris a nutunglik a nat musano, i ser mat lalang, ma i ser taramo a labino ngunungut. A susut na bung i ser puku una sungun, o una danim. <sup>16</sup> A sa ben tari munung torom anum a kum nat na ususer, ikut ka det pet lar pasi sur det in ulangolango i.”

<sup>17</sup> O Iesu i balu i lena, “Mot a taro tagun uniri, ka mot nurnur ma mot a kum tene sakino. A sa kis suano i torom mot. Nangisin mo mot in nurnur? Mot in ben a nat ra urin torom iau.” <sup>18</sup> O Iesu i wasiso dekdek torom a laulau na nion, ra i pirso pas gusun a natlik. Ra una du bung utra i langolango.

<sup>19</sup> Numur a kum nat na ususer det wan torom o Iesu, ma det ting eno i lena, “Ilai ra ka met lakro lar pas a laulau na nion gusuni?” <sup>20-21</sup> Ma i balu det lena, “Uni anumot a nurnur i natino doko. A inanos mot nama lingmulus, ra anumot a nurnur in natino elar nam in pitino mastad, mot in pet lar pasi sur mot in watungi tan a tangai ri lena, ‘Un karai taginin utong,’ ra in karai kut. Katu utna in ngangitin torom mot.”\*

*O Iesu i wasiso melet una nun a minat ma a katkatutur melet*

*(Mk 9:30-32; Lk 9:43-45)*

<sup>22</sup> O Iesu ma anun a kum nat na ususer det wan tomo tong una papor Galili, ra i watungi tandet lena, “Din pitar a Nutun a Musano ulaman a taro <sup>23</sup> ma det in um doko i. Numur tan a tulu bung o God in ulaun melet pasi.” Ra a kum nat na ususer det longoro i, det tupunuk doko uni.

*A takis sur a rumu na etabor*

<sup>24</sup> O Iesu ma anun a kum nat na ususer det wanpat tong o Kapernaum, ra det ra det ser los takis sur a rumu na etabor, det wan torom o Pita ma det tingi lena, “Anumot a tene ususer i ser pitar a takis sur a rumu na etabor o awu?” <sup>25</sup> Ra i mulaot lena, “Ma.”

O Pita i ruk una rumu, ra o Iesu i wasiso mugu mut, ra i tingi lena, “Saimon, asau u nuki, a kum king taginin upiso det ser los a takis ma a ikul tan osi? Tan a kum nutnutundet o tan a taro gisen?” <sup>26</sup> Ra i balu i lena, “Tan a taro gisen.” O Iesu i watungi tano lena, “Ra i lenra, a kum nutnutundet, det langolango, ka det ser kul a takis. <sup>27</sup> Ikut, sur gong dar ban ukankan det, un nan usa utasi ma un boko. In mugano kiripo ra un dat pasi, un pagom a wano, ra un los pas a mani gusuni. Ma un los tari torom det sur a takis anundar rop.”

\* 17:20-21: A ramano kum tene mananos una Buk Tabu det nuki lena a ramano kum wasiso kai i kis una rino ri. I lenri: *Ikut, a ngas na laulau na nion lenri in pirso kut una niaring ma a winewel, ausur un tu utna kai.*

## 18

*Osi ra i labo sakit?*

(Mk 9:33-37, 42-48; Lk 9:46-48; 17:1-2)

<sup>1</sup> Una du bung ra, anun a kum nat na ususer det wan torom o Iesu, ma det tingi lena, “Osi ra i labo sakit una matanitu tagisapat una langit?” <sup>2</sup> I kabo pas ara natlik toromi, i utur tari epotor tandet, <sup>3</sup> ma i watungi lena, “A inanos mot nama lingmulus, ra ka mot in nukpukus sur mot in elar nama kum nat liklik, ka mot in ruk lar pas una matanitu tagisapat una langit. <sup>4</sup> Osi ra i unatino pasi, elar nama natlik ri, i ut ra i labo sakit una matanitu tagisapat una langit.

<sup>5</sup> “Osi ra in gas pas tu natlik lenri una risang, i gas pas iau ut. <sup>6</sup> Ikut, osi ra in ben raro ara tagun a kum nat liklik ri\*<sup>†</sup>, ra det nurnur un iau, a warkurai toromi, in laulau doko tan taio, ra din kubus tar tu labino wat un in kabarano, ma din woro murungi sa umadu.

<sup>7</sup> “In laulau torom a taro tagun a rakrakon bual, kibino una kum utna ra i dat a taro sur det in puku una sakino. A kum utna ra in nanpat ut, ikut in laulau doko torom o naro ra i pam pat pasi. <sup>8</sup> Ra a lamam, o a kikum i ben raro ui, kutus ru i ma un woro gisen ru i. In wakak ra un ruk una nilaun tukum a tumul kut ui, sur gong di woro ui tomo nama ru lamam, o aru kikum rop, una labino sungun ra ke ser rop. <sup>9</sup> Ra in matam i ben raro ui, liok ru i ma un woro gisen ru i. In wakak ra un ruk una nilaun tukum nam in teken matam kut, sur gong di woro ui tomo nam arin matam rop una labino sungun ra ke ser rop.

*A wasiso elelar un ara sipsip ra i raro*  
(Lk 15:3-7)

<sup>10-11</sup> “Gong mot nuk natino pas taio tagun a kum nat liklik ri. A inanos mot, anundet a kum ensel sapat una langit det ser tama in masarin o Tita ra i kis sapat una langit.†

<sup>12</sup> “Asau a nuknukimot? Ra tu musano anunu tu mar na sipsip, ma ara tagun det in raro. Pepetlai, ken nan pas gusun a lisu na noino ma lisu tiro una kum tangai, ma in sisio sur ara ra i raro? <sup>13</sup> A inanos mot nama

lingmulus, ra i sa sio pasi, anun a gasgas uni, in labo taun anun a gasgas una lisu na noino ma lisu ra ka det raro. <sup>14</sup> Lenkutkai ra, a Tamamot ra i kis sapat una langit, ke nemi sur taio tagun det a kum nat liklik ri in iru.

*Asau ra un pami torom o tisisim ra i pam a sakino torom ui*

<sup>15</sup> “Ra o tisisim i pam a sakino torom ui‡ un nan toromi, ma mur kut mur in kis. Ra un watung puaso anun a niraro toromi. Ra in longoro ui, u sa umarom melet pasi. <sup>16</sup> Ra ken longoro ui, un ben melet pas taio o lako ru sur der in warut ui. Uni a Buk Tabu i watungi lenri, ‘Ra lako ru o lako tul anundetul a wasiso i takai kut un tu utna, anundetul a wasiso i lingmulus.’ <sup>17</sup> Ra ken longoro der, un upuaso i torom a taro na lotu. Ra ken longoro bulung a taro na lotu, i wakak sur un tama i elar nam o naro ra ausur a tene nurnur, o elar nam o naro ra a tene los takis.

<sup>18</sup> “A inanos mot nama lingmulus, asau ra mot kubus i nin upiso, din kubus i kai sapat netes una langit, ma asau ra mot palos i nin upiso, din palos i kai sapat netes una langit. <sup>19</sup> A watungi kai tamot, ra lako ru tagun mot nin upiso der mulaot un tu utna ra der sasaring suri, o Tita ra i kis sapat una langit in pam soti ut torom der. <sup>20</sup> Ra lako ru o lako tul detul kis tomo una risang, iau an kis tomo nam detul.”

*A wasiso elelar una tultul ra ke ser marmaris*

<sup>21</sup> O Pita i wan torom o Iesu, ra i tingi lena, “Labino, an man iso udumano ru a sakino ra o tising i pami torom iau? Lako wonom mawit na dino ut?” <sup>22</sup> O Iesu i balu i lena, “Ausur a watungi tam lena a wonom mawit na dino kut. A watungi lena a wonom mawit na noino ma wonom mawit na dino.

<sup>23</sup> “Tama i, a matanitu tagisapat una langit i elar nam ara king, ra i nemi sur anun a kum tultul det in ukodos a mani ra det los papasi tano. <sup>24</sup> Ra i turpas a iting, di ben pat ara tultul toromi. A tultul ra i los pas a noino arip na kina, <sup>25</sup> ikut katu mani sur in balu i nami. Ra anun a labino i pitar a warkurai sur din siuru pas a musano ra,

\* 18:6 A wasiso Grik i lena “a kum natnatino”, a kukuraino lenri: a kum nat liklik, o det ra anundet a nurnur ke dekdek, o det ra a taro det tama pisopiso det. † 18:10-11: A ramano kum tene mananos una Buk Tabu det nuki lena a ramano kum wasiso kai i kis una rino ri. I lenri: *Uni a Nutun a Musano i wanpat sur in ulaun det ra det sa raro.* ‡ 18:15: A ramano kum tene mananos una Buk Tabu det nuki lena o Matiu ke tumus a wasiso ‘torom ui’. Det nuki lena taio gisen i tumus tari numur.

tomo nam anun a ino, ma a kum nutnutunu, ma anun a kum ututna rop, sur din balu a mani ra nami. <sup>26</sup> Ra a tultul ra i kis butkeke umatan anun a labino, ra i saringi lena, 'Un madek ru iau munung, numur an balu rop tar anum a kum mani.' <sup>27</sup> Ma a labino anun a tultul ra i marisi, ra i watungi tano lena, 'Un nan. Gong mukut u balu i.'

<sup>28</sup> "A tultul ra i pirso unago utamon, ra i barato pas ara tultul ra numugu i los pas a noino kina kut tano. I pam ukai pasi, i bing in kabarano, ra i watungi tano lena, 'Un balu tar anung a mani ra u los pasi.' <sup>29</sup> A pasano ra i kis butkeke umatano ra i saringi lena, 'Un madek ru iau munung, numur an balu melet tar anum a mani.' <sup>30</sup> Ikut ke longoro pasi. I beni kut ra i uruk tari una karabus, tuk una bung ra in balu tar a mani ra i los pasi. <sup>31</sup> Ra a kum paspasano det tama a kum petutna ra, det taramo laulau i. Det wan torom anundet a labino, ra det inanosi una kum utna ra a tultul ra i sa pam tari.

<sup>32</sup> "Anun a labino i kabo pasi, ma i watungi tano lena, 'Ui, a sakino tultul ui. A madek ru ui sur gong mo u balu a mani ra u los pasi tang, uni u saring iau. <sup>33</sup> I lai ra ko nem a pasam elar nam iau a nem ui?' <sup>34</sup> Anun a labino i kankan toromi, ra i pitar tari tan a kum tene tamtamabat tagun a karabus sur det in ukadik laulau i tuk in balu tari ut a mani ra i los pasi.

<sup>35</sup> "Ra ka mot in dumano ru a sakino petutna ra a kum tistisimot det pam tari torom mot, o Tita ra i kis sapat una langit in pami kai lenra torom mot taktakai."

## 19

### *Gong taio i kutus a nolin* (Mk 10:1-12)

<sup>1</sup> Ra o Iesu i sa watung rop tar a kum wasiso ri, i wan tagitong o Galili, utong una papor Judia, un ara papor danim Jodan. <sup>2</sup> Ma a labino kunur na taro det muri, ma i ulangolango pas a kum misait tiro iai. <sup>3</sup> A ramano kum Parisi det wan toromi sur det in lari. Det tingi lena, "I tokodos ut elar nam anundat a kum Warkurai sur a musano in lakro ru anun a ino un tu utna oros kut, o awu?" <sup>4</sup> I balu det lena, "Pepetlai, ka mot luk utmakai a wasiso una Buk Tabu? I watungi lenri: Una turturkibin a ukukis, a Tene Ukukis 'i ukis a taro, sur det in musano ma det in ino,'  
*Stat 1:27*

<sup>5</sup> ma i watungi lena, 'Iri a kibino ra a musano in nan gusun o tamano ma o nano, ma in kis tomo nam anun a ino, sur der in takai mukut.' *Stat 2:24*

<sup>6</sup> Ra ausur mo der aru, der takai mukut. Asau ra o God i sa kubus tomo tari, gong melet mo taio i kutusi."

<sup>7</sup> Det ting meleti lena, "I lai sur o Moses i pitar a warkurai sur a musano in pitar a dono buk na kutus nolin torom anun a ino, sur din palos ru a kinkinis na nolin?" <sup>8</sup> I balu det lena, "O Moses i mulaot ru mot sur mot in lakro ru anumot a kum wardain, uni a balamot i dekdek doko. Ikut una turturkibin a ukukis ausur i lenra. <sup>9</sup> A watungi tamot, osi ra in lu ru anun a ino ra ke pam tu sakino tomo nam tu musano gisen, ma a musano ra i nolin melet nam tu ino, a musano ra i pam a sakino."

<sup>10</sup> Ra anun a kum nat na ususer det watungi tano lena, "Ra i lenra, i wakak sur gong di nolin." <sup>11</sup> I balu det lena, "Ausur a taro rop ka det in nolin. Det kut ra o God i sa pitar tar a dekdek tandet. <sup>12</sup> Iri a kum kibino ra lako taro ka det in nolin: Ara taro di usus det lenutra. Ara taro, a taro det banlaulau det, ma ara taro kai, ka det nolin uni det balon una pinapam una matanitu tagisapat una langit. Osi ra in pet lar pasi, in mur a wasiso ri."

*O Iesu i ubek aru lamano netes una kum nat liklik*

(Mk 10:13-16; Lk 18:15-17)

<sup>13</sup> Di ben a kum nat liklik torom o Iesu sur in ubek aru lamano sapat netes un det ma in wararing un det. Ikut anun a kum nat na ususer det turbat det. <sup>14</sup> O Iesu i watungi lena, "Mot in madek ru a kum nat liklik sur det in nan torom iau. Gong mot turbat det, uni a matanitu tagisapat una langit anundet ra det lenri." <sup>15</sup> Ra i ubek tar aru lamano netes un det, numur i wan tagitiro.

*A tene gongon na barman*  
(Mk 10:17-31; Lk 18:18-30)

<sup>16</sup> Ara barman i wan torom o Iesu, ra i tingi lena, "Tene Ususer, osi na wakak na utna ra an pami sur an rakon a nilaun tukum?" <sup>17</sup> O Iesu i balu i lena, "Sur asau ra u ting iau un asau ra i wakak? Ara sot kut i wakak. Ra u nemi sur un ruk una nilaun tukum, un tarom una kum Warkurai." <sup>18</sup> Ra i tingi lena, "Osi na kum Warkurai?" O Iesu i balu i lena, "'Gong u um doko taio, gong u pam a sakino un tu ino anun taio, gong u

wolong, gong u etakun torotoro, <sup>19</sup> un ru o tamam ma o nam, *Kisim Bek 20:12-16* ma ‘un nem a pasam elar nami ra u nem ui ut.’” *Wok Pris 19:18*

<sup>20</sup> A barman ra i watungi tano lena, “A kum Warkurai rop ri a sa mur sot pasi. Asau melet mo an pami?” <sup>21</sup> O Iesu i balu i lena, “Ra u nemi sur un nanpat tokodos mulus, un nan ma un siuru ru anum a kum ululeng rop, ra a mani taguni, un tabor a kum sibo na taro nami. Ra un pami lenra, anum a wakak na ululeng kusapat una langit. Numur un nan urin ma un mur iau.” <sup>22</sup> Ra a barman i longoro a wasiso ri, i wan ma ikut ke gasgas, uni i labo doko anum a ululeng.

<sup>23</sup> Ra o Iesu i watungi tan anum a kum nat na ususer lena, “A inanos mot nama lingmulus, i ngangitin doko torom a tene gongon sur in ruk una matanitu tagisapat una langit. <sup>24</sup> A watungi kai tamot lena, in ngangitin sur a kamel in ruk una mato na sur na susuk, ikut, i ngangitin doko ut sur a tene gongon in ruk una matanitu anum o God. I lingmulus, ken pet lari.” <sup>25</sup> Ra anum a kum nat na ususer det longoro i, det kisin doko ma det watungi lena, “Ra i lenra, osi mo ra din ulauni?” <sup>26</sup> O Iesu i tamtama torom det ra i watungi lena, “A taro ka det in pet lar pasi, ikut o God sot kut in pet lar pas a kum utna rop.”

<sup>27</sup> O Pita i balu i lena, “Tama i, met sa wan gusun anumet a kum utna rop, ra met mur ui. Asau ra met in rakoni numur?” <sup>28</sup> O Iesu i watungi tandet lena, “A Nutun a Musano in kis na king una nun a kiskis na minamar ra din umatok a kum utna rop. A inanos mot nama lingmulus, una du bung ra, mot ra mot sa mur iau, mot in kis una noino ma aru kiskis na king, ma mot in warkurai a noino ma aru kabotaro Israel. <sup>29</sup> Ma det rop taktakai ra det sa wan gusun anundet a kum rumu, o gusun a kum tistisindet a kum musano ma a kum ino, o gusun a kum tamtamtandet, o a kum nanandet, o a kum nutnutundet, o gusun anundet a kum piso, uni det mur iau, din pitar a marmar na utna lenri tandet, ma det in rakoni kai a nilaun tukum. <sup>30</sup> Ikut a susut ra det mugu uniri, numur det in mur, ma det ra det mur uniri, numur det in mugu.”

## 20

*A wasiso elelar una kum tene pinapam una kinobot na wain*

<sup>1</sup> “A matanitu tagisapat una langit i elar nama taman a kinobot na wain, i pirso una kobot raut sur in iting sur lako kum tene pinapam sur det in papam una nun a kinobot na wain. <sup>2</sup> Det kubus wasiso tomo pas nama kum tene pinapam sur det in los a ikul tagun ara bung na pinapam, ra i tulu det sur anum a kinobot na wain. <sup>3</sup> Una lisu na pakano bung, i wan melet ra i tama pas ara taro bulung det tur ororos kut una nubual na inawan tomo. <sup>4</sup> Ra i watungi tandet lena, ‘Mot kai, mot in nan, ma mot in papam una nung a kinobot na wain, ma an tokom mot nam asau ra i tokodos.’ <sup>5</sup> Ra det wan.

“Una labino suan i wan ra i iting melet sur lako kum tene pinapam, ma una tulu pakano bung una lirop i wan melet sur lako taro. <sup>6</sup> Una limo na pakano bung una lirop i wan melet, ma i tama pas ara taro bulung det tur ororos kut. Ra i watungi tandet lena, ‘I lai ra mot tur ororos kut nin, a kudulano bung rop ri?’ <sup>7</sup> Det balu i lena, ‘Katutaio i ben met sur tu pinapam.’ I watungi tandet lena, ‘Mot kai mot in nan ma mot in papam una nung a kinobot na wain.’

<sup>8</sup> “Ra i sa lirop matano mirum, a taman a kinobot na wain, i watungi tan a mugu-mugu tagun anum a kum tene pinapam lena, ‘Kabo pas a kum tene pinapam urin, ma un tokom det. Det ra det wanpat murmur sakit un tokom mugu det. Numur un tokom imurmur a kum tene pinapam tuk un det ra det mugu pat.’ <sup>9</sup> A kum tene pinapam ra di ben pas det una limo na pakano bung det wanpat, ra di tokom det taktakai nama ikul tagun ara bung na pinapam. <sup>10</sup> Det ra di ben mugu pas det, det wanpat. Det nuki lena det in los a labino ikul. Ikut, awu! Det kai di tokom det taktakai nama ikul tagun ara bung na pinapam kut. <sup>11</sup> Ra det sa lolos pas, det ururai torom a taman a kinobot na wain, <sup>12</sup> det watungi lena, ‘Det ri ka det papam suanoi, ma met, met pam a dekdek na pinapam ma a suan i rang met, ikut u tokom det utkai elar nam met.’ <sup>13</sup> Ra i balu ara tandet lena, ‘Pasang, asur a bankaulau ui. Pepetlai, ka dar kubus pas a wasiso sur a ikul tagun ara bung na pinapam?’ <sup>14</sup> Los pas anum a mani, ma un nan. Iau ut a nemi sur an tokom det ra det wanpat murmur elar nam ui ra u mugu. <sup>15</sup> Pepetlai, ke sot sur an pam asau ra a nemi nam anung a mani? U nuknuk laulau un iau, uni a maris a taro ri?’ <sup>16</sup> I lenri, det ra

det mur uniri, numur det in mugu, ma det ra det mugu uniri, numur det in mur.”

*O Iesu i mantul u wasiso una nun a minat  
(Mk 10:32-34; Lk 18:31-34)*

<sup>17</sup> Ra o Iesu i wan nanan usapat o Jerusalem, i ben gisen pas anun a noino ma aru nat na ususer, ma i watungi tandet lena, <sup>18</sup> “Tama i, iri dat wan nanan usapat o Jerusalem. Din pitar a Nutun a Musano torom a kum lamlabino tene etabor torom o God ma a kum tene ususer tagun a Warkurai. Det in warkurai i sur in iru, <sup>19</sup> ma det in pitar tari torom det, ra asur a taro Juda sur det in urongon laulau uni, det in mirasi, ma det in sak wati un in nanai kutus. Ra a tulu bung in rop in katutur melet.”

*A nan o Jon ma o Jems i saring o Iesu  
(Mk 10:35-45)*

<sup>20</sup> Numur a nan aru nutnutun o Sebedi i wan torom o Iesu nam aru nutnutunu. I kis butkeke umatano ma i saringi sur in tarom una nun a nemnem. <sup>21</sup> Ma o Iesu i tingi lena, “Asau ra u nemi?” Ra i balu i lena, “Un mulaot sur aru nutnutung ri, der in kis tomo nam ui una num a matanitu, ara una sot na lamam, ma ara pasander una kair, ma motul in warkurai tomo.” <sup>22</sup> O Iesu i balu i lena, “Ka motul tasman asau ra motul sasaring suri. Pepetlai, in elar sur mur kai mur in inum una kap na mamaut ra an inum uni?” Der balu i lena, “Mir in pet lar pasi kut.” <sup>23</sup> I watungi tander lena, “A lingmulus ut, a kap na mamaut ra an inum uni, mur kai mur in inum uni. Ikut a kinkinis una sot na lamang ma una kair, asur iau, a warkurai sur an pitari. O Tita in pitari torom det ra i sa waninar tari sur det.”

<sup>24</sup> Ra a noino nat na ususer det longoro i, det kankan torom dersino ra. <sup>25</sup> O Iesu i kabo tomo pas det, ra i watungi lena, “Mot tasmani lena a kum tene warkurai anun a taro ra asur a taro Juda, det kuro laulau a taro. Ma anundet a kum mugumugu kai det pitar a kum dekdek na warkurai torom anundet a taro. <sup>26</sup> Ikut torom mot ken lenra. Osi ra i nemi sur in labo taun mot, in unatino pasi sur in tultul anumot. <sup>27</sup> Ma osi ra i nemi sur in mugumugu anumot, in papam oros kut torom mot ma ka din kuli. <sup>28</sup> Lenkutkai ra a Nutun a Musano ke wanpat sur din papam toromi. I wanpat sur i ut in papam torom a taro, ma in pitar tar anun a nilaun, a ikul, sur in kul langolango pas a susut na taro.”

*O Iesu i utamtama pas aru pulu  
(Mk 10:46-52; Lk 18:35-43)*

<sup>29</sup> O Iesu ma anun a kum nat na ususer det wan tagitong o Jeriko, a labino kunur na taro det mur det. <sup>30</sup> Aru musano aru pulu der kis taru una papor ina kisapi. Ra der longoro i lena o Iesu i wan nanan milau, der kakabo sapat lena, “Labino, a Nutun o Dewid, un maris mir.” <sup>31</sup> Ma a kunur na taro det turbat der sur der in kis wowowon. Ikut der kakabo dekdek makai usapat, “Labino, a Nutun o Dewid, un maris mir.” <sup>32</sup> O Iesu i tur sikot, ra i kabo pas der, ma i ting der lena, “Asau ra mur nemi sur an pami un mur?” <sup>33</sup> Der balu i lena, “Labino, mir nemi sur mir in tamtama.” <sup>34</sup> O Iesu i maris doko der, ra i pam arin mander. Uniutra der tamtama, ma der muri.

## 21

*O Iesu i wan usapat o Jerusalem elar nama king*

*(Mk 11:1-11; Lk 19:28-40; Jn 12:12-19)*

<sup>1</sup> Ra det wan milau o Jerusalem, det wanpat sapat o Betpage una Tangai na Oliw, o Iesu i tulu aru nat na ususer. <sup>2</sup> I watungi tander lena, “Mur in nan sur a tamon kusa numugu tamur. Ra mur in nanpat, uniutra mur in tama ara dongki kura di ker ukai tari, tomo nama nutunulik. Mur in palos pas der, ma mur in ben der urin torom iau. <sup>3</sup> Ra taio in ting mur un der, mur in watungi lena, ‘A Labino i nem der,’ ra uniutra in madek ru der torom mur.” <sup>4</sup> Di pam a utna ri sur din pam sot pas a wasiso anun o God ra a poropet i sa watung tari numugu lena, <sup>5</sup> “Mot in inanos a taro Saion lena, “Tama i, anumot a king uniri i wanpat torom mot,

i unatino pasi, ma i kas una dongki, a barman na dongki.” *Sekaraia 9:9*

<sup>6</sup> Aru nat na ususer der wan, ma der pami elar nama wasiso ra o Iesu i sa watung tari tander. <sup>7</sup> Der ben pas a dongki tomo nama nutunu, der rakon ru anundet aru saket, ma der ubek tari netes una aru dongki, ra o Iesu i kas un der. <sup>8</sup> A labino kunur na taro kai det rakon ru anundet a kum saket, ma det talaso i una kisapi. Ma ara taro kai det tau pas a kum turunu duwai ma det ubek tari una kisapi. <sup>9</sup> A kunur na taro ra det mugu tano, ma det kai ra det mur, det kukukuk lena,

“Osana torom a Nutun o Dewid!

O naro ra i wanpat nama risan a Labino i dan!” *Buk Song 118:25-26*

“Osana usapat netes sakit!”

<sup>10</sup> Ra o Iesu i wanpat sapat o Jerusalem, a taro Jerusalem rop det kisin ra det iting lena, “Osi ra?” <sup>11</sup> Ra a taro ra det wan tomo nam i det watungi lena, “A musano ri i o Iesu, a poropet tagitong o Nasaret una papor Galili.”

*O Iesu i ruk una rumu na etabor  
(Mk 11:15-19; Lk 19:45-48; Jn 2:13-22)*

<sup>12</sup> O Iesu i ruk una ara dino tagun a rumu na etabor, ra i lu ru pirso a taro rop ra det siuru, ma det kai ra det kukul tiro iai. I woro bulus ru a kum kabulu anun a kum tene keles mani\*, ma a kum kiskis anundet ra det siuru a kum tabun. <sup>13</sup> Ma i watungi tandet lena, “Di sa tumus tari una Buk Tabu lenri, ‘Din watung anung a rumu nama rumu na niaring.’ *Aisaia 56:7* Ikut mot sa pam pukus pasi sur in elar mukut nama ‘nubual na parparau anun a kum tene wolong.’” *Jer 7:11*

<sup>14</sup> A kum pulu ma det ra a kikindet i mat det wan toromi una rumu na etabor ma i ulangolango pas det. <sup>15</sup> Ra a kum lamlabino tene etabor torom o God ma a kum tene ususer tagun a Warkurai det tama a wakak na utna sakit ri i pami, ra det longoro i kai a kum nat liklik det kukukuk una dino na rumu na etabor lena, “Osana torom a Nutun o Dewid,” det kankan doko. <sup>16</sup> Ra det ting o Iesu lena, “U sa longoro tar a kum wasiso ri anun a kum nat liklik?” O Iesu i balu det lena, “Ma! Pepetlai, ka mot luki utmakai a wasiso tagun a Buk Tabu? I watungi lena, ‘U sa ususer tar a kum nat liklik sur det in watung ulabo pas ui.’” *Buk Song 8:2*

<sup>17</sup> Ra i wan gusun det tiro iai, ra i wan utong o Betani ra i inep pas ara bung na mirum tong.

*O Iesu i bor in nanai na fig  
(Mk 11:12-14, 20-24)*

<sup>18</sup> Una kobot raut o Iesu i milet melet usapat o Jerusalem, ra i murak. <sup>19</sup> I tama pas in nanai na fig i tur taru una papor ina kisapi, ra i wan milau i. Ikut ke tama lako wino, a dondono rop kut. Ra i watungi torom in nanai ra lena, “Turpasi uniri ma numur, kon wu melet mo.” Uniutra, in nanai i marang.

\* 21:12: A mani anun a gapman Rom det ser ruk nami una rumu na etabor, ra det kelesi sur a mani sur det in kul a takis nami tagun a rumu na etabor.

<sup>20</sup> Ra a kum nat na ususer det tama i, det kisin, ra det tingi lena, “In nanai na fig ri, i marang lakit lai?” <sup>21</sup> O Iesu i balu det lena, “A inanos mot nama lingmulus, ra mot nurnur, ma ka mot in wur nuknuk, mot in pam a pinapam ri a pami un in nanai na fig. Ausur i kut ri ra mot in pami, awu. Ra mot in watungi kai torom a tangai ri lena, ‘Un taragot ma un sirok losop usa utasi,’ in pami kut. <sup>22</sup> Ra mot nurnur, a kum utna rop ra mot wararing suri, din pitari ut torom mot.”

*A iting una dekdek ra o Iesu i ser papam nami  
(Mk 11:27-33; Lk 20:1-8)*

<sup>23</sup> O Iesu i ruk una rumu na etabor, ma i ususer a taro. A kum lamlabino tene etabor torom o God ma a kum mugumugu anun a taro det wan toromi. Ra det tingi lena, “Asi na ngas na dekdek ra u pam a kum utna ri nami? Osi ra i pitar tar a dekdek ri tam?” <sup>24</sup> Ra o Iesu i balu det lena, “Iau kai an ting mot nam ara iting. Ra mot in balu i, an inanos mot una dekdek ra a ser pam a kum utna ri nami. <sup>25</sup> Tagai a dekdek ra o Jon i baptaiso a taro nami? Tan o God, o tan a taro kut?”

Ra det wasiso etetalai torom det lena, “Ra dat in watungi lena, ‘Tan o God,’ in balu dat kut lena, ‘Sur asau ra ka mot nurnur uni?’ <sup>26</sup> Ikut ra dat in watungi lena, ‘Tan a taro,’ dat ngaran a taro, sako det in kankan torom dat, uni det rop det nurnur un o Jon lena, i a poropet.” <sup>27</sup> Ra det balu o Iesu kut lena, “Ka met tasmani.” Numur o Iesu i watungi tandet lena, “Iau kai, kan inanos mot una dekdek ra a ser pam a kum utna ri nami.”

*A wasiso elelar una ru nutnutun a musano*

<sup>28</sup> O Iesu i inanos det lena, “Asau mot nuki? Ara musano aru nutnutunu, aru nat musano. I wan torom a mugano, ra i watungi tano lena, ‘Nutunglik, uniri un nan sur a kinobot na wain ma un papam.’ <sup>29</sup> Ra o nutunulik i watungi lena, ‘Iau kan nan,’ ikut numur i pukus melet a nuknukino, ra i wan. <sup>30</sup> Ra o tamano i wan bulung torom ara pasander, ra i inanos utkai lenra, ra a nutunulik i balu i lena, ‘I wakaak kut tita, an nan ut,’ ikut ke wan. <sup>31</sup> Osi na pasander ra i tarom tan a tamander?” Det balu i lena, “A mugano.”

O Iesu i watungi tandet lena, “A inanos mot nama lingmulus, a kum tene los takis ma a kum pamuk na ino, kuri det ruk mugu nanan tamot, una matanitu anun o God.”<sup>32</sup> O Jon i wanpat ra i ususer mot una tokodos na petutna, ra ka mot nurnur uni, ikut a kum tene los takis ma a kum pamuk na ino det nurnur uni. Mot tama tar det ut, ikut ka mot nukpukus kai sur mot in nurnur uni.”

*A wasiso elelar una kum tene pinapam una kinobot na wain*

*(Mk 12:1-12; Lk 20:9-19)*

<sup>33</sup> “Mot in longoro ara wasiso elelar bulung ri: Ara musano i marut tar a kinobot na wain, ra i pam bat tari nam in noworo. Tiro ubalan a kinobot, i kil tar in nutung sur din pas ginogino a wain uni sur a polono in nanpat. Ma i pam tar a nat na rumu lekeleke sur a tene tamtamabat. Numur i pitar tar a kinobot munung tan a ramano kum tene pinapam sur det in tamtamabati, ra i wan sur ara tamon gisen. <sup>34</sup> Ra i milau a kalang sur din git tomo a wino wain, i tulu ru anun a kum tultul torom a taro na pinapam, sur det in los pas anunu lako wino wain. <sup>35</sup> A taro na pinapam ra, det pam ukai pas anun a kum tultul, det um ara, det um doko ara ma ara kai det duku doko i nama kum watat. <sup>36</sup> I tulu melet anun a ramano kum tultul, det susut tandet ra det mugu, ikut a taro na pinapam det pam meleti kut lenra na det. <sup>37</sup> Numur i tulu ru ut a nutunulik torom det, uni i nuki lena det in urur uni. <sup>38</sup> Ikut, ra a taro na pinapam det tama pas o nutunulik det wasiso tomo pas lena, ‘I ra in keles o tamano, i mo ra i wan urin. Mot iap, dat in um doko i, sur anundat mo a kinobot na wain.’ <sup>39</sup> Ra det pam ukai pasi, det sugut pirso ru i tagun a kinobot, ma det um doko ru i.”

<sup>40</sup> Numur o Iesu i ting a taro lena, “Ra a taman a kinobot na wain in nanpat, asau ra in pami torom a taro na pinapam?” <sup>41</sup> Det balu i lena, “In um doko rop ru a sakino taro ra, ma in pitar tar anun a kinobot na wain torom lako taro na pinapam gisen, sur det in tamtamabati. A taro na pinapam maragom ra, det in pitar tar anunu lako wino wain toromi una kalang na ngigit.”

<sup>42</sup> O Iesu i watungi tandet lena, “Pepetlai, ka mot luk a wasiso ri una Buk Tabu? I watungi lena,

‘A wat ra a kum tene pam rumu det lakro ru tari,  
i ut ra, a wakak na wat ra i udekdek a rumu.

A utna ri, a Labino ut i sa pam tari,  
ma i wakak sakit una numet a tam-  
tama.’

*Buk Song*  
118:22-23

<sup>43</sup> I mo ra a watungi tamot lena, din rakon ru a matanitu anun o God gusun mot, ma din pitar tari tan ara taro ra det in wu a wakak na windet.” <sup>44</sup> Osi ra in puku taru una wat ri, in tiginogino, ma osi ra a wat ri in puku taru uni, in tiginogino rop elar nama kubus.†

<sup>45</sup> Ra a kum lamlabino tene etabor torom o God ma a kum Parisi det longoro a kum wasiso elelar anun o Iesu, det tasmani ut lena i wasiso kut un det. <sup>46</sup> Ra det sisio sur tu kisapi sur det in pam ukai pasi uni, ikut det ngaran a kunur na taro, uni a taro det nurnur uni lena i a poropet.

## 22

*A wasiso elelar una lukaro na unolin*  
*(Lk 14:15-24)*

<sup>1</sup> O Iesu i wasiso melet torom det nama wasiso elelar lenri, <sup>2</sup> “A matanitu tagisapat una langit i elar nama king ra i sa waninar tar a lukaro na unolin sur o nutunu, a musano. <sup>3</sup> Ra i tulu ru anun a kum tultul torom det, ra di sa inanos mugu tar det, sur det in ben pas det sur a lukaro. Ikut det putut rop kut. <sup>4</sup> I tulu ru i bulung anun a ramano kum tultul gisen nama wasiso lena, ‘Mot in inanos det ra di sa inanos mugu tar det lena, “A sa waninar rop tar a utna na inangon. A sa um doko tar a kum bulumakau ma a kum matok na butbut na bulumakau, a kum utna i sa waninar rop. Mot in nan urin una lukaro na unolin.”’

<sup>5</sup> “Ikut ka det tarom, det wan gisgisen kut. Ara i wan sur ana kinobot, ara kai sur anun a rumu na siuru. <sup>6</sup> Ma ara taro kai ra di wan sur det, det pam ukai pasi kut a kum tultul, ma det banlailau det ma det um doko det. <sup>7</sup> A king ra, in balano i sungun doko, i tulu ru anun a taro na inaim, ra det um doko ru a kum tene umum doko taro ra, ma det tun ru anundet a tamon.

<sup>8</sup> “I watungi melet tan anun a kum tultul lena, ‘Di sa waninar tar a lukaro na unolin, ikut det ra di sa inanos mugu tar det, ka det tokodos sur det in kis una lukaro.

† 21:44: A ramano kum tene mananos una Buk Tabu det nuki lena o Matiu ke tumus a rino 44. Det nuki lena taio gisen i tumus tari numur.

<sup>9</sup> Mot nan una kum kisapi ma osi ra mot in etoromi, mot in inanos lina in nan urin sur a lukaro.’ <sup>10</sup> Ra a kum tultul det wan una kum kisapi, ma det ben tomo det rop ra det etorom det, a kum sakino taro ma a kum wakak na taro kai, ma a lukaro na unolin i bukus nam det.

<sup>11</sup> “Ra a king i ruk sur in tama a taro, i tama torom pas ara musano ra ke emar nam tin namalu na lukaro na unolin. <sup>12</sup> Ma i tingi lina, ‘Le, u ruk lai taru urin? Uni ka num tin namalu na lukaro na unolin.’ A musano ra ke balu i. <sup>13</sup> Ra a king i watungi tan anun a kum tultul lina, ‘Mot in ker pas aru kikino ma aru lamano ma mot in woro pirso ru i unago utamon una dumirum. Tiro iai di tangtangis ma di ungingit lokondi iai.’

<sup>14</sup> “Di sa kabo pas a susut, ikut di pilok pas a pak na taro mukut.”

*A iting una takis*

*(Mk 12:13-17; Lk 20:20-26)*

<sup>15</sup> Numur a kum Parisi det wan tomo taru, ra det epak pas lina det in lar o Iesu sur tu wasiso anunu, ra det in takuni nami. <sup>16</sup> Det tulu ru anundet a kum nat na ususer tomo nama kum paspasan o Erod torom o Iesu, ma det watungi lina, “Tene Ususer, met tasmani lina ui a tokodos na musano, ma u ususer a taro una kisapi anun o God nama lingmulus. Ko nuknuk bing un asau ra a taro det watungi un ui, uni a magiram i takai kut torom a taro rop. <sup>17</sup> Un inanos met, asau a nuknukim? I tokodos sur din pitar a takis torom a Sisa\* o awu?”

<sup>18</sup> Ikut, o Iesu i tasmani lina, a nuknukindet i laulau, ra i watungi tandet lina, “Mot a kum tene torotoro, ilai ra mot nemi sur mot in lar iau? <sup>19</sup> Mot in ese iau nam tu mani na takis.” Ra det pitar tar a mani tano. <sup>20</sup> Ma i ting det lina, “In masarin osi ri, ma a tumtumus ri uni anun osi?” <sup>21</sup> Det balu i lina, “Anun a Sisa.” Ra i watungi tandet lina, “Asau ra anun a Sisa, mot in pitari torom a Sisa. Ma asau ra anun o God, mot in pitari torom o God.” <sup>22</sup> Ra det longoro i, det kisin doko ma det wan gusuni.

*A iting una nilaun melet gusun a minat*

*(Mk 12:18-27; Lk 20:27-40)*

<sup>23</sup> Una bung ut ra a kum Sadusi, ra det ser ipul kut lina katu nilaun melet gusun a minat, det wan torom o Iesu, ma det tingi lina,

<sup>24</sup> “Tene Ususer, o Moses i watungi lina, ra

tu musano in mat pas gusun anun a ino, ma katu nutunder, o tisinolik in ben pasi ra in nolin nami, sur in ulabo tar lako kum nat una risan o tisinoro ra i sa mat. <sup>25-26</sup> Ara kabo tisinoro a wonom mawit na musano det, det kis epotor tamet. A mugano i nolin, ra i mat pas gusun anun a ino, ma katu nutunder. Ra a murmur tano bulung i nolin nama ino ra, ma i bulung i mat kut gusuni. Numur a mantul na tisinoro bulung. Ra i lenra torom a wonom mawit, det rop det nolin nami, ikut katu nutun tu pasandet. <sup>27</sup> Ra numur a ino bulung i mat.

<sup>28</sup> “Una nilaun melet gusun a minat, a ino ra, anun osi na pasandet mo tagun a wonom mawit ra? Uni det rop det sa nolin pas nami.”

<sup>29</sup> O Iesu i balu det lina, “Mot raro doko, uni ka mot tasman a Buk Tabu ma a dekdekin o God kai. <sup>30</sup> Una nilaun melet gusun a minat, ka det in nolin melet mo, det in elar mukut nama kum ensel sapat una langit. <sup>31</sup> Ra mot ipul lina a kum minat ka det in katuttur melet gusun a minat, pepetlai, ka mot luki utmakai a wasiso ra o God i sa watung tari tamot? I watungi lina, <sup>32</sup> ‘Iau a God anun o Abaram, a God anun o Aisak ma a God anun o Jekop.’ *Kisim Bek 3:6* O God ausur a God anun a kum minat, i a God anundet ra det laun.” <sup>33</sup> Ra a kunur na taro det longoro i, det kisin doko una nun a ngas na etowo.

*A warkurai ra i labo sakit*

*(Mk 12:28-34; Lk 10:25-28)*

<sup>34</sup> A kum Parisi det longoro i lina, o Iesu i sa duku sot pas a kum Sadusi, ra det wan tomo toromi. <sup>35</sup> Ma ara pasandet, a tene mananos tagun a Warkurai, i lari nama iting lina, <sup>36</sup> “Tene Ususer, asi na warkurai ra i labo sakit tandet rop?” <sup>37</sup> Ma i balu i lina, “Un nem a Labino anum a God nam in balam rop, a niom rop, ma a nuknukim rop.” *Lo 6:5*

<sup>38</sup> A warkurai ri i labo sakit tandet rop, ma i a mugano warkurai. <sup>39</sup> Ma iri i a manru na warkurai, ra i ling na elar nami, ‘Un nem a pasam elar nami, ra u nem ui ut.’ *Wok Pris 19:18*

<sup>40</sup> Aru warkurai ri, der a kimkibin a kum wasiso na Warkurai rop anun o Moses ma a kum etowo anun a kum poropet.”

*A Karisito i a Labino anun o Dewid*

*(Mk 12:35-37; Lk 20:41-44)*

\* 22:17. A Sisa i a labino mugumugu una gapman Rom, ma a taro Israel kai det kis utuntudu ina nun a warkurai.

<sup>41</sup> Ra a kum Parisi det kis tomo, o Iesu i ting det lena, <sup>42</sup> “Asau ra mot nuki una Karisito? I a nutun osi?” Det balu i lena, “A nutun o Dewid.” <sup>43</sup> O Iesu i watungi tandet lena, “Ra in lenra, ilai ra a Tokodos na Nion i mugu o Dewid ra i watung a Karisito lena ‘anung a Labino’? Uni o Dewid i watungi lena,

<sup>44</sup> “A Labino i watungi torom anung a Labino, “Un kis una papor sot na lamang,

tuk ra an winim pas anum a kum ebar  
sur det in kis utuntudu ina num a  
warkurai.”’ Buk Song 110:1

<sup>45</sup> O Dewid i watung a Karisito lena i anun a Labino. Ra i lenra, der tamano pepetlai?”

<sup>46</sup> Ma kataio i nuk pas tu wasiso melet sur in balu i nami. Turpasi una bung ra, kataio melet mo i wan toromi nam tu iting, uni det ngara.

## 23

*A magiran a kum Parisi ma a kum tene ususer tagun a Warkurai*

(Mk 12:38-39; Lk 11:43, 46; 20:45-46)

<sup>1</sup> Numur o Iesu i watungi tan a kunur na taro ma anun a kum nat na ususer lena, <sup>2</sup> “A kum tene ususer tagun a Warkurai ma a kum Parisi det ususer a taro nama kum Warkurai elar nami ra o Moses i pami. <sup>3</sup> A kum utna rop ra det ususer mot uni, mot in tarom uni, ma mot in pami. Ikut, gong mot mur anundet a ngasino, uni ka det pam asau ra det watung tari. <sup>4</sup> Det pitar tar a kum warkurai ra i ngangitin sur a taro det in muri, ikut det ut, ka det warut det uni. <sup>5</sup> Anundet a kum pinapam rop, det pami kut, sur a taro det in tama det. I perere bing anundet a kum boks liklik ra det ser uruk tar a kum du Buk Tabu uni ma det keru una kum masasaridet. I walos bing anundet a kum kulo ra kura una sinisir ina nundet a kum malu na niaring. <sup>6</sup> Det nem a kinkinis na labino sa numugu una kum lukaro, ma a kinkinis kai sa numugu una kum rumu na lotu. <sup>7</sup> Ma det nemi sur a taro det in pitar a labino urur torom det una kum nubual na inawan tomo, ma det in watung det kai nama kum tene ususer.

\* 23:13-14: A ramano kum tene mananos una Buk Tabu det nuki lena a ramano kum wasiso kai i kis una rino ri. I lena: *In laulau doko torom mot a kum tene ususer tagun a Warkurai ma a kum Parisi, mot a kum tene torotoro. Mot wrop a kum ululeng anum a kum ula, ma mot pam a kum walalos na niaring sur a taro det in tama mot. In labo sakit a warkurai na minabalu anum o God torom mot.*

<sup>8</sup> “Ikut, gong di watung mot a kum tene ususer, uni ara Tene Ususer sot kut anu-mot. Ma mot, mot nisisino. <sup>9</sup> Ra gong mot tar tamamot una taio taginin upiso, uni ara Tamamot sot kut, ra i kis sapat una langit. <sup>10</sup> Ma gong di watung mot kai a kum mugumugu, uni ara sot kut anumot a mugumugu, a Karisito kut. <sup>11</sup> Ma osi ra i labo tamot, in unatino pasi, ma in tarom lu mot. <sup>12</sup> Uni osi ra i ulabo pasi, din unatino i. Ma osi ra i unatino pasi, din ulabo i.”

*O Iesu i wasiso una magiran a kum Parisi ma a kum tene ususer tagun a Warkurai*

(Mk 12:40; Lk 11:39-42, 44, 47-52; 20:47)

<sup>13-14</sup> O Iesu i watungi lena, “In laulau doko torom mot a kum tene ususer tagun a Warkurai ma a kum Parisi, mot a kum tene torotoro. Mot tagar bat a taro sur gong det ruk una matanitu tagisapat una langit. Ma mot ut, ka mot ruk uni, ma ka mot madek a taro ra det nem na ruk, sur det in ruk.\*

<sup>15</sup> “In laulau doko torom mot a kum tene ususer tagun a Warkurai ma a kum Parisi, mot a kum tene torotoro. Mot wan tupupukus sa utasi ma sa ubual, sur mot in dat pukus taio, sur in nanpat a nat na ususer anumot. Ra i sa tarom, mot tarai taru uni, sur in nan una labino sungun, ma anun a sakino petutna in labo tan anumot a sakino petutna.

<sup>16</sup> “In laulau doko torom mot a kum pulu na mugumugu, uni mot watungi lena, ‘Ra taio i liliman nama rumu na etabor, ke maut, ikut ra taio i liliman nama gol una rumu na etabor, i ra i lingmulus.’ <sup>17</sup> Mot a kum longlong na pulu! Asau ra i labo tander? A gol, o a rumu na etabor? A rumu na etabor! Uni a gol ra i kis una rumu na etabor in nanpat a utna anum o God, uni a rumu na etabor i utalapor. <sup>18</sup> Mot watungi kai lena, ‘Ra taio i liliman nama kabulu na tuntun etabor, ke maut, ikut ra taio i liliman nama etabor ra di ubeki uni, i ra i lingmulus.’ <sup>19</sup> Mot a kum pulu! Asau ra i labo tander? A etabor, o a kabulu na tuntun etabor? A kabulu na tuntun etabor! Uni a etabor ra i kis una kabulu na tuntun etabor in nanpat a utna anum o God, uni a kabulu na tuntun etabor i utalapor i. <sup>20</sup> Ra taio i liliman nama kabulu na tuntun etabor, i

liliman utkai nama kum utna rop ra kura uni. <sup>21</sup>Osi ra i liliman nama rumu na etabor, i liliman utkai nam o God ra i kis uni. <sup>22</sup>Ra taio i liliman nama langit, i liliman ut nama kiskis na king anun o God, ma i liliman utkai nam o naro ra i kis uni.

<sup>23</sup>"In laulau doko torom mot a kum tene ususer tagun a Warkurai ma a kum Parisi, mot a kum tene torotoro. Mot nuknuk doko sur a kum natnat na warkurai lenri, mot pitar in tekteken nanai torom o God tagun a noino natnat na duwai ra i sangsangnain wakak tagun anumot a kinobot, ikut ka mot nuk pas a kum lamlabino utna una kum warkurai. Iri a kum lamlabino utna: a tokodos na warkurai, ma a marmaris torom a taro, ma a lingmulus na petutna. I wakak sur mot in pam a kum utna ra, ma gong kai mot dumanu ru in tektekene tagun a noino, sur mot in pitari torom o God. <sup>24</sup>Mot a kum pulu na mugumugu! Ra mot inum, mot rakon ru a sinip gusun a kap, ikut, a kamel ra kura una kap, mot inumi kut!

<sup>25</sup>"In laulau doko torom mot a kum tene ususer tagun a Warkurai ma a kum Parisi, mot a kum tene torotoro. Mot gosgos pasi kut a surun a kap ma a pelet, ikut a balander i bukus nama petutna na ungongos pas a utna tan taio, ma a ngasino ra ara i nuk pasi ut. <sup>26</sup>Ui a pulu na Parisi! Un dur mugu pas a balan a kap ma a pelet, sur in talapor kai a surunder.

<sup>27</sup>"In laulau doko torom mot a kum tene ususer tagun a Warkurai ma a kum Parisi, mot a kum tene torotoro. Mot elar nama kum kulam na minat ra di pen tar det. Ra di tama det taginago upiso det wakak, ikut tiro ubalandet i bukus nama kum sursur na minat ma a kum utna rop ra i dur. <sup>28</sup>Lenkutkai ra, a taro det tama a pinimot lena, mot a kum tene tokodos, ikut a bal-amot i bukus nama torotoro, ma a kum sakino petutna.

<sup>29</sup>"In laulau doko torom mot a kum tene ususer tagun a Warkurai ma a kum Parisi, mot a kum tene torotoro. Mot utur a kum aim nisan a kum kulam na minat anun a kum poropet, ma mot mar a kum tung na minat anun a kum tene tokodos. <sup>30</sup>Ma mot watungi lena, 'Gunuk ra met sa laun tomo numugu nama kum tumtubumet, ka met in warut det ra det um doko a kum poropet.' <sup>31</sup>Ikut uniri mot upuaso mot ut lena, mot a kum tumtubundet ra det um doko a kum poropet. <sup>32</sup>Mot mo, mot in urop a kum

sakino petutna ra a kum tumtubumot det sa ukatutur tari numugu.

<sup>33</sup>"Mot a kum sui! Mot a kum nutnutun a kum laulau na sui! Mot in kalabor eno pepetlai gusun a warkurai na minabalu una labino sungun? <sup>34</sup>Uniri an tulu ru a kum poropet, a kum tene mananos, ma a kum tene ususer torom mot. Lako taro tagun det, mot in um doko det, ma lako taro, mot in sak wat det una kum nanai kutus, ma lako taro kai, mot in um det una numot a kum rumu na lotu, ma mot in lu ru det gusun anumot a kum tamon, ma det in kalabor sur a kum tamon gisen. <sup>35</sup>Din pitar a warkurai na minabalu torom mot, una gapin a kum tene tokodos rop, ra di sa um doko tar det. Turpasi ra di um doko o Abel, a tene tokodos, ma i wan tuk ra di um doko o Sekaraia, a nutun o Berekia, i ra mot um doko i epotor nisan a kabulu na tuntun etabor ma a nubual ra i Tabu, tiro urumu una rumu na etabor. <sup>36</sup>A inanos mot nama lingmulus, din pitar a warkurai na minabalu torom a taro tagun uniri una kum utna rop ri.

*O Iesu i maris o Jerusalem*

*(Lk 13:34-35)*

<sup>37</sup>"Jerusalem, Jerusalem, ui ra u ser um doko a kum poropet, ma det ra di tulu ru det torom ui, u duku doko ru det kut nama watat. A susut na dino a nem na ben tomo a kum nutnutum elar nama kereke ra i rakup bat tomo a kum nutnutunu utuntudu ina ru mebene, ikut ka mot nemi. <sup>38</sup>Tama! O God i sa wan gusun anumot a tamon. <sup>39</sup>Uni a inanos mot lena, ka mot in tama melet iau mo tuk una bung ra mot in watungi lena, 'O naro ra i wanpat nama risan a Labino i dan.'" *Buk Song 118:26*

## 24

*A kum ukinalong ra in ese a tintinip na bung*

*(Mk 13:1-13; Lk 21:5-19)*

<sup>1</sup>O Iesu i pirso gusun a rumu na etabor. Ra i wan nanan, anun a kum nat na ususer det wan toromi, ma det inanosi sur in tama a kum rumu nisan a rumu na etabor. <sup>2</sup>Ra i watungi tandet, "Mot tama i ut a kum rumu ri, niko? A inanos mot nama lingmulus, numur din rege ginogino det rop, ma katu wat in inep netes un tu wat."

<sup>3</sup>Ra o Iesu i kis sapat netes una Tangai na Oliw, a kum nat na ususer det wanpat eno toromi, ma det watungi tano lena, "Un

inanos met, nangisin mo a kum utna ri in nanpat? Ma asi na ukinalong ra in ese anum a milmilet ma a tintinip ina rakrakon bual?" <sup>4</sup> O Iesu i balu det lena, "Mot in tumarong, sako taio in toro pas mot. <sup>5</sup> Uni a susut det in nanpat nama risang, ma det in warango det lena, 'Iau a Karisito,' ra det in toro lako susut na taro. <sup>6</sup> Mot in longoro a kum inaim ma a kum inarang na inaim, ikut gong mot lai taru. A kum utna lenri det in nanpat, ikut a tintinip ina rakrakon bual kura utmakai. <sup>7</sup> A kum kabotaro det in tur na inaim torom a kum se kabotaro, ma ara gapman in tur na inaim torom ara gapman. A kum lamlabino munurak, ma a kum guri in nanpat una kum tamon. <sup>8</sup> A kum utna rop ri, i elar nama kum mugano ngunungut, ra i ser wanpat una ino ra i ling na usus.

<sup>9</sup> "Kura numur, din pitar mot sur din banlaulau mot, ma din um doko mot, ma a kum kabotaro rop det in nget mot, uni mot anungi. <sup>10</sup> Una kum bungbung ra, a susut det in nan gisen gusun a nurnur. Det in pitar etetalai det torom a kum ebar, ma det in nget etetalai det. <sup>11</sup> A susut na torotoro na poropet kai det in nanpat, ma det in toro pas a susut na taro. <sup>12</sup> A marmaris anum lako susut in rop, uni a kum sakino petutna in labo nanan. <sup>13</sup> Ikut osi ra in tur dekdek tuk una tintinipino, o God in ulauni. <sup>14</sup> Din warawai nama Wakak na Wasiso una matanitu anum o God torom a taro tagun a rakrakon bual rop, sur a wasiso talapor in nan torom a kum kamkabo taro rop, numur a tintinip na bung in nanpat maragom.

*A utumarong una sakino utna ra in nanpat (Mk 13:14-23; Lk 21:20-24)*

<sup>15</sup> "Mot in tama ara sakino utna sakit in nanpat, in kis una rumu anum o God ra in ban udur a rumu ra. A utna ra, o Daniel a poropet i sa wasiso mugu taru uni numugu utmakai. Osi ra in luk a kum wasiso ri, i wakak sur in mananos uni. <sup>16</sup> Una bung ra, det ra det kis una papor Judia, det in kalabor eno usapat una kum tangai. <sup>17</sup> Ra taio in kis sapat netes una nun a rumu \*, ra in pirso, gong i ruk sur in los pas tu utna tagisa urumu. <sup>18</sup> Ma ra taio in kis sa ukinobot, gong i milet melet unago utamon sur anuna saket. <sup>19</sup> Una kum bungbung ra, in laulau doko torom a kum tianani, ma torom a kum ino kai ra a kum nutnutundet, det sus

utmakai. <sup>20</sup> Mot in wararing sur gong mot kalabor song una kum kalang na kotokoto, o una Bung na Sabat. <sup>21</sup> Uni una kum bungbung ra, in labo sakit a ngunungut. In labo taun a kum ngunungut ra i ser wanpat una rakrakon bual. Turpasi una turturkibin ina rakrakon bual tuk uniri, ma numur kai, katu ngunungut in elar nami. <sup>22</sup> Ra gunuk o God ken kutus pirso a kum bungbung ra, kataio ut in laun. Ikut in kutus pirso ru i sur det ra i sa pilok pas det, det in laun.

<sup>23</sup> "Una kum bungbung ra, ra taio in watungi torom mot lena, 'Tama i, a Karisito kuri i,' o 'Kurong i,' gong mot nurnur. <sup>24</sup> Uni lako kum torotoro na Karisito, ma lako kum torotoro na poropet det in nanpat. Det in pam lako kum labino ukinalong ma lako kum utna na ukisin sur det in toro pas a taro ra o God i sa pilok pas det, ra ut ko det in pet lar pasi. Ikut ka det in pet lar pasi. <sup>25</sup> Tama i, a sa inanos mugu tar mot uni.

<sup>26</sup> "Ra det in watungi tamot lena, 'Kura i kis una nubual kalako taro uni,' gong mot wan suri, ma ra det in watungi kai lena, 'Kuri una rumu,' gong mot nurnur. <sup>27</sup> Uni una bung na inawan pat anum a Nutun a Musano, a taro rop det in tama i. In elar nam in nememe, ra i meme i tagitong una matmatano tobar, tuk una matmatano lubur. <sup>28</sup> A nubual ra a minat i inep uni, a kum kotkot det in nan tomo iai.

*A Nutun a Musano in nanpat (Mk 13:24-27; Lk 21:25-28)*

<sup>29</sup> "Uniutra, ra i sa rop a kum mamaut ma ngunungut una kum bungbung ra,

'in matanas in dumirum, a kalang ken talapor,

a kum nangngang det in puku pirso tagisapat una bakut,

ma a kum utna sapat netes una bakut det in tugunugunu.' *Aisaia 13:10; 34:4*

<sup>30</sup> "Una bung ra, a ukinalong ina Nutun a Musano in nanpat una bakut. Ma a kum kamkabo taro rop una rakrakon bual det in domos. Ma det in tama a Nutun a Musano in nanpat sapat netes una kum du bakut, nama dekdek ma a labino minamar.

<sup>31</sup> In tuwuru in tangis bing, ra a Nutun a Musano in tulu pirso anum a kum ensel, sur det in ben tomo anum a taro na pipilok tagun a wat na matmatano wuwu, tagun

\* 24:17: A ngas na rumu anum a taro Israel, sapat na lur na rumu i elaro kut, ma det ser kis utkai uni.

ara papor rakrakon bual tuk tong una ara papor rakrakon bual.

*A wasiso elelar un in nanai na fig*  
(Mk 13:28-31; Lk 21:29-33)

<sup>32</sup> “Mot in ususer tagun in nanai na fig. Ra a kum kanokano in sibul pat melet, ma a dondono in tapalos, mot tasmani lena a kum kalang na mararong i sa milau. <sup>33</sup> Lenkutkai, ra mot in tama a kum utna rop ra a wasiso taru uni in nanpat, mot in tasmani lena, a du bung i sa milau. <sup>34</sup> A inanos mot nama lingmulus, a kum utna rop ri in nanpat ra a taro tagun uniri det laun utmakai. <sup>35</sup> A langit ma a rakrakon bual der in rop, ikut anung a kum wasiso ken rop.

*Katutaio i tasman a bung o a du bung ra a Nutun a Musano in nanpat*

(Mk 13:32-37; Lk 17:26-30, 34-36)

<sup>36</sup> “Katutaio i tasman a bung o a du bung ra a kum utna ri in nanpat. A kum ensel sapat una langit ka det tasmani, ma a Nutunu kai ke tasmani, o Tamano sot kut i tasmani. <sup>37</sup> A inawan pat melet anun a Nutun a Musano, in elar nama kum bungbung anun o Noa. <sup>38</sup> Una kum bungbung ra in nolomom ke wanpat utmakai, det wangon, det inum, ma det unolin det, tuk una bung ra o Noa i kas una sip. <sup>39</sup> Ma ka det tasman asau ra in nanpat, tuk in nolomom i wanpat, ra i los rop ru det. In lenkutkai ra una inawan pat melet anun a Nutun a Musano. <sup>40</sup> Una bung ra, ra lako ru musano der in papam sa ukinobot, din los pas tu pasander kut, ma ara pasander awu. <sup>41</sup> Ra lako ru ino kai der in gino a wit, din los pas tu pasander kut, ma ara pasander awu.

<sup>42</sup> “Mot in tumarong mot, uni ka mot tasman a bung ra anumot a Labino in nanpat uni. <sup>43</sup> Mot in tasmani: Ra a taman a rumu in tasman a du bung una mirum ra a tene wolong in nanpat uni, in kis ma in tamtamabat anun a rumu. Ken madek ru anun a rumu sur din wolongi. <sup>44</sup> Mot kai, mot in koikoi taru, uni a Nutun a Musano in nanpat una du bung ra ka mot nuki lena in nanpat uni.

*A lingmulus na tultul ma a tultul ra ke lingmulus*

(Lk 12:41-48)

<sup>45</sup> “A tultul ra i lingmulus una nun a pinapam ma i mananos kai, anun a labino in ukis tari sur in mugumugu anun a kum tultul

una nun a rumu, sur in tamtabor det nama andet a utna na inangon una kum du bung na inangon. <sup>46</sup> A tultul ra, in dan ra anun a labino in nanpat ma in tama i ra i pam sot pas anun a pinapam. <sup>47</sup> A inanos mot nama lingmulus, anun a labino in ubek tari sur in tene tamtamabat una nun a kum utna rop. <sup>48</sup> Ikut ra a tultul ra, i a sakino tultul, ma i nuki lena, anun a labino ken nanpat lakit, <sup>49</sup> in turpasi sur in um a kum tultul ra det papam tomo nami. Ma in nangon ma in inum tomo nama kum tene ininum. <sup>50</sup> Anun a labino in nanpat un tu bung o tu du bung ra a tultul ke tasmani, ma ke nuki lena in nanpat uni. <sup>51</sup> Ra a labino in tau kutkutusi, ma in pitar tar a warkurai na minabalu toromi, sur in kis tomo nama kum tene torotoro, una nubual ra di tangtangis ma di ungingit lokondi iai.

## 25

*A wasiso elelar una noino toraro*

<sup>1</sup> “Una du bung ra, a matanitu tagisapat una langit in elar nama noino toraro, ra det los pas anundet a kum lam, ma det wan sur det in barato a matok na nolin. <sup>2</sup> A limo tagun det, det mananos, ma a limo kai tandet, ka det mananos. <sup>3</sup> Det ra ka det mananos det los anundet a kum lam, ikut ka det los lako kum koto na wel kai tomo nam det. <sup>4</sup> Ikut, det ra det mananos det los anundet a kum lam ma det los i utkai a kum koto na wel tomo nam det. <sup>5</sup> A matok na nolin ke wanpat lakit, ra a matan det i sunu, ma det inep dumun rop.

<sup>6</sup> “Ra una labino mirum di kakabo lena, ‘Wo, a matok na nolin mo! Mot iap, mot in barato i.’ <sup>7</sup> A kum toraro rop det tuangun, ma det waninar anundet a kum lam. <sup>8</sup> Det ra ka det mananos, det saring a kum mananos ino lena, ‘Mot in tabor met nam lakalik wel, uni anumet a kum lam det sa ling na mat.’ <sup>9</sup> Det balu det lena, ‘Awu, sako ken elar nam dat rop. Mot in nan torom det ra det siuru wel ma mot in kukul pas.’ <sup>10</sup> Ikut ra det wan sur det in kukul, a matok na nolin i wanpat. A limo ra det sa waninar, det wan tomo nam i sur a lukaro na unolin, ra di tagar bat a matansako.

<sup>11</sup> “Numur a limo ra ka det mananos det wanpat, ma det kakabo lena, ‘Labino, labino, un papos pas met.’ <sup>12</sup> I balu det lena, ‘A inanos mot nama lingmulus, ka tasman mot.’

<sup>13</sup> “Ra i lenra, mot in tumarong mot, uni ka mot tasman a bung o a du bung ra a Labino in nanpat uni.

*A wasiso elelar una tulu tultul  
(Lk 19:11-27)*

<sup>14</sup> “A matanitu tagisapat una langit i elar utkai nam ara musano ra i waninar sur in nan utiro una ra tamon gisen. I kabo pas anun a tulu tultul, ra i isuaro tar anun a kum ululeng tandetul sur detul in papam nami.

<sup>15</sup> I pitar tar a limo na arip na kina tan ara, ma aru arip na kina tan ara, ma ara arip na kina kai tan ara. I pitar tari torom detul taktakai elar ut nam anundetul a mananos. Ra numur i wan una nun a inawan. <sup>16</sup> O naro ra di pitar tar a limo na arip na kina tano, i wan lakit ma i papam nami, ma i ulabo melet pas a limo na arip na kina taguni.

<sup>17</sup> Lenkutkai ra torom o naro i ra di pitar tar aru arip na kina tano, i ulabo melet pas aru arip na kina taguni. <sup>18</sup> Ikut, o naro i ra di pitar tar ara arip na kina tano, i wan, i kil pas in nutung, ma i por eno tar a mani anun anun a labino.

<sup>19</sup> “Ra i sa suano i, a labino anun a tulu tultul, i wanpat ma i kabo pas detul sur detul in inanos kapo i una nun a mani. <sup>20</sup> O naro ra di pitar tar a limo na arip na kina tano i wan toromi nama limo na arip melet, ra i watungi tano lena, ‘Labino, i pitar tar a limo na arip na kina tang. Tama i, a sa pam pat pas a limo na arip melet taguni.’

<sup>21</sup> Anun a labino i balu i lena, ‘Wakak sakit, ui a wakak na tultul, u lingmulus una num a pinapam. An ubek tar ui sur un warkurai un lako susut na utna, uni u lingmulus una kum nat na utna ri. Ra uniri dar in nan ma dar in gas tomo.’

<sup>22</sup> “O naro ra di pitar tar aru arip na kina tano i wan toromi, ma i watungi lena, ‘Labino u pitar tar aru arip na kina tang. Tama i, a sa pam pat pas aru arip melet taguni.’ <sup>23</sup> Anun a labino i balu i lena, ‘Wakak sakit, ui a wakak na tultul, u lingmulus una num a pinapam. An ubek tar ui sur un warkurai un lako susut na utna, uni u lingmulus una nat na utna ri. Ra uniri dar in nan ma dar in gas tomo.’

<sup>24</sup> “Numur, i ra di pitar tar ara arip na kina tano i wan toromi, ra i watungi lena, ‘Labino, a tasmani lena ui a tene ngalngalia. U ser pasong pas a utna ra ko marut tari, ma u git pasi kai, a win a utna ra ko marut tari.

<sup>25</sup> A ngaran ui, ra a wan, a por eno tar anum

a mani. Iri melet mi anum a mani.’ <sup>26</sup> Anun a labino i balu i lena, ‘Ui a laulau na tultul, a tabalamat na musano ui. U sa tasman tari lena, a pasong a utna ra ko marut tari, ma a git pasi kai a wino utna ra ka marut tari. <sup>27</sup> Ilai ra ko ubek tar anung a mani una beng sur an los pas anung a mani ma tu sibano kai una bung ra an nanpat uni? <sup>28</sup> Mot in los ru a mani gusuni, ma mot in pitar tari torom o naro ra anun a noino arip na kina. <sup>29</sup> Uni, osi ra i utur ukai a labino, din tabor meleti sur anun a utna in labo bing, ma osi ra ke utur ukai tu utna, din rakon ru anun asau lik gusuni. <sup>30</sup> Ra a tultul ri ra ke gas un tu utna, mot in woro pirso ru i una dumirum, a nubual ra di tangtangis ma di ungingit lokondi iai.’

*A Nutun a Musano in isuaro a taro una bung na warkurai*

<sup>31</sup> “A Nutun a Musano in nanpat nama nun a minamar, tomo nama nun a kum ensel, ra in kis una nun a kiskis na king. A kiskis ra a labino minamar ino. <sup>32</sup> A kum kamkabo taro rop una rakrakon bual det in nan tomo umatano, ma in isuaro det, elar nama tene tamtamabat anun a kum sipsip i isuaro a kum sipsip gusun a kum meme. <sup>33</sup> In tulu a kum sipsip sur a papor sot na lamano, ma a kum meme sur a papor kair. <sup>34</sup> A king in watungi tandet ra kura una papor sot na lamano lena, ‘Mot wan urin, mot ra o Tita i sa watung udan tar mot. Mot in rakon pas a matanitu di sa waninar tari sur anumot, tagun numnumugu utmakai una turturk-ibin ina rakrakon bual. <sup>35</sup> Uni a murak ra mot tabor iau, a muruk ra mot uinum iau, a usiro ra mot ben ruk iau una rumu. <sup>36</sup> Ka tin namalu anung ra mot pitar in namalu tang, a misait ra mot tamtamabat iau, ma a kis una karabus ra mot lumu iau.’

<sup>37</sup> “A kum tene tokodos det in tingi lena, ‘Labino, nangisin met tama ui ra u murak ma met tabor ui, o u muruk ra met uinum ui? <sup>38</sup> Nangisin met tama ui ra u usiro ra met ben ruk ui una rumu, o ka tin namalu anum ra met pitar in namalu tam? <sup>39</sup> Nangisin met tama ui ra u misait, o u kis una karabus, ra met lumu ui?’

<sup>40</sup> “A king in balu det lena, ‘A inanos mot nama lingmulus, asau ra mot sa pam tari torom tu musano oros kut tagun a kum tistising ri, mot sa pam tari ut un iau.’

<sup>41</sup> “In watungi bulung torom det una papor kair na lamano lena, ‘Mot wan gisen

gusun iau. A dekdek ina warkurai na mina-balu i sa kis un mot. Mot nan una labino sungun ra ken mat, ra di sa waninar tari sur o Satan ma anun a kum ensel. <sup>42</sup> Uni a murak ra ka mot tabor iau, a muruk ra ka mot uinum iau. <sup>43</sup> A usiro ra ka mot ben ruk iau una rumu, ka tin namalu anung ra ka mot pitar tin namalu tang, a misait ma a kis una karabus ra ka mot lumu iau.

<sup>44</sup> “Det bulung det in tingi lena, ‘Labino, nangisin met tama ui ra u murak, o u muruk, o u usiro, o ka tin namalu anum, o u misait, o u kis una karabus, ra ka met warut ui?’

<sup>45</sup> “In balu det lena, ‘A inanos mot nama lingmulus, asau ra ka mot pam tari torom tu musano oros kut, ka mot pami kai un iau.’ <sup>46</sup> Ra det in nan sur a ngunungut tukum. Ikut a kum tene tokodos det in nan sur a nilaun tukum.”

## 26

*Det wasiso tomo pas sur det in um doko o Iesu*

(Mk 14:1-2; Lk 22:1-2; Jn 11:45-53)

<sup>1</sup> Ra o Iesu i sa watung rop tar a kum wasiso ri, i inanos anun a kum nat na ususer lena, <sup>2</sup> “Mot tasmani ut, ra aru bung in rop, din turpas a labino bung na lotu na Wanlakai, ra din pitar tar a Nutun a Musano sur din sak wati un in nanai kutus.”

<sup>3</sup> Una du bung ut ra a kum lamlabino tene etabor torom o God ma a kum mugumugu anun a taro, det kis tomo una labino rumu anun o Kaiapas, a mugumugu na tene etabor. <sup>4</sup> Det wasiso tomo pas sur det in pam ukai eno pas o Iesu, ma det in um doko i. <sup>5</sup> Det watungi lena, “Gong dat pami una labino bung na lotu, sako a taro det in kankan ma det in ukatutur tu inaim.”

*Ara ino i lingis in polo sangsangnain un in lorin o Iesu*

(Mk 14:3-9; Jn 12:1-8)

<sup>6</sup> O Iesu i kis tong o Betani, una rumu anun o Saimon, i ra numugu i misait nama lepra. <sup>7</sup> Ara ino i wan torom o Iesu nam in polo sangsangnain, a matano i ka doko, ma kura un in nokoto ra di pami nama wat. I lingisi un in lorin o Iesu, ra kura utmakai o Iesu i wangon. <sup>8</sup> A kum nat na ususer det tama i, ra det kankan doko uni, ma det watungi lena, “Sur asau ra di lingis orosi kut in polo sangsangnain ri? <sup>9</sup> I lai ra ka di siuru

pasi sur lako labino mani sur din tabor a kum sibo na taro nami?”

<sup>10</sup> O Iesu i sa tasman asau ra det wasiso uni, ra i watungi tandet lena, “I lai ra mot pitar a maut torom a ino ri? I sa pam tar a wakak na pinapam sakit un iau. <sup>11</sup> A kum sibo na taro det in laun bolbolos tomo ut nam mot. Ikut iau, kan kis tukum nisamot. <sup>12</sup> I sa lingis tar in polo sangsangnain ri una pining sur in waninar iau sur a bung an mat ma din uruk a minating una kulam na minat. <sup>13</sup> A inanos mot nama lingmulus, una kum tamtamon una rakrakon bual, ra din warawai nama Wakak na Wasiso iai, din inanos utkai un asau ra a ino ri i sa pam tari, sur a risano in tur na aim.”

*O Judas i nemi sur in pitar tar o Iesu torom a kum mugumugu anun a taro Juda*

(Mk 14:10-11; Lk 22:3-6)

<sup>14</sup> O Judas Iskariot, ara tagun a noino ma aru nat na ususer, i wan torom a kum lamlabino tene etabor torom o God. <sup>15</sup> Ma i ting det lena, “Ra an pitar tar o Iesu torom mot, asau mot in kul iau nami?” Ma det pitar tar a tulu noino silwa tano. <sup>16</sup> Turpasi una bung ra i nuknuk sur tu wakak na du bung ra in pitar tar o Iesu ulamandet.

*O Iesu tomo nama nun a kum nat na ususer det wan a utna na Wanlakai*

(Mk 14:12-21; Lk 22:7-14, 21-23; Jn 13:21-30)

<sup>17</sup> Una mugano bung una kum lamlabino bung na lotu na beret ra kalako is uni, a kum nat na ususer det wan torom o Iesu, ma det tingi lena, “U nemi sur met in waninar andat a utna sur a labino bung na lotu na Wanlakai awai?” <sup>18</sup> Ra i balu det lena, “Mur in nanpat sapat o Jerusalem, mur in etorom nam ara musano, ra mur in watungi tano lena, ‘A Tene Ususer i watungi lena: Anung a bung i sa milau. Met nam anung a kum nat na ususer met in ukinalong a labino bung na lotu na Wanlakai munung una num a rumu.’” <sup>19</sup> A ru nat na ususer der pam soti ut asau ra o Iesu i sa watung tari tander, ma der waninar a utna na Wanlakai.

<sup>20</sup> Ra i sa lirop, o Iesu tomo nama nuna noino ma aru nat na ususer det kis una inangon. <sup>21</sup> Det wangon ra i watungi lena, “A inanos mot nama lingmulus, ara tagun mot in pitar tar iau ulaman a kum ebar.” <sup>22</sup> Det tupunuk doko ra det rop taktakai det tur pas a iting toromi lena, “Labino, ausur iau niko?” <sup>23</sup> O Iesu i balu det lena, “I ra mir puk tomo amir aru du beret una dis, i

ut ra in pitar tar iau ulaman a kum ebar.  
<sup>24</sup> A Nutun a Musano in mat elar nami ra di sa tumus tari una Buk Tabu. Ikut in laulau sakit torom a musano ra in pitar tari torom a kum ebar. In wakak toromi ra ka din ususi, sur gong i taramo a dekdek na warkurai ra uni.”  
<sup>25</sup> O Judas, i ra in pitar tari torom a kum ebar, i tingi lena, “Tene Ususer, ausur iau niko?” I balu i lena, “Ui ut ra.”

*A tintinip na inangon anun a Labino*  
 (Mk 14:22-26; Lk 22:14-20; 1Kor 11:23-25)

<sup>26</sup> Det wangon utmakai, ra o Iesu i los pas a beret, i watung wakak pas uni, i tibiki, ma i tabor anun a kum nat na ususer nami, ra i watungi lena, “Mot in rakoni ma mot in nani. Iri a pining.”  
<sup>27</sup> Numur i los pas a kap, i watung wakak pas uni ra i pitari tandet. I watungi lena, “Mot rop mot in inum taguni.  
<sup>28</sup> Iri a gaping, a kunubus ra i dat tomo tar a taro nam o God. A gaping ri, i tilingis sur in unus ru a kum sakino petutna anun a susut na taro.  
<sup>29</sup> A watungi tamot lena, kan inum melet mo lako wain, tuk ra dat in inum a matok na wain una matanitu anun o Tita.”  
<sup>30</sup> Ra det sa kele tar a kelekele na lotu, det wan tito usapat una Tangai na Oliw.

*O Iesu i wasiso mugu taru un o Pita ra in ipul*

(Mk 14:27-31; Lk 22:31-34; Jn 13:36-38)

<sup>31</sup> O Iesu i watungi tandet lena, “Miri umirum, mot rop mot in nan pas kut gusun iau, i kibino una kum utna ra in nanpat un iau. Uni di sa tumus tari una Buk Tabu lena, O God i watungi lena, ‘An um a tene tamabat anun a kum sipsip, ra a kum sipsip det in kalabor sarara.’  
*Sekaraia 13:7*

<sup>32</sup> Ikut ra a sa katatur melet gusun a minat, an mugu utong o Galili.”  
<sup>33</sup> O Pita i watungi tano lena, “Ra det rop det in nan pas gusun ui, ikut iau awu.”  
<sup>34</sup> O Iesu i watungi tano lena, “A inanos ui nama lingmulus, miri umirum, a kereke ken kurkurirakuk utmakai, ra un ipul a tulu dino lena, ko tasman iau.”  
<sup>35</sup> O Pita i watungi tano lena, “Kan ipul ru ui. Iau kai an iru tomo nam ui, i wakak kut.” Ma a kum nat na ususer rop kai det watungi lenutra.

*O Iesu i wararing tiro o Getsemani*  
 (Mk 14:32-42; Lk 22:39-46)

<sup>36</sup> O Iesu tomo nam anun a kum nat na ususer det wanpat una nubual a risano Getsemani, ra i watungi tandet lena, “Mot

in kis kut nin, ma iau an nan lilik utong, sur an wararing pas.”  
<sup>37</sup> Ra i ben pas o Pita tomo nama ru nutnutun o Sebedi. Una du bung ut ra, i tupunuk ma i maut doko a nuknukino.  
<sup>38</sup> I watungi tandet lena, “Anung a nilaun i mamaut doko nama tupunuk, milau mo an mat nami. Motul in kis kut nin, ma motul in koikoi taru ut tomo nam iau.”  
<sup>39</sup> I wan lilik taru usa numugu, i puku tuntudung taru una piso, ma i wararing lena, “Tita, ra gunuk in sot, un los ru a kap na mamaut ri gusun iau. Ikut gong u mur anung a nemnem, un muri ut anum a nemnem.”

<sup>40</sup> I milet melet torom a tulu nat na ususer, ra i tama detul, detul sa inep dumun. I ting o Pita lena, “Pepetlai, ka motul in pet lari sur motul in koikoi tomo nam iau un tu du bunglik kut?”  
<sup>41</sup> Motul in koikoi, ma motul in wararing, sur gong motul puku una ululam. A niomotul i nem na tarom, ikut a pinimotul i tungulu kut.”

<sup>42</sup> A manru dino melet i wan gusun detul, ma i wararing lena, “Tita, ra ken sot sur un los ru a kap na mamaut ri gusun iau, an inumi ut. An muri ut anum a nemnem.”  
<sup>43</sup> I milet melet, ra i tama detul, detul sa inep dumun melet, un a matandetul i sa sunu doko.  
<sup>44</sup> Ra i wan melet gusun detul, i mantul u wararing, ra i watung melet a niaring ra i sa watung tari munung.

<sup>45</sup> Ra i milet melet torom a tulu nat na ususer, i watungi tandetul lena, “Motul in inep liklik mukut ma motul in mana? Tama i, a du bung i sa milau, ra din pitar tar a Nutun a Musano ulaman a kum tene sakino.  
<sup>46</sup> Motul katatur, dat na wan! Tama i, a musano ra in pitar tar iau ulaman a kum ebar, i sa wanpat.”

*Di dat pas o Iesu*

(Mk 14:43-50; Lk 22:47-53; Jn 18:3-12)

<sup>47</sup> Ra o Iesu i wasiso utmakai, o Judas, ara tagun a noino ma aru nat na ususer, i wanpat, det nama kunur na taro. Det los a kum totok na inaim ma a kum nalnal. A kum lamlabino tene etabor torom o God ma a kum mugumugu anun a taro, det tulu ru det.  
<sup>48</sup> I ra in pitar tar o Iesu ulaman a kum ebar i sa inanos mugu tar a kunur na taro una ukinalong ra in pami lenri, “I ra an gom a pangpagor na wano, i ut ra. Mot in pam ukai pasi.”

<sup>49</sup> Uniutra o Judas i wan torom o Iesu ra i watungi lena, “Wakak na mirum, Tene Ususer!” Ra i gom a pangpagor na wano.

<sup>50</sup> O Iesu i watungi tano lena, “Pasang, un pami kut a utna ra u wan urin suri.” Ma a taro ra, det wan torom o Iesu, det pam ukai pasi ma det dati.

<sup>51</sup> Ara tagun det ra det wan tomo nam o Iesu, i dat pas anun in totok na inaim, ra i tau kutus ru in talngan a tultul anun a mugumugu na tene etabor torom o God. <sup>52</sup>O Iesu i watungi tano lena, “Uruk melet anum in totok una bano, uni det rop ra det etawu nama kum totok na inaim, det in iru nama kum totok na inaim. <sup>53</sup>Peptelai, u nuki lena, in ngangitin sur an saring o Tita sur lako susut na arip na ensel, ra uniutri in tulu ru det torom iau? <sup>54</sup>Ikut, ra an pami lenra, ka din pam sot pas a kum wasiso na Buk Tabu una kum utna ri ra i sot sur din pami un iau.”

<sup>55</sup> Una du bung ra, o Iesu i watungi tan a kunur na taro lena, “Peptelai, kutiro iau a tene inaim ma a tene wolong, sur i mo ri mot wanpat nama kum totok na inaim ma a kum nalnal sur mot in pam ukai iau? Una kum bungbung rop a ser kis ubalan in noworo ina rumu na etabor, a ser ususer a taro, ma ka mot pam ukai iau. <sup>56</sup>Ikut a kum utna rop ri i wanpat sur din pam sot pas a kum tumtumus anun a kum poropet.” Numur anun a kum nat na ususer rop det kalabor sarara pas gusuni.

*O Iesu i tur una warkurai umatan a taro na kiwung*

(Mk 14:53-65; Lk 22:54-55, 63-71; Jn 18:13-14, 19-24)

<sup>57</sup> Det ra det sa pam ukai pas o Iesu, det beni utiro una rumu anun o Kaiapas a mugumugu na tene etabor torom o God. A kum tene ususer tagun a Warkurai ma a kum mugumugu kura det sa wan tomo. <sup>58</sup>O Pita i mur nanan o Iesu, ikut i bakbak ut gusuni, tuk una nubual anun a mugumugu na tene etabor torom o God. I ruk una nubual ra, ma i kis tomo nama kum tene tamtamabat sur in tama asau ra din pami un o Iesu.

<sup>59</sup> A kum lamlabino tene etabor torom o God, tomo nama taro na kiwung rop, det sisio sur tu torotoro na wasiso un tu sakino utna ra o Iesu i sa pam tari, sur det in takuni nami, ma det in um doko i uni. <sup>60</sup>A susut na tene torotoro det wanpat, ikut ka det sio lar pas tu utna ra det in takuni nami. Aru ra der wanpat murmur, <sup>61</sup>der watungi lena, “A musano ri i watungi lena, ‘An rege ru a

rumu na etabor ri anun o God, ma an pam melet pasi una tulu bung kut.’”

<sup>62</sup> A mugumugu na tene etabor torom o God i tur, ra i ting o Iesu lena, “Peptelai, kon balu det? Asau ra un balu a kum wasiso na etakun ri nami?” <sup>63</sup>Ikut o Iesu ke wasiso. A tene etabor ra, i watungi tano lena, “Una risan o God, ra i laun, un inanos met ra ui a Karisito a Nutun o God, o awu.”

<sup>64</sup> O Iesu i watungi tano lena, “I ut ra u sa watungi. Ma a watungi tamot lena, turpasi uniri, mot in tama a Nutun a Musano in kis una papor sot na laman o God, i ra i dekdek sakit, ma numur mot in tama i ra in nanpat una kum du bakut tagisapat una langit.”

<sup>65</sup> A mugumugu na tene etabor i kankan ra i raros anun in namalu ut, ra i watungi lena, “Uniri i sa wasiso laulau un o God. Dat nem melet lako wasiso na etakun sur asau? Mot sa longoro tar anun a kum wasiso laulau un o God. <sup>66</sup>Asau mot nuki?” Ra det balu i lena, “I wakak sur in iru.”

<sup>67</sup> Ma det ibis in masarino, ma det tubuli, ra ara taro det pasori, <sup>68</sup>ra det watungi lena, “Karisito, ui a poropet, un inanos met, osi ra i takalo ui.”

*O Pita i ipul ru o Iesu*

(Mk 14:66-72; Lk 22:56-62; Jn 18:15-18, 25-27)

<sup>69</sup> Ra o Pita i kis utmakai nago upiso una rumu ra, ara toraro, a tultul i wan toromi ra i watungi lena, “Ui kai ara tagun det ra mot ser wan tomo nam o Iesu a te Galili.”

<sup>70</sup> Ikut i ipul umatan det rop, i watungi lena, “Ka tasman asau ra u wasiso uni.” <sup>71</sup>Ra i wan utong nisan a matansako ina in noworo, ara toraro bulung i tama pasi, ra i watungi tan a taro tiro iai lena, “A musano ri, der ut nam o Iesu a te Nasaret.” <sup>72</sup>Ma i ipul melet, i liliman lena, “A lingmulus ut, ka tasman a musano ra.”

<sup>73</sup> Numur lilik, det ra det tur tiro iai det wan torom o Pita, det watungi tano lena, “A lingmulus ut ra ui kai ara tagun det. Met longoro lele ui kut una num a liu na wasiso.” <sup>74</sup>Ma i liliman torom det, i watungi lena, “O God in warkurai laulau iau ra an toro. Ka tasman a musano ra.” Ra uniutra a kereke i kurkurirakuk mut. <sup>75</sup>Ma o Pita i nuk pas a wasiso ra o Iesu i sa watung tari tano lena, “A kereke ken kurkurirakuk utmakai, ra un ipul a tulu dino lena, ko tasman iau.” Ra i pirso gusun a nubual ra, ma i tangis dokodoko i.

## 27

*Di pitar tar o Iesu torom o Pailat*

*(Mk 15:1; Lk 23:1-2; Jn 18:28-32)*

<sup>1</sup>Una kobot raut, a kum lamlabino tene etabor rop torom o God ma a kum mugumugu anun a taro, det wasiso tomo un o Iesu sur din un doko i. <sup>2</sup>Det ker pas aru lamano, det beni ra det pitar tari torom o Pailat, a labino mugumugu anun a gapman.

*O Judas i popos*

*(Ap 1:18-19)*

<sup>3</sup>O Judas, i ra i pitar tar o Iesu ulaman a kum ebar, i tasmani lena di sa warkurai tar o Iesu sur in mat, ra a labino tupunuk i losi. I milet nama tulu noino silwa torom a kum lamlabino tene etabor torom o God ma a kum mugumugu. <sup>4</sup>Ma i watungi lena, “A sa pam tar a sakino petutna, uni a sa sobor tar o naro ra ke pam tu sakino.” Ra det balu i lena, “Met, met lai? Ui ut!” <sup>5</sup>I woro ru a tulu noino silwa una rumu na etabor, ra i wan ma i popos.

<sup>6</sup>A kum lamlabino tene etabor torom o God det los pas a kum silwa, ra det watungi lena, “Ke tokodos una kum Warkurai sur dat in ubek a mani ri una ululeng na mani, uni a mani ri a ikul tagun a musano ra di um doko i.” <sup>7</sup>Ra det wasiso tomo pas uni, ma det kul pas a du piso gusun a tene pampam kuro nama piopap, sur din porpor a kum minat ina kum usiro tiro iai. <sup>8</sup>I mo ra di watung a nubual ra nam “A piso na gap,” ma a taro det watungi ut lenra tuk uniri. <sup>9</sup>Lenra di pam sot pas a wasiso ra o Jeremaia a poropet i sa watung tari numugu lena, “Det los pas a tulu noino silwa, a matano ra a taro Israel det ubek tari una musano ra. <sup>10</sup>Ma a tulu noino silwa ra di kul pas a du piso anun a tene pam kuro nama piopap, elar nama Labino i watung tari tang.”

*O Pailat i ting o Iesu*

*(Mk 15:2-5; Lk 23:3-5; Jn 18:33-38)*

<sup>11</sup>O Iesu i tur umatan o Pailat, a mugumugu tagun a gapman, ma a mugumugu i tingi lena, “Ui a king anun a taro Juda?” Ra o Iesu i balu i lena, “I ut ra u sa watung tari.” <sup>12</sup>A kum lamlabino tene etabor torom o God ma a kum mugumugu det takuni, ikut ke balu det. <sup>13</sup>Ra o Pailat i tingi lena, “Ko longoro a susut na utna ri det takun ui nami?” <sup>14</sup>Ke balu det un tu etakun ra det takuni nami, awu ut. Ra a mugumugu tagun a gapman i kisin doko uni.

*Di pitar a warkurai sur o Iesu in mat*

*(Mk 15:6-15; Lk 23:13-25; Jn 18:39-19:16)*

<sup>15</sup>Una kum kilkilalo rop una kum lamlabino bung na lotu na Wanlakai, a mugumugu tagun a gapman i ser palos ru ara karabus ra a taro det sasaring suri. <sup>16</sup>Una kilalo ra, ara musano a risano o Barabas i kis una karabus una nun a kum lamlabino sakino petutna, ma a taro rop det tasmani. <sup>17</sup>A kunur na taro det wanpat tomo torom o Pailat, ra i ting det lena, “Osi ra mot nemi sur an palos ru i torom mot? O Barabas o o Iesu, i ra di watungi nama Karisito?” <sup>18</sup>I watungi lenri, uni i sa tasmani lena, det pitar tar o Iesu toromi una sakino nuknukindet. <sup>19</sup>Ra o Pailat kura utmakai i pam a warkurai, anun a ino i pitar ru a wasiso toromi lena, “Gong u pam tu utna una tene tokodos ra, katu niraro anunu. Uni nanganong mirum, a ririon, ma a kum utna a tama i una musano ra, i banlaulau anung a nilaun.”

<sup>20</sup>Ikut a kum lamlabino tene etabor torom o God ma a kum mugumugu det ukatutur a balan a kunur na taro sur det in sasaring sur o Barabas, ma sur din um doko o Iesu. <sup>21</sup>A mugumugu tagun a gapman i ting det lena, “Osi na pasander ra mot nemi sur an palos ru i torom mot?” Det balu i lena, “O Barabas.” <sup>22</sup>O Pailat i ting det lena, “Asau ra an pami un o Iesu, i ra di watungi nama Karisito?” Det rop det balu i lena, “Sak wati un in nanai kutus!” <sup>23</sup>Ma i ting det lena, “Sur asau? Asi na sakino utna ra i sa pam tari?” Ikut det kukukuk dekdek lena, “Sak wati un in nanai kutus!”

<sup>24</sup>O Pailat i tama i lena, ke pet lar pas tu utna mo, ma a labino purpuruon milau in nanpat. Ra i los pas a danim, i gos pas aru lamano umatan a kunur na taro, ra i watungi lena, “A langolango gusun a gapin a tene tokodos ri. Mot ut din warkurai mot uni.” <sup>25</sup>A taro rop det balu i lena, “I wakak kut, a warkurai na minabalu una gapino in kis un met ma a kum nutnutumet kai.” <sup>26</sup>O Pailat i palos ru o Barabas torom det. Ra di sa takalo tatar o Iesu, i pitar tari tan a kum tene inaim sur det in sak wati un in nanai kutus.

*A kum tene inaim det urongon laulau un o Iesu*

*(Mk 15:16-20; Jn 19:2-3)*

<sup>27</sup>A kum tene inaim anun a mugumugu tagun a gapman det dat pas o Iesu utirotu urumu una labino rumu anun anundet a

mugumugu. Ra det ben tomo pas a kum tene inaim rop toromi. <sup>28</sup> Det palos ru anun a kum malu, ma det mar tari nam in merek na malu. <sup>29</sup> Ra det liko pas in narus a loklokono ma det ubek tari un in lorino elar nama kukup anun a king. Det upampam tari nam in nubuku una sot na lamano\* ma det kis butkeke umatano, ma det urongon laulau uni lena, “Ui a king anun a taro Judal” <sup>30</sup> Ma det ibisi, det rakon pas in nubuku ra gusuni, ma det raprapus in lorino nami. <sup>31</sup> Ra det sa urongon laulau papas uni, det palos ru in merek na malu gusuni. Det mar tari melet nama nun a kum malu, ma det ben pirso i sur din sak wati un in nanai kutus.

*Di sak wat o Iesu un in nanai kutus  
(Mk 15:21-32; Lk 23:26-43; Jn 19:17-27)*

<sup>32</sup> Det pirso ra det barato pas ara te Sairini, a risano o Saimon, ma det ungonos tari sur in los in nanai kutus anun o Iesu. <sup>33</sup> Det wanpat una nubual ra di watungi nam o Golgota, a kukuraino a “Nubual na Lor na Minat.” <sup>34</sup> Det pitar tar a wain tan o Iesu, ra di sa pam tomo tari nam ara utna ra i mapak. I inum tama i, ikut ke nemi sur in inumi. <sup>35</sup> Ra det sa sak wat tari un in nanai kutus, det pilai laki sur det in isuaro anun a kum malu torom det taktakai. <sup>36</sup> Numur det kis ma det tamtamabat o Iesu. <sup>37</sup> Sapat netes tan in lorin o Iesu un in nanai kutus, det ubek tar a wasiso na etakun uni, di tumus tari lena,  
“IRI I O IESU, A KING ANUN A TARO JUDA.”

<sup>38</sup> Ma di sak wati kai aru tene wolong tomo nami una arin nanai kutus, ara una papor sot, ma ara kai una kair. <sup>39</sup> Det ra det wanan sakit o Iesu, det watung laulau i ma det lele lorindet toromi. <sup>40</sup> Ma det watungi lena, “Ui mo ra u watungi lena un rege ru a rumu na etabor ma un pam melet pasi una tulu bung kut, uniri un ulaun pas ui mo. Ra ui a Nutun o God, un pirso gusun in nanai kutus.” <sup>41</sup> A kum lamlabino tene etabor torom o God ma a kum tene ususer tagun a Warkurai ma a kum mugumugu, det kai det urongon laulau un o Iesu, det watungi lena, <sup>42</sup> “I ulaun pas a taro gisen, ikut ken ulaun lar pasi ut. Ra i a King anun a taro Israel, uniutri in pirso gusun in nanai kutus ma dat in nurnur uni. <sup>43</sup> I nurnur ut un o God. Ra o God i nemi, uniutri in ulaun pasi, uni i ut i sa watung tari lena, ‘Iau a

Nutun o God.’” <sup>44</sup> Aru tene wolong ra der kete tomo nami, der kai der watung laulau i.

*O Iesu i mat*

*(Mk 15:33-41; Lk 23:44-49; Jn 19:28-30)*

<sup>45</sup> Tur pasi una noino ma aru pakano bung una suan, tuk una tulu pakano bung una lirop, a bual rop i dumirum. <sup>46</sup> Ra i tulu pakano bung, o Iesu i kukukuk dekdek lena, “Eloi, Eloi, lema sabakatani?” A kukuraina wasiso ra i lenri, “Anung a God, anung a God, ilai ra i wan gusun iau?” *Buk Song 22:1*

<sup>47</sup> Ara taro tagun det ra det tur milau det longoro i, ra det watungi lena, “O naro ri i kakabo sur o Elaija.” <sup>48</sup> A iapiap kut, ara tagun det i kalabor, ra i los pas ara utna ra i ser dop a polo. I puk pasi una wain ra i mititir, i ubek pasi un in nanai ra i tulusu toto i usapat sur o Iesu in inumi. <sup>49</sup> Ara taro kai tagun det, det watungi lena, “Te, dat in madek tari munung. Dat in tama i ra o Elaija in nan pirso sur in ulaun pasi, o awu.” <sup>50</sup> O Iesu i kukuk dekdek melet pas, ra i ubek ru anun a nilaun.

<sup>51</sup> Una du bung ut ra, in namalu ra di mabat kutus nami sa urumu na rumu na etabor i tararos potor, turpasi tagisapat netes tuk unago piso. A guri i wanpat, ma a kum watat det tapagol. <sup>52</sup> A kum kulam na minat det papos, ma a susut na taro anun o God ra det sa mat, det katutur melet. <sup>53</sup> Det pirso gusun a kum kulam na minat. Ma numur tan a katkatutur melet anun o Iesu, det wanpat sapat o Jerusalem, a tamon anun o God, ma det tur pat torom a susut na taro. <sup>54</sup> A mugumugu anun a kum tene inaim, ma det kai ra kura tomo nam i sur det in tamtamabat o Iesu, det taramo a guri, ma det tama a kum utna ra i wanpat, ra det ngara doko. Det watungi lena, “I lingmulus ut, a musano ri a Nutun o God.”

<sup>55</sup> A susut na wardain kai ra det mur o Iesu tagitong o Galili sur det in waruti, det tur bakbak taru ut ma det tama a kum utna ri. <sup>56</sup> Kura epotor tandet, a tulu ino kai ri, o Maria Magdalen, ma o Maria a nan o Jems ma o Josep, ma a nan aru nutnutun o Sebedi.

*Di inep tar o Iesu una kulam na minat*

*(Mk 15:42-47; Lk 23:50-56; Jn 19:38-42)*

<sup>57</sup> Ra i sa lirop, ara tene gongon, a te Arimatia, a risano o Josep, i kai ara nat na

\* 27:29: In merek na malu, a kukup ma in nubuku detul tamtama elar nama ememar anun a king.

ususer anun o Iesu, <sup>58</sup> i wan torom o Pailat ma i saring pas a minatin o Iesu tano. Ra o Pailat i itula sur din pitar tari tano. <sup>59</sup> O Josep i los pas a minat ino, ma i pulus pasi nam in wakak na matok na malu, <sup>60</sup> ra i inep tari una nun a matok na kulam na minat, ra i sa kil tari una papor wat. I bulus bat tar a matansako na kulam na minat nama labino wat, ra i wan gusuni. <sup>61</sup> O Maria Magdalen ma o Maria kai, a nan o Jems ma o Josep, der kis taru numugu tan a kulam na minat.

*Det tamtamabat a kulam na minat*

<sup>62</sup> Una bung numur, a Bung na Sabat, a kum lamlabino tene etabor torom o God ma a kum Parisi det wan tomo torom o Pailat. <sup>63</sup> Det watungi tano lena, “Labino, met nuk pas a wasiso anun a tene torotoro ri. Ra i laun utmakai, i watungi lena, ra a tulu bung in rop, in laun pat melet. <sup>64</sup> Un tulu ru lako taro sur det in tamtamabat wakak a kulam na minat, elar nama tulu bung, sako anun a taro na ususer det in nanpat ma det in wolong pas a minat ino, ra det in inanos a taro lena i sa laun melet gusun a minat. Ra a torotoro ri anundet, in labo tan a torotoro ra numugu o Iesu i sa watung tari.” <sup>65</sup> O Pailat i watungi tandet lena, “Uniutri mot in ben pas a kum tene tamtamabat ma mot in nan. Mot in tamtamabat wakak a kulam na minat elar ut nam anumot a mananos.” <sup>66</sup> Ra det wan, ma det udekdek bat tar a kulam na minat. Det ubek a ngas na ukinalong sur det in tasman pasi kut ra taio i sa papos tari. Ma det utur tar a kum tene tamtamabat sur det in tamtamabati.

## 28

*O Iesu i katuttur melet gusun a minat*

(Mk 16:1-10; Lk 24:1-12; Jn 20:1-10)

<sup>1</sup> Numur tana Bung na Sabat, una kobot raut una mugano bung una wik, o Maria Magdalen, ma ara Maria kai der wan sur der in tama a kulam na minat. <sup>2</sup> Ma a labino guri i wanpat, uni ara ensel anun a Labino i wan pirso tagisapat una langit sur a kulam na minat, ma i bulus gisen ru a wat, ra i kis taru netes uni. <sup>3</sup> In masarino i talapor elar nam in nememe, ma anun in namalu i kabang elar nama busu na top. <sup>4</sup> A kum tene tamtamabat det ngaran doko i, det neneder, ra det elar mukut nama kum minat.

<sup>5</sup> A ensel i watungi tan a aru ino ra lena, “Gong mur ngara. A tasmani lena, mur sisio

sur o Iesu, i ra di sak wat tari un in nanai kutus. <sup>6</sup> Ke kis mo nin. I sa katuttur melet elar nama nun a wasiso. Mur wan urin, mur in tama a nubual ra i inep taru uni. <sup>7</sup> Numur mur in nan lakit, ma mur in inanos anun a kum nat na ususer lena, ‘I sa laun melet gusun a minat. Uniri in mugu utong o Galili. Mot in tama i tong.’ Iri a sa inanos mur uni.”

<sup>8</sup> Der wan lakit gusun a kulam na minat. Der ngara, ikut a labino gasgas kai i los der. Der kalabor sur anun a kum nat na ususer sur der in inanos det. <sup>9</sup> Ra der wan nanan, o Iesu i wanpat kisin torom der. Ma i watungi tander lena, “Wakak na kobot torom mur.” Der wan toromi, der pam aru kikino ma der lotu toromi. <sup>10</sup> Ma o Iesu i watungi tander lena, “Gong mur ngara. Mur in nan ma mur in inanos a kum tistising liklik, sur det in nan utong o Galili, ma det in tama iau tong.”

*A wasiso anun a kum tene tamtamabat*

<sup>11</sup> Ra aru ino der sa wan taru, a ramano kum tene inaim ra det tamtamabat a kulam na minat, det wan usapat o Jerusalem. Ma det inanos a kum lamlabino tene etabor torom o God una kum utna rop ra i wanpat tong una kulam na minat. <sup>12</sup> Ra a kum lamlabino tene etabor ma a kum mugumugu det kis tomo, ma det wasiso tomo sur tu kisapi ra det in muri. Numur det pitar tar a labino mani torom a kum tene inaim, <sup>13</sup> ra det watungi lena, “Mot in watungi kut lenri, ‘Una mirum ra met inep dumun, anun a kum nat na ususer det wanpat, ma det wolong pas a minat ino.’ <sup>14</sup> Ra a mugumugu tagun a gapman in longoro a utna ri, ra in iting uni, met in warut mot, ma met in palos pas mot gusun a warkurai.” <sup>15</sup> Ra a kum tene inaim det los pas a mani, ma det pami elar nami ra di sa inanos tar det uni. Ma a wasiso ri i wan sarara torom a taro Juda tuk uniri.

*O Iesu i wanpat torom anun a kum nat na ususer*

(Mk 16:14-18; Lk 24:36-49; Jn 20:19-23; Ap 1:6-8)

<sup>16</sup> A noino ma ra nat na ususer anun o Iesu det wan utong o Galili una tangai ra o Iesu i sa inanos tar det uni. <sup>17</sup> Det tama o Iesu, ra det lotu toromi, ikut ara taro tagun det ka det nurnur. <sup>18</sup> O Iesu i wan milau torom det, ma i watungi tandet lena, “O God i sa pitar rop tar a warkurai tang, sur an warkurai a kum utna rop sapat una langit ma nin kai

upiso. <sup>19</sup>Ra mot in nan, mot in ususer a kum kamkabo taro rop, sur det kai anung a kum nat na ususer. Mot in baptaiso det nama risan o Tita, ma o Nutunu, ma a Tokodos na Nion. <sup>20</sup>Ma mot in ususer det sur det in mur a kum wasiso rop ra a sa watung tari tamot. Ma a lingmulus lena iau, an kis tomo nam mot tuk una tintinipino.”

## A Wakak na Wasiso uno Iesu Karisito Mak i tumusi

### *A wasiso talapor mugu*

O Mak, ara risano kai o Jon, i tumus a buk ri. I a mugano musano ra i tumtumus una Wakak na Wasiso. O Mak i ausur ara tagun a noino ma aru nat na ususer anun o Iesu. A taro det nuki lena, o Mak i los a wasiso un o Iesu gusun o Pita, ra numur i tumusi. O Mak i labopat ut sapat o Jerusalem. I kai i tama a kum utna ra o Iesu i pami. Ra dat luk a buk Mak 14:51-52 kutiro i wasiso uni ut.

Numur i wanpat a tene warut anun o Pol ma o Banabas una nunder a pinapam (tama Ap 12:25).

O Mak i tumtumus torom a taro Rom sur det in tasman a Wakak na Wasiso un o Iesu. Una buk ri i inanos det lena, o Iesu kut ra a dekdekino i labo ma i utur ukai a warkurai. I nemi sur a taro Rom ma dat kai dat in tasmani lena o Iesu a Nutun o God.

O Mak i tumus a susut na utna na ukisin ra o Iesu i pami, ma a kum mamaut ra i taramo i, ikut ke tumus sikot a ramano wasiso na ususer anun o Iesu. Ara utna kai ra o Mak i tumusi, i lenri, o Iesu a dekdekino i labo sakit gusun o Satan, ma i a Tene Ulaun anundat.

A tumtumus anun o Mak i tuk taru kut una 16:8. Ma a buk Mak 16:9-20 ara musano gisen ut i tumusi.

A inawan ina buk Mak:

- O Iesu i turpas anun a pinapam (1:1-13)
- O Iesu i papam tong o Galili (1:14-9:50)
- O Iesu i wan usapat o Jerusalem (10:1-52)
- A tintinip na wik ma a minat anun o Iesu (11:1-15:47)
- A katkatatur melet anun o Iesu gusun a minat (16:1-20)

### *O Jon a Tene Baptaiso i warawai*

(Mt 3:1-12; Lk 3:1-18; Jn 1:19-28)

<sup>1</sup>Iri a Wakak na Wasiso un o Iesu Karisito, a Nutun o God.

<sup>2</sup>I turpasi elar nama wasiso anun o God ra a poropet Aisaia i sa tumus tari lena, “Tama i, iau an tulu ru anung a tene los wasiso sur in mugu tam, i ra in waninar anum a kisapi.

<sup>3</sup>Una nubual kalako taro uni, in nalngan ara i kakabo lena,

‘Mot in waninar a kisapi anun a Labino, mot in pam kodos anun a kum kisapi.’” *Aisaia 40:3*

<sup>4</sup>A musano ra, i o Jon a Tene Baptaiso. I kis una nubual kalako taro uni, ra i ser warawai lena, a taro det in nukpukus ma din baptaiso det, sur o God in unus ru anundet a kum sakino petutna. <sup>5</sup>A taro rop tagisapat o Jerusalem ma tagun a kum tamtamon rop kai una papor Judia, det wan toromi. Det watung puaso anundet a kum sakino petutna, ra i baptaiso det una danim Jodan. <sup>6</sup>O Jon i ser emar nam in namalu di pami nama iwu na kamel, ma i ser ker wati nam in pino bulumakau. I ser wan a kum ko ma a polono tatos. <sup>7</sup>I ser watungi lena, “O naro ra in mur tang, a dekdekino i labo taun a dekdeking. Ka elar sur an par piso, ma an palos aru su gusun aru kikino, uni a natino doko tano. <sup>8</sup>Iau, a baptaiso mot nama danim, ikut i, in baptaiso mot nama Tokodos na Nion.”

*O Jon i baptaiso o Iesu, ra numur o Satan i lari*

(Mt 3:13-4:11; Lk 3:21-22; 4:1-13)

<sup>9</sup>Una ara bung, o Iesu i wanpat tagitong o Nasaret una papor Galili, ra o Jon i baptaiso i una danim Jodan. <sup>10</sup>O Iesu i saur gusun a danim, ra i tama a langit i papos, ma a Tokodos na Nion i wan pirso toromi elar namin natabun. <sup>11</sup>In nalngan ara tagisapat una langit i watungi lena, “Ui a Nutunglik, a nat na wakak, a gas doko nam ui.”

<sup>12</sup>Uniuira a Tokodos na Nion i tulu ru o Iesu usa una nubual kalako taro uni, <sup>13</sup>ra i kis tiro a wat na noino bung, ra o Satan i lari. I kis tomo nama kum kuabor ma a kum ensel det waruti.

### *O Iesu i kabo pas a wat na tene woro uben*

(Mt 4:12-22; Lk 4:14-15; 5:1-11)

<sup>14</sup>Ra di sa uruk tar o Jon una karabus, o Iesu i wanpat tiro una papor Galili, i warawai nama Wakak na Wasiso anun o God. <sup>15</sup>I watungi lena, “A du bung i sa sot, ma a matanitu anun o God i sa milau. Mot in nukpukus, ma mot in nurnur una Wakak na Wasiso.”

<sup>16</sup>O Iesu i asal una usalin ina du tasi Galili, ra i tama pas o Saimon der sino nam o Endru. Der woro a uben sa utasi, uni der aru tene woro uben. <sup>17</sup>I watungi tander lena, “Mur in mur iau, sur an ususer mur sur mur aru tene ben taro.” <sup>18</sup>Uniuira der katatur pas gusun anunder a kum uben, ma der muri.

<sup>19</sup> I wan lilik melet, ra i tama pas o nander-sino bulung, o Jems ma o Jon, aru nutnutun o Sebedi. Der kis taru una pot ma der mabon anunder a kum uben. <sup>20</sup> Uniutra, o Iesu i kabo der, ra der wan gusun a tamander ma a kum tultul kura una pot, ma der muri.

*O Iesu i lakro ru a laulau na nion gusun ara musano*

*(Lk 4:31-37)*

<sup>21</sup> Det wan utong o Kapernaum. Ra una Bung na Sabat o Iesu i ruk utiro una rumu na lotu, ma i ususer a taro. <sup>22</sup> Ra det kisin una nuna kum etowo, uni i ususer det elar nam ara, ra a warkurai kura ut tano. Ke ususer det elar nama kum tene ususer tagun a Warkurai.

<sup>23</sup> Uniutra ara musano, a laulau na nion kura uni, i ruk utiro una nundet a rumu na lotu, ma i kakabo lena, <sup>24</sup> "Iesu, a te Nasaret u ling na pam asau un met? U wanpat sur un banlaulau met? A tasman ui, ui a Tene Tokodos anun o God." <sup>25</sup> O Iesu i sakbati lena, "Gong u wasiso! Pirso gusun a musano ra!" <sup>26</sup> Ma a laulau na nion i gunu dekdek tari, ra i kukukuk ma i pirso gusuni.

<sup>27</sup> A taro rop det kisin doko, ra det ting etetalai det lena, "Asau ri? A matok na ususer. A musano ri i ususer nama dekdek, ma a warkurai kura ut tano. I ser wasiso, ra a kum laulau na nion det ser mur anun a wasiso." <sup>28</sup> Ra a wasiso un o Iesu i wan sarara lakit utiro una kum tamon rop una papor Galili.

*O Iesu i ulangolango pas a susut na misait*  
*(Mt 8:14-17; Lk 4:38-41)*

<sup>29</sup> O Iesu tomo nama nun a kum nat na ususer, det pirso gusun a rumu na lotu. Uniutra, det wan tomo nam o Jems ma o Jon ra det wan utiro una rumu anun o Saimon der nam o Endru. <sup>30</sup> A ino a inumun o Saimon, i misait nama pino mararong, kura i inep. Uniutra det inanos o Iesu uni. <sup>31</sup> Ra o Iesu i wan toromi, i pam a lamano, ma i ukatatur pasi, ra a mararong i rop mut gusuni. Numur a ino ra i tabor det mo nama utna na inangon.

<sup>32</sup> Ra in matanas i sa sup taru, a taro det ben pat a kum misait rop torom o Iesu, ma det kai ra a kum laulau na nion kura un det. <sup>33</sup> A taro rop tagun a tamon ra, det wanpat ma det bukus una matansako. <sup>34</sup> Ra i ulangolango a susut ra det misait nama kum wur matano misait. I lakro ru a susut na laulau na nion gusun det, ma i turbat a

kum laulau na nion sur gong det wasiso, uni det tasmani ut o Iesu.

*O Iesu i warawai tiro una papor Galili*  
*(Lk 4:42-44)*

<sup>35</sup> Una lar, o Iesu i tuangun ra i pirso. I wan sur a nubual kalako taro uni, ma i wararing tiro iai. <sup>36</sup> O Saimon ma det ra det wan tomo nami, det sisio suri. <sup>37</sup> Ra det sa sio pasi, det inanos lena, "A taro rop det sisio sur ui." <sup>38</sup> Ra o Iesu i balu det lena, "Dat in nan gisen bulung utiro una lako kum tamon milau, sur an warawai kai torom det. Uni i a kibino ra a wanpat suri." <sup>39</sup> Ra i wan tuptupukus una papor Galili rop. I warawai una nundet a kum rumu na lotu, ma i lakro ru a kum laulau na nion gusun a taro.

*O Iesu i ulangolango pas ara lepra*  
*(Mt 8:1-4; Lk 5:12-16)*

<sup>40</sup> Ara musano, i misait nama lepra, i wan torom o Iesu, ra i kis butkeke, ma i saring dekdeki lena, "Ke ngangitin torom ui. Ra u nemi, un ulangolango pas iau." <sup>41</sup> O Iesu i maris doko i. I kodos a lamano, ma i pam a pinino ra i watungi tano lena, "A nemi ut, un langolango." <sup>42</sup> Uniutra, a lepra i rop mut gusuni, ra i langolango melet. <sup>43</sup> Uniutra, o Iesu i tulu ru i, ma i pak dekdek tari lena, <sup>44</sup> "Gong u inanos tar taio nami. Un nan ma un ese mugu tar ui torom a tene etabor torom o God, ma un pitar a kum etabor torom o God elar nami ra o Moses i sa watung tari, sur un talapor umatan o God. Ra un pami lena, a taro det in tasmani lena u sa langolango." <sup>45</sup> Ikut a musano ri, i wan ma i wasiso tuptupukus, ra a wasiso uni, i wan sarara. I mo ra, o Iesu ke wan puaso melet un tu tamon. I wan ra i ser kis tuptupukus mukut tiro una kum nubual kalako taro uni. Ikut a taro tagun a kum tamon det ser wan toromi.

## 2

*O Iesu i ulangolango ara musano a pinino i mat*

*(Mt 9:1-8; Lk 5:17-26)*

<sup>1</sup> A iso bung bat tari, ra o Iesu i wanpat melet tiro una tamon Kapernaum. A taro det longoro i lena i sa wanpat tiro urumu. <sup>2</sup> A susut det wanpat, ra katu kolo sa urumu ma tiro upiso una matansako, ra i warawai torom det nama wasiso anun o God. <sup>3</sup> Ra a wat na musano det los ara musano a pinino i mat. Det losi torom o Iesu. <sup>4</sup> Ikut ka det pet lar pasi, uni a taro det bukus doko. Ra

det wan tito usapat una lur na rumu, ma det papok saro pas a nubual taltalai nam o Iesu i tur iai, ra det unoro pirso a misait tomo nama lu ra i inep uni. <sup>5</sup>O Iesu i tama anundet a nurnur, ra i inanos a musano a pinino i mat lena, “Nutunglik, di sa unus ru anum a kum sakino petutna.”

<sup>6</sup>A ramano kum tene ususer tagun a Warkurai kura det kis taru, det nuknuk doko lena, <sup>7</sup>“Ilai sur a musano ri i wasiso lenra? I watung laulau o God uni i elaro i nami. Osi i elar sur in unus ru a kum sakino petutna? O God sot kut.”

<sup>8</sup>Uniutra, o Iesu i tasman asau ra det nuknuk uni. Ra i ting det, “Sur asau ra mot nuknuk lenra? <sup>9</sup>Asi na wasiso ra an watungi tan a musano ri, sur an ese a dekdeking nami torom mot? Pepetlai, an watungi lena, ‘Di sa unus ru anum a kum sakino petutna,’ o, an lena, ‘Un katuttur, un los anum a lu ma un nan?’ <sup>10</sup>A wasiso ra an watungi, an watungi sur mot in tasmani lena, o God i pitar a warkurai torom a Nutun a Musano, sur in unus ru a kum sakino petutna nin upiso.” Ra i watungi torom a musano a pinino i mat lena, <sup>11</sup>“A inanos ui, un katuttur, un los anum a lu, ra un nan sur anum a rumu.” <sup>12</sup>I katuttur, ma i los anum a lu, ra i wan pirso umatan det rop. A taro rop det kisin ra det rakon lekeleke pas o God lena, “Uni maragom ri, met tama a ngas na utna lenri.”

*O Iesu i kabo pas o Liwai  
(Mt 9:9-13; Lk 5:27-32)*

<sup>13</sup>O Iesu i wan melet utiro una papor ina du tasi Galili. A labino kunur na taro det wanpat toromi, ra i ususer det. <sup>14</sup>Ra i wan nanan, i tama pas o Liwai a nutun o Alpius, i kis una rumu na los takis. O Iesu i inanosi lena, “Un mur iau.” Ra o Liwai i katuttur ma i muri.

<sup>15</sup>Numur o Iesu ma anum a kum nat na ususer, det wangon tiro una rumu anum o Liwai. A susut na tene los takis, ma a kum tene sakino kai det wangon tomo nam det, uni a susut na taro lenri det ser mur o Iesu.

<sup>16</sup>A kum tene ususer tagun a Warkurai ra det Parisi utkai, det tama o Iesu i wangon tomo nama kum tene sakino ma a kum tene los takis, ra det ting anum a kum nat na ususer lena, “Sur asau o Iesu i wangon tomo nama kum tene los takis ma a kum tene sakino?”

<sup>17</sup>O Iesu i longoro i, ra i watungi lena, “A dokta ke wanpat sur det ra det langolango. Awu! I wanpat sur det kut ra det misait. Ka

wanpat sur an kabo pas a kum tene tokodos, awu. A wanpat sur an kabo pas a kum tene sakino.”

*Det ting o Iesu una winewel torom o God  
(Mt 9:14-17; Lk 5:33-39)*

<sup>18</sup>A kum nat na ususer anum o Jon ma a kum Parisi det wewel. Ara taro det wanpat torom o Iesu ra det tingi lena, “Sur asau ra a kum nat na ususer anum o Jon ma a kum nat na ususer anum a kum Parisi det wewel, ikut anumi awu?” <sup>19</sup>O Iesu i balu det lena, “A kum paspasan a musano ra i nolin matok, det in wewel pepetlai, ra kura utmakai i tomo nam det? Ke sot sur det in wewel, uni a musano ra kura utmakai i tomo nam det. <sup>20</sup>Ikut tu bung in nanpat, ra din ben ru i gusun det, ra det in wewel maragom.

<sup>21</sup>Katutaio in mabon a du matok na malu tomo nama turaino ra i tararos. Ra in pami lenra, a du matok na malu in raros a turai na malu, ra in tararos bing. <sup>22</sup>Ma kataio in titior a matok na wain utiro un in turai na koto, ra di pami nam in pino meme, sako a wain in mubus ma in purus in nokoto na wain, ra a wain ma in nokoto der in laulau. Din titior a matok na wain ut utiro un in matok na koto na wain.

*O Iesu i wasiso talapor una Bung na Sabat  
(Mt 12:1-8; Lk 6:1-5)*

<sup>23</sup>Ara du bung una Bung na Sabat, o Iesu i wan nanan epotor una kum kinobot na wit. Anun a kum nat na ususer det wan tomo nami, ra det turpas a kumut a ramano kum turunu wit. <sup>24</sup>A kum Parisi det inanos o Iesu lena, “Tama i! Ilai sur anum a kum nat na ususer det pam a utna ri, ra ke tokodos elar nama warkurai tagun a Bung na Sabat?”

<sup>25-26</sup>O Iesu i balu det lena, “Pepetlai, ka mot luki utmakai asau ra o Dewid i pami? Una kilalo ra o Abiata i mugumugu na tene etabor torom o God, o Dewid tomo nama kum paspasano det murak, ma kalako utna. O Dewid i ruk tiro una rumu anum o God, ra i wan a beret di sa pitar tari torom o God. Ma i tabor kai a kum paspasano nami. Ikut a beret ra, a warkurai taguni, i lenri, a kum tene etabor torom o God kut det in nangon taguni, ma a taro ororos awu.” <sup>27</sup>Ra o Iesu i len tandet, “A Bung na Sabat di pami sur in warut a taro. Ka di pami sur a taro det in warut a Sabat. <sup>28</sup>Lenkutkai ra, a Nutun a Musano i a Labino utkai tagun a Bung na Sabat.”

## 3

*O Iesu i ulangolango pas ara musano una Bung na Sabat*

(Mt 12:9-14; Lk 6:6-11)

<sup>1</sup>Numur o Iesu i ruk melet utiro una rumu na lotu. Ara musano kura iai, a lamano i kong. <sup>2</sup>Ara taro kura det sisio sur tu utna det in takun o Iesu nami. Ra det tamtama wakak taru ut uni, ra in ulangolango pas a musano ra una Bung na Sabat, o awu. <sup>3</sup>Ra o Iesu i inanos a musano ra a lamano i kong lena, "Un tur tiro numugu tan a taro rop." <sup>4</sup>Numur o Iesu i ting det lena, "Asau i tokodos sur din pami una Bung na Sabat? Din pam a wakak ino, o a laulau ino? Din ulaun taio, o din um doko taio?" Ikut det kis wowowon ma ka det balu i. <sup>5</sup>O Iesu i nas pukpukus det, i balano sungun nam det, ikut i maris det, uni a balandet i dekdek doko. I inanos a musano ra a lamano i kong lena, "Kodos a lamam." I kodosi, ra a lamano i tokodos melet. <sup>6</sup>Uniutra a kum Parisi det pirso ra det wasiso tomo nama taro anun o Erod, sur tu kisapi det in um doko o Iesu uni.

*A labino kunur na taro det wan torom o Iesu*

<sup>7</sup>O Iesu tomo nam anun a kum nat na ususer, det wan utiro una papor ina du tasi Galili. Ma a labino kunur na taro taginin una papor Galili det muri. <sup>8</sup>A taro det longoro a kum sau ra i pami, ra a susut det wanpat toromi tagitong una ru papor Judia ma Idumea ma tagisapat o Jerusalem, ma tagitong una ara papor danim Jordan ma tagitong o Taia ma o Saidon. <sup>9</sup>Ra a kunur na taro det sa bukus, i inanos anun a kum nat na ususer, sur det in sio tar tu pot. Ra a taro det in bukus talilis pasi, in kas uni. <sup>10</sup>I sa ulangolango tar a susut munung, ra a ramano kum misait bulung, det sugut saro det utiro toromi, sur det in pam a pinino. <sup>11</sup>A taro ra a kum laulau na nion kura un det, ra det in tama i, det in puku piso sa numugu tano, ma det in woiwoi lena, "Ui a Nutun o God." <sup>12</sup>Ikut i turbat dekdek det, sur gong det inanos tar taio lena, i osi.

*O Iesu i kabo pas a noino ma aru aposel*

(Mt 10:1-4; Lk 6:12-16)

<sup>13</sup>O Iesu i wan usapat una tangai, ra i kabo pas ara taro ra i ling sur det, ra det wan toromi. <sup>14</sup>I pilok pas a noino ma aru musano, ra i urising det nama kum aposel.

I pilok det sur det in nan tomo nami, ma sur in tulu det sur det in warawai. <sup>15</sup>Ma i pitar a dekdek torom det, sur det in lakro ru a kum laulau na nion. <sup>16</sup>Iri a kum risan a noino ma aru musano ra i pilok pas det: O Saimon, i ra o Iesu i urisingi nam o Pita, <sup>17</sup>o Jems ma o Jon der sino, aru nutnutun o Sebedi, der ra o Iesu i urising der nam o Boanerges, i kukuraino, aru nutnutun a pungpugur, <sup>18</sup>ma o Endru, o Pilip, o Batolomiu, o Matiu, o Tomas, o Jems a nutun o Alpius, o Tadius, o Saimon ara tagun a kabotaro Silot,\* <sup>19</sup>ma o Judas Iskariot, i ra i usobor tar o Iesu.

*Det watungi un o Iesu lena a laulau na nion kura uni*

(Mt 12:22-32; Lk 11:14-23; 12:10)

<sup>20</sup>Numur ra o Iesu i sa ruk taru una rumu, ara kunur na taro bulung det wanpat toromi, ra katu du bung sur o Iesu ma anun a kum nat na ususer det in nangan uni. <sup>21</sup>A kum kukunu det longoro a wasiso ra uni, ra det wanpat sur det in ben pasi, uni a taro det watungi uni lena ke tokodos mo a nuknukino.

<sup>22</sup>Ra a kum tene ususer tagun a Warkurai, ra det wan tagisapat o Jerusalem, det watungi lena, "O Belsebul, a labino anun a kum laulau na nion, kura un o Iesu, ra i ser lakro ru a kum laulau na nion nama dekdekin o Belsebul."

<sup>23</sup>Ra o Iesu i kabo pas det toromi, ma i wasiso torom det nama kum wasiso elelar lenri, "Pepetlai sur o Satan in lakro melet ru o Satan?" <sup>24</sup>Ra tu gapman det melet ut det in waim etalai, a gapman ra in tur dekdek pepetlai? <sup>25</sup>Ma ra lako taro tagun tu rumu det in waim etalai melet kut, ka det in kis tomo melet mo. <sup>26</sup>Ra o Satan in tur na inaim melet kut nam anun a kum tultul, ma ka det in tur tomo, o Satan ken tur dekdek, in rop kut.

<sup>27</sup>"Kataio in pet lar pasi sur in ruk una rumu anun tu dekdek na musano, ma in los pas a kum utna tagitiro una nun a rumu, ra ken ker ukai mugu tari. Ra ut in ker ukai mugu tari, in los a kum utna maragom anun a musano ra. <sup>28</sup>A inanos mot nama lingmulus, din unus ru a kum sakino petutna rop anun a taro, ma anundet a kum sakino wasiso kai un o God. <sup>29</sup>Ikut ra taio in wasiso laulau una Tokodos na Nion, katutaio melet mo in unus lar pasi. Anun a sakino petutna ra, in kis tukum." <sup>30</sup>O Iesu i wasiso lenri,

\* 3:18: Silot i a risan a taro, ra det tur tomo, uni det nemi sur det in lakro ru a gapman Rom.

uni det watungi uni lena, "A laulau na nion kura uni."

*O nan o Iesu tomo nama kum tistisino  
(Mt 12:46-50; Lk 8:19-21)*

<sup>31</sup>Numur o nan o Iesu ma a kum tistisino det wanpat. Det tur taru kut nago upiso ra det tulu ara sur in ben pasi torom det. <sup>32</sup>A kunur na taro kura det kis talilis pasi, det inanos lena, "O nam ma a kum tistisim kunago det upiso. Det nem na tama ui." <sup>33</sup>Ra i ting det lena, "Mot nuki osi o nang, ma osi det a kum tisting?" <sup>34</sup>Numur i tamtama torom det rop ra det kis talilis pasi, ra i watungi lena, "Tama i, det ri o nang ma a kum tisting! <sup>35</sup>Uni osi ra i ser mur a nemnem anun o God, i ra a tising a musano, ma a tising a ino, ma o nang."

#### 4

*O Iesu i wasiso elelar una wat na ngas na piso*

*(Mt 13:1-9; Lk 8:4-8)*

<sup>1</sup>Numur o Iesu i tur melet pas a etowo tiro nisan a du tasi Galili. A kunur na taro det bukus doko ma det tur talilis pasi. I kas una pot ra i kis taru uni sa utasi, ma a taro rop det tur nago korot una usalin. <sup>2</sup>I ususer det una susut na utna nama kum wasiso elelar. I ususer det lena, <sup>3</sup>"Mot longoro i! A tene minarut i wan sur in sapro a kum pitino wit. <sup>4</sup>Ra i sapro nanan a kum pitino wit, a ramano det puku una kisapi, ra a kum piko det rop pat ma det wan ru i. <sup>5</sup>A ramano kai det puku una nubual na watat, ra kalako susut na piso uni. Det lubang pat lakit, uni a piso ke but. <sup>6</sup>Ikut ra a suan i sisio pat, i rang det ra det main ma det marang rop, uni kalako wakakor indet. <sup>7</sup>A ramano kum pitino wit det puku epotor una kum kuikui, ra a kum kuikui det lubang ma det rau bat pas det. Ra ka det wu lako windet. <sup>8</sup>Ikut a ramano kum pitino det puku una wakak na piso. Det lubang pat, det labo ra det wu. A ramano det wu a tulu noino, a ramano kai a wonom na noino, ma a ramano ara mar na windet." <sup>9</sup>Ra o Iesu i len tandet, "Osi ra arin talngano kura, i wakak sur in longoro nami."

*O Iesu i ususer nama wasiso elelar  
(Mt 13:10-17; Lk 8:9-10)*

<sup>10</sup>O Iesu mukut kura i kis taru, ra a noino ma aru nat na ususer ma ara taro kai det tingi una kum wasiso elelar. <sup>11</sup>Ra i inanos det lena, "O God i utalapor a wasiso na pidik

una nun a matanitu torom mot. Ikut torom det a taro gisen, a ususer det una ututna rop nama kum wasiso elelar, <sup>12</sup>sur, 'det in tamtama ma det in tamtama, ikut ka det in tama lele i, ma det in longoro ma det in longoro, ikut ka det in tasmani. Ra gunuk det in tasman lele i, sako det in tupukus torom o God ma in unus ru anundet a kum sakino.'" *Aisaia 6:9-10*

*O Iesu i utalapor a kukurai na wasiso elelar una wat na ngas na piso*

*(Mt 13:18-23; Lk 8:11-15)*

<sup>13</sup>O Iesu i inanos det lena, "Pepetlai, ka mot talapor una wasiso elelar ri? Mot in talapor lai un tu wasiso elelar kai? <sup>14</sup>A tene minarut i elar nam ara musano ra i ususer det nama wasiso anun o God. <sup>15</sup>A kum pitino wit ra det puku una kisapi, det elar nam ara taro det longoro a wasiso anun o God, ra a iapiap kut, o Satan i wanpat ma i rakon ru i. <sup>16</sup>A kum pitino ra det puku una nubual na watat det elar nam ara taro ra det longoro a wasiso anun o God, ra uniutra det pam ukai i nama gasgas. <sup>17</sup>Ikut a wasiso anun o God ke kis ubalandet, ra ka det in tur suano i, elar nama wit ra kalako wakakor indet. Ra a kum mamaut in nanpat, ma din banlaulau det, uni det nurnur una wasiso anun o God, det in puku lakit. <sup>18</sup>A kum pitino ra det puku epotor una kum kuikui, det elar nama taro ra det longoro a wasiso, <sup>19</sup>ikut a labino nuknuk sur a wakak na kinkinis nin upiso, ma a kum usobor tagun a kum ululeng taginin una rakrakon bual, ma a nemnem kai sur a ramano kum utna, i rau bat a wasiso anun o God, ra ka det wu lako windet. <sup>20</sup>Ikut a ramano taro det elar nama kum pitino, ra det lubang sapat una wakak na piso. Det longoro a wasiso ma det muri, ra det wu. A ramano det wu a tulu noino, a ramano a wonom na noino, ma a ramano ara mar na windet."

*A wasiso elelar una lam  
(Lk 8:16-18)*

<sup>21</sup>O Iesu i len tandet, "Katutaio in los pas tu lam ma in wop bat tari nama paket, o in ubek tari kai nago utuntudu ina kabulu. Awul! Din ubek tari ut netes una nuna turtur. <sup>22</sup>A kum utna rop ra i kis eno, numur in nanpat pupuaso. Ma a kum utna rop ra di munu tari, numur in kis taltalapor, ma din tasmani. <sup>23</sup>Osi ra arin talngano kura, i wakak sur in longoro nami."

<sup>24</sup> O Iesu i wasiso liklik utmakai ra i lena, “Mot nuknuk wakak un asau ra mot longoro i. Ra mot in longoro wakak, o God in pitar a labino tastasman torom mot. Mot in utur ukai a tastasman ra i labo sakit. <sup>25</sup> Osi ra i longoro anung a kum etowo, o God in pitar a labino tastasman toromi. Ikut osi ra ke longoro, din rakon ru utkai asau lik ra kura i pam ukai i.”

*A wasiso elelar una kum wino wit ra i lubung*

<sup>26</sup> O Iesu i watungi kai lena, “A matanitu anun o God i elar nam ara musano ra i sapro a kum wino wit una piso. <sup>27</sup> I ser inep una mirum ma i ser ungalu una waspi, ra a kum wino wit det lubung pat ma det labo, ikut a musano ke tasmani ra det lubung pepetlai. <sup>28</sup> A piso ut i ser ulubung a kum wit lenri: Numugu in ubek in gomono, numur in nanaino in labo tito, ra numur in ubek in gilino tomo nama wino. <sup>29</sup> Ra kut a kum wino det sa taka, a musano ra, in nan tomo nam anun in totok, ma in pirat pas det, uni a kalang sur din pasong a wit i sa sot.”

*A wasiso elelar un in pitino mastad*  
(Mt 13:31-32, 34; Lk 13:18-19)

<sup>30</sup> O Iesu i watungi lena, “A matanitu anun o God i elar nam asau? Ma asi na wasiso elelar ra an utalaporu nami? <sup>31</sup> I elar nam in pitino mastad. I natino taun a kum pitino duwai rop, ra di maruti una piso. <sup>32</sup> Ikut ra di sa marut tari, ma i lubung, i labo taun a kum duwai na inangon rop. I ubek a kum lamlabino kanokano, ma a kum piko det ser pam pios una kum kanokano ra kura una kabosoro ino.”

<sup>33</sup> O Iesu i ususer det nama susut na wasiso elelar kai, ra i elar nam anundet a tastasman. <sup>34</sup> Ke wasiso torom det nam tu se wasiso, a wasiso elelar rop kut. Ikut, ra i mukut tomo nam anun a kum nat na ususer det kis, i utalaporu maragom a kukurai na kum wasiso elelar.

*O Iesu i turbat a wuwu ma a toptop*  
(Mt 8:23-27; Lk 8:22-25)

<sup>35</sup> Una bung na lirop ut ra, o Iesu i inanos anun a kum nat na ususer lena, “Dat nan utong una ara papor tasi.” <sup>36</sup> A kum nat na ususer det kas utiuro una pot ra o Iesu kura uni, ra det wan gusun a kunur na taro. A ramano kum pot utkai det wan tomo nam det. <sup>37</sup> A dekdek na wuwu doko i ragoti, ma a toptop i tapak sapat netes una pot, ra i milau sur in bukus nama tasi. <sup>38</sup> O Iesu i inep

dumun nago numur una pot, ma i ulalong una pilo. A kum nat na ususer det wangun pasi ma det inanos lena, “Tene Ususer, dat na iru! Ko nuk pas met mo?” <sup>39</sup> I katutur, i turbat a wuwu ma i len tan a top, “Mana, un mililo.” Ra a wuwu i rop ma i mililo mut. <sup>40</sup> Numur i len tan a kum nat na ususer lena, “Sur asau ra mot ngara? Awai kuti anumot a nurnur?” <sup>41</sup> Det ngara doko ma det ting etetalai det lena, “Osi na ngas na musano mulus ri? A wuwu ma a top der mur anun a wasiso!”

## 5

*O Iesu i lakro ru a laulau na nion gusun ara musano*

(Mt 8:28-34; Lk 8:26-39)

<sup>1</sup> O Iesu tomo nam anun a kum nat na ususer det wan kutus una du tasi Galili utong una ara papor sur a papor anun a taro Gerasa. <sup>2</sup> Ra o Iesu i sirok gusun a pot, ara musano, a laulau na nion kura uni, i wan gusun a kum kulam na minat sur in nan barato i. <sup>3</sup> A musano ra, i ser kis una kum kulam na minat. Ma kataio ut i pet lar pasi sur in pam ukai i, ma a sen kai ke sot sur din ker ukai i nami. <sup>4</sup> A susut na dino mo, di ser ker ukai aru lamano ma aru kikino nama sen, ikut i ser rubut a sen ma i ser sak ginogino a kum sen gusun aru kikino. Katutaio ut i dekdek sur in umarom lar pasi. <sup>5</sup> Una kum mirum ma a waspi, i ser kukukuk abit tiro una kum kulam na minat ma una kum tangai, ma in toktok a pinpinino nama watat.

<sup>6</sup> Ra i bakbak utmakai, i tama o Iesu, i kalabor ma i kis butkeke nama urur numugu tano. <sup>7</sup> A musano ra i kukukuk nam in labino walngano lena, “Iesu, a Nutun o God, a Labino Sakit, asau ra u nem na pami un iau? Un liliman umatan o God sur gong u ukadik iau.” <sup>8</sup> I wasiso lenri, uni o Iesu i sa watung tari lena, “A laulau na nion, un pirso gusun a musano ri.” <sup>9</sup> Numur o Iesu i tingi lena, “Osi a risam?” Ma i balu i lena, “A risang A Kabo Liur, uni a susut met.” <sup>10</sup> Ra i saring liklik o Iesu sur gong i lakro ru tar det gusun a nubual ra.

<sup>11</sup> A kabo liur na boro kura det wangon tiro milau kut una tangai. <sup>12</sup> Ra a kum laulau na nion det saring o Iesu lena, “Un tulu met utiuro torom a kabo liur na boro, sur met in ruk utiuro un det.” <sup>13</sup> O Iesu i mulaot ru det. A kum laulau na nion det pirso gusun a musano, ma det ruk taru una kum boro.

A kum boro det kalabor pirso una palis sur a du tasi, ra det kongo rop. Det rop det elar nama ru arip.

<sup>14</sup> A taro ra det ser tabor a kabo liur na boro ra, det kalabor ma det inanos tiro utamon ma tiro utkai una kum natnat na tamon. Ra numur a taro det wan sur det in tama asau ra i wanpat. <sup>15</sup> Ra det wanpat torom o Iesu, det tama a musano ra a kabo liur na laulau na nion numugu det sisio taru uni. Kura mukut i kis taru, i sa pipis pas ma a nuknukino i sa talapor melet. Ra a taro ra det ngara doko. <sup>16</sup> Det ra det sa tama tari, det inanos a taro una kum utna ra i wanpat una musano ra a kum laulau na nion kura uni, ma una kum boro kai. <sup>17</sup> Numur a taro det saring o Iesu sur in nan gisen gusun anundet a papor.

<sup>18</sup> O Iesu i kas utiro una pot, ra a musano ra numugu a kum laulau na nion kura uni, i saring o Iesu sur in nan tomo nami. <sup>19</sup> O Iesu ke tarom tano, ikut i lena, “Un nan utiro una num a tamon torom a kum kukum, ma un inanos det una labino utna ra a Labino i sa pam tari un ui, ma una nuna marmaris torom ui.” <sup>20</sup> Ra a musano ra i wan, ma i inanos a taro tiro o Dekapolis\*, una labino utna ra o Iesu i sa pam tari uni. Ra a taro rop det kisin.

*O Iesu i ulaun pas a nutun o Jairus ma i ulangolango ara ino*

*(Mt 9:18-26; Lk 8:40-56)*

<sup>21</sup> O Iesu i kas una pot ma i wan melet utiro una ara papor du tasi. A kunur na taro det wan tomo ma det tur talilis pasi tiro una usalin. <sup>22</sup> Ara mugumugu tagun a rumu na lotu, a risano o Jairus, i wanpat tiro. I tama o Iesu, ra i kis butkeke sa numugu tano, <sup>23</sup> ma i saring dekdeki lena, “A nutunglik, a ino, i sa ling na mat. Aiap, dar in nan ma un ubek a lamam sapat netes uni, sur in langolango ma in laun.”

<sup>24</sup> Ra o Iesu i wan tomo nami, a kunur na taro det muri, ma det bukus talilis pasi.

<sup>25</sup> Ma ara ino kura, i misait nama gap elar nama noino ma aru kilalo. <sup>26</sup> I taramo a labino ngunungut ulaman a kum dokta, ma i urop tar anun a kum utna ra i ulengi un det. Ikut ke langolango, a misait i labo nanan kut. <sup>27</sup> I longoro a saksakutna un o Iesu, ra i wan tiro ubalan a kunur na taro, numur tan o Iesu, ma i tulan anun a saket. <sup>28</sup> I pami lenra, uni i nuki lena, “Ra an tuki kut anun a saket, an langolango.”

<sup>29</sup> Uniutra a gap i tuk, ra a ino i taramo a pinino i langolango ma ke taramo melet a ngunungut.

<sup>30</sup> Uniutra, o Iesu i taramo a dekdek i wan gusuni, i tupukus torom a kunur na taro ra i iting lena, “Osi ra i tulan anung a saket?”

<sup>31</sup> Anun a kum nat na ususer det balu i lena, “U tama a kunur na taro det talilis bat pas ui, ra u iting pepetlai lena, ‘Osi ra i tulan iau?’” <sup>32</sup> Ikut o Iesu i tamtama utmakai sur osi ra i tulan tari. <sup>33</sup> A ino ra i tasman a misait i sa rop gusuni, i wan ra i puku sa numugu tan o Iesu. I ngara ma i neneder, ra i inanos nam asau ra i sa pam tari. <sup>34</sup> O Iesu i watungi tano lena, “Nutunglik, anum a nurnur i sa ulangolango pas ui. Un nan nama malmal. Anum a misait i sa rop gusun ui.”

<sup>35</sup> Ra o Iesu i wasiso utmakai, a ramano kum musano ra det wan tagitiro una rumu anun o Jairus, a mugumugu tagun a rumu na lotu, det wanpat. Det lena, “O nutumlik i sa mat. Gong mo u ubalon a tene ususer.”

<sup>36</sup> O Iesu ke nuk pas asau ra det watungi, ikut i inanos a mugumugu tagun a rumu na lotu lena, “Gong u ngara. Un nurnur kut.”

<sup>37</sup> Ke madek taio sur in muri, ikut i mulaot sur o Pita, ma o Jems der sino nam o Jon detul in muri. <sup>38</sup> Ra det wanpat tiro una rumu anun a mugumugu ra, o Iesu i tama det ra det tala, det ugaia ma det domos. <sup>39</sup> I ruk ra i watungi tandet lena, “Ilai ra mot tala ma mot ugaia nama tinangis? A ino lik ri ausur i mat, i inep dumun kut.” <sup>40</sup> Ra det urongon kut uni.

I tulu pirso ru det rop, ikut i ben pas a taman a ino lik ma o nano ma anun a tulu nat na ususer, ra detul wan tomo nami. Ra det ruk torom a ino lik. <sup>41</sup> O Iesu i pam a laman a ino lik ra i inanos lena, “Talita koum!” A kukuraino i lenri, “A ino lik, a watungi tam, un katutur!” <sup>42</sup> Uniutra, a ino lik i katutur ma i wan. Det tama i ra det kisin doko. I elar nama noino ma aru kilalo anunu. <sup>43</sup> O Iesu i turbat dekdek det sur gong det inanos tar taio un asau ra i sa pam tari. Ma i inanos det sur det in tabor a ino lik ra, nam lako utna na inangon.

## 6

*A taro Nasaret ka det nurnur un o Iesu*  
*(Mt 13:53-58; Lk 4:16-30)*

<sup>1</sup> O Iesu tomo nam anun a kum nat na ususer det wan tagitong o Kapernaum, ra

\* 5:20: O Dekapolis a kukuraino a noino lamlabino tamon.

det wanpat tong o Nasaret, a tamon anun o Iesu. <sup>2</sup>Una Bung na Sabat, i turpasi sur in ususer a taro tiro una rumu na lotu. A susut na taro ra det longoro i, det kisin doko, ra det watungi lena, "A musano ri i tasman lan a kum utna ri? A ngas na mananos sau ri di pitari tano, ra i pam a kum lamlabino utna na ukisin nami?" <sup>3</sup>I a tene pam rumu kut, a nutun o Maria. A kum tistisino kai, o Jems, o Josep, o Judas ma o Saimon, ma a kum bunu kai ano kuri ut dat laun tomo nin." Ra a taro ka det nemi ut mo.

<sup>4</sup>O Iesu i watungi tandet lena, "Di ser ru a poropet una kum se tamon, ikut det ut una nun a tamon, a kum kukuunu ma det kai una nun a rumu ka det ru i." <sup>5</sup>O Iesu ke pam lar pas lako susut na utna na ukisin tiro iai, ikut i ubek aru lamano una pak na misait, ra i ulangolango pas det. <sup>6</sup>I kisin, uni ra ka det nurnur uni.

*O Iesu i tulu ru a noino ma aru nat na ususer*

(Mt 10:5-15; Lk 9:1-6)

Numur o Iesu i wan tuptupukus una kum tamon, ra i ususer a taro. <sup>7</sup>I kabo pas a noino ma aru nat na ususer, ra i tulu ru det a ruru, ma i pitari a dekdek tandet sur det in lakro ru a kum laulau na nion. <sup>8</sup>I watungi tandet lena, "Gong mot los tu utna una numot a inawan, mot in losi kut in nubuku. Gong mot los lako utna na inangon, gong tu rat ma gong mot silapo tu mani una numot a kum malu. <sup>9</sup>Mot in pas aru su, ikut gong mot los tar tin namalu na kelkeles. <sup>10</sup>Ra mot in nanpat tiro un tu rumu, mot in kis ut tiro iai tuk una bung ra mot in nan gusun a tamon ra. <sup>11</sup>Ra a taro tagun tu tamon ka det in gas pas mot, ma ka det in longoro anumot a wasiso, ra mot in nan gusun a tamon ra, mot in tang ru a kubus gusun a kikimot. Mot in tang ru a kubus sur a ukinalong na utumarong torom det\*."

<sup>12</sup>Ra det wan ma det warawai torom a taro, sur det in nukpukus. <sup>13</sup>Ma det lakro ru a susut na laulau na nion, ma det talus a susut na misait nama wel, ma det ulangolango pas det.

*O Erod i nuki lena o Iesu i o Jon a Tene Baptaiso*

(Mt 14:1-2; Lk 9:7-9)

<sup>14</sup>A King Erod i longoro a wasiso un o Iesu, uni a taro rop det sa tasmani. Ara taro det watungi uni lena, "A musano ra, i o Jon a Tene Baptaiso, i sa laun melet gusun a minat. I mo ra, i pam a kum utna na ukisin."

<sup>15</sup>Ara taro kai det watungi un o Iesu lena, "I, a poropet Elaija." Ara taro kai det watungi uni lena, "O Iesu, i ara poropet elar nama kum poropet tagun numugu." <sup>16</sup>O Erod i longoro a kum wasiso ri un o Iesu, ra i lena, "A sa tau kutus ru tar in lorin o Jon, ra uniri i sa laun pat melet gusun a minat!"

*O Erod i itula sur din tau kutus in lorin o Jon a Tene Baptaiso*

(Mt 14:3-12)

<sup>17-18</sup>Numugu o Erod i tulu ru anun a kum tene inaim sur det in dat pas o Jon, ma det in ker pasi, ra det in uruk tari una karabus. O Erod i pami lenri, uni o Jon i inanos i lena, "Ke tokodos ra u nolin nam o Erodias, a urim." I watungi lenri, uni o Erod i sa sal pas o Erodias, a ino anun o tisino, o Pilip, ra i nolin nami. <sup>19</sup>O Erodias i nget laulau o Jon ma i nemi sur in um doko i. Ikut ke pet lar pasi, <sup>20</sup>uni o Erod i ngaran o Jon ra i tamtamabati. I pami lenra uni i tasmani lena, o Jon a tene tokodos ma a musano anun o God. O Erod i gas sur in longoro anun a kum wasiso, ikut a nuknukino i ser talara nami.

<sup>21</sup>Numur o Erodias i nuk pas ara kisapi sur din um doko o Jon. Una bung ra di ukinalong a bung na usus anun o Erod, o Erod i pam a labino inangon sur a kum mugumugu tagun anun a gapman, ma a kum mugumugu anun a kum tene inaim, ma a kum mugumugu tagitong una papor Galili. <sup>22</sup>Ra kura det wangon, a nutun o Erodias a ino, i ruk ra i lagor nisan det. O Erod ma a taro ra det wangon tomo nami, det gas doko nami. Numur i len tan a toraro ra lena, "Asau ra u nemi tang, an tabor ui nami." <sup>23</sup>Ra i liliman dekdek tari lena, "Asau mukut ra un saringi tang, an pitari tam. Ra un saring iau kai sur tu kukur tagun a kum utna ra a warkurai suri, an pitari ut tam." <sup>24</sup>Ra i wan torom o nano ma i tingi lena, "Asau ra an saringi tano?" O nano i balu i lena, "Un saringi sur in lorin o Jon a Tene Baptaiso." <sup>25</sup>Uniutra, a toraro ra i wan lakit torom a king, ra i watungi tano lena,

\* 6:11: A ukinalong ra a kum Parisi det ser muri, ra det wan gusun a nubual anun a taro ra ausur a kum te Juda. Iri a utumarong torom det ra det rosumur gusun a wasiso anun o God.

“Uniutri, un tabor iau nam in lorin o Jon a Tene Baptaiso un tu pelet.”

<sup>26</sup> A king i tupunuk doko. Ikut ke nemi mo sur in ipul, uni i sa liliman taru lena asau mukut ra in saringi tano in tabori ut nami, ma a taro ra det kis tomo nami una inangon, det sa longoro tar anun a wasiso. <sup>27</sup> Uniutra, i tulu ru a tene inaim sur in los tar in lorin o Jon toromi. A tene inaim i ruk una karabus, ra i tau kutus pas in lorin o Jon. <sup>28</sup> I ubek pasi una pelet, ra i pitari torom a toraro, ra i bulung i pitari torom o nano.

<sup>29</sup> A kum nat na ususer anun o Jon det longoro i, ra det wan ma det los pas a minat ino, ma det uruk tari una kulam na minat.

*O Iesu i tabor a limo na arip na musano  
(Mt 14:13-21; Lk 9:10-17; Jn 6:1-14)*

<sup>30</sup> A kum aposel det kis tomo nam o Iesu, ra det inanosi una kum utna rop ra det sa pam tari, ma det sa ususer tar a taro kai nami. <sup>31</sup> Ra o Iesu i watungi tandet lena, “Dat in nan sur tu nubual kalako taro uni, sur mot in mana pas.” I watungi lenri, uni a susut na taro det wanpat liklik kut, ma katu du bung sur o Iesu tomo nam anun a kum aposel det in nangon uni. <sup>32</sup> Ra det kut det kas una pot ra det wan sur a nubual kalako taro uni.

<sup>33</sup> A susut na taro ra det tama det ra det soi, det tama lele pas o Iesu tomo nam anun a kum aposel. Det kalabor gusun a kum tamon ra det mugu pat una nubual ra o Iesu det in sot iai. <sup>34</sup> Ra det sot, o Iesu i tama a labino kunur na taro. I maris doko det, uni det elar mukut nama kum sipsip ra katu tene tamtamabat anundet. Ra i tur pas a towo det nama susut na utna.

<sup>35</sup> Ra i sa lirop, anun a kum nat na ususer det wan toromi, ra det watungi tano lena, “A nubual ri i bakbak gusun a kum tamon, ma i sa lirop kai. <sup>36</sup> Un tulu ru a taro sur det in nan sur a kum natnat na tamon milau, ma a kum lamlabino tamon kai. Det in kul pas lako utna sur det in nani.” <sup>37</sup> O Iesu i balu det lena, “Mot ut mot in tabor det.” Det watungi tano lena, “Kalako ru mar na denari† sur dat in kul tabor det nami.” <sup>38</sup> Ra o Iesu i ting det, “Lako isin beret kura mot losi? Mot in nan ma mot in tamtama.” Ra det sa tama tari, det inanos o Iesu lena, “A limanin beret kut kuri ma aru kiripo kai.”

<sup>39</sup> Ra o Iesu i tulu anun a kum nat na ususer sur det in tibo susuaro a taro sur det

in kis un in wuliso. <sup>40</sup> A ramano det kis arara mar, ma a ramano kai a limlimo na noino.

<sup>41</sup> Ra o Iesu i los pas a limanin beret, ma aru kiripo, i tamtama usapat una langit, i watung wakak pas torom o God uni, ra numur i tibik a limanin beret, ra i pitari tan anun a kum nat na ususer sur det in tibo a taro nami. I tibo det rop kai nam aru kiripo. <sup>42</sup> Det rop det wangon ma det masur. <sup>43</sup> Numur det song bukus pas a noino ma aru rat nama beret ma a kiripo ra det wangon kopos pas uni. <sup>44</sup> A kunur na taro ra det wangon, a niluluk ina kum musano sot kut i elar nama limo na arip.

*O Iesu i wan sapat netes una tasi  
(Mt 14:22-23; Jn 6:15-21)*

<sup>45</sup> Uniutra, o Iesu i tulu ru anun a kum nat na ususer, sur det in kas una pot, ma det in mugu utong o Betsaida una ara papor tasi. Ma i, i kis utmakai sur in tulu ru a taro. <sup>46</sup> Ra i wan gusun det, i wan tito usapat una tangai sur in wararing. <sup>47</sup> Ra i sa lirop matano mirum, a pot i sa wan potora una du tasi, ma o Iesu mukut i kis nago una usalin. <sup>48</sup> I tama det ra i sa tekes det a ulusu, uni a wuwu i waim tagisa numugu. Una lar, o Iesu i wan sapat netes una tasi torom det, ra i ling na wan sakit det. <sup>49</sup> Det tama pasi ra i wan sapat netes una du tasi, det nuki lena a nion. Ra det woiwoi, <sup>50</sup> uni det rop det tama i, ra det ngara doko. Uniutra o Iesu i watungi tandet lena, “A kosom taru tamot, iau kut ri. Gong mot ngara.” <sup>51</sup> Ra o Iesu i kas torom det una pot, ra a wuwu i mana mut. Det kisin doko, <sup>52</sup> uni ka det tasman wakak a utna na ukisin ra o Iesu i sa pam tari una beret ma a kiripo. Uni a balandet i dekdek doko.

<sup>53</sup> Ra det sa wan kutus un ara papor tasi, det sot tiro una papor Genesaret, det ega tar a pot. <sup>54</sup> Det sirok gusun a pot, ra uniutra, a taro det tama lele pas o Iesu. <sup>55</sup> Det kalabor una kum tamon una papor ra sur det in los a kum misait torom o Iesu. Det los det una kum lu sur utiro toromi, un asi na tamon ra det longoro i lena, i kura iai. <sup>56</sup> O Iesu i wan utiro una kum natnat na tamon ma a kum lamlabino tamon kai, ra a taro det los pat a kum misait ma det inep det tiro una nubual ra a taro det ser wan tomo uni. A kum misait det saringi sur det in pami kut a sinisir ina nun a saket. Ra det rop ra det pami, det langolango mut.

† 6:37: Anundet a mani det ser watungi nama denari. Ara denari i elar nama ikul anun ara musano una ra bung na pinapam.

## 7

A kum Parisi det mur kut a wasiso anun a taro, ma ausur a wasiso anun o God  
(Mt 15:1-9)

<sup>1</sup> A kum Parisi ma a kum tene ususer tagun a Warkurai ra det wan tagisapat o Jerusalem, det wan tomo torom o Iesu. <sup>2</sup> Det tama a ramano kum nat na ususer anunu ra det wangon kut nama dur na lamandet, ma ka det gos mugu pas a kum lamandet. <sup>3</sup> A kum Parisi tomo nama taro Juda rop det mur a wasiso anun a taro tagun numugu, lena ka det nangon, ra ka det gos mugu pas a kum lamandet. <sup>4</sup> Ra det in milet tagitiro una nubual na siuru, det in gos lamandet mugu pas ut, numur det in nangon. A ramano utna utkai tagun numugu ra det ser pami, i lenri, det ser gos a kum kap, a kum kuro, ma a kum ketel.

<sup>5</sup> A kum Parisi ma a kum tene ususer tagun a Warkurai det ting o Iesu lena, "Ilai sur anum a kum nat na ususer ka det ser mur a kum etowo anun anundat a taro tagun numugu? Det ser wangon kut nama kum dur na lamandet." <sup>6</sup> Ra o Iesu i balu det lena, "A wasiso anun o Aisaia i lingmulus ut, ra i wasiso na poropet mugu taru un mot a kum tene torotoro. I tumusi un mot lena, 'A taro ri det ru iau kut nama wandet, ikut a balandet i bakbak doko gusun iau."

<sup>7</sup> Det lotu oros kut torom iau, uni det ususer nama kum warkurai anun a taro kut.' Aisaia 29:13

<sup>8</sup> Mot sa wan gusun a kum Warkurai anun o God, ma mot mur mukut a kum etowo anun a taro."

<sup>9</sup> O Iesu i watungi tan a kum Parisi ma a kum tene ususer tagun a Warkurai lena, "A lingmulus ut, mot sa rosumur gusun a Warkurai anun o God, sur mot in muri kut a kum etowo anun anumot a taro tagun numugu. <sup>10</sup> Uni o Moses i watungi lena, 'Un ru o tamam ma o nam,' Kisim Bek 20:12 ra i watungi kai lena, 'Osi ra in wasiso laulau un o tamano ma o nano, din um doko i.' Kisim Bek 21:17

<sup>11</sup> Ikut mot, mot ususer a taro lena, i wakak kut, ra taio in watungi tan o tamano ma o nano lena, 'Asau ra an warut mur nami, a sa tabor tar o God nami.' <sup>12</sup> Mot turbati kut sur gong i warut o tamano ma o nano. <sup>13</sup> Ra

mot pami lenra, mot unatino pas a wasiso anun o God, ma mot muri kut a kum etowo ra mot los pasi gusun anumot a taro tagun numugu. Ma a susut na utna kai lenri ra ke tokodos, mot ser pami."

A kum utna ra i udur a taro umatan o God  
(Mt 15:10-20)

<sup>14</sup> O Iesu i kabo melet pas a kunur na taro toromi, ra i watungi tandet lena, "Mot rop mot in longoro iau, ma mot in tasman lele anung a wasiso. <sup>15-16</sup> Tu utna ra taio in nan pasi ma in ruk un in balano, ken uduri umatan o God. Ikut, a kum utna ra in pirso gusun a nuknukino, i ra in uduri umatan o God."\*

<sup>17</sup> O Iesu i wan gusun a kunur na taro, ma i ruk una rumu. Anun a kum nat na ususer det tingi una wasiso elelar ri. <sup>18</sup> Ra i watungi tandet lena, "Mot kai, ka mot talapor utmakai? Ka mot tasmani lena a kum utna rop ra i ruk un in balan taio, ken uduri umatan o God? <sup>19</sup> Uni ke ruk una nuknukino, i ruk pas kut un in balano ra i pirso melet."

Ra una nun a wasiso ra, i upuaso i lena, a kum utna na inangon rop i wakak. <sup>20</sup> I watungi kai lena, "A utna ra in pirso gusun a nuknukin a taro, i ra in udur det. <sup>21</sup> Iri a kum utna ra i ser wanpat tagun a nuknukin a taro: a kum sakino nuknuk, a kum petutna na pamuk, a wolong, um doko a taro, di sal pas a ino anun taio gisen, <sup>22</sup> a nemnem sur a susut na utna, a kum sakino petutna, a kum torotoro, a kum sakino nemnem na pinindi, a nuknuk laulau sur a utna anun taio, di mang laulau ara, taio ra i ulabo pasi ut, ma a kum tuptup na petutna. <sup>23</sup> A kum sakino utna rop ri, det wanpat gusun a nuknukin a taro, ma i udur det umatan o God."

A nurnur anun a ino ra ausur a ino Juda  
(Mt 15:21-28)

<sup>24</sup> O Iesu i wan tagitiro, ra i wanpat milau a tamon Tair, ma i ruk un ara rumu. Ke nemi sur taio in tasmani ra kura i, ikut ke pet lar pasi sur gong det tasmani. <sup>25</sup> Ara ino, a nutunu a inolik, a laulau na nion kura uni. I longoro a wasiso un o Iesu, uniutra i wan ra i kis butkeke nisan a kokino. <sup>26</sup> A ino ra, a ino Ponisia tagun a papor Siria, i ausur a ino Juda. I saring o Iesu sur in lakro ru a laulau

\* 7:15-16: A ramano kum tene mananos una Buk Tabu det nuki lena, a ramano wasiso kai i kis una rino ri. I lenri: Ra taio arin talngano kura, i wakak sur in longoro nami.

na nion gusun a nutunulik. <sup>27</sup> Ra o Iesu i watungi tano lena, “Din tabor masur mugu tar a kum nat. Ke tokodos sur din los a utna ana kum nat, ma din woro i tan a kum pap.” <sup>28</sup> Ra a ino i balu i lena, “Labino, a lingmulus ut ra. Ikut, a kum pap kai det ser wan a kum mumumut na utna nago utuntudu ina kabulu na inangon ana kum nat.” <sup>29</sup> Ra o Iesu i watungi tan a ino ra lena, “Una num a wakak na minabalu, un nan kut. A laulau na nion i sa pirso gusun a nutumlik.” <sup>30</sup> A ino i milet melet, ra i tama a nutunu kura i inep taru una bano. A laulau na nion i sa pirso taru gusuni.

*O Iesu i uwakak pas ara musano ra i kutkut ma i ngat*

<sup>31</sup> O Iesu i wan gusun a tamon Tair ma i wan sakit o Saidon sur a du tasi Galili, ra i wanpat una papor Dekapolis†. <sup>32</sup> Ara taro det ben ara musano i kutkut ma i ngat torom o Iesu, ma det saringi sur in ubek aru lamano netes uni. <sup>33</sup> O Iesu i ben gisen pasi kut gusun a kunur na taro, ra i ubek arin kaskas na lamano una arin talngan a musano ra. I ibis taru ra i pam in karmen a musano. <sup>34</sup> I tatado usapat una langit, i los wuwu pas, ra i watungi tano lena, “Epata!” a kukuraino lena: “Un papos!” <sup>35</sup> Uniutra, in talngano i talapor, ma in karmene i tapalos ra i wasiso pat. <sup>36</sup> Ra o Iesu i turbat dekdek a taro sur gong det inanos taio uni. Ikut ka det longoro i, ma a wasiso uni, i wan sarara kut. <sup>37</sup> Det ra det longoro a utna ri, det kisin doko uni, ma det watungi lena, “O Iesu i pam wakak pas a kum utna rop. I uwakak pas a kum kutkut sur det in longoro, ma a kum ngat sur det in wasiso!”

## 8

*O Iesu i tabor a wat na arip na musano (Mt 15:32-39)*

<sup>1</sup> Ara bung ubalan a kum bungbung ra, a labino kunur na taro det wan pat tomo, ma kalako utna na inangon sur det in nani. O Iesu i kabo pas anun a kum nat na ususer toromi, ma i watungi tandet lena, <sup>2</sup> “A maris doko a taro ri, uni det sa kis tomo nam iau nin, a tulu bung, ma kalako utna na inangon sur det in nani. <sup>3</sup> Ra an tulu ru det sur anundet a kum tamon nama munurak, det in bengbeng nanan una kisapi, uni ara taro tagun det, det wan ut tagitiro bakbak.”

<sup>4</sup> Anun a kum nat na ususer det inanos lena, “A nubual ri, kalako taro uni. Tagai mo lako utna na inangon sur dat in tabor det nami?”

<sup>5</sup> Ra o Iesu i ting det lena, “A isin beret kura mot losi?” Det balu i lena, “A wonom mawit ino mukut.”

<sup>6</sup> O Iesu i inanos a taro rop sur det in kis. I los pas a wonom mawit nin beret, i watung wakak pas uni torom o God, i tibiki ma i pitari torom anun a kum nat na ususer sur det in tabor a taro nami. Ra det pami lenutra. <sup>7</sup> Det los pas a kabanin natnat na kiripo kai, ra i watung wakak pas uni, ma i pitari sur det in tibo a taro nami. <sup>8</sup> A taro det wangon ma det masur. Numur det song bukus pas a wonom mawit na rat nama kum utna ra det wangon kopos pas uni. <sup>9</sup> A kum ino tomo nama kum nat liklik ma a kum musano, det rop det wangon. A niluluk ina kum musano kut, i elar nama wat na arip. Ra numur o Iesu i tulu ru det. <sup>10</sup> I kas una pot tomo nam anun a kum nat na ususer, ma det wan sur a papor Dalmanuta.

*A kum Parisi det ting o Iesu sur in pam tu ukinalong*

*(Mt 16:1-4)*

<sup>11</sup> A kum Parisi det wanpat torom o Iesu, ma det wasiso na engaras tomo nami. Det ling sur det in lari. Ra det saringi lena, in pam tu ukinalong sur in ese i lena, i tagisapat una langit. <sup>12</sup> O Iesu i taramo a mamaut ma i rungasotuk, ra i watungi lena, “Ilai ra a taro tagun uniri, det tamtama sur tu ukinalong? A inanos mot nama lingmulus, ka din pam tu ukinalong torom mot.” <sup>13</sup> Ra i kas melet una pot, ra i wan gusun det utong un ara papor tasi.

*A utumarong una is anun a kum Parisi ma anun o Erod*

*(Mt 16:5-12)*

<sup>14</sup> A kum nat na ususer det dumano i sur det in los lako beret. In tekene sot kut ra det losi tomo nam det una pot. <sup>15</sup> Ra o Iesu i utumarong det lena, “Mot in tumarong una is anun a kum Parisi, ma anun o Erod.”

<sup>16</sup> Ra det wasiso tomo una kukurain a wasiso anun o Iesu, ra det lena, “I watungi lenra uni ka dat los lako beret.” <sup>17</sup> O Iesu i tasman anundet a wasiso ra i watungi tandet lena, “Ilai ra mot wasiso lena ka mot los lako beret? Ka mot mananos ma ka mot talapor utmakai? Pepetlai, a balamot i dekdek? <sup>18</sup> A kum matmata mot i kis, ikut ka mot

† 7:31: O Dekapolis a kukuraino a noino lamlabino tamon.

tamtama nami. Ma a kum taltalngamot i kis, ikut ka mot longoro nami. Pepetlai, ka mot nuk pas asau ra asa pam tari? <sup>19</sup> Ra a tibik a limanin beret torom a limo na arip na musano, aiso rat ra mot song bukus pasi nama utna na inangon ra di wangon kopos pas uni?" Det balu i lena, "A noino ma aru." <sup>20</sup> "Ma i kai, ra a tibik a wonom mawit na beret torom a wat na arip na musano, aiso rat ra mot ubukus pasi nama utna ra di wangon kopos pas uni?" Ra det balu i lena, "A wonom mawit." <sup>21</sup> Ra i ting det lena, "Ka mot talapor utmakai?"

*O Iesu i utamtama pas a pulu tong o Betsaida*

<sup>22</sup> O Iesu tomo nam anun a kum nat na ususer det wanpat tong o Betsaida, ra ara taro det ben pat ara pulu toromi, ma det saringi sur in ubek a lamano uni sur in tamtama. <sup>23</sup> I pam a laman a pulu, ra i ben gisen pasi gusun a tamon, i ibis tar arin matan a pulu, ma i ubek aru lamano uni, ra i tingi lena, "U sa tama tu utna?" <sup>24</sup> A musano ra i tamtama tokodos, ra i lena, "A tama a taro det elar kut nama kum duwai ra det wan nanan." <sup>25</sup> O Iesu i ubek melet aru lamano una arin matan a pulu, ra arin matano der talapor wakak maragom, ra i tama a kum utna rop. <sup>26</sup> O Iesu i tulu ru a musano ra, ma i watungi tano lena, "Un nan tokodos sur anum a rumu. Gong u wan ubalan a tamon."

*O Pita i wasiso talapor un o Iesu  
(Mt 16:13-20; Lk 9:18-21)*

<sup>27</sup> O Iesu tomo nam anun a kum nat na ususer det wan sur a kum tamon milau o Sisaria Pilipai. Ra det wan nanan, i ting det lena, "A taro det watung iau nam osi?" <sup>28</sup> Det balu i lena, "Ara taro det watung ui o Jon a Tene Baptaiso. Ara taro det watung ui o Elaija, ma ara taro kai det watung ui, ara tagun a kum poropet." <sup>29</sup> Ra i ting det lena, "Ma mot, mot watung iau nam osi?" Ra o Pita i balu i lena, "Ui a Karisito." <sup>30</sup> Ra i turbat dekdek det sur gong det inanos taro taio uni."

*O Iesu i wasiso mugu una nun a minat  
(Mt 16:21-28; Lk 9:22-27)*

<sup>31</sup> O Iesu i tur pasi sur in towon anun a kum nat na ususer lena, "A Nutun a Musano in taramo a susut na mamaut. A kum mugumugu, a kum lamlabino tene etabor torom o God, ma a kum tene ususer tagun

a Warkurai det in rosumur gusuni ma din um doko i. Ra a tulu bung in rop, in katutur melet." <sup>32</sup> A wasiso ri anun o Iesu i talapor kut. Ra o Pita i ben gisen pasi ma i turbat dekdeki. <sup>33</sup> O Iesu i tupukus, ma i tamtama torom anun a kum nat na ususer, ra i wasiso dekdek torom o Pita lena, "Satan, un nan unago numur tang! Uni u muri kut a nuknukin a taro, ma ko mur a nuknukin o God."

<sup>34</sup> O Iesu i kabo pas a kunur na taro tomo nam anun a kum nat na ususer toromi, ma i watungi tandet lena, "Ra taio i nemi sur in mur iau, gong i mur a nuknukino. In los pas anun in nanai kutus ma in mur iau. <sup>35</sup> Osi ra i maris bat anun a nilaun, in iru, ikut osi ra ke maris bat anun a nilaun uni i mur iau ma a Wakak na Wasiso, in laun. <sup>36</sup> Osi ra in utur ukai a kum ututna rop taginin una rakrakon bual, ma a niono in iru, in wakak pepetlai toromi?" <sup>37</sup> In kul keles a niono nam asau? <sup>38</sup> A taro tagun uniri, anundet a nilaun i bakbak gusun o God, ma det a kum tene pam sakino. Osi ra in maimai un iau ma una nung a kum wasiso epotor tan a taro ri, a Nutun a Musano kai in maimai uni, ra in nanpat tomo nam a kum ensel anun o Tamano ma a minamar anun o Tamano."

## 9

<sup>1</sup> Ma i watungi tandet lena, "A inanos mot nama lingmulus, lako taro tagun mot ri mot tur nin, ka mot in mat utmakai, ra mot in tama a matanitu anun o God ra in nanpat nama dekdek."

*A pinin o Iesu i tamtama senene  
(Mt 17:1-13; Lk 9:28-36)*

<sup>2</sup> Numur tan a wonom na bung, o Iesu i ben pas o Pita, o Jems ma o Jon, ra i ben gisen pas detul usapat una tangai ra i tur toto bing. Tiro iai detul tama a pinin o Iesu i wanpat senene. <sup>3</sup> Anun a kum malu i kabang doko ma i pilpil, ra kataio taginin upiso in gos talapor pas tin namalu lenra. <sup>4</sup> Ma a tulu nat na ususer detul tama pas o Elaija der nam o Moses der wanpat, ra detul wasiso tomo nam o Iesu. <sup>5-6</sup> A tulu nat na ususer detul ngara doko, ma o Pita ke tasman asau ra in watungi. Ra i watungi mukut tan o Iesu lena, "Tene Ususer, i wakak ra dat in kis nin. Metul in pam lako tulu turturup, ara anumi, ara anun o Moses, ma ara anun o Elaija." <sup>7</sup> Ra a du bakut i wanpat ma i pulus bat pas det. Ma in nalngan ara tagisapat una bakut i watungi lena, "Iri a Nutunglik, a

nat na wakak. Mot in longoro i.”<sup>8</sup> Uniutra, detul tamtama tuptupukus, ikut ka detul tama melet mo taio, o Iesu sot mukut kura i tomo nam detul.

<sup>9</sup> Ra det wan pirso nanan tagisapat una tangai, o Iesu i turbat tar detul sur gong detul inanos tar taio un asau ra detul sa tama tari, tuk una bung ra a Nutun a Musano in katatur gusun a minat.<sup>10</sup> Detul mur a wasiso ra, ma ka detul inanos taio nami, ikut detul ting etalai detul lena, “Asau a kukurai na katatur gusun a minat?”

<sup>11</sup> Ra detul ting o Iesu lena, “Sur asau ra a kum tene ususer tagun a Warkurai det watungi lena, o Elaija in nanpat mugu?”<sup>12</sup> I balu detul lena, “A lingmulus ut, o Elaija in nanpat mugu ma in ukodos melet a kum utna rop. Ma ilai ra di sa tumus tari una Buk Tabu lena, a Nutun a Musano in taramo a susut na ngunungut ma din ipul ru i?”<sup>13</sup> Iikut uniri a watungi torom motul lena, o Elaija i sa wanpat taru, ma det pam a kum sakino petutna uni, elar ut nam anundet a nemnem. A kum utna ri un o Elaija, i elar nama wasiso ra di sa tumus tari una Buk Tabu.”

*O Iesu i lakro ru a laulau na nion gusun ara natlik*

*(Mt 17:14-21; Lk 9:37-43)*

<sup>14</sup> O Iesu tomo nama tulu nat na ususer det wanpat nisan a kum nat na ususer. Det tama a labino kunur na taro kura det tur talilis pas a kum nat na ususer, ma a kum tene ususer tagun a Warkurai kura det engaras tomo nam det.<sup>15</sup> A taro det tama pas o Iesu, ra det kisin doko, ma det kalabor ra det gas pasi.<sup>16</sup> Ra o Iesu i ting det lena, “Asau ra mot engaras uni?”<sup>17</sup> Ara musano tagun a taro ra, i balu i lena, “Tene Ususer, a ben a nutunglik a nat musano torom ui, uni a laulau na nion kura uni ma ke wasiso.<sup>18</sup> A laulau na nion ri i ser solsolongi, i ser woro puku i utiro upiso. A wano i ser busu ma i ser ungingit a kabo lokono ma i ser udekdek a pinpinino. A saring anum a kum nat na ususer sur det in lakro ru a laulau na nion gusuni, ikut ka det pet lar pasi.”

<sup>19</sup> O Iesu i balu i lena, “Mot a taro tagun uniri, ka mot nurnur! A sa kis suano i tomo nam mot. Nangisin mo mot in nurnur? Mot in ben a nat ra urin torom iau.”<sup>20</sup> Det beni torom o Iesu. Ra a laulau na nion i tama pas o Iesu, uniutra i woro pirso tar a natlik. Ra

a natlik i puku piso, i tubulus tuptupukus, ma i busubusu a wano.

<sup>21</sup> Ra o Iesu i ting a taman a nat lena, “Nangisin ra i turpasi?” Ma i balu i lena, “Ra i natlik utmakai.<sup>22</sup> A susut na bung, a laulau na nion i ser woro tari una sungun, o una danim sur in um doko i. Ra un pet lari sur un lakro ru a laulau na nion gusuni, un maris mir, ma un warut mir.”<sup>23</sup> O Iesu i len tano, “Ilai ra u watung lenri, “Ra un pet lari”? Osi ra i nurnur, in pet lar pas a kum utna rop.”<sup>24</sup> Uniutra a taman a natlik i balu i lena, “A nurnur! Warut iau una nung a lik nurnur.”<sup>25</sup> O Iesu i tama a kunur na taro ra det kalabor tomo torom det, ra i wasiso dekdek torom a laulau na nion lena, “Ui a laulau na nion, u ngat ma u kutkut. A sak bat ui, un pirso gusun a natlik, ma gong melet mo u sisiop uni.”<sup>26</sup> A laulau na nion i woiwoi pas, i gunu dekdek tar a natlik, ra i pirso gusuni. A natlik ra, i tamtama mukut elar nama minat, ma a susut na taro det lena i sa mat.<sup>27</sup> Iikut, o Iesu i pam pas a laman a natlik, ra i dat ukatatur pasi, ma i tur.

<sup>28</sup> Numur det ruk un ara rumu, ra anun a kum nat na ususer det ting eno i lena, “Ilai ra ka met lakro lar pas a laulau na nion gusuni?”<sup>29</sup> O Iesu i balu det lena, “A ngas na laulau na nion lenri, in pirso kut una niaring.”

*O Iesu i wasiso melet una nun a minat*

*(Mt 17:22-23; Lk 9:43-45)*

<sup>30</sup> Det wan tagitiro iai, ma det wan sakit potora una papor Galili. O Iesu ke nemi sur taio in tasman a nubual ra det in kis iai,<sup>31</sup> uni i nemi sur in ususer anun a kum nat na ususer. Ra i watungi tandet lena, “Din pitar a Nutun a Musano ulaman a taro ma det in um doko i. Numur tan a tulu bung, in laun melet.”<sup>32</sup> Ka det talapor una kukurai na wasiso ri, ma det ngara sur det in tingi.

*Osi ra i labo sakit*

*(Mt 18:1-5; Lk 9:46-48)*

<sup>33</sup> Det wanpat tong o Kapernaum. Ra det ruk una rumu, o Iesu i ting det lena, “Asau ra mot engaras uni ra mot wan nanan a kisapi?”<sup>34</sup> Iikut ka det balu i, uni det engaras sur osi ra i labo taun det.<sup>35</sup> O Iesu i kis ra i kabo pas anun a noino ma aru nat na ususer, ra i watungi tandet lena, “Ra taio i nemi sur in labo sakit, i wakak sur in unatino pasi kut, ma in tultul kut anun a taro rop.”<sup>36</sup> Ra i los pas ara natlik, ma i utur

tari epotor tandet. Numur i romo pasi, ma i watungi tandet lena,<sup>37</sup> “Osi ra in gas pas tu natlik lenri una risang, i gas pas iau ut. Ma osi ra in gas pas iau, ausur i gas pas iau kut, i gas pas o naro ut ra i tulu ru iau urin.”

*Osi ra ke turbat dat, i warut dat kut  
(Lk 9:49-50)*

<sup>38</sup> O Jon i watungi tan o Iesu lena, “Tene Ususer, met tama ara musano i lakro ru a kum laulau na nion nama risam, ra met turbati, uni i ausur tagun dat.”<sup>39</sup> O Iesu i balu i lena, “Gong mot turbati. Ra taio in pam tu utna na ukisin nama risang, ken watung lakit tu sakino wasiso un iau.”<sup>40</sup> Uni osi ra ke turbat dat, i warut dat.<sup>41</sup> A inanos mot nama lingmulus, osi ra in tabor mot nam lakalik danim uni mot anun o Karisito, in losi ut anun a ikul.

*A utna ra i ben raro a taro sur a sakino petutna*

*(Mt 18:6-9; Lk 17:1-2)*

<sup>42</sup> “Osi ra in ben raro ara tagun a kum nat liklik ri\*<sup>43</sup>, ra det nurnur un iau, a warkurai toromi in laulau doko tan taio ra din kubus tar tu labino wat un in kabaranano, ma din woro murungi usa utasi.”<sup>43-44</sup> Ra a lamam i ben raro ui, kutus ru i. In wakak ra un ruk una nilaun tukum a tumul kut ui, sur gong di woro ui tomo nama ru lamam rop una labino sungun ra ke ser mat.<sup>45-46</sup> Ra a kikim i ben raro ui, kutus ru i. In wakak ra un ruk una nilaun tukum a tumul kut ui, sur gong di woro ui tomo nama ru kikim rop una labino sungun.<sup>47</sup> Ra in matam i ben raro ui, liok ru i. In wakak ra un ruk una matanitu anun o God nam in teken matam kut, sur gong di woro ui tomo nam arin matam rop una labino sungun.<sup>48</sup> Tiro iai

‘a kum suisui liklik ka det ser mat, ma a sungun kai ke ser mat.’ *Aisaia 66:24*

<sup>49</sup> Din umatok a taro rop nama sungun<sup>‡</sup> elar nama sol i umatok a etabor ra di pitari torom o God.<sup>50</sup> A sol i wakak, ikut ra a makasman ino i sa rop, mot in umakasman meleti mo pepetlai? Ken elar! I wakak sur a sol in kis un mot, ma mot in kis na emarom tomo.”

\* 9:42: A wasiso Grik i lena “a kum natnatino”, a kukuraino lenri: a kum nat liklik, o det ra anundet a nurnur ke dekdek, o det ra a taro det tama pisopiso det. † 9:45-46: A ramano kum tene mananos una Buk Tabu det nuki lena a rino 48 in kis kai una rino 44 ma 46. ‡ 9:49: A sungun i ukinalong a kum mamaut det in taramo i.

## 10

*Gong taio i kutus a nolin  
(Mt 19:1-12; Lk 16:18)*

<sup>1</sup> O Iesu i wan tagitiro utong una papor Judia, un ara papor danim Jordan. A kunur na taro det wan melet toromi, ra i ususer melet det elar nama ngasino anunu.<sup>2</sup> A ramano kum Parisi det wan toromi sur det in lari. Det tingi lena, “I tokodos ut elar nam anundat a kum Warkurai sur a musano in lakro ru anun a ino, o awu?”<sup>3</sup> Ra o Iesu i balu det lena, “Asi na warkurai ra o Moses i pitar tari tamot?”<sup>4</sup> Ma det balu i lena, “O Moses i mulaot tari kut sur a musano in tumus a dono buk na kutus nolin, sur din palos ru a kinkinis na nolin.”<sup>5</sup> O Iesu i watungi tandet lena, “O Moses i tumus a warkurai ra sur mot, uni a balamot i dekdek doko. ‘Ikut una turturkibin a ukukis, O God ‘i ukis a taro, sur det in musano ma det in ino’.” *Stat 1:27*

<sup>7</sup> ‘Iri a kibino ra a musano in nan gusun o tamano ma o nano, ma in kis tomo nam anun a ino, sur der in takai mukut.’ *Stat 2:24*

Ra ausur mo der aru, der takai mukut.<sup>9</sup> Asau ra o God i sa kubus tomo tari, gong melet mo taio i kutusi.”

<sup>10</sup> Ra det kis sa urumu, a kum nat na ususer det ting melet o Iesu una wasiso ri.<sup>11</sup> Ma i watungi tandet lena, “Osi ra in lu ru anun a ino, ma in nolin melet nam tu ino, a musano ra i pam a sakino torom anun a mugano ino.”<sup>12</sup> Ma ra tu ino in nan gusun anun a musano, ma in nolin melet nam tu taio, a ino ra, i kai i pam a sakino.”

*O Iesu i wasiso udan a kum nat liklik  
(Mt 19:13-15; Lk 18:15-17)*

<sup>13</sup> A taro det ben a kum nat liklik torom o Iesu sur in ubek aru lamanano sapat netes un det. Ikut a kum nat na ususer det turbat det.<sup>14</sup> O Iesu i tama i, i kankan ra i watungi tandet lena, “Mot in madek ru a kum nat liklik sur det in nan torom iau. Gong mot turbat det, uni a matanitu anun o God anundet ra det lenri.”<sup>15</sup> A inanos mot nama lingmulus, osi ra ken ruk una matanitu anun o God elar nama natlik, ken ruk lar pas.”<sup>16</sup> Ra i romo pas a kum nat liklik, ma i ubek aru lamanano netes un det, ma i wasiso udan det.

*A tene gongon*

(Mt 19:16-30; Lk 18:18-30)

<sup>17</sup> Ra o Iesu i wan nanan melet, ara musano i kalabor pat toromi, i kis butkeke umatano, ma i tingi lena, “Wakak na Tene Ususer, asau ra an pami sur an rakon a nilaun tukum?” <sup>18</sup> O Iesu i balu i lena, “Sur asau ra u watung iau lena a wakak? Katutaio i wakak, o God sot kut.” <sup>19</sup> U tasman a kum Warkurai: ‘Gong u um doko taio, gong u pam a sakino un tu ino anun taio, gong u wolong, gong u etakun torotoro, gong u toro pas tu utna anun taio ma u los pasi, un ru o tamam ma o nam.’” *Kisim Bek 20:12-16*

<sup>20</sup> A musano ra i balu i lena, “Tene Ususer, turpasi ra a natlik utmakai tuk uniri, a ser mur a kum Warkurai rop ri.” <sup>21</sup> O Iesu i tamtama toromi, i marisi ra i watungi tano lena, “Ara utna mukut ra kabaut u pami. Un nan ma un siuru ru anum a kum utna rop, ra a mani taguni, un tabor a kum sibo na taro nami. Ra un pami lenra, anum a wakak na ululeng kusapat una langit. Numur un nan urin ma un mur iau.” <sup>22</sup> I longoro a wasiso ri, ra i tamtama tumtumul, ra i wan ma ikut ke gasgas, uni i labo doko anun a ululeng. <sup>23</sup> O Iesu i ger tuptupukus torom anun a kum nat na ususer ra i watungi tandet lena, “I ngangitin doko torom a kum tene gongon sur det in ruk una matanitu anun o God.” <sup>24</sup> A kum nat na ususer det kisin doko una wasiso ri. O Iesu i watung meleti tandet lena, “A kum nutnutung liklik, in ngangitin doko torom a taro sur det in ruk una matanitu anun o God. <sup>25</sup> In ngangitin sur a kamel in ruk una mato na sur na susuk, ikut, i ngangitin doko ut, sur a tene gongon in ruk una matanitu anun o God. I lingmulus, ken pet lari.” <sup>26</sup> A kum nat na ususer det kisin doko, ra det ting etalai det lena, “Ra i lenra, osi mo ra din ulauni?” <sup>27</sup> O Iesu i tamtama torom det ra i watungi lena, “A taro ka det in pet lar pasi, ikut o God sot kut in pet lar pas a kum utna rop.”

<sup>28</sup> O Pita i watungi tan o Iesu lena, “Tama i, met sa wan gusun anumet a kum utna rop, ra met mur ui.” <sup>29</sup> O Iesu i watungi lena, “A inanos mot nama lingmulus: Ra taio in nan gusun anun a rumu, o gusun a kum tistisino a kum musano ma a kum ino, o gusun o nano, o gusun o tamano, o gusun a kum nutnutunu o gusun anun a piso, uni i mur iau ma a Wakak na Wasiso, <sup>30</sup> una nilaun ri,

din pitar ara ra mar tagun a kum ututna ri tano: a kum rumu, a kum tistisino a kum musano ma a kum ino, a kum nanano, a kum nutnutunu ma a piso, ma a kum ngunungut utkai. Ma una nilaun numur din tabori nama nilaun tukum. <sup>31</sup> Ikut a susut ra det mugu uniri, numur det in mur, ma det ra det mur uniri, numur det in mugu.”

*O Iesu i mantul u wasiso una nun a minat*  
(Mt 20:17-19; Lk 18:31-34)

<sup>32</sup> O Iesu tomo nam anun a kum nat na ususer det wan nanan usapat o Jerusalem. O Iesu i mugu nanan tandet, ra a kum nat na ususer det nuknuk doko, ma a taro kai ra det muri det ngara. O Iesu i ben gisen melet pas anun a noino ma aru nat na ususer, ra i inanos det una kum utna ra in nanpat uni. <sup>33</sup> I watungi lena, “Tama i, iri dat wan nanan usapat o Jerusalem. Din pitar a Nutun a Musano torom a kum lamlabino tene etabor torom o God, ma a kum tene ususer tagun a Warkurai. Det in warkurai i sur in iru, ma det in pitar tari torom det ra ausur a taro Juda. <sup>34</sup> Det in urongon laulau uni, det in ibisi, det in mirasi ma det in um doko i.” Ra a tulu bung in rop in katutur melet.”

*A sasaring anun o Jems mo Jon*  
(Mt 20:20-28)

<sup>35</sup> Aru nutnutun o Sebedi, o Jems ma o Jon, der wan torom o Iesu ra der inanos i lena, “Tene Ususer, mir saring ui sur un pam asau ra mir nemi tam.” <sup>36</sup> Ra i ting der lena, “Asau ra mur nemi tang?” <sup>37</sup> Der balu i lena, “Un ukis mir una num a minamar, ma datul in warkurai tomo, ara pasamir una sot na lamam ma ara una kair.”

<sup>38</sup> O Iesu i inanos der lena, “Ka mur tasman asau ra mur sasaring suri. Pepetlai, in elar sur mur kai mur in inum una kap na mamaut ra an inum uni? Ma in elar kai sur din baptaiso mur nama baptais na ngunungut ra din baptaiso iau nami?” <sup>39</sup> Ma der balu i lena, “Mir in pet lar pasi kut.” O Iesu i watungi tander, “A kap na mamaut ra an inum uni, mur kai mur in inum uni, ma a baptais ra din baptaiso iau nami, din baptaiso mur kai nami. <sup>40</sup> Ikut a kinkinis una sot na lamang ma una kair, ausur iau, a warkurai sur an pitari. O God ut in pitari torom det ri a sananin tari sur det.”

<sup>41</sup> A noino nat na ususer det longoro i, ra det kankan torom o Jems ma o Jon. <sup>42</sup> O Iesu i kabo tomo pas det, ra i watungi lena,

“Mot tasmani lena, det ra di watung det a kum tene warkurai anun a taro ra asur a taro Juda, det kuro lalau a taro. Ma anundet a kum mugumugu kai det pitar a kum dekdek na warkurai torom anundet a taro. <sup>43</sup>Ikut torom mot ken lenra. Osi ra i nemi sur in labo taun mot, in unatino pasi sur in tultul anumot. <sup>44</sup>Ma osi ra i nemi sur in mugumugu anumot, in papam oros kut torom a taro rop ma ka din kuli. <sup>45</sup>A Nutun a Musano kai, ke wanpat sur din papam toromi. I wanpat sur i ut in papam torom a taro, ma in pitar tar anun a nilaun, a ikul, sur in kul ulangolango pas a susut na taro.

*O Iesu i utamtama pas o Batimaias a pulu*  
(Mt 20:29-34; Lk 18:35-43)

<sup>46</sup>Det wanpat tiro o Jeriko. Numur, o Iesu tomo nam anun a kum nat na ususer ma a kunur na taro det wan tagitiro. Ara musano kura i kis taru una papor ina kisapi, a musano ra a pulu, a risano o Batimaias (a kukuraino a nutun o Timaias) ma i ser saring utna. <sup>47</sup>I longoro i lena o Iesu a te Nasaret i wan sakit, ra i tur pas a kakabo sapat lena, “Iesu, a Nutun o Dewid, un maris iau!” <sup>48</sup>A susut na taro det turbati sur in kis wowowon. Ikut i kakabo dekdek makai usapat, “Nutun o Dewid, un maris iau!” <sup>49</sup>O Iesu i tur sikot ra i lena, “Mot kabo i urin.” Ra det kabo pas a pulu, ma det watungi tano lena, “Katutur! Un gas! O Iesu i kabo ui.” <sup>50</sup>O Batimaias i woro pirso ru anun a saket, i katutur, ra i wan torom o Iesu. <sup>51</sup>O Iesu i tingi lena, “Asau ra u nemi sur an pami un ui?” A pulu i balu i lena, “Tene Ususer, a nemi sur an tamtama.” <sup>52</sup>O Iesu i watungi lena, “Un nan! Anum a nurnur i sa utamtama pas ui.” Uniutra i tamtama, ma i mur o Iesu una kisapi.

## 11

*O Iesu i wan usapat o Jerusalem elar nama king*

(Mt 21:1-11; Lk 19:28-40; Jn 12:12-19)

<sup>1</sup>Ra det wan milau o Jerusalem, det wanpat sapat o Betpage ma o Betani una Tangai na Oliw, o Iesu i tulu aru tagun anun a kum nat na ususer. <sup>2</sup>Ma i inanos der lena, “Mur in nan sur a tamon kusa numugu tamur. Ra mur in nanpat, uniutra mur in tama ara barman na dongki kura di ker ukai tari, ma katutaio utmakai i kas taru uni. Mur in palos pasi ma mur in beni urin. <sup>3</sup>Ra

taio in ting mur lena, ‘Mur pami lenra sur asau?’ mur in watungi lena, ‘A Labino i nemi kut munung, ra numur in tulu melet tari urin.’” <sup>4</sup>Ra der wan, der pastorom a barman na dongki ra di ker tari nisan a matansako ina ra rumu, milau a kisapi, ra der palos pasi. <sup>5</sup>Ara taro kura det tur taru tiro iai, det ting der lena, “Ai, mur palos a barman na dongki ra sur asau?” <sup>6</sup>Der balu det nama wasiso ra o Iesu i sa watung tari, ra det mulaot ru i tander. <sup>7</sup>Der ben tar a barman na dongki torom o Iesu, ma der rakon ru anunder aru saket, ma der ubek tari netes uni, ra o Iesu i kas uni. <sup>8</sup>A susut na taro kai det rakon ru anundet a kum saket, ma det talaso i una kisapi. Ma ara taro kai det tau pas a kum turunu duwai sa ubual ma det ubek tari una kisapi. <sup>9</sup>Det ra det mugu ma det kai ra det mur, det kukukuk lena, “Osana! O naro ra i wanpat nama risan a Labino i dan!” *Buk Song 118:25-26*

<sup>10</sup>“Dat in watung ulabo pas a matanitu anun a tamandat o Dewid ra in nanpat!

Osana usapat netes sakit!”

<sup>11</sup>Ra o Iesu i wanpat sapat o Jerusalem, i ruk una rumu na etabor. Ra i sa tama tar a kum utna rop, i milet melet utong o Betani tomo nam anun a noino ma aru nat na ususer, uni i sa lirop.

*O Iesu i bor in nanai na fig*

(Mt 21:18-19)

<sup>12</sup>Una bung numur, ra det wan tagitong o Betani, o Iesu i murak. <sup>13</sup>I tama in nanai na fig tagitiro bakbak i lubulubu wakak. I wan sur in tama i sur lako wino. Ra i wan pat tiro, ke tama lako wino, a dondono rop kut, uni ke taun fig utmakai. <sup>14</sup>Ra i watungi torom in nanai ra lena, “Turpasi uniri ma numur, kataio melet mo in nan tin niwim.” Ma anun a kum nat na ususer det longoro anun a wasiso ri.

*O Iesu i ruk una rumu na etabor*

(Mt 21:12-17; Lk 19:45-48; Jn 2:13-22)

<sup>15</sup>Ra det wanpat sapat o Jerusalem, o Iesu i ruk una ara dino tagun a rumu na etabor, ma i lu ru pirso a taro ra det siuru, ma det kai ra det kukul tiro iai. I woro bulus ru a kum kabulu anun a kum tene keles mani\* ma a kum kiskis anundet ra det siuru a kum tabun. <sup>16</sup>Ma ke madek tar taio sur in los a kum utna na siuru epotor una rumu na

\* 11:15: A mani anun a gapman Rom det ser ruk nami una rumu na etabor, ra det kelesi sur a mani sur det in kul a takis nami tagun a rumu na etabor.

etabor. <sup>17</sup>Ra i ususer det, i watungi lena, “Di sa tumus tari una Buk Tabu lenri, ‘Din watung anung a rumu nama rumu na niaring sur a kum kamkabo taro rop una rakrakon bual.’ *Aisaia 56:7* Ikut mot sa pam pukus pasi sur in elar mukut nama ‘nubul na parparau anun a kum tene wolong.’” *Jer 7:11*

<sup>18</sup>A kum lamlabino tene etabor torom o God ma a kum tene ususer tagun a Warkurai det longoro i, ra det nuknuk sur tu kisapi sur det in um doko o Iesu uni, uni det ngarani. Det ngara uni a taro rop det kisin una a kum etowo anunu.

<sup>19</sup>Ra i sa lirop, o Iesu tomo nam anun a kum nat na ususer det wan melet gusun a tamon Jerusalem.

*A etowo tagun in nanai na fig  
(Mt 21:20-22)*

<sup>20</sup>Una kobot raut, det milet melet usapat o Jerusalem, ra det tama in nanai na fig i sa marang, tagisapat netes tuk unago una wakakor ino. <sup>21</sup>Ma o Pita i nuk pas a wasiso anun o Iesu, ra i watungi tano lena, “Tama i! Tene Ususer, in nanai na fig ra u bor tari, i sa marang rop.” <sup>22</sup>Ma o Iesu i balu i lena, “Mot in nurnur un o God. <sup>23</sup>A inanos mot nama lingmulus, ra taio in watungi tan a tangai ri lena, ‘Un taragot ma un sirok losop usa utasi,’ ma ke nuknuk larlar, i nurnur kut lena din pam a utna ra i sa watung tari, din pam soti ut. <sup>24</sup>Lenra, a inanos mot, a kum utna rop ra mot wararing suri, mot in nurnur kut lena di sa pitar tari tamot, ma din pitari ut torom mot.

<sup>25-26</sup>“Ra mot tur ma mot wararing, ma mot nuk torom tu utna ra taio i pam sako tari un mot, mot in dumano ru i, sur a Tamamot kusapat una langit in unus ru anumot a kum sakino petutna kai.”†

*Det iting una dekdek ra o Iesu i ser papam nami*

*(Mt 21:23-27; Lk 20:1-8)*

<sup>27</sup>Det wanpat melet sapat o Jerusalem. Ra o Iesu i wan nanan una rumu na etabor, a kum lamlabino tene etabor torom o God, ma a kum tene ususer tagun a Warkurai, ma a kum mugumugu det wan toromi. <sup>28</sup>Ra det tingi lena, “Asi na ngas na dekdek ra u pam a kum utna ri nami? Osi ra i pitar tar a dekdek ri tam sur un pam a kum utna ri?”

<sup>29</sup>O Iesu i balu det lena, “Iau kai an ting mot nam ara iting. Ra mot in balu i, an inanos mot una dekdek ra a ser pam a kum utna ri nami. <sup>30</sup>Tagai a dekdek ra o Jon i baptaiso a taro nami? Tan o God, o tan a taro kut? Mot inanos iau.” <sup>31</sup>Ra det wasiso etetalai torom det lena, “Ra dat in watungi lena, ‘Tan o God,’ in balu dat kut lena, ‘Sur asau ra ka mot nurnur uni?’” <sup>32</sup>Ikut in pepetlai ra dat in watungi lena, ‘Tan a taro?’ Det ngaran a taro, uni det rop det nurnur un o Jon lena i a poropet. <sup>33</sup>Ma det balu o Iesu kut lena, “Ka met tasmani.” Numur o Iesu i watungi tandet lena, “Iau kai kan inanos mot una dekdek ra a ser pam a kum utna ri nami.”

## 12

*A wasiso elelar una taro na pinapam una kinobot na wain*

*(Mt 21:33-46; Lk 20:9-19)*

<sup>1</sup>O Iesu i ususer det nama wasiso elelar lena, “Ara musano i marut tar a kinobot na wain, ra i pam bat tari nam in noworo. Tiro ubalan a kinobot, i kil tar in nutung sur din pas ginogino a wain uni, sur a polono in nanpat. Ma i pam tar a nat na rumu lekeleke sur a tene tamtamabat. Numur i pitar tar a kinobot munung tan a ramano kum tene pinapam sur det in tamtamabati, ra i wan sur ara tamon gisen. <sup>2</sup>Ra a kalang i sa sot sur din git tomo a wino wain, i tulu ru ara tultul torom a taro na pinapam, sur lako wino tagun anun a kinobot sur anunu kai.

<sup>3</sup>A taro na pinapam ra, det pam ukai pasi ma det umi, ra det tulu oros melet ru i kut.

<sup>4</sup>Ra i tulu melet ara tultul torom det, det rapus in lorino, ma det ban umaimai tari.

<sup>5</sup>Ma a taman a kinobot i tulu i bulung ara tultul, det um doko i kut. Ra i tulu melet a susut, det um ara taro tagun det ma det um doko ara taro kai. <sup>6</sup>Ara sot mukut i kis toromi, a nutunu lik ut, a nat na wakak. I tulu ru i bulung torom det, uni i nuki lena det in urur uni. <sup>7</sup>Ikut a taro na pinapam det wasiso tomo pas lena, ‘I ra in keles o tamano, i mo ra i wan urin. Mot iap, dat in um doko i, sur anundat mo a kinobot na wain.’ <sup>8</sup>Ra det pam ukai pasi ma det um doko ru i, ra det sugut pirso ru i tagun a kinobot.

<sup>9</sup>“Asau mo a taman a kinobot na wain ra in pami? In nanpat ma in um doko a taro na

† 11:25-26: A ramano kum tene mananos una Buk Tabu det nuki lena, a ramano wasiso kai i kis una rino ri. I lenri: Ra ka mot in nuk dumano ru i, a Tamamot kai kusapat una langit ken nuk unus ru anumot a kum sakino petutna.

pinapam, ma in pitar tar a kinobot ra torom lako taro gisen, sur det in tamtamabati.

<sup>10</sup> Pepetlai, ka mot luk a wasiso ri una Buk Tabu? I watungi lena,

'A wat ra a kum tene pam rumu det lakro ru tari,

i ut ra, a wakak na wat ra i udekdek a rumu.

<sup>11</sup> A utna ri a Labino ut i sa pam tari, ma i wakak sakit una numet a tam-tama.' " Buk Song 118:22-23

<sup>12</sup> A kum mugumugu anun a taro Juda det sisiso sur tu kisapi sur det in pam ukai pas o Iesu uni, uni det tasmani lena i watung a wasiso elelar ri un det. Ikut det ngaran a kunur na taro. Ra det wan mut gusuni.

*Det iting una takis*

(Mt 22:15-22; Lk 20:20-26)

<sup>13</sup> Det tulu a kum Parisi, ma a kum pas-pasan o Erod torom o Iesu, sur det in lari sur tu wasiso anunu, ra det in takuni nami. <sup>14</sup> Ra det wanpat toromi, det watungi lena, "Tene Ususer, met tasmani lena ui a tokodos na musano. Ko nuknuk bing un asau ra a taro det watungi un ui, uni a magiram i takai kut torom a taro rop, ma u ususer det una kisapi anun o God nama lingmulus. Pepetlai, i tokodos sur din pitar a takis torom a Sisa \* o awu? <sup>15</sup> Dat in pitari, o gong?" I tasman lele anundet a torotoro, ra i ting det, "Ilai ra mot nemi sur mot in lar iau? Tu mani urin sur an tama i." <sup>16</sup> Ra det pitar tar a mani tano. Ma i ting det lena, "In masarin osi ri, ma a tumtumus ri uni anun osi?" Ra det balu i lena, "Anun a Sisa." <sup>17</sup> O Iesu i watungi tandet lena, "Asau ra anun a Sisa, mot in pitari torom a Sisa. Ma asau ra anun o God, mot in pitari torom o God." Ra det longoro i, det kisin doko uni.

*Det iting una nilaun melet gusun a minat*

(Mt 22:23-33; Lk 20:27-40)

<sup>18</sup> A kum Sadusi, ra det ser ipul kut lena katu nilaun melet gusun a minat, det wan torom o Iesu, ma det tingi lena, <sup>19</sup> "Tene Ususer, o Moses i tumus tari tandat lena, ra tu musano in mat pas gusun anun a ino, ma katu nutunder, o tisinolik in ben pasi ma in nolin nami, sur in ulabo tar lako kum nat una risan o tisino ra i sa mat. <sup>20</sup> Ara kabo tisino a wonom mawit na musano det. A mugano i nolin, ra i mat pas gusun anun a

ino, ma katu nutunder. <sup>21</sup> Ra a murmur tano bulung i nolin nama ino ra. I bulung i mat kut gusuni, ma katu nutunder. I lenkutkai lar ara pasandetul sino. <sup>22</sup> Det rop a wonom mawit det, ra det nolin nami, ikut a ino ra, ke usus tar tu nat un det. Ra numur tandet rop a ino bulung i mat. <sup>23</sup> Una nilaun melet gusun a minat, a ino ra, anun osi na pasandet mo? Uni a wonom mawit rop, det sa nolin pas nami."

<sup>24</sup> O Iesu i balu det lena, "Mot raro doko, uni ka mot tasman a Buk Tabu ma a dekdekin o God kai. <sup>25</sup> Ra a taro det in katutur melet gusun a minat, ka det in nolin melet mo, det in elar mukut nama kum ensel sapat una langit. <sup>26</sup> Ra mot ipul lena, a kum minat ka det in katutur melet gusun a minat, pepetlai, ka mot luki utmakai a Buk anun o Moses, ra i wasiso un in nanai ra i kunabor? O God i watungi torom o Moses lena, 'Iau a God anun o Abaram, a God anun o Aisak ma a God anun o Jekop.' Kisim Bek 3:6

<sup>27</sup> Mot raro doko. O God ausur a God anun a kum minat, i a God anundet ra det laun."

*A warkurai ra i labo sakit*

(Mt 22:34-40; Lk 10:25-28)

<sup>28</sup> Ara tagun a kum tene ususer tagun a Warkurai i wanpat torom o Iesu, ma i longoro i ra i wasiso tomo nama kum Sadusi. I longoro o Iesu ra i balu wakak det, ma i tingi lena, "Asi na warkurai ra i labo sakit tandet rop?" <sup>29</sup> O Iesu i balu i lena, "Iri a warkurai ra i labo sakit, 'Mot a taro Israel, mot in longoro i! A Labino anundet a God, i ara sot kut. <sup>30</sup> Mot in nem a Labino anumot a God nama balamot rop, a niomot rop, a nuknukimot rop, ma a dekdekimot rop.' Lo 6:4-5

<sup>31</sup> Ma a manru warkurai i lenri, 'Un nem a pasam elar nami ra u nem ui ut.' Katu warkurai melet mo i labo tan aru warkurai ri." Wok Pris 19:18

<sup>32</sup> A tene ususer tagun a Warkurai i watungi tan o Iesu lena, 'A lingmulus ut, Tene Ususer! I tokodos anum a wasiso lena o God i ara sot kut, ma kataio melet mo.

<sup>33</sup> Dat in nem o God nama balandat rop, a nuknukindat rop ma a dekdekindat rop, ma dat in nem a kum paspasandat elar nami ra dat nem dat ut. Ra dat in mur aru warkurai ri, i labo taun a kum etabor ma a kum etabor kai ra di tuntun det torom o God."

\* 12:14: A Sisa i a labino mugumugu una gapman Rom, ma a taro Israel kai det kis utuntudu ina nun a warkurai.

<sup>34</sup> Ra o Iesu i tama i ra i wasiso na mananos, i watungi tano lena, “Ko bakbak mo gusun a matanitu anun o God.” Numur kataiao melet mo i wan toromi nam tu iting, uni det ngara.

*A Karisito i a Labino anun o Dewid  
(Mt 22:41-46; Lk 20:41-44)*

<sup>35</sup> Ra o Iesu i ususer det una rumu na etabor, i watungi lena, “I lai ra a kum tene ususer tagun a Warkurai det watungi lena, a Karisito i a nutun o Dewid? <sup>36</sup> A Tokodos na Nion i mugu o Dewid ra i watungi lena, ‘A Labino i watungi torom anung a Labino, “Un kis una papor sot na lamang, tuk ra an winim pas anum a kum ebar sur det in kis utuntudu ina num a warkurai.”’ *Buk Song 110:1*

<sup>37</sup> O Dewid ut i watung a Karisito lena, i anun a Labino. Ra i lenra, der tamano pepetlai?”

*O Iesu i utumarong a taro una petutna anun a kum tene ususer tagun a Warkurai  
(Mt 23:1-36; Lk 20:45-47)*

A labino kunur na taro det gas doko ra det longoro a wasiso anun o Iesu.

<sup>38</sup> Ra i ususer det, i watungi lena, “Mot in tumarong mot gusun a kum tene ususer tagun a Warkurai. Det nemi sur det in nan tuptupukus nama kum wakak na ememar, ma det nemi kai sur a taro det in pitar a labino urur torom det una kum nubual na inawan tomo. <sup>39</sup> Ma det nem a kinkinis sa numugu una kum rumu na lotu, ma a kinkinis na labino sa numugu una kum lukaro. <sup>40</sup> Det ser urop a kum ululeng anun a kum ula, ma det ser pam a kum walalos na niaring sur a taro det in tama det. In labo doko a warkurai na minabalu anun o God torom det.”

*A etabor anun a sibo na ula  
(Lk 21:1-4)*

<sup>41</sup> O Iesu i kis milau taru nisan a dino, ra di ser woro mani uni tiro na rumu na etabor. I tama a taro ra det woro anundet a kum mani. A susut na tene gongon kai, det woro a labino mani. <sup>42</sup> I kut, ara sibo na ula, i woro tar aru toia kut. <sup>43</sup> Ra o Iesu i kabo pas anum a kum nat na ususer toromi, ma i watungi tandet lena, “A inanos mot nama lingmulus, a sibo na ula ri, i woro a labino mani taun det rop ra det woro anundet a kum mani. <sup>44</sup> Det woro tari kut a sibano tagun anundet a kum mani, ikut a sibo na

ula ri, i sa woro rop ru asau ra in to pas anum a kinkinis.

## 13

*A kum ukinalong ra in nanpat numugu tan a bung na warkurai*

*(Mt 24:1-14; Lk 21:5-19)*

<sup>1</sup> Ra o Iesu i pirso gusun a rumu na etabor, ara pasan anum a kum nat na ususer i inanosi lena, “Tama i, Tene Ususer! A kum wakak na rumu ri, di pami nama kum lamlabino watat!” <sup>2</sup> O Iesu i balu i lena, “U tama i ut a kum lamlabino rumu ri, niko? Numur din rege ginogino det rop, ma katu wat in inep netes un tu wat.”

<sup>3</sup> O Iesu i kis sapat netes una Tangai na Oliw una papor ra i tamtama lakai sur a rumu na etabor. O Pita, Jems, Jon ma o Endru det ting eno i lena, <sup>4</sup> “Un inanos met, nangisin mo a kum utna ri in nanpat? Ma asi na ukinalong ra in ese i lena i sa milau sur det in nanpat?” <sup>5</sup> O Iesu i inanos det lena, “Mot in tumarong, sako taio in toro pas mot. <sup>6</sup> A susut det in nanpat nama risang, ma det in warango det lena, ‘Iau a Karisito,’ ra det in toro lako susut na taro. <sup>7</sup> Ra mot in longoro a kum inaim ma a kum inarang na inaim, gong mot lai taru. A kum utna lenri det in nanpat, ikut a tintinip ina rakrakon bual kura utmakai. <sup>8</sup> A kum kabotaro det in tur na inaim torom a kum se kabotaro, ma ara gapman in tur na inaim torom ara gapman. A kum guri ma a kum lamlabino munurak in nanpat una kum tamon. A kum utna ri i elar nama kum mugano ngunungut ra i ser wanpat una ino ra i ling na usus.

<sup>9</sup> “Mot in tumarong mot. A taro det in pitar mot ulaman a kum tene warkurai, ma det in miras mot una kum rumu na lotu. Mot in tur una kum warkurai numugu umatan a kum lamlabino mugumugu ma a kum king, uni mot anungi. Mot in wasiso talapor un iau torom det. <sup>10</sup> Din warawai mugu nama Wakak na Wasiso torom a kum kamkabo taro rop una rakrakon bual. <sup>11</sup> Ra din dat pas mot sur a warkurai, gong mot nuknuk mugu sur asau mot in watungi. Una du bung ra, mot in watungi kut a wasiso ra di sa unuk tar mot nami. Uni asur mot ut ra mot in wasiso, a Tokodos na Nion ut.

<sup>12</sup> “Taio in mulaot ru tu tisino sur din um doko i, ma tu musano in mulaot ru tu nutunu sur din um doko i. Ma a kum nat

det in tur na inaim torom a tamandet ma a nandet, ma det in mulaot ru a tamandet ma a nandet sur din um doko der. <sup>13</sup>Ma a taro rop det in nget mot uni mot anungi, ikut osi ra in tur dekdek tuk anun a nilaun in rop, o God in ulauni.

*A utumarong una sakino utna ra in nanpat*  
(Mt 24:15-28; Lk 21:20-24)

<sup>14</sup>“Mot in tama ara sakino utna sakit in nanpat, in kis una dino ra ke to pasi sur in kis iai, ma in ban udur a dino ra. Osi ra in luk a kum wasiso ri, i wakak sur in mananos uni. Una bung ra, det ra det kis una papor judia, det in kalabor eno usapat una kum tangai. <sup>15</sup>Ra taio in kis sapat netes una nun a rumu, ra in pirso, gong i ruk sur in los pas tu utna tagisa urumu.\* <sup>16</sup>Ma ra taio in kis sa ukinobot, gong i milet melet unago utamon sur anuna saket. <sup>17</sup>Una kum bungbung ra, in laulau doko torom a kum tianan, ma torom a kum ino kai ra a kum nutnutundet, det sus utmakai. <sup>18</sup>Mot in warang sur gong a utna ri i wanpat una kum kalang na kotokoto. <sup>19</sup>Uni una kum bungbung ra, in labo sakit a ngunungut. In labo taun a kum ngunungut ra i ser wanpat una rakrakon bual. Turpasi ra o God i ukis a rakrakon bual tuk uniri, ma numur kai, katu ngunungut in elar nami. <sup>20</sup>Ra gunuk a Labino ken kutus pirso a kum bungbung ra, kataio ut in laun. Ikut in kutus pirso ru i sur det ra i sa pilok pas det, det in laun.

<sup>21</sup>“Una kum bungbung ra, ra taio in watungi torom mot lena, ‘Tama i, a Karisito kuri i,’ o ‘Kurong i,’ gong mot nurnur. <sup>22</sup>Uni lako kum torotoro na Karisito, ma lako kum torotoro na poropet det in nanpat. Det in pam lako kum ukinalong ma lako kum utna na ukisin sur det in toro pas a taro ra o God i sa pilok pas det, ra ut ko ra det in pet lar pasi. Ikut, ka det in pet lar pasi. <sup>23</sup>Mot in tumarong mot! A sa inanos mugu tar mot una kum utna rop ra in nanpat.

*A Nutun a Musano in nanpat*  
(Mt 24:29-31; Lk 21:25-28)

<sup>24</sup>“Ra i sa rop a kum mamaut ma ngunungut una kum bungbung ra, ‘in matanas in dumirum, a kalang ken talapor, <sup>25</sup>a kum nangngang det in puku pirso tagisapat una bakut,

ma a kum utna sapat netes una bakut det in tugunugunu.’ *Aisaia 13:10; 34:4*

<sup>26</sup>“Una bung ra, a taro det in tama a Nutun a Musano in nanpat una kum du bakut nama labino dekdek ma a minamar. <sup>27</sup>Ma in tulu pirso anun a kum ensel sur det in ben tomo anun a taro na pipilok tagun a wat na matmatano wuwu, tagun ara papor rakrakon bual tuk tong una ara papor rakrakon bual.

*A wasiso elelar un in nanai na fig*  
(Mt 24:32-35; Lk 21:29-33)

<sup>28</sup>“Mot in ususer tagun in nanai na fig. Ra a kum kanokano in sibul pat melet, ma a dondono in tapalos, mot tasmani lena a kum kalang na mararong i sa milau. <sup>29</sup>Lenkutkai, ra mot in tama a kum utna ra a wasiso taru uni in nanpat, mot in tasmani lena a du bung i sa milau. <sup>30</sup>A inanos mot nama lingmulus, a kum utna rop ri in nanpat ra a taro tagun uniri det laun utmakai. <sup>31</sup>A langit ma a rakrakon bual der in rop, ikut anung a kum wasiso ken rop.

*Katutaio i tasman a bung o a du bung*  
(Mt 24:36-44)

<sup>32</sup>“Katutaio i tasman a bung o a du bung ra a kum utna ri in nanpat. A kum ensel sapat una langit ka det tasmani, ma a Nutunu kai ke tasmani, o Tamano sot kut i tasmani. <sup>33</sup>Mot in nuknuk wakak, ma mot in tumarong mot, uni ka mot tasmani ra nangisin a kum utna ri in nanpat. <sup>34</sup>I elar nam ara musano ra i waninar sur in nan utiro una ra tamon gisen. I pitar tar anun a rumu tan anun a kum tultul, sur det in tamtamabati. I tibo susuaro a kum pinapam tandet rop taktakai, ma i inanos tar ara musano sur in tamtamabat a matansako.

<sup>35</sup>“Mot in tumarong mot, uni ka mot tasmani ra nangisin a taman a rumu in milet, una lirop, o una labino mirum, o una lar ra a kum kereke det kurkurirakuk, o una kobot, <sup>36</sup>sako in nanpat kisin, ra in nan taru un mot ra kura mot inep dumun kut. <sup>37</sup>Asau ra a watungi tamot, a watungi kai torom a taro rop lena, mot in tumarong mot.”

## 14

*Det wasiso tomo pas sur det in um doko o Iesu*  
(Mt 26:1-5; Lk 22:1-2; Jn 11:45-53)

\* 13:15: A ngas na rumu anun a taro Israel, sapat na lur na rumu i elaro kut, ma det ser kis utkai uni.

<sup>1</sup> Aru bung numugu tan a labino bung na lotu na Wanlakai, ma a labino bung na lotu na beret ra kalako is uni, a kum lamlabino tene etabor torom o God, ma a kum tene ususer tagun a Warkurai det nuknuk sur tu ngas na kisapi sur det in pam ukai eno pas o Iesu, ma det in um doko i. <sup>2</sup> Det watungi lena, “Gong dat pami una labino bung na lotu, sako a taro det in kankan ma det in ukatutur tu inaim.”

*A ino i lingis in polo sangsangnain un in lorin o Iesu*

(Mt 26:6-13; Jn 12:1-8)

<sup>3</sup> O Iesu i kis tong o Betani, una rumu anun o Saimon, i ra numugu i misait nama lepra. Ra kura o Iesu i wangon, ara ino i wan toromi nam in polo sangsangnain ra di watungi nama nad. A matano i ka doko, ma kura un in nokoto, ra di pami nama wat. I sak kutur ru in kabaranoto koto, ra i lingisi un in lorin o Iesu. <sup>4</sup> A ramano taro ra det kis tiro iai det kankan ma det wasiso etalai lena, “Sur asau ra di lingis orosi kut in polo sangsangnain ri? <sup>5</sup> I lai ra ka di siuru pasi sur lako tulu mar na denari\* sur din tabor a kum sibo na taro nami?” Ma det wasiso na kankan torom a ino ra.

<sup>6</sup> Ra o Iesu i watungi tandet lena, “Mot in madek ru a ino ri. I lai ra mot pitar a maut toromi? I sa pam tar a wakak na pinapam sakit un iau. <sup>7</sup> A kum sibo na taro det in laun bolbolos tomo ut nam mot. Ma nangisin mot nem na pam a wakak ino torom det, mot in pami kut. Ikut iau, kum kis tukum nisamot. <sup>8</sup> A ino ri i sa pam sot pas a utna ra i elar sur in pami. I sa lingis tar in polo sangsangnain ri una pining sur in waninar mugu iau sur a bung ra an mat ma din uruk a minating una kulam na minat. <sup>9</sup> A inanos mot nama lingmulus, una kum tamtamon una rakrakon bual, ra din warawai nama Wakak na Wasiso iai, din inanos utkai un asau ra a ino ri i sa pam tari, sur a risano in tur na aim.”

*O Judas i mulaot sur in pitar tar o Iesu*

(Mt 26:14-16; Lk 22:3-6)

<sup>10</sup> O Judas Iskariot, ara tagun a noino ma aru nat na ususer, i wan torom a kum lamlabino tene etabor torom o God, sur in pitar tar o Iesu torom det. <sup>11</sup> Ra det longoro i, det gas, ma det uliman tari sur det in kuli nam lako mani. Ra o Judas i nuknuk

sur tu wakak na du bung ra in pitar tar o Iesu ulamandet.

*O Iesu tomo nam anun a kum nat na ususer det wan a utna na Wanlakai*

(Mt 26:17-25; Lk 22:7-14, 21-23; Jn 13:21-30)

<sup>12</sup> Una mugano bung una kum lamlabino bung na lotu na beret ra kalako is uni, ra di ser um doko a kum sipsip uni sur a labino bung na lotu na Wanlakai, a kum nat na ususer anun o Iesu det tingi lena, “U nemi sur met in nan urai, ma met in waninar andat a utna sur a labino bung na lotu na Wanlakai?” <sup>13</sup> I tulu aru tagun anun a kum nat na ususer, ma i watungi tander lena, “Mur in nanpat sapat o Jerusalem. Ra mur sa wanpat, mur in etorom nam ara musano i los in labino koto na danim, ra mur in muri. <sup>14</sup> Ra in ruk un tu rumu, mur in watungi tan a taman a rumu lena, ‘A Tene Ususer i watungi lena: Awai i a kukur rumu ra met nam anung a kum nat na ususer, met in nan a utna na Wanlakai iai?’ <sup>15</sup> Ma in ese tar mur una labino kukur rumu sapat netes, ra di sa waninar tari. Mur in waninar andat a utna tiro iai.” <sup>16</sup> Aru nat na ususer der wanpat sapat o Jerusalem, ma der pastoromi ut a kum utna rop ra o Iesu i sa watung tari tander. Ra der waninar a utna na Wanlakai.

<sup>17</sup> Ra i sa lirop, o Iesu tomo nama nuna noino ma aru nat na ususer det wanpat. <sup>18</sup> Det wangon ra i watungi lena, “A inanos mot nama lingmulus, ara tagun mot ri dat wangon tomo, in pitar tar iau ulaman a kum ebar.” <sup>19</sup> Ra det tupunuk, det rop taktakai det tingi lena, “Ausur iau, niko?” <sup>20</sup> Ra o Iesu i balu det lena, “Ara tagun mot ut a noino ma aru, ra mir puk tomo amir aru du beret una dis. <sup>21</sup> A Nutun a Musano in mat elar nami ra di sa tumus tari una Buk Tabu. Ikut in laulau sakit torom a musano ra in pitar tari torom a kum ebar. In wakak toromi ra ka din ususi, sur gong i taramo a dekdek na warkurai ra uni.”

*A tintinip na inangon anun a Labino*

(Mt 26:26-30; Lk 22:14-20; 1Kor 11:23-25)

<sup>22</sup> Det wangon utmakai, ra o Iesu i los pas a beret, i watung wakak pas uni, i tibiki, ma i tabor anun a kum nat na ususer nami, ra i watungi lena, “Mot in rakoni, iri a pining.”

<sup>23</sup> Numur i los pas a kap, i watung wakak pas uni, ra i pitari tandet, ma det rop det inum

\* 14:5: Anundet a mani det ser watungi nama denari. Ara denari i elar nama ikul anun ara musano una ra bung na pinapam.

taguni. <sup>24</sup> Ra i watungi tandet lena, “Iri a gaping, a kunubus ra i dat tomo tar a taro nam o God. A gaping ri, i tilingis sur a susut na taro. <sup>25</sup> A inanos mot nama lingmulus, kan inum melet mo lako wain, tuk ra an inum a matok na wain una matanitu anun o God.”

<sup>26</sup> Ra det sa kele tar a kekeleke na lotu, det wan tito usapat una Tangai na Oliw.

*O Iesu i wasiso mugu una ipul anun o Pita*  
(Mt 26:31-35; Lk 22:31-34; Jn 13:36-38)

<sup>27</sup> O Iesu i watungi tandet lena, “Mot rop mot in nan pas kut gusun iau, uni di sa tumus tari una Buk Tabu lenri, O God i watungi lena, ‘An um a tene tam-tamabat anun a kum sipsip, ra a kum sipsip det in kalabor sarara.’  
*Sekaraia 13:7*

<sup>28</sup> Ikut, ra a sa katuttur melet gusun a minat, an mugu utong o Galili.” <sup>29</sup> O Pita i watungi tano lena, “Ra det rop det in nan pas gusun ui, ikut iau awu.” <sup>30</sup> O Iesu i watungi tano lena, “A inanos ui nama lingmulus, miri umirum, a kereke ken manru kurkurirakuk utmakai, ra un ipul a tulu dino lena, ko tasman iau.” <sup>31</sup> Ra o Pita i wasiso dekdek toromi lena, “Kan ipul ru ui. Iau kai an iru tomo nam ui, i wakak kut.” Ma a kum nat na ususer rop kai det watungi lenutra.

*O Iesu i wararing tiro o Getsemani*  
(Mt 26:36-46; Lk 22:39-46)

<sup>32</sup> O Iesu tomo nam anun a kum nat na ususer det wanpat una nubual a risano Getsemani, ra i watungi tandet lena, “Mot in kis kut nin, ma iau an wararing pas.”

<sup>33</sup> Ra i ben pasi kut o Pita, Jems ma o Jon ra detul wan tomo nami. Una du bung ut ra, i turpas a taramo a labino tupunuk ma i maut doko a nuknukino. <sup>34</sup> I watungi tandetul lena, “Anung a nilaun i mamaut doko nama tupunuk, milau mo an mat nami. Motul in kis kut nin, ma motul in koikoi taru ut.” <sup>35</sup> I wan lilik taru usa numugu, i puku na urur tiro una piso, ma i wararing sur a du bung na minat in nan sakiti, raut a nemnem anun o God. <sup>36</sup> I wararing lena, “Tita, Tita, a kum utna rop i to pas ui un pami, un los ru a kap na mamaut ri gusun iau. Ikut gong u mur anung a nemnem, un muri ut anum a nemnem.”

<sup>37</sup> I milet melet torom a tulu nat na ususer, ra i tama detul, detul sa inep dumun. I ting o Pita lena, “Saimon, pepetlai, u inep dumun kut? Kon pet lari sur un koikoi

un tu du bunglik kut? <sup>38</sup> Motul in koikoi, ma motul in wararing, sur gong motul puku una ululam. A niomotul i nem na tarom, ikut a pinimotul i tungulu kut.”

<sup>39</sup> Ra i wan gusun detul, i wararing melet nama niaring ra i sa watung tari numugu.

<sup>40</sup> I milet melet, ra i tama detul, detul sa inep dumun melet, uni a matandetul i sa sunu doko. Ka detul tasman asau ra detul in balu i nami. <sup>41</sup> Ra i mantul u milet torom detul, i watungi lena, “Motul in inep liklik mukut, ma motul in mana? Gong mo! A du bung i sa sot. Tama i, di sa pitar tar a Nutun a Musano ulaman a kum tene sakino. <sup>42</sup> Motul katuttur, dat na wan! Tama i, a musano ra in pitar tar iau ulaman a kum ebar, i sa wanpat.”

*Di dat pas o Iesu*

(Mt 26:47-56; Lk 22:47-53; Jn 18:3-12)

<sup>43</sup> Ra o Iesu i wasiso utmakai, o Judas, ara tagun a noino ma aru nat na ususer, i wanpat, det nama kunur na taro. Det los a kum totok na inaim, ma a kum nalnal. A kum lamlabino tene etabor torom o God ma a kum tene ususer tagun a Warkurai ma a kum mugumugu det tulu ru det. <sup>44</sup> I ra in pitar tar o Iesu ulaman a kum ebar, i sa inanos mugu tar a kunur na taro una ukinalong ra in pami lena, “I ra an gom a pangpagor na wano, i ut ra. Mot in pam ukai pasi, mot in ben gisen pasi ma mot in tamtamabat wakaki.”

<sup>45</sup> Uniutra o Judas i wan torom o Iesu ra i watungi lena, “Tene Ususer!” Ra i gom a pangpagor na wano. <sup>46</sup> Ra a taro ra, det pam ukai o Iesu ma det dat pasi.

<sup>47</sup> Ara tagun det ra det tur milau, i dat pas anun in totok na inaim, ra i tau kutus ru in talngan a tultul anun a mugumugu na tene etabor torom o God. <sup>48</sup> Ra o Iesu i watungi tandet lena, “Pepetlai, kutiro iau a tene inaim ma a tene wolong, sur i mo ri mot wanpat nama kum totok na inaim, ma a kum nalnal sur mot in pam ukai iau?

<sup>49</sup> Una kum bungbung rop dat ser kis tomo una rumu na etabor, a ser ususer a taro, ma ka mot pam ukai iau. Ikut di pami lenri sur din pam sot pas a wasiso na Buk Tabu.” <sup>50</sup> Numur a taro na ususer rop anun o Iesu det kalabor sarara pas gusuni.

<sup>51</sup> Ma ara barman ra i ser mur o Iesu, i rakup pasi kut nam in namalu. Det pam ukai pasi, <sup>52</sup> ra i kabalor gusun anun in namalu, ma i mengere mukut.

*O Iesu i tur una warkurai umatan a taro na kiwung*

(Mt 26:57-68; Lk 22:54-55, 63-71; Jn 18:13-14, 19-24)

<sup>53</sup> Det ben pas o Iesu torom a mugumugu na tene etabor torom o God. Ma a kum lamlabino tene etabor rop torom o God, a kum mugumugu, ma a kum tene ususer tagun a Warkurai det wanpat tomo tiro iai. <sup>54</sup> O Pita i mur nanan o Iesu, ikut i bakbak ut gusuni. I ruk una nubual anun a mugumugu na tene etabor torom o God, ra i minor nisan a sungun tomo nama kum tene tamtamabat.

<sup>55</sup> A kum lamlabino tene etabor torom o God, tomo nama taro na kiwung rop det sisio sur tu sakino utna ra o Iesu i sa pam tari, sur det in takuni nami, ma det in um doko i uni, ikut ka det sio lar pas tu utna. <sup>56</sup> A susut det watung a kum torotoro na wasiso un o Iesu, ikut anundet a kum wasiso ke takai. <sup>57</sup> A ramano taro det tur ma det watung a kum torotoro na wasiso uni lena, <sup>58</sup> “Met longoro i, i watungi lena, ‘An rege ru a rumu na etabor ri, ra a taro det pam tari, ma una tulu bung kut, an pam pas taio ra ausur a taro det pami.’” <sup>59</sup> Ikut anundet a kum wasiso kai ke takai.

<sup>60</sup> A mugumugu na tene etabor torom o God i tur taru numugu tandet ra i ting o Iesu lena, “Pepetlai, kon balu det? Asau ra un balu a kum wasiso na etakun ri nami?” <sup>61</sup> Ikut o Iesu ke wasiso. A tene etabor ra, i ting meleti lena, “Ui a Karisito, a Nutun o God ra i dan tukum, o awu?” <sup>62</sup> Ra o Iesu i watungi lena, “Iau ut ra. Ra numur mot in tama a Nutun a Musano in kis una papor sot na laman o God, i ra i dekdek sakit, ma mot in tama i ra in nanpat una kum du bakut tagisapat una langit.” <sup>63</sup> A mugumugu na tene etabor i kankan ra i raros anun in namalu ut ma i iting lena, “Dat nem melet lako wasiso na etakun sur asau?” <sup>64</sup> Uniri mot sa longoro taro anun a kum wasiso laulau un o God. Asau mot nuki?” Ra det rop det mulaot sur o Iesu in iru. <sup>65</sup> Ara taro, det turpas a ibis o Iesu, det pulus bat pas arin matano, det tubuli ma det watungi tano lena, “Ui a poropet, un inanos met, osi ra i tubul ui!” Ra a kum tene tamtamabat det ben pasi ma det umi.

*O Pita i ipul ru o Iesu*

(Mt 26:69-75; Lk 22:56-62; Jn 18:15-18, 25-27)

<sup>66</sup> Ra o Pita i kis utmakai nago upiso una rumu ra, ara toraro, a tultul anun a mugumugu na tene etabor torom o God i wanpat. <sup>67</sup> Ra i tama o Pita kura i minor, i nas dekdeki ra i lena, “Ui kai u ser wan tomo nam o Iesu a te Nasaret.” <sup>68</sup> Ikut, i ipul lena, “Ka tasman asau ra u wasiso uni, ma ka talapor uni.” I wan utong nisan a matansako ina in noworo, ra a kereke i kurkurirakuk mut. <sup>69</sup> A toraro i tama melet pasi, ra i inanos det ra det tur tiro iai lena, “A musano ri, i kai ara ut tagun det ri.” <sup>70</sup> O Pita i ipul melet.

Numur lilik tano, det ra det tur milau torom o Pita, det watungi tano lena, “A lingmulus ut ra ui kai ara tagun det, uni ui a te Galili.” <sup>71</sup> Ra i liliman torom det, i watungi lena, “O God in warkurai laulau iau ra an toro. Ka tasman a musano ra mot wasiso uni.” <sup>72</sup> Ra uniuira a kereke i manru kurkurirakuk mut. O Pita i nuk pas a wasiso ra o Iesu i sa watung tari tano lena, “A kereke ken manru kurkurirakuk utmakai, ra un ipul a tulu dino lena, ko tasman iau.” Ra i tangis sakit pas mut.

## 15

*O Iesu i tur umatan o Pailat*

(Mt 27:1-2, 11-14; Lk 23:1-5; Jn 18:28-32)

<sup>1</sup> Una kobot raut, a kum lamlabino tene etabor torom o God, a kum mugumugu, ma a kum tene ususer tagun a Warkurai ma a taro na kiwung rop, det kubus wasiso pas. Det ker pas aru laman o Iesu, det beni, ra det pitar tari torom o Pailat. <sup>2</sup> O Pailat i tingi lena, “Ui a king anun a taro Juda?” Ra o Iesu i balu i lena, “I ut ra u sa watung tari.” <sup>3</sup> A kum lamlabino tene etabor torom o God det takun o Iesu una susut na utna. <sup>4</sup> O Pailat i ting melet o Iesu lena, “Ilai, katu minabalu anumi? Tama i, a susut na utna ri det takun ui nami.” <sup>5</sup> Ikut, o Iesu ke balu i nam tu wasiso, ra o Pailat i kisin doko uni.

*Det mulaot ru o Iesu sur in mat*

(Mt 27:15-26; Lk 23:13-25; Jn 18:39-19:16)

<sup>6</sup> Una kum kilkilalo rop una kum lamlabino bung na lotu na Wanlakai, o Pailat i ser palos ru ara karabus ra a taro det sasaring suri. <sup>7</sup> Una kilalo ra, ara musano a risano o Barabas i kis una karabus. I ara tagun det ra det waim nama gapman. Det ukatutur a inaim, ra det ser um doko a taro. <sup>8</sup> Ra a kunur na taro det wanpat torom o Pailat, ma det saring sur in palos melet ru tu karabus. <sup>9</sup> Ra o Pailat i ting det lena,

“Mot nemi sur an palos ru a ‘king anun a taro Juda’ torom mot?”<sup>10</sup> I watungi lenri uni i sa tasmani lena, a kum lamlabino tene etabor torom o God det pitar tar o Iesu toromi una sakino nukukindet.<sup>11</sup> Ikut a kum lamlabino tene etabor torom o God det ukatutur a balan a kunur na taro sur det in saring o Pailat, sur in palos ru o Barabas torom det.<sup>12</sup> O Pailat i ting det lena, “Asau ra an pami un o naro ra mot watungi nama king anun a taro Juda?”<sup>13</sup> Ra det kukukuk kut lena, “Sak wati un in nanai kutus!”<sup>14</sup> O Pailat i ting det lena, “Sur asau? Asi na sakino utna ra i sa pam tari?” Ikut det kukukuk dekdek lena, “Sak wati un in nanai kutus!”<sup>15</sup> O Pailat i nemi sur in ugasgas a taro, ra, i palos ru o Barabas torom det. Ra di sa takalo tatar o Iesu, o Pailat i pitar tari tan a kum tene inaim sur det in sak wati un in nanai kutus.

*A kum tene inaim det urongon un o Iesu  
(Mt 27:27-31; Jn 19:2-3)*

<sup>16</sup> A kum tene inaim det dat pas o Iesu utiro urumu una labino rumu anun anundet a mugumugu, ra det kabo tomo pas a kum tene inaim rop.<sup>17</sup> Det mar tari nam in merek na malu, det liko pas in narus a loklokono, ma det ubek tari un in lorino elar nama kukup anun a king.\*<sup>18</sup> Det kakabo toromi lena, “Ui a king anun a taro Juda!”<sup>19</sup> Det raprapus in lorino nam in nubuku, det ibisi, det kis butkeke nisano, ma det urur toromi.<sup>20</sup> Ra det sa urongon laulau papas uni, det palos ru in merek na malu gusuni. Det mar tari melet nama nun a kum malu, ma det ben pirso i sur din sak wati un in nanai kutus.

*Di sak wat o Iesu un in nanai kutus  
(Mt 27:32-44; Lk 23:26-43; Jn 19:17-27)*

<sup>21</sup> Tiro una kisapi a kum tene inaim det etorom pas ara te Sairini, a risano o Saimon, a taman o Aleksanda mo Rupus, i wan tagitong un ara tamon sur in nan usapat o Jerusalem. Det ungonos tari sur in los in nanai kutus anun o Iesu.<sup>22</sup> Det ben o Iesu sur a nubual ra di watungi nam o Golgota, a kukuraino a “Nubual na Lor na Minat.”<sup>23</sup> Det pitar tar a wain tano ra di sa pam tomo tari nama mira, ikut ke nemi sur in inumi.<sup>24</sup> Det sak wat tari un in nanai kutus, ra det pilai laki sur anun a kum malu sur osi tagun

det in los tin namalu.<sup>25</sup> Ra i lisu na pakano bung una kobot, det sak wati un in nanai kutus.<sup>26</sup> Det tumus tar a wasiso na etakun uni, sapat netes un in nanai kutus lena,

*“A KING ANUN A TARO JUDA.”*

<sup>27-28</sup> Det sak wati kai, aru tene wolong tomo nami una arin nanai kutus, ara una papor sot, ma ara kai una kair.<sup>†</sup><sup>29</sup> Det ra det wanan sakit o Iesu, det watung laulau i ma det lele lorindet toromi. Ma det watungi lena, “Ui mo ra u watungi lena un rege ru a rumu na etabor, ma un pam melet pasi una tulu bung kut,<sup>30</sup> uniri un ulaun pas ui mo, ma un pirso gusun in nanai kutus.”<sup>31</sup> A kum lamlabino tene etabor torom o God ma a kum tene ususer tagun a Warkurai det kai det urongon laulau un o Iesu, det wasiso etalai torom det lena, “I ulaun pas a taro gisen, ikut ken ulaun lar pasi ut.<sup>32</sup> Ra i a Karisito, a King anun a taro Israel, uniuiri in pirso gusun in nanai kutus, sur dat in tama i, ma dat in nurnur uni.” Ma der ra der kete tomo nami, der kai, der watung laulau i.

*O Iesu i mat*

*(Mt 27:45-56; Lk 23:44-49; Jn 19:28-30)*

<sup>33</sup> Ra i noino ma aru pakano bung una suan, a bual rop i dumirum tuk una tulu pakano bung una lirup.<sup>34</sup> Ra i tulu pakano bung, o Iesu i kukukuk dekdek lena, “Eloi, Eloi, lema sabakatani?” A kukuraina wasiso ra i lenri, “Anung a God, anung a God, ilai ra u wan gusun iau?”  
*Buk Song 2:2:1*

<sup>35</sup> Ara taro tagun det ra det tur milau, det longoro i, ra det watungi lena, “Tama i, i kakabo sur o Elaija.”<sup>36</sup> Ara tagun det i kalabor ra i los pas ara utna ra i ser dop a polo. I puk pasi una wain ra i mititir, i ubek pasi un in nanai ra i tulsu toto i usapat sur o Iesu in inumi. Ma i inanos det lena, “Te, dat in madek tari munung. Dat in tama i ra o Elaija in nan pirso sur in los pirso pasi, o awu.”<sup>37</sup> O Iesu i kukuk dekdek pas, ra i mat.

<sup>38</sup> Ra in namalu ra di mabat kutus nami sa urumu una rumu na etabor i tararos potora, turpasi tagisapat netes tuk unago piso.<sup>39</sup> A mugumugu anun a kum tene inaim ra i tur taru nisan in nanai kutus, i longoro o Iesu ra i kakabo ma i tama a ngas na minat ra i pami, i watungi lena, “I lingmulus ut, a musano ri a Nutun o God.”

\* 15:17: In merek na malu ma a kukup der tamtama elar nama ememar anun a king. † 15:27-28: A ramano kum tene mananos una Buk Tabu det nuki lena, a ramano wasiso kai i kis una rino ri. I lenri: *Di pami lenri sur din pam sot pas a wasiso uni una Buk Tabu ra i lenri, “Di luk tomo pasi nama kum tene sakino.”*

<sup>40</sup> A ramano wardain kai det tur bakkak taru ut ma det tama a kum utna ri. Kura epotor tandet, a tulu ino kai ri, o Maria Magdalen, ma o Salomi ma o Maria kai a nan o Joses ma o Jems ra a barman. <sup>41</sup> Detul ri, detul ser murmur o Iesu ra i kis sa o Galili, ma detul ser waruti. Ma a susut na wardain, ra det wan tomo nami usapat o Jerusalem, kura det kai iai.

*Di inep a minatin o Iesu una kulam na minat*

(Mt 27:57-61; Lk 23:50-56; Jn 19:38-42)

<sup>42-43</sup> Ara musano a te Arimatia, a risano o Josep. I ara tagun a taro na kiwung, a labino musano ra a taro det ser ru i, ma i ser kis langlang sur a matanitu anun o God. Ra i sa lirop una bung na waninar, a bung numugu tan a Bung na Sabat, i wan torom o Pailat, ke ngara, ra i saring pas a minatin o Iesu tano. <sup>44</sup> Ra o Pailat i kisin ra i longoro i lena o Iesu i sa mat. I kabo pas a mugumugu anun a kum tene inaim, ra i tingi lena, "Pepetlai, o Iesu i sa mat?" <sup>45</sup> Ra i sa mananos pas tan a mugumugu ri, i mulaot ru a minat in o Iesu torom o Josep. <sup>46</sup> Ra o Josep i kul pas in wakak na malu, i los pirso pas a minat in o Iesu, ra i pulus pasi nam in namalu ra. Numur i inep tari una kulam na minat ra di sa kil tari una papor wat, ra i bulus bat tar a matansako na kulam ra nama labino wat. <sup>47</sup> O Maria Magdalen ma o Maria, o nan o Joses, der tama tar a nubual ra di inep o Iesu uni.

## 16

*O Iesu i katuttur gusun a minat*

(Mt 28:1-8; Lk 24:1-12; Jn 20:1-10)

<sup>1</sup> Ra a Bung na Sabat i sa rop, o Maria Magdalen, ma o Salomi ma o Maria a nan o Jems, detul kul pas a kum utna ra i sangsangnain sur detul in mar a minatin o Iesu nami. <sup>2</sup> Ra in nusuan i wanpat una kobot raut una mugano bung una wik, detul wan sur a kulam na minat. <sup>3</sup> Ra detul wan nanan, detul ting etalai detul, "Osi mo in warut datul sur in bulus gisen ru a wat gusun a matansako na kulam na minat?" <sup>4</sup> Ikut ra detul tamtama tokodos usa, detul tama i ra di sa bulus gisen ru tar a labino wat ra. <sup>5</sup> Ra detul ruk una kulam, detul tama ara barman, i kis taru una papor sot na lamandetul, i emar pas nam in kabang

\*

16:8: A ramano kum tene mananos una Buk Tabu det nuki lena, a tumtumus anun o Mak i tuk ut nin. Det nuki lena ara gisen i tumus tar a kum rino 9-20.

na malu. Ra detul tama pasi, detul kisin ma detul ngara.

<sup>6</sup> A musano ra i watungi lena, "Gong motul ngara. A tasmani lena, motul sisio sur o Iesu a te Nasaret, i ra di sak wat tari un in nanai kutus. I sa katuttur melet, ma ke kis mo nin. Motul in tama a nubual ra di inep tari uni. <sup>7</sup> Motul nan, ma motul in inanos anun a kum nat na ususer ma o Pita kai lena, 'O Iesu in mugu utong o Galili. Mot in tama i tong, elar nami ra i sa inanos mugu tar mot.'" <sup>8</sup> Detul kisin ma detul neneder, ra detul kalabor gusun a kulam na minat. Ma ka detul inanos taio nam tu wasiso, uni detul ngara doko.\*

*O Iesu i wanpat torom o Maria Magdalen ma aru nat na ususer kai*

(Mt 28:9-10; Lk 24:13-35; Jn 20:11-18)

[ <sup>9</sup> O Iesu i katuttur gusun a minat una kobot raut una mugano bung una wik. Ra i wanpat mugu torom o Maria Magdalen, i ra o Iesu i lakro ru tar a wonom mawit na laulau na nion gusun. <sup>10</sup> O Maria Magdalen i wan ra i inanos det ra det ser mur o Iesu, kura det balano marmaris ma det tangtangis suri. <sup>11</sup> Ra det longoro i lena, o Iesu i sa laun melet gusun a minat ma o Maria i sa tama tari, ka det nurnur uni.

<sup>12</sup> Numur o Iesu i wanpat torom aru nat na ususer ra der wan nanan una kisapi, ma a pinino i tamtama senene. <sup>13</sup> Der milet melet, ra der inanos a kum nat na ususer rop. Ikut, ka det nurnur kai un der.

*O Iesu i wanpat torom a noino ma ra nat na ususer*

(Mt 28:16-20; Lk 24:36-49; Jn 20:19-23; Ap 1:6-8)

<sup>14</sup> Numur i wanpat torom a noino ma ra nat na ususer ra det kis na inangon. Ra i bor det, uni a balandet i dekdek ma ka det nurnur un det ra det sa tama tari ra i sa laun melet. <sup>15</sup> Ma i watungi tandet lena, "Mot in nan una rakrakon bual rop, ma mot in warawai nama Wakak na Wasiso torom a taro rop. <sup>16</sup> Osi ra i nurnur ma di baptaiso i, din ulauni. Ikut i ra ke nurnur, din pitar a dekdek na warkurai na minabalu toromi. <sup>17</sup> A kum tene nurnur det in pam a kum utna na ukisin ri: Det in lakro ru a kum laulau na nion nama risang, ma det in wasiso nama kum matok na ngas na wasiso, <sup>18</sup> det in pam

a kum sui ra i ser karot doko a taro, ikut ken banlaulau det, ma ra det in inum a sangsagor, ken banlaulau det, ma det in ubek a kum lamandet una kum misait, ra det in langolango.”

*O Iesu i wan usapat una langit  
(Lk 24:50-53; Ap 1:9-11)*

<sup>19</sup> Ra a Labino o Iesu i sa wasiso taru tandet, o God i ben toto pasi usapat una langit, ma o Iesu i kis una papor sot na laman o God. <sup>20</sup> Anun a kum nat na ususer det wan, ma det warawai tuptupukus. Ma a Labino i papam tomo nam det, ma i ulingmulus anun a wasiso nama kum utna na ukisin.]

## A Wakak na Wasiso un o Iesu Karisito o Luk i tumusi

### *A wasiso talapor mugu*

O Luk i tumus a buk ri. Ausur ia ra tagun a noino ma aru nat na ususer anun o Iesu. Ma ausur kai i a te Juda, i a te Grik. Anun a tamon kanapi o Antiok una papor Siria. O Luk ke tama tar a kum utna ra o Iesu i pami. I los mananos kut tandet ra det wasiso un o Iesu. Una ramano kum inawan anun o Pol, o Luk i wan tomo nami. (Ap 16:10-17; 20:5-21; 27:1-28:16).

Numugu anun a pinapam a dokta, ma i tasman wakak a wasiso Grik.

A buk ri a mugano buk ra o Luk i tumusi, ma i tumusi kai a buk Aposel. I tumus a buk ri sur a taro Grik det in tasman wakak a wasiso un o Iesu ma det in nurmur uni. Det in tasmani lena o Iesu i wan pirso urin sur in ulaun a taro rop. O Luk i tumtumus kai un o Iesu lena i wanpat a musano mulus, ma i wasiso una nun a marmaris torom a sibo na taro ma torom dat rop taktakai.

I tumtumus kai una kum utna ri: A watung ulabo torom o God, a dekdek ina Tokodos na Nion, a niaring, ma a nilaun anun a kum sibo na taro ma a kum tene gongon.

A inawan ina buk Luk:

A turturkibin ina buk ri (1:1-4)

A usur anun o Iesu ma o Jon a Tene Baptaiso (1:5-2:52)

A pinapam anun o Jon a Tene Baptaiso (3:1-20)

Di baptaiso o Iesu ra numur o Satan i ulami (3:21-4:13)

O Iesu i papam tong o Galili (4:14-9:50)

O Iesu i wan usapat o Jerusalem (9:51-19:27)

A tintinip na wik ma a minat anun o Iesu (19:28-23:56)

A katkatatur melet anun o Iesu tagun a minat, ma anun a inawan toto (24:1-53)

### *O Luk i tumus a buk ri torom o Tiopilus*

<sup>1</sup>Torom o Tiopilus,

A susut det lari ra det sa pam sot pas a tumtumus una kum utna ra i wanpat epotor tamet. <sup>2</sup>A taro ra det sa tama tar a kum utna ri numugu, ma det ser ususer a taro una Wakak na Wasiso, det ut det inanos met una kum utna ri. <sup>3</sup>Iau kai, a sa tikin pas a kum utna ri tagun a turturkibino, ra a nuki lena i wakak ra an tumus tari tam, o Tiopilus a labino. A tumus murmur a inawan pat anun a kum utna ri, <sup>4</sup>sur un tasmani lena a kum utna ra di sa ususer tar ui nami, i lingmulus ut.

*A wasiso talapor mugu ra din usus o Jon a Tene Baptaiso*

<sup>5</sup>Una kilalo ra o Erod i king una papor Judia, ara tene etabor torom o God a risano o Sekaraia. I ara tagun a kabotaro anun o Abia, ra det rop a kum tene etabor. O Sekaraia, anun a ino a risano o Elisabet, der rop tagun a kabotaro anun o Eron. <sup>6</sup>Der aru tene tokodos umatan o God, der mur wakak a kum Warkurai rop anun a Labino. <sup>7</sup>Ikut katu nutunder, uni o Elisabet ke ser usus, ma der sa takano laulau kai.

<sup>8</sup>Ara bung una kum bungbung na etabor anun a kabotaro anun o Sekaraia, o Sekaraia ut i pam a pinapam na etabor umatan o God. <sup>9</sup>A kum tene etabor torom o God det pilok pas o Sekaraia sur i ut in ruk una rumu na etabor anun a Labino, ma in tun a utna ra i sangsangnain wakak. Anundet a pipilok ra, i elar nama ngasino ra det ser muri\*. <sup>10</sup>Una du bung ra i tun a paura ra a mis ino i sangnain wakak ra di watung nama insens, a taro na lotu rop ra det tur tomo nago upiso det wararing.

<sup>11</sup>A ensel anun a Labino i wanpat torom o Sekaraia, ra i tur taru una papor sot nisan a kabulu na tuntun etabor, ra di tun a utna ra i sangsangnain wakak uni. <sup>12</sup>Ra o Sekaraia i tama pasi, a pinino i surin, ma i ngara doko uni. <sup>13</sup>Ikut a ensel i watung tano lena, "Sekaraia, gong u ngara, o God i sa longoro anum a niaring, ma anum a ino o Elisabet in usus pas tu nutumlik a musano, ra un pasor a risano nam o Jon. <sup>14</sup>Un gas doko nami, ma a susut kai det in gas una nun a usus, <sup>15</sup>uni in labo umatan a Labino. Ken inum a wain, o a dekdek na ininum. Ra ka din ususi utmakai i sa bukus nama Tokodos na Nion. <sup>16</sup>Ma in ben pukus tar a susut na taro Israel torom a Labino anundet o God. <sup>17</sup>In dekdek

\* 1:9 - Det pam ara pinapam sur in ese det lena osi ra in pam a pinapam na etabor. Ara taro det nuki lena i elar nami ra di tumus a risan a taro taktakai una kum watat, ra osi ra a risano i wanpat in los a pinapam ra.

elar nama poropet Elaija ma a magirano kai in elar ut nami. In mugu tana Labino, sur in ben tomo melet a kum tamtaman a kum nat torom a kum nutnutundet sur det in emarom melet, ma in ben pas a taro na pitarngat melet sur a wakak na ninunuk anun a kum tokodos na taro, sur in waninar a taro anun a Labino sur anun a inawan pat.”

<sup>18</sup> O Sekaraia i ting a ensel lena, “An tasman petlani lena a utna ri in nanpat? Uni mir, mir sa takano rop.” <sup>19</sup> Ra a ensel i balu i lena, “Iau o Gebriel, a ser tur umatan o God. I ut i tulu ru iau sur an inanos ui, ma an los a wakak na wasiso ri torom ui. <sup>20</sup> Ikut ui, ko nurnur una nung a wasiso. In nanpat tokodos ut una kalang ino. Tama i, turpasi uniri kon wasiso, uni ko nurnur. Un ngat tuk una du bung ra a utna ri in nanpat uni.”

<sup>21</sup> Una du bung ra a taro det kis langlang sur o Sekaraia, det nuknuk doko, uni i sa suano i tiro una rumu na etabor. <sup>22</sup> Ra i wan pirsu, ke wasiso lar pas mo torom det. Det tasmani lena o Sekaraia i sa tama tar tu tamtama una rumu na etabor, uni i tusutusu mukut torom det nama ru lamano.

<sup>23</sup> Ra i sa rop anun a du bung na pinapam, i milet melet sur anun a tamon. <sup>24</sup> Ma numur, o Elisabet anun a ino i tianan, ma a limo na kalang ke wan gisen pas gusun a rumu. <sup>25</sup> Ra i watungi lena, “A Labino i sa warut tar iau, ma uniri maragom i los ru asau ra a maimai nami umatan a taro.”

*Di inanos o Maria lena in usus o Iesu*

<sup>26</sup> Ra i sa wonom nin kalang anun o Elisabet, o God i tulu ru a ensel Gebriel utong o Galili un ara tamon a risano o Nasaret. <sup>27</sup> I wan torom ara toraro ra ke inep tomo nam tu musano. A risano o Maria, ra di sa ubek bat tari sur anun o Josep, i tagun a kabotaro anun o Dewid. <sup>28</sup> A ensel i ruk torom o Maria ma i watungi tano lena, “Un gas, u dan doko! A Labino i kis tomo nam ui.” <sup>29</sup> O Maria i nuknuk doko una wasiso ri lena asau a kukuraino. <sup>30</sup> Ikut a ensel i watungi tano lena, “Maria, gong u ngara, o God i gas doko nam ui. <sup>31</sup> Tama i! Un tianan, un usus pas a nat musano, ra un pasor tar a risano nam o Iesu. <sup>32</sup> Ma a risano in rereng, ma din watungi lena a Nutun o God a Labino Sakit. Ma a Labino o God, in ukis tari una kiskis na king anun o tubunu o Dewid, <sup>33</sup> ra in king tukum anun a kabotaro anun o Jekop, ma anun a matanitu ken rop.”

<sup>34</sup> O Maria i ting a ensel lena, “In pepetlai ri?

Uni ka nolin utmakai nam tu musano.” <sup>35</sup> A ensel i balu i lena, “A Tokodos na Nion in kis un ui, ma a dekdekin o God a Labino Sakit in pulus bat ui. Ra a Tene Tokodos ra un usus pasi, din watungi nama Nutun o God. <sup>36</sup> Tama i, a kukum o Elisabet i sa takano laulau, ra di watungi lena ken usus mo, ikut uniri i sa tianan, ma i sa wonom nin kalang anunu. <sup>37</sup> Uni katu utna i ngangitin torom o God.” <sup>38</sup> Ra o Maria i watungi lena, “Iau a tultul anun a Labino. Din pami ut un iau elar nama num a wasiso.” Ra a ensel i wan gusuni.

*O Maria i wan torom o Elisabet*

<sup>39</sup> Numur o Maria i waninar pas, ra i wan lakit usapat una kum tangai sur ara tamon ra i kis una papor Judia. <sup>40</sup> I ruk una rumu anun o Sekaraia, ra i kabo na gasgas pas o Elisabet. <sup>41</sup> Ra o Elisabet i longoro pas a kakabo na gasgas anun o Maria toromi, a nat i milu un in balano, ma o Elisabet i bukus nama Tokodos na Nion. <sup>42</sup> Ra i watungi nam in labino walngano lena, “Ui u dan tan a kum ino rop, ma a nat kai ra un ususi i dan. <sup>43</sup> Iau osi na ngas na ino ri, ra a nan anung a Labino i wan torom iau? <sup>44</sup> Ra a longoro anum a kakabo na gasgas torom iau, a nat i gas, ma i milu un in balang. <sup>45</sup> U dan, uni u nurnur lena, a wasiso anun a Labino torom ui in nanpat mulus.”

*O Maria i watung ulabo pas o God*

<sup>46</sup> O Maria i watungi lena,  
<sup>47</sup> “A niong i watung ulabo pas a Labino,  
<sup>47</sup> ma in balang i gas un o God, anung a Tene Ulaun,  
<sup>48</sup> uni i maris iau anun a tultul na ino, a ino oros kut iau.  
 Turpasi uniri a kum taun taro rop det in watungi un iau lena a dan,  
<sup>49</sup> uni i ra i Dekdek, i sa pam tar a kum labino utna un iau,  
 a risano i tokodos.  
<sup>50</sup> Anun a marmaris i kis torom det ra det ngara suri,  
 a kum taun taro rop.  
<sup>51</sup> I pam a kum dekdek na pinapam nama lamano,  
 i lu susuaro ru det ra det woman labino una nuknukindet.  
<sup>52</sup> I woro pirsu ru a kum king gusun anundet a kum kiskis na labino,  
 ma i ulabo pas det ra det unatino pas det.

<sup>53</sup> I tabor masur a taro ra det murak nama kum wakak na utna, ikut i tulu ru a kum tene gongon nama gowono lamandet.

<sup>54</sup> I warut anun a kum tultul, a taro Israel, ra i nuk pas anun a marmaris

<sup>55</sup> torom o Abaram ma anun a kabotaro tukum, elar nami ra i sa watung tari torom anundat a kabotaro tagun numugu.”

<sup>56</sup> Ra o Maria i kis nisan o Elisabet elar nama tul in kalang, ra numur i milet melet sur anun a tamon.

*O Elisabet i usus o Jon a Tene Baptaiso*

<sup>57</sup> Ra a bung anun o Elisabet i sot sur in usus uni, i usus pas a nat musano. <sup>58</sup> A kum paspasano ma a kum kukunu det longoro i lena a Labino i maris doko o Elisabet, ma det gas tomo nami.

<sup>59</sup> Ra i sa tiwal na bung anun a nat, det waninar sur din tok talilis a pinino, ma det nemi sur det in pasor tar a risan o tamano o Sekaraia uni. <sup>60</sup> Ikut o nano i watungi lena, “Gong! Din pasori ut nam o Jon.”

<sup>61</sup> Det watungi tano lena, “Katu kukum i los a rising ra.” <sup>62</sup> Numur det pam a kum ukinalong nama lamandet torom o tamano, ra det tingi lena, “Osi na rising u nemi sur din pasor a nat ri nami?” <sup>63</sup> Ra i ukinalong nama lamano sur tu utna ra in tumtumus uni, ma i tumusi lena, “A risano o Jon.” Det rop det kisin. <sup>64</sup> Uniutra a wan o Sekaraia i papos, ma in karmene i milu, ra i wasiso mut, i watung ulabo pas o God. <sup>65</sup> Ma a kum paspasander rop, det ngara. A wasiso una utna ri, i wan sarara una kum tamon sapat una kum tangai una papor Judia. <sup>66</sup> Det rop ra det longoro i, det nuknuk doko uni, ma det watungi lena, “A nat ri in nanpat asi na ngas na musano?” Uni det tama i lena a dekdek ina Labino i kis uni.

*O Sekaraia i wasiso na poropet*

<sup>67</sup> O Sekaraia o taman o Jon, i bukus nama Tokodos na Nion, ma i wasiso na poropet lenri,

<sup>68</sup> “Dat in watung ulabo pas a Labino, a God anun a taro Israel, uni i sa wanpat taro torom anun a taro, ma i sa kul ulangolango tar det.

<sup>69</sup> I sa pitar tar a dekdek na Tene Ulaun torom dat, tagun a kabotaro anun o Dewid, a tultul anun a Labino,

<sup>70</sup> elar nami ra i sa watung tari numugu ut-makai una wan anun a kum tokodos na poropet.

<sup>71</sup> I sa pitar tari sur in ulaun pas dat gusun anundat a kum ebar, ma gusun a lamandet rop ra det nget dat,

<sup>72</sup> ma sur in maris anundat a kabotaro tagun numugu ma in pam sot pas anun a tokodos na kunubus.

<sup>73</sup> I uliliman taro torom a tubundat o Abaram lena,

<sup>74</sup> in ulaun pas dat gusun a laman anundat a kum ebar, sur dat in papam toromi ma ka dat in ngara.

<sup>75</sup> Dat in papam toromi nama petutna ra i talapor ma i tokodos umatano, una nundat a kum bungbung na n-laun rop.

<sup>76</sup> Ma ui, nutunglik, din watung ui, a poropet anun o God a Labino Sakit, uni un mugu nanan tana Labino, sur un pam saro mugu anun a kisapi,

<sup>77</sup> sur din utalapor anun a taro una kisapi sur din ulaun pas det, a kisapi ra, din unus ru anundet a kum sakino petutna,

<sup>78</sup> kibino una labino marmaris anun anundat a God.

Ma una nun a marmaris, a talapor tagisapat netes in sisio pat torom dat.

<sup>79</sup> In sisio un det ra det kis una dumirum, ma una dumirum na minat, sur in mugu dat una kisapi na malmal.”

<sup>80</sup> Ra a nat i labo pat nanan ma o God i udekdek a niono. Ma i kis una nubual kalako taro uni tuk ra i tur pat torom a taro Israel.

## 2

*O Maria i usus o Iesu  
(Mt 1:18-25)*

<sup>1</sup> Una kilalo ra, o Sisa Augustus, a mugu-mugu tagun a gapman Rom, i ubek a warkurairai sur din tumus a risan a taro rop una kum tamon ra o Rom i warkurai sur det. <sup>2</sup> Iri a mugano dino ra di tumus a risandi una kum kilalo ra o Kwirinius i mugumugu tong o Siria. <sup>3</sup> Ma a taro rop det wan sur anundet a kum tamon mulus sur din tumus a risandet.

<sup>4</sup> O Josep kai i wan tagitiro una tamon Nasaret una papor Galili utong o Betliem

una papor Judia. O Betliem, a tamon ra di usus o Dewid iai, ma o Josep i wan utong, uni i tagun a kabotaro anun o Dewid. <sup>5</sup>I wan sur din tumus a risano, tomo nama risan o Maria ra di sa ubek bat tari sur anunu. Ra der wan o Maria i sa tianan. <sup>6</sup>Ra der kis tong o Betliem, i sot a du bung sur o Maria in usus uni, <sup>7</sup>ra i usus pas a mugano nutunu, a nat musano. Ma i pulusi\* nama kum malu anun a nat, ma i inep tari una boks na inangon ana kum wewegua, uni a rumu na usiro i sa bukus pas gusun detul.

*A ensel i pitar a wasiso torom a kum tene tamtamabat a kum sipsip*

<sup>8</sup>A ramano kum tene tamtamabat a kum sipsip det tamtamabat anundet a kum sipsip una mirum sa usual milau una tamon ra. <sup>9</sup>Ma a ensel anun a Labino i wanpat torom det, ma a minamar anun a Labino i sisio talilis det, ra det ngara doko. <sup>10</sup>Ikut a ensel i watungi tandet lena, “Gong mot ngara. Mot tama i, a wanpat torom mot nama wakak na wasiso ra in ugasgas a taro rop. <sup>11</sup>Uniri, una tamon anun o Dewid, di sa usus pas anumot a Tene Ulaun, i a Karisito, a Labino. <sup>12</sup>Ma mot in tama a ukinalong lenri: A nat di pulus tari nama kum malu na nat, ma di inep tari una boks na inangon ana kum wewegua.”

<sup>13</sup>Uniutra a labino kunur na ensel tagisapat una langit det wanpat torom a ensel ra, ma det watung ulabo pas o God lena,

<sup>14</sup>“Dat in watung ulabo pas o God sapat netes sakit, ma a malmal una rakrakon bual rop torom det ra o God i gasgas un det.”

<sup>15</sup>Ra a kum ensel det sa wan gusun det usapat netes una langit, a kum tene tamtamabat a kum sipsip det watungi lena, “Uniutri dat in nan utong o Betliem, dat in tama a utna ri i sa wanpat, ra a Labino i sa inanos tar dat nami.”

<sup>16</sup>Ra det wan lakit, ra det sio pas o Maria ma o Josep ma a natmiso ra di inep tari una boks na inangon ana kum wewegua. <sup>17</sup>Ra det sa tama tar a nat, det watung puaso a wasiso ra a ensel i sa inanos tar det nami una nat ra. <sup>18</sup>Det rop ra det longoro a wasiso anun a kum tene tamtamabat a kum sipsip, det kisin doko uni. <sup>19</sup>Ra o Maria i longoro a kum wasiso ri, i pam ukai i un in

balano ma i nukruk doko uni. <sup>20</sup>A kum tene tamtamabat a kum sipsip det millet melet, det ulabo pas o God ma det rakon lekeleke pasi una kum utna det longoro i ma det sa tama tari, elar ut nama wasiso anun a ensel.

*Di pasor a risan o Iesu*

<sup>21</sup>Ra i tiwal na bung anun a nat, ma i sa sot sur din tok talilis a pinino, di pasor tar a risano nam o Iesu, elar nama wasiso a ensel i sa watung tari ra o Maria ke tianan utmakai.

*Di pitar tar o Iesu torom a Labino*

<sup>22-24</sup>Numur tana usus anun o Iesu, o Maria ma o Josep der kis ru a kum bungbung na utalapor. Ra i sa rop der wan usapat o Jerusalem, sur der in pitar a etabor, elar nama Warkurai anun o Moses. Der in etabor nama “arin natahun o arin barman na balus,”

*Wok Pris 12:8* elar nama Warkurai anun a Labino. Der los o Iesu utkai usapat o Jerusalem, sur der in pitar tari tan a Labino, elar nami ra di sa tumus tari una Warkurai anun a Labino lena, “A kum mugano nat musano rop ma a kum mugano loko na wewegua, din pitar tar det torom a Labino.” *Kisim Bek 13:2, 12*

<sup>25</sup>Ara musano i kis sapat o Jerusalem a risano o Simion, a tene tokodos ma a tene urur kai torom o God. I ser kis langlang sur o God in ulaun a taro Israel, ma a Tokodos na Nion i kis uni. <sup>26</sup>A Tokodos na Nion i sa upuaso tari toromi lena ken mat lakit, tuk ut in tama tar a Karisito anun a Labino. <sup>27</sup>A Tokodos na Nion i mugu i sur in ruk un in noworo na rumu na etabor. Ra i tama pas o nader suano der wanpat nama nat, o Iesu, sur der in pitar tari torom a Labino, elar nami ra di sa tumus tari una kum Warkurai. <sup>28</sup>O Simion i los pas o Iesu nama ru lamano, ra i watung wakak torom o God lenri,

<sup>29</sup>“Labino, uniri un ulangolango ru iau, anum a tultul, sur an nan nama malmal,

elar ut nama num a liliman torom iau.

<sup>30</sup>A sa tama tar a Tene Ulaun ra u tulu ru i, nam in matang.

<sup>31</sup>U sa waninar tari umatan a kum kabotaro rop.

<sup>32</sup>I a talapor sur in utalapor anum a kisapi torom det ra ausur a taro Israel, ma sur a minamar torom anum a taro Israel.”

\* 2:7: A magiran a taro Juda det utalilis a natmiso nama kum du malu. Det utalilisi sur a ru lamano ma a ru kikino in tokodos ma gong a pinino i kotokoto.

<sup>33</sup>O Tamano ma o nano der kisin doko una kum wasiso ra o Simion i watungi un o Iesu. <sup>34</sup>O Simion i watung udan detul, ra i watungi tano Maria, o nan o Iesu, lena, "Tama i, a nat ri, o God i pilok pasi sur a susut na te Israel det in iru uni, ma a susut kai det in laun uni, ma sur a ukinalong ra, a susut na taro det in rosumur gusuni. <sup>35</sup>Ra det in rosumur gusuni, in upuaso a kum nuknuk tagun a balandet. Ma ui, a tupunuk ra un taramo i in elar nam in totok na inaim ra in so anum a nilaun."

<sup>36-37</sup>Ara ino bulung, a poropet, a risano o Ana, a nutun o Panuel, tagun a kabotaro Aser. I sa takano laulau, i sa tiwal na noino ma wat na kilalo anunu ma i ula mukut. Der nolin pas kut a wonom mawit na kilalo, ra numur anum a musano i mat. A ino ri ke wan taru gusun a rumu na etabor, i lotlotu una kum mirum ma a waspi, i ser wewel ma i ser wararing. <sup>38</sup>Una du bung utra, i wanpat torom detul, i watung wakak pas torom o God, ra i wasiso puaso una nat torom det rop ra det ser kis langlang sur God in ulangolango pas a taro Jerusalem.

#### *Detul milet melet utong o Nasaret*

<sup>39</sup>O Josep ma o Maria der sa pam sot pas a kum utna rop elar nama Warkurai anum a Labino, ra numur detul milet melet utong o Galili, sur anundetul a tamon o Nasaret. <sup>40</sup>Ra a nat i labo pat nanan, ma i dekdek nanan, ma i bukus nama mananos, ma a marmaris anum o God i kis uni.

#### *O Iesu i kis sikot una rumu na etabor*

<sup>41</sup>Una kum kilalo rop o taman o Iesu ma o nano der ser wan usapat o Jerusalem una labino bung na lotu na Wanlakai. <sup>42</sup>Ra i sa noino ma aru kilalo anum o Iesu, detul wan usapat o Jerusalem sur a labino bung na lotu na Wanlakai, elar ut nami ra det ser pami. <sup>43</sup>Ra a labino bung na lotu na Wanlakai i sa rop, det milet melet, ma o Iesu i kis sikot kut sapat o Jerusalem, ikut o tamano ma o nano ka der tasmani. <sup>44</sup>Der nuki lena det wan tomo nama taro. Ra det sa wan ara bung una nundet a milmilet, der turpasi sur der in sisio sur o Iesu nisan a kum kukun detul, ma a kum paspasan detul.

<sup>45</sup>Ra der lagano sisio taru suri, der milet melet usapat o Jerusalem, ra der sisio mo suri sapat. <sup>46</sup>Ra der sa sisio pas a tulu bung, der tama torom pasi una rumu na etabor. I kis tomo nama kum tene ususer tagun a

Warkurai, i longoro det, ma i tingting det kai. <sup>47</sup>Det rop ra det longoro i, det kisin una nun a mananos, ma anum a kum minabalu torom det. <sup>48</sup>Ra der tama pasi, der kisin, ma o nano i watungi tano lena, "Nutunglik, ilai ra u pami lenri un mir? Mir nam o tamam mir sa sisio doko pas sur ui, ma mir ngara doko sur ui." <sup>49</sup>Ra i watungi tander lena, "Asau ra mur sisio sur iau suri? Ka mur tasmani lena i tokodos sur an kis una rumu anum o Tita?" <sup>50</sup>Ikut ka der talapor una nun a wasiso.

<sup>51</sup>Numur detul milet melet utong o Nasaret, ra i ser tarom tander, ma o nano i nuk ukai a kum utna rop ri. <sup>52</sup>O Iesu i labo pat nanan una pinino ma una nun a mananos, ma o God ma a taro kai det gas doko nami.

### 3

#### *O Jon a Tene Baptaiso i warawai (Mt 3:1-12; Mk 1:1-8; Jn 1:19-28)*

<sup>1</sup>Ra i sa noino ma a limo na kilalo na warkurai anum o Sisa Taiberius, o Pontias Pailat a labino mugumugu i warkurai una papor Judia, ma o Erod i mugumugu una papor Galili, ma a tisinolik o Pilip i mugumugu una aru papor Ituria ma o Trakonitis, ma o Lisania i mugumugu una papor Abilene <sup>2</sup>ma o Anas ma o Kaiapas der los a pinapam na mugumugu na tene etabor torom o God. Una kilalo ra, a wasiso anum o God i wanpat torom o Jon, a nutun o Sekaraia ra i kis una nubual kalako taro uni. <sup>3</sup>Ma i wan una kum nubual rop milau a danim Jordan, i ser warawai lena, a taro det in nukpukus ma din baptaiso det, sur o God in unus ru anundet a kum sakino petutna. <sup>4</sup>Elar nam i ra di sa tumus tari una buk anum a poropet Aisaia lena,

"Una nubual kalako taro uni, in nalngan ara i kakabo lena,

'Mot in waninar a kisapi anum a Labino, mot in pam kodos anum a kum kisapi.

<sup>5</sup>A kum lala rop din por det ma a kum du tultul rop ma a kum tangai din kil elaro det.

A kum kisapi ra i kiloklok din ukodos det, ma a kum nubual i tungtung, din por kodos det.

<sup>6</sup>Ra a taro rop det in tama i ra o God in ulaun a taro.'"  
*Aisaia 40:3-5*

<sup>7</sup>A kunur na taro det wanpat torom o Jon sur in baptaiso det, ra i watungi tandet lena, "Ai, mot a kum nutnutun a kum sui! Ka inanos mot sur mot in kalabor eno gusun

a warkurai na minabalu anun o God, ra in nanopat. <sup>8</sup> Mot in pam a kum utna ra in upiaso i lena mot sa nukpukus. Ma gong mot nuki lena o God ken warkurai mot uni mot a kabotaro anun o Abaram. A inanos mot lena, o God in pet lari sur in pam pat pas a kabotaro anun o Abaram tagun a kum wawat ri. <sup>9</sup> Di sa ubek tar a nawu nisan a kum kibino duwai, ma a kum duwai rop ra ka det wu lako wakak na windet, din tau ru det, ma din woro tar det una sungun.”

<sup>10</sup> A kunur na taro det tingi lena, “Asau ra met in pami?” <sup>11</sup> I balu det lena, “Osi ra anunu lako rin namalu na kelkeles, in pitar tar tino tan taio ra ka tin namalu na ememar anunu, lenkutkai ra una utna na inangon.” <sup>12</sup> Ma a ramano kum tene los takis det wanpat sur in baptaiso det. Ma det tingi lena, “Tene Ususer, asau ra met in pami?” <sup>13</sup> Ra i balu det lena, “Gong mot los a takis i labo taun i ra di sa kubus tari.” <sup>14</sup> Ma a ramano kum tene inaim det tingi lena, “Ma met, asau ra met in pami?” Ra i balu det lena, “Gong mot los na kankan oros pasi kut a mani gusun a taro, ma gong mot etakun torotoro, mot in gas kut sur a ikul ra din pitari tamot.”

<sup>15</sup> A taro det ser kis langlang sur a Karisito. Ra det longoro o Jon, det nuki lena kutiro a Karisito mo. <sup>16</sup> Ra o Jon i watungi tandet rop lena, “Iau, a baptaiso mot nama danim. Ikut o naro ra a dekdeking i labo taun a dekdeking in nanopat. Ka elar sur an palos aru su gusun aru kikino, uni a natino doko tano. In baptaiso mot nama Tokodos na Nion ma a sungun. <sup>17</sup> I pam pas anun a pok nam aru lamano sur in lakro susuaro a pino wit gusun a wino wit\*. Numur in ubek tomo anun a wino wit una nuna rumu na wit, ikut in tun ru a kum pinino una sungun ra ke ser mat.” <sup>18</sup> Ra o Jon i warawai torom det nama Wakak na Wasiso i udekdek det nama susut na wasiso sur det in pukus anundet a nilaun.

<sup>19</sup> Ma o Jon i wasiso dekdek torom o Erod a mugumugu, uni i nolin melet nam o Erodias, a ino anun o tisino. Ma i wasiso dekdek una kum sakino utna rop kai ra o Erod i sa pam tari. <sup>20</sup> Ma o Erod i wot melet ara sakino petutna ra i uruk tar o Jon una karabus.

*O Jon i baptaiso o Iesu  
(Mt 3:13-17; Mk 1:9-11)*

<sup>21</sup> Ra o Jon i baptaiso a taro rop, i baptaiso i kai o Iesu. Ma una du bung ra i wararing, a langit i papos, <sup>22</sup> ma a Tokodos na Nion i keles pasi elar namin natahun, ra i wan pirso ma i kis netes un o Iesu. Ma in nalngan ara tagisapat una langit i watungi lena, “Ui a Nutunglik, a nat na wakak, a gas doko nam ui.”

*A niluluk ina kabotaro anun o Iesu  
(Mt 1:1-17)*

<sup>23</sup> O Iesu i turpas anun a pinapam ra kutiro i tulu noino kilalo anunu. I a nutun o Josep, a nuknukin a taro kut lenra.

O Josep a nutun o Eli,

<sup>24</sup> o Eli a nutun o Matat,

o Matat a nutun o Liwai,

o Liwai a nutun o Melki,

o Melki a nutun o Janai,

o Janai a nutun o Josep,

<sup>25</sup> o Josep a nutun o Matatias,

o Matatias a nutun o Amos,

o Amos a nutun o Naum,

o Naum a nutun o Esli,

o Esli a nutun o Nagai,

<sup>26</sup> o Nagai a nutun o Mat,

o Mat a nutun o Matatias,

o Matatias a nutun o Semein,

o Semein a nutun o Josek,

o Josek a nutun o Joda,

<sup>27</sup> o Joda a nutun o Joanan,

o Joanan a nutun o Resa,

o Resa a nutun o Serubabel,

o Serubabel a nutun o Salatiel,

o Salatiel a nutun o Neri,

<sup>28</sup> o Neri a nutun o Melki,

o Melki a nutun o Adi,

o Adi a nutun o Kosam,

o Kosam a nutun o Elmadam,

o Elmadam a nutun o Er,

<sup>29</sup> o Er a nutun o Josua,

o Josua a nutun o Eliaser,

o Eliaser a nutun o Jorim,

o Jorim a nutun o Matat,

o Matat a nutun o Liwai,

<sup>30</sup> o Liwai a nutun o Simion,

o Simion a nutun o Juda,

o Juda a nutun o Josep,

o Josep a nutun o Jonam,

o Jonam nutun o Eliakim,

<sup>31</sup> o Eliakim a nutun o Melea,

o Melea a nutun o Mena,

o Mena a nutun o Matata,

\* 3:17: A ngasino ra di ser lakro ru a pinino wit gusun a wino i lenri: Di woro toto a wit ra a wuwu i wup ru a pinino ra a wino i puku pirso.

o Matata a nutun o Natan,  
 o Natan a nutun o Dewid,  
<sup>32</sup> o Dewid a nutun o Jesi,  
 o Jesi a nutun o Obed,  
 o Obed a nutun o Boas,  
 o Boas a nutun o Salmon,  
 o Salmon a nutun o Nason,  
<sup>33</sup> Nason a nutun o Aminadap,  
 o Aminadap a nutun o Atmin,  
 o Atmin a nutun o Arni,  
 o Arni a nutun o Esrom,  
 o Esrom a nutun o Peres,  
 o Peres a nutun o Juda,  
<sup>34</sup> o Juda a nutun o Jokop,  
 o Jokop a nutun o Aisak,  
 o Aisak a nutun o Abaram,  
 o Abaram a nutun o Tera,  
 o Tera a nutun o Naor,  
<sup>35</sup> o Naor a nutun o Seruk,  
 o Seruk a nutun o Reu,  
 o Reu a nutun o Pelek,  
 o Pelek a nutun o Eber,  
 o Eber a nutun o Sela,  
<sup>36</sup> o Sela a nutun o Kainan,  
 o Kainan a nutun o Arpaksat,  
 o Arpaksat a nutun o Sem,  
 o Sem a nutun o Noa,  
 o Noa a nutun o Lamek,  
<sup>37</sup> o Lamek a nutun o Metusela,  
 o Metusela a nutun o Enok,  
 o Enok a nutun o Jaret,  
 o Jaret a nutun o Malelel,  
 o Malelel a nutun o Kainan,  
<sup>38</sup> o Kainan a nutun o Enos,  
 o Enos a nutun o Set,  
 o Set a nutun o Adam,  
 o Adam a nutun o God.

## 4

*O Satan i lar o Iesu*  
 (Mt 4:1-11; Mk 1:12-13)

<sup>1</sup> O Iesu i bukus nama Tokodos na Nion. Ra i wan tagitong una danim Jodan, a Tokodos na Nion i mugu i utiro una nubual kalako taro uni. <sup>2</sup> I kis tiro iai a wat na noino bung ra o Satan i lari. Ke wan tu utna ubalan a kum bungbung ra. Numur i murak. <sup>3</sup> Ra o Satan i watungi tano lena, "Ra ui a Nutun o God, un inanos a wat ri sur in nanpat a beret." <sup>4</sup> O Iesu i balu i lena, "Di sa tumus tari una Buk Tabu lena, 'A taro ka det ser laun nama utna na inangon kut.'" Lo 8:3

<sup>5</sup> O Satan i ben pasi sur ara nubual sapat netes, ra i ese tar a kum tamtamon rop una rakrakon bual tano una nat na du bung lik kut. <sup>6</sup> Ra i watungi tano lena, "An tabor ui

nama dekdek indet rop ma a kum minamar indet rop, uni di sa pitar tari tang, ma an pitari torom taio ra a nemi. <sup>7</sup> Ra un lotu torom iau, a kum utna ri, anum rop kut." <sup>8</sup> O Iesu i balu i lena, "Di sa tumus tari una Buk Tabu lena, 'Un lotu torom a Labino anum a God, ma un tarom kut toromi.'" Lo 6:13

<sup>9</sup> Numur o Satan i ben pasi usapat o Jerusalem, ma i utur tari sapat netes sakit una rumu na etabor. Ma i watungi tano lena, "Ra ui a Nutun o God, un sirok pirso taginin, <sup>10</sup> uni di sa tumus tari una Buk Tabu lena,

'In tulu ru anun a kum ensel  
 sur det in tamtamabat wakak ui.'

<sup>11</sup> Ma, 'Det in pam pas ui nama kum laman-det,

sur gong u tuka a kikum un tu wat.'" Buk Song 91:11-12

<sup>12</sup> O Iesu i balu i lena, "Di sa watung tari una Buk Tabu lena, 'Gong u lar a Labino anum a God.'" Lo 6:16

<sup>13</sup> Ra o Satan i sa lar tari nama kum larlar rop ri, ra i wan munung gusuni.

*O Iesu i turpas anum a pinapam tong o Galili*  
 (Mt 4:12-17; Mk 1:14-15)

<sup>14</sup> O Iesu i milet melet utong una papor Galili nama dekdek ina Tokodos na Nion, ma a wasiso uni i wan sarara una papor rop ra. <sup>15</sup> O Iesu i ususer a taro una nundet a kum rumu na lotu, ma det rop det watung ulabo pasi.

*Di lu ru o Iesu tagitong o Nasaret*  
 (Mt 13:53-58; Mk 6:1-6)

<sup>16</sup> O Iesu i wanpat tiro o Nasaret, a tamon ra i labo pat iai, ma i ruk una rumu na lotu una Bung na Sabat, elar nama nun a petutna ut, ma i tur sur in luluk. <sup>17</sup> Ra di pitar tar a buk anum a poropet Aisaia toromi. I palos pas a buk ra di sa pul tari, ma i tama a dino ra di sa tumus tari lenri, <sup>18</sup> "A Nion a Labino i kis un iau, uni i sa pilok pas iau sur an warawai nama wakak na wasiso torom a kum sibo na taro.

I tulu ru iau sur an warawai lenri, din palos ru det ra di sa ker ukai tar det, din utamtama melet a kum pulu, din ulangolango ru det ra det taramo a mamaut ra di sa pam tari un det,

<sup>19</sup> ma an wasiso puaso una kilalo na mar-mar is anum a Labino ra uniri i sa wanpat." Aisaia 61:1-2

<sup>20</sup> I pul melet tar a buk ra, i pitar tari torom a tene pinapam tagun a rumu na

lotu, ma i kis melet. A taro rop una rumu na lotu det tama dekdeki, <sup>21</sup> ma i watungi tandet lena, "A wasiso ri mot longoro i, uniri a sa pam sot pasi."

<sup>22</sup> Det rop det wasiso na ulabo pasi, ma det kisin una nun a wakak na wasiso. Ra det iting lena, "A musano ri, a nutun o Josep, niko?" <sup>23</sup> Ra i watungi tandet lena, "Kutiro mot in watung a wasiso elelar ri un iau: 'Dokta, un ulangolango pas ui ut! A kum utna rop ra met longoro i lena u sa pam tari tiro o Kapernaum, i wakak ra un pami utkai nin una num a tamon.'" <sup>24</sup> Ra o Iesu i watungi kai tandet lena, "A inanos mot nama lingmulus, katu poropet di ser gas pasi una nun a tamon ut. <sup>25</sup> A lingmulus ut ra a susut na ula det kis tiro o Israel una kilalo ra o Elaija i kis tong, ra a tulu kilalo ma wonom na kalang ke bato, ma a labino munurak i monong a kum tamon rop. <sup>26</sup> Ikut o God ke tulu o Elaija torom tu ino Israel, torom ara ula kut tagun a tamon Sarepat una papor Saidon. <sup>27</sup> A susut na lepra det kis tong o Israel una kilalo anun a poropet Elisa, ikut o God ke ulangolango taio tagun det, o Neman kut a te Siria."

<sup>28</sup> Ra det longoro a kum wasiso ri, a taro rop ra det kis una rumu na lotu, det kankan doko. <sup>29</sup> Det katuttur, ra det lu ru o Iesu tagun anundet a tamon. Det dat pasi usapat una tangai ra di pam tar anundet a tamon uni, sur det in woro pirso i una papor wat. <sup>30</sup> Ikut i wan kut epotor tan a kunur na taro, ra i wan mut gusun det.

*O Iesu i lakro ru a laulau na nion gusun a musano*

*(Mk 1:21-28)*

<sup>31</sup> Numur o Iesu i wan utong o Kapernaum, una papor Galili, ra una Bung na Sabat, i ususer a taro. <sup>32</sup> Ra det kisin una nuna kum etowo, uni i ususer det elar nam ara, ra a warkurai kura ut tano. <sup>33</sup> Una rumu na lotu ara musano, a laulau na nion kura uni, i kakabo dekdek lena, <sup>34</sup> "Ai! Iesu, a te Nasaret, u ling na pam asau un met? U wanpat sur un banlaulau met? A tasman ui, ui a Tene Tokodos anun o God." <sup>35</sup> O Iesu i sakbati lena, "Gong u wasiso! Pirso gusun a musano ra!" Ma a laulau na nion i woro pirso tari epotor tandet rop, i pirso gusuni, ma katu du pinino i laulau.

<sup>36</sup> A taro rop det kisin doko, ra det ting etetalai det lena, "A ngas na wasiso sau ri? A warkurai ma a dekdek kura ut tano, ra i

ser wasiso tana kum laulau na nion, ra det ser pirso mut."

<sup>37</sup> Ra a wasiso un o Iesu i wan sarara utiro una kum tamon rop una papor ra.

*O Iesu i ulangolango pas a susut na misait*  
*(Mt 8:14-17; Mk 1:29-39)*

<sup>38</sup> O Iesu i pirso gusun a rumu na lotu, ra i wan sur a rumu anun o Saimon. Ara ino a inumun o Saimon kura urumu, a pinino i mararong doko, ra det saring o Iesu sur in waruti. <sup>39</sup> Ra o Iesu i tur taru nisan a bano, ma i pitar a wasiso torom a misait, ra a mararong i rop gusuni. Ra i tur mut, ra i tabor det mo nama utna na inangon.

<sup>40</sup> Ra in matanas i ling na sup, a taro det ben pat det rop ra det misait nama kum wur ngas na misait torom o Iesu. Ma i ubek aru lamano netes un det taktakai, ra i ulangolango det rop. <sup>41</sup> Ma a kum laulau na nion kai det pirso gusun a susut, ra det kakabo lena, "Ui a Nutun o God." Ra o Iesu i turbat det, sur gong det wasiso, uni det tasmani ut lena i a Karisito.

<sup>42</sup> Ra i sa waspi, o Iesu i wan gusun a tamon ra, sur a nubual kalako taro uni. A kunur na taro det sisio suri. Ra det sa sio pasi, det ling na turbati sur gong mo i wan gusun det. <sup>43</sup> Ikut i balu det lena, "An warawai nama Wakak na Wasiso una matanitu anun o God una ramanu kum tamon gisen kai. Uni i a kibino ra di tulu ru iau urin." <sup>44</sup> Ra i warawai nanan una kum rumu na lotu una papor Judia.

## 5

*A kum mugano nat na ususer anun o Iesu*  
*(Mt 4:18-22; Mk 1:16-20)*

<sup>1</sup> Ara bung o Iesu i tur nago usalin una du tasi Genesaret, a taro det tur talilis bat pasi, sur det in longoro a wasiso anun o God. <sup>2</sup> Ra i tama pas aru pot tiro iai una usalin, ra a kum tene woro uben det sa wan pas gusun der, kura det gos anundet a kum uben. <sup>3</sup> I kas taru un ara tagun der, a pot ra anun o Saimon, ra i inanosi sur in sugut lilik tar a pot usa utasi. Ra o Iesu i kis taru uni, ma i ususer a kunur na taro.

<sup>4</sup> Ra i sa wasiso rop, i watungi tan o Saimon lena, "Mot in nan usa una dino ra i lamano, ma mot in woro anumot a kum uben sur lako kiripo." <sup>5</sup> O Saimon i balu i lena, "Labino, met sa tol panai taru una kudulano mirum, ma ka met dat pas tin kiripo, ikut an woro melet tar a kum

uben, uni ui u itula.”<sup>6</sup> Ra det sa woro tar a kum uben, det dat pas a susut na kiripo, ra anundet a kum uben milau in tararos.<sup>7</sup> Det kalu pas a kum paspasandet tagun ara pot kai sur det in warut det. Ra det wan torom det, ma det ubukus pas aru pot rop, ra der ling na murung mo.<sup>8-10</sup> O Saimon ma det ra det wan tomo nami det kisin una kum kiripo ra det dat pasi, lenkutkai ra torom aru paspasano, Jems ma o Jon, aru nutun o Sebedi. Ra o Saimon Pita i tama a utna ri, i puku nama urur tiro nakikin o Iesu ra i watungi tano lena, “Labino, wan gusun iau, iau a tene sakino.” O Iesu i balu i lena, “Gong u ngara. Turpasi uniri, un tene ben taro.”<sup>11</sup> Ra det sa dat toto tar aru pot, det wan gusun anundet a kum utna rop, ma det mur o Iesu.

*O Iesu i ulangolango pas a lepra*  
(Mt 8:1-4; Mk 1:40-45)

<sup>12</sup> O Iesu i kis un ara tamon, ma ara musano ra a pinino rop i bukus nama lepra, i wan toromi. Ra i tama pas o Iesu, i kis but keke ma in masarino unago upiso, ma i saring dekdeki lena, “Labino, wan ngangitin torom ui. Ra u nemi, un ulangolango pas iau, sur an talapor umatan o God.”<sup>13</sup> O Iesu i kodos a lamano, ma i pam a pinino ra i watungi tano lena, “A nemi ut, un langolango.” Uniutra a lepra i rop gusuni.<sup>14</sup> Ra o Iesu i wasiso dekdek taru toromi lena, “Gong u inanos tar taio nami. Un nan ma un ese mugu tar ui torom a tene etabor torom o God, ma un pitar a etabor torom o God elar nami ra o Moses i sa watung tari, sur un talapor umatan o God. Ra un pami lenra, a taro det in tasmani lena u sa langolango.”<sup>15</sup> Ikut a wasiso un o Iesu i wan sarara makai, ra a susut na taro det wan tomo sur det in longoro i, ma sur in ulangolango pas det gusun anundet a kum misait.<sup>16</sup> Ikut a susut na bung o Iesu i ser wan gisen, una nubual kalako taro uni, sur in wararing.

*O Iesu i ulangolango pas a musano a pinino i mat*  
(Mt 9:1-8; Mk 2:1-12)

<sup>17</sup> Ara bung ra o Iesu i ususer a taro, a kum Parisi ma a kum tene ususer tagun a Warkurai, kura det kis tomo nami. Det wanpat tagun a kum tamon rop una papor Galili ma una papor Judia, ma tagisapat o Jerusalem kai. Ma a dekdek ina Labino i kis un o Iesu sur in ulangolango a kum misait.

<sup>18</sup> A ramano kum musano det los pat ara musano a pinino i mat, i inep taru kut una lu. Det lari sur det in ruk nami, ma det in inep tari numugu nisan o Iesu.<sup>19</sup> Ikut ka det ruk lar pas nami, uni a taro det bukus doko. Ra det ka nami usapat netes una rumu, det papok saro pas a nubual sapat netes, ra det unoro pirso tari tomo nama lu epotor nisan a kunur na taro numugu nisan o Iesu.<sup>20</sup> O Iesu i tama anundet a nurnur, ra i inanos a musano a pinino i mat lena, “Pasang, di sa unus ru anum a kum sakino petutna.”

<sup>21</sup> A kum tene ususer tagun a Warkurai ma a kum Parisi, det nuknuk doko lena, “Osi na ngas na musano ri? I watung laulau o God uni i elaro i nami. Osi i elar sur in unus ru a kum sakino petutna? O God sot kut.”<sup>22</sup> O Iesu i tasman a nuknukindet, ra i ting det lena, “Sur asau ra mot nuknuk lenra?”<sup>23</sup> Asi na wasiso ra ke ngangitin sur an watungi? An watungi lena, ‘Di sa unus ru anum a kum sakino petutna,’ o, an lena, ‘Un katutur, ma un nan?’<sup>24</sup> A wasiso ra an watungi, an watungi sur mot in tasmani lena, o God i pitar a warkurai torom a Nutun a Musano, sur in unus ru a kum sakino petutna nin upiso.” Ra i watungi torom a musano a pinino i mat lena, “A inanos ui, un katutur, un los anum a lu, ra un nan sur anum a rumu.”<sup>25</sup> Uniutra i tur umatan det rop, i los anum a lu, ra i wan sur anum a rumu. Ra i wan i rakon lekeleke pas o God.<sup>26</sup> Ma det rop det kisin doko, det rakon lekeleke pas o God. Det ngara doko, ra det watungi lena, “Uniri, dat tama a kum se utna i wanpat una nundat a tamtama.”

*O Iesu i kabo pas o Liwai*  
(Mt 9:9-13; Mk 2:13-17)

<sup>27</sup> Numur tana kum utna ri, o Iesu i wan ra i tama pas ara tene los takis, a risano o Liwai, ra i kis una rumu na los takis. O Iesu i watungi tano lena, “Un mur iau.”<sup>28</sup> Ra o Liwai i katutur ma i wan gusun anum a kum utna rop, ra i mur o Iesu.

<sup>29</sup> Numur o Liwai i pam a labino inangon un o Iesu una nun a rumu. A susut na tene los takis ma ara taro kai det kis tomo nam o Iesu una inangon ra.<sup>30</sup> A kum Parisi tomo nam anundet a kum tene ususer tagun a Warkurai, det pukus anum a kum nat na ususer ra det watungi lena, “Sur asau ra mot wangon ma mot inum tomo nama kum tene los takis ma a kum tene sakino?”<sup>31</sup> O Iesu i balu det lena, “A dokta ke wanpat sur det ra det langolango. Awu! I wanpat

sur det kut ra det misait. <sup>32</sup> Ka wanpat sur an kabo pas a kum tene tokodos, awul! A wanpat sur an kabo pas a kum tene sakino sur det in nukpukus.”

*A iting una winewel*

*(Mt 9:14-17; Mk 2:18-22)*

<sup>33</sup> Ara taro det watungi tan o Iesu lena, “A kum nat na ususer anun o Jon det ser wewel ma det ser wararing, ma lenkutkai lar a kum nat na ususer anun a kum Parisi. Ikut anum a kum nat na ususer det wangon ma det inum kut.” <sup>34</sup> O Iesu i balu det lena, “A kum paspasan a musano ra i nolin matok, det in wewel pepetlai, ra kura utmakai i tomo nam det?” <sup>35</sup> Ikut tu bung in nanpat, ra din ben ru i gusun det. Una kum bung ra, det in wewel maragom.”

<sup>36</sup> O Iesu i watungi kai ara wasiso elelar tandet lenri, “Katutaio in raros pas tu du malu tagun in matok na malu, sur in mabon tomo tari nam in turai na malu. Ra in pami lenra, in raros laulau ru in matok na malu, ma a du matokino ka der in tamtama elar nama du turaino. <sup>37</sup> Ma kataio in titior a matok na wain utiro un in turai na koto, ra di pami nam in pino meme, sako a matok na wain in mubus ma in purus in nokoto na wain, ra a wain in tilingis, ma in nokoto na wain kai in laulau. <sup>38</sup> Din titior a matok na wain ut utiro un in matok na koto na wain. <sup>39</sup> Kataio ra in inum pas a turai na wain, in nem melet a matok na wain, in watungi kut lena, ‘A turaino ut i wakak.’”

## 6

*O Iesu i a Labino tagun a Bung na Sabat*

*(Mt 12:1-8; Mk 2:23-28)*

<sup>1</sup> Un ara Bung na Sabat, o Iesu i wan nanan epotor una kum kinobot na wit. Anun a kum nat na ususer det kumut pas a ramano kum turunu wit, det gisgis pasi ma det wani. <sup>2</sup> A ramano kum Parisi det iting lena, “Ilai sur mot pam a utna ri, ra ke tokodos elar nama warkurai tagun a Bung na Sabat?” <sup>3</sup> O Iesu i balu det lena, “Pepetlai, ka mot luki utmakai asau ra o Dewid i pami? Det nama taro ra det wan tomo det murak, <sup>4</sup> ra i ruk una rumu anun o God, i los pas a beret ra di sa pitar tari torom o God, i wani, ra i tabor det kai ra det wan tomo nami. A beret ra, a warkurai taguni, i lenri, a kum tene etabor torom o God kut det in nangon taguni, ma a taro ororos awu.” <sup>5</sup> Ma o Iesu i

watungi tandet lena, “A Nutun a Musano i a Labino tagun a Bung na Sabat.”

*O Iesu i ulangolango pas a musano ra a lamano i kong*

*(Mt 12:9-14; Mk 3:1-6)*

<sup>6</sup> Un ara Bung na Sabat bulung, o Iesu i ruk una rumu na lotu, ma i ususer a taro. Ara musano kura iai, a sot na lamano i kong. <sup>7</sup> A kum Parisi ma a kum tene ususer tagun a Warkurai det sisio sur tu utna det in takun o Iesu nami. Det tamtama wakak taru ut uni, ra in ulangolango pas a musano ra una Bung na Sabat, o awu. <sup>8</sup> Ma o Iesu i tasman a nuknukindet ra i watungi tan a musano ra a lamano i kong lena, “Un tur! Ra un nan sa numugu tan a taro rop.” I katuttur, ra i tur taru sa numugu tandet. <sup>9</sup> Ra o Iesu i len tandet lena, “An ting mot: Asau i tokodos sur din pami una Bung na Sabat? Din pam a wakak ino o a laulau ino? Din ulaun taio, o din banlaulau taio?” <sup>10</sup> Ma i nas pukpukus det rop, ra i inanos a musano lena, “Kodos a lamam.” I kodosi, ra a lamano i tokodos melet. <sup>11</sup> Ikut in balandet i sungun, ma det wasiso tomo sur tu ngas na utna det in pami un o Iesu.

*O Iesu i pilok pas a noino ma aru aposel*

*(Mt 10:1-4; Mk 3:13-19)*

<sup>12</sup> Ara bung, o Iesu i wan usapat una tangai sur in wararing. A bung na mirum rop ra, i wararing torom o God. <sup>13</sup> Ra i sa waspi, i kabo pas anun a taro na ususer toromi, ma i pilok pasi kut a noino ma aru tagun det, ra i urising det nama kum aposel. <sup>14</sup> Iri a kum risandet: O Saimon, i ra o Iesu i urisingi nam o Pita, dersino nam o Endru, o Jems, o Jon, o Pilip, o Batolomiu, <sup>15</sup> o Matiu, o Tomas, o Jems a nutun o Alpius, o Saimon ara tagun a taro Silot,\* <sup>16</sup> o Judas a nutun o Jems, ma o Judas Iskariot i ra numur i usobor tar o Iesu.

*O Iesu i ususer a taro ma i ulangolango det*

*(Mt 4:23-25)*

<sup>17</sup> Ra o Iesu tomo nama nun a taro na ususer det wan pirso tagisapat una tangai, i tur una elaro na nubual, tomo nam anun a kunur na taro na ususer. Ma a labino kunur na taro tagitiro una papor Judia ma tagisapat o Jerusalem ma tagun a kum tamon nago korot utasi milau o Tair ma o Saidon kai, <sup>18</sup> det wanpat sur det in longoro i, ma

\* 6:15: Silot i a risan a taro, ra det tur tomo, uni det nemi sur det in lakro ru a gapman Rom.

sur in ulangolango pas det gusun anundet a kum misait. Ma i lakro ru a kum laulau na nion gusun det rop ra a kum laulau na nion det banlaulau det. <sup>19</sup>Ra a taro rop, det nemi sur det in pam a pinin o Iesu, uni a dekkek i wan pirso gusuni, ma i ulangolango pas det rop.

*A gas ma a tupunuk  
(Mt 5:1-12)*

<sup>20</sup>O Iesu i tama anun a taro na ususer ra i watungi lena,

“Mot ra mot sibo, mot dan,  
uni anumot a matanitu anun o God!

<sup>21</sup>Mot ra mot murak uniri, mot dan,  
uni numur mot in masur.

Mot ra mot tangis uniri, mot dan,  
uni numur mot in nongon.

<sup>22</sup>Mot dan ra a taro det nget mot,  
o det pilok ru mot  
ma det watung laulau mot,  
ma det banlaulau a risamot,  
uni mot tagun a Nutun a Musano.

<sup>23</sup>“Una bung ra din pam a kum utna ri torom mot, mot in gas, mot in sirsirok nama gasgas, uni i labo sakit anumot a ikul sapat una langit. Uni a kum utna ri, a kum tumtubundet tagun numugu det sa pam tari torom a kum poropet.

<sup>24</sup>Ikut in laulau torom mot a kum tene gongon,  
uni mot sa rakon pas anumot a wakak ino.

<sup>25</sup>In laulau torom mot ra mot masur uniri,  
uni numur mot in murak.

In laulau torom mot ra mot nongon uniri,  
uni numur mot in tupunuk ma mot in tangis.

<sup>26</sup>In laulau torom mot ra a taro rop det watung ulabo pas mot,  
uni a kum tumtubundet tagun numugu det pami lenri torom a kum torotoro na poropet.

*A petutna na marmaris torom a kum ebar  
(Mt 5:38-48)*

<sup>27</sup>“An watungi tamot ra mot longoro iau, mot in nem anumot a kum ebar, ma mot in pam a wakak ino torom det ra det nget mot. <sup>28</sup>Mot in watung udan det ra det saring o God sur in banlaulau mot, ma mot in wararing un det ra det banlaulau mot. <sup>29</sup>Ra taio in pasor tar a papor wam, un pukus ara papor bulung toromi. Ra taio in ras pas anum a saket, un madek tari kai anum a siot tano. <sup>30</sup>Un tabor det rop ra det saring ui.

Ra taio in los pas tu utna gusun ui, gong u sasaring melet suri. <sup>31</sup>Asau ra mot nemi sur a taro det in pami torom mot, mot kai mot in ser pami torom det.

<sup>32</sup>“Ra mot nem det kut ra det nem mot, din watung ulabo pas mot pepetlai? Uni a kum tene sakino kai det nem etetalai det ut. <sup>33</sup>Ra mot in pam a wakak ino torom det ra det pam a wakak ino torom mot, din watung ulabo pas mot pepetlai? Uni a kum tene sakino kai det ser pami lenra. <sup>34</sup>Ra a taro det saring mot sur tu utna, ma mot pitari kut torom det, ra mot tasmani lena, det in balu i ut torom mot, din watung ulabo pas mot pepetlai? Uni a kum tene sakino kai det pitar tar a utna tan a kum tene sakino, ma det nuki lena det in balu i. <sup>35</sup>Ikut mot in nem anumot a kum ebar, ra mot in pam a wakak ino torom det. Ra a taro det nemi sur det in los munung tu utna gusun mot, mot in pitari kut, ma gong mot nemi sur det in balu i. Ra mot in pami lenra, anumot a ikul in labo sakit, ma mot a kum nutnutun o God a Labino Sakit, ra i ser maris det ra ka det ser watung wakak toromi, ma a kum tene sakino kai. <sup>36</sup>Mot in lason una marmaris, elar nama Tamamot a tene marmaris.

*Gong mot tamtama una magiran taio  
(Mt 7:1-5)*

<sup>37</sup>“Gong mot tamtama una magiran taio, sako o God in tamtama una magiramot. Gong mot kuro taio sur in los a warkurai na minabalu, sako o God in kuro mot ra mot in los a warkurai na minabalu. Mot in dumano ru a kum sakino petutna ra a taro det pami un mot, ma o God in unus ru anumot a kum sakino petutna. <sup>38</sup>Mot in etabor, ma o God in tabor mot. Ikut a etabor anun o God torom mot in labo doko, ma din sogori, ma in bukus melet, ma in tilingis. Uni asi na ngas na etabor ra mot pitari, i labo o i natino, i kut kai ra o God in pitar meleti torom mot.”

<sup>39</sup>O Iesu i watungi kai a wasiso elelar torom det lenri, “Tu pulu in ben lan taio kai ra i pulu? Pepetlai, der rop ka der in puku dorong un tin nutung? <sup>40</sup>A nat na ususer ke labo taun anun a tene ususer. Ikut o naro ra i sa urop pas anun a etowo, in elar kut nam anun a tene ususer.

<sup>41</sup>“Ilai ra u tama pasi kut a burbururup kura un in matan o tisim, ikut ko nuk pas a nuduwai pi kura ut un in matam? <sup>42</sup>Ra ko tama pas a nuduwai pi kura kut un in

matam, un watung petlani torom o tismim lena, 'Tising, an rakon ru a burbururup gusun in matam'? Ui a tene torotoro, un los mugu ru a nuduwai pi gusun in matam, ra un tamtama wakak, sur un rakon ru a burbururup gusun in matan o tismim.

*A wasiso elelar una arin ngas na wino duwai*

*(Mt 7:16-20; 12:33-35)*

<sup>43</sup> "In wakak na duwai ken wu lako laulau na wino, ma in laulau na duwai kai ken wu lako wakak na wino. <sup>44</sup> Din tama lele a kum duwai tagun a windet. Ka din git pas tin niwino fig tagun in kandas, ma in niwino wain tagun in suksuk. <sup>45</sup> A wakak na musano i ese anun a wakak na petutna tagun a wakak ino ra i kis una nun a nilaun, ma a laulau na musano kai, i ese anun a sakino petutna tagun a sakino ra i kis una nun a nilaun. Uni a wan a taro i watung puaso a petutna ra i bukus una nundet a nilaun.

*A wasiso elelar una aru ngas na tene pam rumu*

*(Mt 7:24-27)*

<sup>46</sup> "Ilai ra mot watung iau nama 'Labino, Labino,' ma ka mot pam asau ra a watungi tamot? <sup>47</sup> Osi ra i wan torom iau ma i longoro anung a kum wasiso, ma i muri, i elar nama musano ra an inanos mot nami. <sup>48</sup> I elar nama musano ra i pam tar a rumu. I kil dordorong a kum tung, ma i utur tar a kum pos ina rumu netes una wat. A lomom i wanpat, ma i sal tiro na rumu, ikut ke gunu lar pasi, uni di sa pam wakak tari. <sup>49</sup> Ikut osi ra in longoro anung a kum wasiso ma ke muri, i elar nama musano ra i utur tar anun a rumu netes kut una piso, ma ke pam mugu tar a kibina rumu. A lomom i sal taru uni, i toropo, ma i terege mut!"

## 7

*A nurnur anun ara mugumugu anun a kum tene inaim tagitong o Rom*

*(Mt 8:5-13)*

<sup>1</sup> Ra o Iesu i sa watung rop tar a kum wasiso ri torom a taro, i wanpat tiro o Kapernaum. <sup>2</sup> Ara mugumugu anun a kum tene inaim tagitong o Rom i kis tiro iai. Ara tagun anun a kum tultul i misait, milau mo sur in mat. A tultul ri, i labo umatan anun a mugumugu. <sup>3</sup> A mugumugu anun a kum tene inaim i longoro a wasiso un o Iesu, ra i tulu ru a ramano kum mugumugu

anun a taro Juda sur det in saringi, sur in nan toromi, ma in ulangolango pas anun a tultul. <sup>4</sup> Ra det wanpat torom o Iesu, det saring dekdeki lena, "A musano ra, a wakak na musano, i wakak ra un tarom toromi, <sup>5</sup> uni i maris dat a taro Juda, ma i kul tar anundat a rumu na lotu." <sup>6</sup> Ra o Iesu i wan tomo nam det.

Det sa milau a rumu, ra a mugumugu anun a kum tene inaim i tulu ru a ramano kum paspasano torom o Iesu nama wasiso lena, "Labino, gong a utikidis ui, uni ka tokodos sur un ruk una nung a rumu. <sup>7</sup> Ka nuki kai lena a tokodos sur an nan torom ui. Ikut, un watung tu wasiso kut, ra anung a tultul in langolango. <sup>8</sup> Uni iau a musano ra a ser tarom una warkurai anundet ra det labo tang, ma di pitar tar a warkurai kai tang sur an warkurai a taro na inaim. Ra an watungi tan taio lena, 'Un nan,' in nan kut. Ma torom taio kai lenri, 'Un nan urin,' in nan kut urin. Ma torom anung a tultul lena, 'Un pam a utna ri,' in pami kut."

<sup>9</sup> O Iesu i longoro anun a wasiso, ra i kisin doko, ma i tupukus torom a taro ra det muri, ra i watungi lena, "A watungi tamot lena, ka tama tar tu te Israel ra anun a nurnur i labo elar nama musano ri." <sup>10</sup> Ma det ra di tulu tar det, det millet melet sur a rumu, ra det tama i lena a tultul ra, i sa langolango melet.

### *O Iesu i ulaun pas a nutun a ula*

<sup>11</sup> Ke suanoi kut, ra o Iesu i wan utong una tamon di watungi nam o Nain, ma anun a kum nat na ususer ma a labino kunur na taro kai det wan tomo nami. <sup>12</sup> Ra i wanpat milau una matansako ina tamon, a taro Nain det los pirso ara minat, a barman, i ara sot kut a nutun ara ula. A susut na taro tagitong una tamon ra det wan tomo nama ula. <sup>13</sup> Ra a Labino i tama a ino ra, i marisi ma i watungi lena, "Gong mo u tangis." <sup>14</sup> I wan milau, ma i pam a lu ra di los a minat nami, ma a taro ra det los a minat det tur sikot. I watungi lena, "Barman, a watungi tam, un katuttur." <sup>15</sup> Ra a minat i katuttur ma i wasiso. Numur o Iesu i pitar melet tari torom o nano.

<sup>16</sup> A taro rop det kisin ma det ngara, ma det watung ulabo pas o God, ma det watungi lena, "A labino poropet i sa wanpat epotor tandat. O God i sa wanpat sur in warut dat, anun a taro." <sup>17</sup> Ra a wasiso ri un o

Iesu i wan sarara tong una papor Judia rop, ma a kum tamon milau kai.

*O Iesu ma o Jon a Tene Baptaiso  
(Mt 11:2-19)*

<sup>18</sup> A kum nat na ususer anun o Jon a Tene Baptaiso det inanosi una kum utna rop ri o Iesu i pami. O Jon i kabo pas aru tagun det, <sup>19</sup> ra i tulu ru der torom a Labino sur der in tingi lena, “Ui mo ra di wasiso mugu taru un ui lena, un nanpat, o met in kis langlang utmakai sur taio?”

<sup>20</sup> Ra der wanpat torom o Iesu, der watungi lena, “O Jon, a Tene Baptaiso i tulu ru mir torom ui, sur mir in ting ui lena, ‘Ui mo ra di wasiso mugu taru un ui lena, un nanpat, o met in kis langlang utmakai sur taio?’”

<sup>21</sup> Una du bung ut ra, o Iesu i ulangolango pas a susut gusun anundet a kum ngunungut ma a kum misait, ma i lakro ru a kum laulau na nion gusun det, ma i utamtama pas a susut na pulu. <sup>22</sup> Ma i balu der lena, “Mur in millet melet, ma mur in inanos o Jon una asau ri mur sa tama i, ma mur sa longoro tari: A kum pulu det sa tamtama, det ra a kikindet i mat det sa wan tokodos, a kum lepra det sa langolango, a kum kutkut det sa longoro, a kum minat det sa laun, ma di warawai nama Wakak na Wasiso torom a kum sibo na taro. <sup>23</sup> Osi ra i tama a kum utna ri a pami ma anun a nurnur ke puku, i sa dan.”

<sup>24</sup> Ra aru nat na ususer anun o Jon der wan, o Iesu i watungi torom a kunur na taro un o Jon lena, “U ra bung ra mot wan una nubual kalako taro uni torom o Jon, asau ra mot tamtama suri? Kutiro in nere ra i erere una wuwu? Awu. <sup>25</sup> Asau ra mot wan sur mot in tama i? A musano ra i emar nama kum wakak na malu? Awu. Tama i, det ra det ser emar nama kum wakak na malu, ma det dan nama kum wakak na utna, det ser kis una kum rumu na king. <sup>26</sup> Asau ra mot wan sur mot in tama i? A poropet? Ma! A watungi tamot, o Jon i labo sakit ut taun a kum poropet. <sup>27</sup> Di sa tumtumus taru uni, una Buk Tabu lena, “Tama i, iau an tulu ru anung a tene los wasiso sur in mugu tam, i ra in waninar anum a kisapi numugu tam.’

*Mal 3:1*

<sup>28</sup> A watungi tamot, o Jon i labo sakit taun a taro rop taginin upiso. Ikut osi ra i natino sakit una matanitu anun o God, i labo taun o Jon.”

<sup>29</sup> Ra a taro rop det longoro i, ma a kum tene los takis kai, det mulaot una tokodos na kisapi anun o God, uni det sa los pas a baptais anun o Jon. <sup>30</sup> Ikut a kum Parisi ma a kum tene ususer tagun a Warkurai det rosumur gusun a kisapi ra o God i pitari torom det, uni ka det los a baptais anun o Jon.

<sup>31</sup> Ma o Iesu i watungi lena, “An elaro a taro tagun uniri nama sau? Det elar nama sau? <sup>32</sup> Det elar nama kum nat liklik ra det kis una balano tamon ma det kakabo torom det etetalai lena,

‘Met wup tual,

ikut ka mot lagori,

ma met kele a kelekele na tupunuk,

ikut ka mot tangis.’

<sup>33</sup> O Jon a Tene Baptaiso i wanpat, ke wan tu wakak na utna ma ke inum a wain, ra mot watungi uni lena, ‘A laulau na nion kura uni.’ <sup>34</sup> A Nutun a Musano i wanpat, i wangon ma i inum, ra mot watungi uni lena, ‘Tama i, a musano ri a tene inangon ma a tene ininum, a pasan a kum tene los takis, ma a kum tene sakino.’ <sup>35</sup> Ikut a taro rop ra det mur a mananos anun o God, det upuaso i lena, anun a mananos i a mananos mulus.”

*Ara ino i lingis a polo sangsangnain una ru kikin o Iesu*

<sup>36</sup> Ara Parisi i ben pas o Iesu sur det in nangon tomo. O Iesu i ruk una rumu anun a Parisi ra, ma i kis sur der in nangon. <sup>37</sup> Ma ara ino tagitiro una tamon ra, a tene sakino, ra i tasman pasi lena o Iesu kura i wangon una rumu anun a Parisi, i ruk nama polo sangsangnain ra kura un in nokoto ra di pami nama wat. <sup>38</sup> Ma i tur taru numur tan o Iesu, nisan aru kikino. I tangis, ra a lurlur na matano i puku una ru kikin o Iesu, ma i us der nama iwu na lorino, i gom der, ma i lingis a polo sangsangnain un der.

<sup>39</sup> A Parisi ra i ben pas o Iesu i tama a utna ri, i nuki lena, “Ra a musano ri a poropet mulus, in tasman a ino ri ra i pam aru kikino, ma in tasmani kai a magirano, lena i a sakino ino.” <sup>40</sup> O Iesu i watungi tano lena, “Saimon, a nem na watung ara utna tam.” Ma i balu i lena, “Tene Ususer, un watungi kut.”

<sup>41</sup> O Iesu i watungi tano lena, “Aru musano der dinau pas a mani gusun ara musano, ara pasander i dinau pas a limo na mar na mani ma ara kai a limo na noino mani. <sup>42</sup> Ka der balu lar pas a dinau, uni katu

mani tander. Ra a musano ra, i watungi tander lena, 'Gong mukut mur balu anumur a dinau.' Osi na pasander anum a marmaris in labo sakit torom o naro ra i pitar tar a mani tander?" <sup>43</sup> O Saimon i balu i lena, "Kutiro i ra i dinau pas a labino mani sakit gusuni." O Iesu i watungi tan o Saimon lena, "I tokodos anum a minabalu."

<sup>44</sup> O Iesu i iger unago numur torom a ino, ma i watungi tan o Saimon lena, "Tama a ino ri. Ra a ruk una num a rumu ko pitar tar a danim sur din gos aru kiking nami. Iikut, a ino ri, i gos aru kiking nama lurlur na matano, ma i us der nama iwu na lorino. <sup>45</sup> Ko ukinalong anum a gasgas nama egom torom iau, ikut a ino ri ke mana ugom aru kiking turpasi ut ra a wanpat nin. <sup>46</sup> Ko talus in loring nami lako wel, ikut a ino ri i lingis tar a polo sangsangnain una ru kiking. <sup>47</sup> A watungi tam lena anum a labino marmaris torom iau i ese i lena o God i sa unus ru anum a susut na sakino petutna. Iikut osi ra o God i unus ru i kut anum a nat na sakino petutna, anum a marmaris kai in natino."

<sup>48</sup> Ra o Iesu i watungi tan a ino ra lena, "Di sa unus ru anum a kum sakino petutna."

<sup>49</sup> A taro ra det kis tomo una inangon, det wasiso torom det etalai lena, "Osi na ngas na musano ri i pet lar pasi sur in unus ru a kum sakino petutna?" <sup>50</sup> O Iesu i watungi tan a ino ra lena, "Una num a nurnur ut, di sa ulaun pas ui. Un nan nama malmal."

## 8

*A wardain ra det wan tomo nam o Iesu*

<sup>1</sup> Numur o Iesu i wan tuptupukus una kum lamlabino tamon ma a kum natnat na tamon rop, ma i warawai nama Wakak na Wasiso una matanitu anum o God. I wan tomo nama nun a noino ma aru nat na ususer, <sup>2</sup> ma a kum wardain kai, ra i sa lakro ru tar a kum laulau na nion gusun det, ma i sa ulangalango pas det gusun a kum misait. Iri a kum risandet: O Maria, ara risano kai o Magdalen, i ra a wonom mawit na laulau na nion det pirso pas gusuni, <sup>3</sup> ma o Joana a ino anum o Kusa, i a mugumugu anum a kum tultul anum o Erod, ma o Susana, ma a susut kai. A wardain ri det warut o Iesu ma anum a kum nat na ususer, nam anundet a kum ululeng ut.

*A wasiso elelar una tene minarut*  
(Mt 13:1-17; Mk 4:1-12)

<sup>4</sup> Ra a labino kunur na taro tagun a kum tamon det wanpat tomo torom o Iesu, i watung ara wasiso elelar torom det lena, <sup>5</sup> "A tene minarut i wan sur in sapro a kum pitino wit. Ra i sapro nanan a kum pitino wit, a ramano det puku una kisapi, ra a taro det papas netes uni, ma a kum piko kai det wan ru i. <sup>6</sup> A ramano kai det puku una nubual na watat. Det lubung pat, ra det main melet kut, uni a piso i sengesenge doko. <sup>7</sup> A ramano kum pitino wit det puku epotor una kum kuikui, ra a kum kuikui det lubung tomo nam det, ma det rau bat pas det. <sup>8</sup> A ramano kum pitino det puku una wakak na piso. Det lubung pat ra det wu. Tektekene i wu ara mar na wino."

Ra i sa watung tar a kum wasiso ri tandet, i watungi lena, "Osi ra arin talngano kura, i wakak sur in longoro nami."

<sup>9</sup> Anun a kum nat na ususer det tingi sur a kukurai na wasiso elelar. <sup>10</sup> Ma i watungi tandet lena, "O God i sa pitar tar a mananos tamot, sur mot in talapor una kum wasiso na pidik una nun a matanitu. Iikut torom a taro gisen a ususer det nama kum wasiso elelar, sur  
'det in tamtama ma det in tamtama, ikut ka  
det in tama lele i,  
det in longoro ma det in longoro, ikut  
ka det in tasmani.' Aisaia 6:9

*O Iesu i palos a kukurain a wasiso elelar una tene minarut*  
(Mt 13:18-23; Mk 4:13-20)

<sup>11</sup> "A kukurai na wasiso elelar ri i lenri, a pitino wit i elar nama wasiso anum o God. <sup>12</sup> A kum pitino wit ra det puku una kisapi, det elar nam ara taro ra det longoro a wasiso, ra o Satan i wanpat, ma i rakon ru a wasiso gusun in balandet, sur gong det nurnur, ma gong di ulaun det. <sup>13</sup> Ra a kum pitino ra det puku una nubual na watat, det elar nam ara taro ra det longoro a wasiso, ra det pam ukai i nama gasgas. Iikut kalako wakakor indet, anundet a nurnur ke tur suanoi. Ra a kum larlar i wanpat torom det, det puku. <sup>14</sup> A kum pitino ra det puku epotor una kum kuikui, det elar nam ara taro ra det longoro a wasiso, ikut a labino nuknuk una kinkinis anundet, a kum ululeng, ma a gasgas tagun a nilaun nin upiso, det rau bat a wasiso anum o God, ra ka det wu lako windet. <sup>15</sup> Iikut a kum pitino ra det puku una wakak na piso, det elar nam ara taro ra det longoro a wasiso, ma a balandet i wakak ma

i tokodos, ra det pam ukai dekdek a wasiso ra det muri tuk det wu a windet.

*A wasiso elelar una lam  
(Mk 4:21-25)*

<sup>16</sup> “Katutaio in ungangon tar tu lam ma in wop bat tari nama paket, o in ubek tari kai nago utuntudu ina kabulu. Awu! In ubek tari ut netes una nuna turtur, sur det ra det ruk det in tama a talapor. <sup>17</sup> Uni a kum utna rop ra i kis eno, numur in nanpat pupuaso. Ma a kum utna rop ra in parau, numur din tasmani ma in kis taltalapor. <sup>18</sup> Mot in nuknuk wakak una wasiso ra mot longoro i. Osi ra i pam ukai a mananos una wasiso anun o God, din tabor meleti nama labino. Ma osi ra ke pam ukai tu mananos una wasiso anun o God, din rakon ru i utkai asau lik ra i nuki lena i pam ukai i.”

*O nan o Iesu ma a kum tistisino  
(Mt 12:46-50; Mk 3:31-35)*

<sup>19</sup> O nan o Iesu ma a kum tistisino det wanpat sur det in tama i, ikut ka det pet lar pasi, uni a kunur na taro det tur talilis bat pasi. <sup>20</sup> Ra di inanos o Iesu lena, “O nam ma a kum tistisim kunago det tur nago upiso. Det nem na tama ui.” <sup>21</sup> Ra i balu det lena, “Det ra det longoro a wasiso anun o God ma det muri, det ra o nang ma a kum tistising.”

*O Iesu i turbat a wuwu ma a top  
(Mt 8:23-27; Mk 4:35-41)*

<sup>22</sup> Ara bung o Iesu tomo nama nun a kum nat na ususer, det kas una pot, ra i watungi tandet lena, “Dat nan utong una ara papor tasi.” Ra det wan. <sup>23</sup> Ra det kalabor nanan nama sel, o Iesu i inep dumun. A dekdek na wuwu i ragoti una du tasi, ra a top i walwalkas, ma milau det in iru. <sup>24</sup> A kum nat na ususer det wan toromi, det wangun pasi, ma det inanos i lena, “Tene Ususer, Tene Ususer, dat na iru!” I katutur, i kankan ana wuwu ma a dekdek na top, ma der mana, ra i mililo rop. <sup>25</sup> Ma i watungi tan a kum nat na ususer lena, “Awai i anumot a nurnur?” Det ngara, ma det kisin, det ting etetalai det lena, “Osi na ngas na musano mulus ri? I wasiso torom a wuwu ma a top, ra der mur anun a wasiso!”

*O Iesu i lakro ru a kum laulau na nion gusun  
ara musano*

*(Mt 8:28-34; Mk 5:1-20)*

<sup>26</sup> O Iesu ma a kum nat na ususer det sot una papor anun a taro Gerasa, tiro un ara papor du tasi tagun a papor Galili. <sup>27</sup> Ra o Iesu i sirok gusun a pot, ara musano tagun

a tamon ra i wan barato i. A kum laulau na nion kura uni. I sa suanoi, ma ke ser pipis, ma ke kis kai un tu rumu, i ser kis kut una kum kulam na minat. <sup>28</sup> Ra i tama pas o Iesu, i kukukuk, ma i puku pirso taru nisan aru kikino, ma i kukukuk nam in labino walngano lena, “Iesu, a Nutun o God a Labino Sakit, asau ra u nem na pami un iau? A saring ui, gong u ukadik iau.” <sup>29</sup> I wasiso lenri, uni o Iesu i sa wasiso dekdek taru torom a laulau na nion sur in pirso gusun a musano ri. A susut na dino a laulau na nion i solsolongi. A taro ra det ser tamtamabati, det ser ker ukai aru lamano ma aru kikino nama sen, ikut i ser rubut det kut, ma a laulau na nion i ser ungongos pasi usapat una kum nubual kalako taro uni.

<sup>30</sup> O Iesu i tingi lena, “A risam osi?” Ma i balu i lena, “A risang A Kabo Liur,” uni a susut na laulau na nion det sa ruk taru uni. <sup>31</sup> Ma det saring o Iesu sur gong i tulu ruk tar det un in labino tung ra katu tuktukino.

<sup>32</sup> A kabo liur na boro kura det wangon tiro una tangai. Ra a kum laulau na nion det saring o Iesu sur det in ruk taru una kum boro. Ra i mulaot ru det. <sup>33</sup> Ma a kum laulau na nion det pirso gusun a musano ra, ma det ruk taru una kum boro. A kum boro det kalabor pirso una palis sur a du tasi, ra det kongo rop.

<sup>34</sup> A taro ra det ser tabor a kabo liur na boro, det tama a utna ri, det kalabor ma det inanos tiro utamon ma tiro utkai una kum natnat na tamon. <sup>35</sup> Ra a taro det wan sur det in tama asau ra i wanpat. Det wanpat torom o Iesu, det tama a musano ra a kabo liur na laulau na nion det pirso pas gusuni. Kura mukut i kis taru nisan aru kikin o Iesu, i sa pipis pas ma a nuknukino i sa talapor melet. A taro ra det ngara doko. <sup>36</sup> Det ra det sa tama tari, det inanos a taro lena o Iesu i sa lakro ru a kum laulau na nion gusun a musano ra. <sup>37</sup> Ma a taro rop tagitiro una papor anun a kum Gerasa det saring o Iesu sur in nan gisen gusun det, uni det ngara doko. Ra o Iesu i kas melet una pot ma i wan.

<sup>38</sup> A musano ra a kum laulau na nion det sa pirso taru gusuni, i saring o Iesu sur in nan tomo nami. Ikut o Iesu i tulu ru i kut lena, <sup>39</sup> “Un millet melet sur anum a rumu, ma un wasiso una labino utna ra o God i sa pam tari un ui.” Ra i millet melet, i wasiso una tamon ra, una labino utna ra o Iesu i sa pam tari uni.

*O Iesu i ulaun pas a nutun o Jairus ma i ulangolango pas ara ino*

*(Mt 9:18-26; Mk 5:21-43)*

<sup>40</sup> O Iesu i milet melet, a kunur na taro det gas pasi, uni det rop det kis langlang ut suri. <sup>41</sup> Ara musano, a risano o Jairus, a mugumugu tagun a rumu na lotu, i wanpat ra i kis butkeke sa numugu tan o Iesu. I saring dekdeki sur in nan usa una nun a rumu, <sup>42</sup> uni ara nutunulik kut, a ino, anun a kilalo a noino ma aru, i sa ling na mat.

Ra o Iesu i wan, a labino kunur na taro det talilis bat pasi. <sup>43</sup> Ara ino kura i misait nama gap elar nama noino ma aru kilalo, [ma i sa urop tar anun a mani una kum dokta], ikut kataio i ulangolango lar pasi. <sup>44</sup> I wan numur tan o Iesu, ma i tulan tar a sinisir na saket anunu, ma uniutra a gap i tuk. <sup>45</sup> Ma o Iesu i iting lena, "Osi ra i tulan iau?" Ra det rop det ipul, o Pita i watungi lena, "Labino, ko tama a labino kunur na taro ri det talilis bat pas ui?" <sup>46</sup> Ikut o Iesu i watungi lena, "Ara pasandet i sa tulan tar iau, uni a tasmani lena, a dekdek i sa wan gusun iau." <sup>47</sup> A ino i tasmani lena di sa sio pasi, ra i neneder pat, ma i puku sa numugu tan o Iesu. Umatan a kunur na taro rop, i inanos o Iesu una kibino ra i tulan tari, ma i inanosi kai lena uniutra i langolango. <sup>48</sup> Ma o Iesu i watungi tano lena, "Nutunglik, anum a nurnur i sa ulangolango pas ui. Un nan nama malmal."

<sup>49</sup> Ra o Iesu i wasiso utmakai, ara i wan tagitiro una rumu anun o Jairus, a mugumugu tagun a rumu na lotu, ra i watungi tan o Jairus lena, "O nutumlik i sa mat. Gong mo u ubalon a tene ususer." <sup>50</sup> Ra o Iesu i longoro a wasiso ra, i watungi tan o Jairus lena, "Gong u ngara. Un nurnur kut, ra din ulaun melet pasi."

<sup>51</sup> Ra i wanpat una rumu, ke madek taio sur in ruk tomo nami. I ben pasi kut o Pita, o Jon ma o Jems, ma a tamana ino lik ma o nano kai. <sup>52</sup> A taro rop det kukukuk ma det domos, ra o Iesu i watungi tandet lena, "Gong mot domos. A ino lik ri ausur i mat, i inep dumun kut." <sup>53</sup> Ikut det urongon kut un o Iesu, uni det tasmani lena, i sa mat. <sup>54</sup> Ra o Iesu i pam a laman a ino lik, ra i inanosi lena, "Nutunglik, un katatur." <sup>55</sup> Ra a niono i milet toromi, uniutra i katatur. Ra o Iesu i inanos det sur det in tabor a ino lik ra, nam lako utna na inangon. <sup>56</sup> O tamano ma

o nano der kisin doko, ikut o Iesu i turbat der sur gong der inanos tar taio un asau ra i wanpat.

## 9

*O Iesu i tulu ru a noino ma aru nat na ususer*

*(Mt 10:5-15; Mk 6:7-13)*

<sup>1</sup> O Iesu i kabo tomo pas a noino ma aru nat na ususer, ra i pitar a dekdek ma a warkurai tandet sur det in lakro ru a kum laulau na nion rop, ma sur det in ulangolango pas a taro gusun a kum misait. <sup>2</sup> Ma i tulu ru det sur det in warawai una matanitu anun o God, ma det in ulangolango pas a kum misait. <sup>3</sup> Ma i watungi tandet lena, "Gong mot los tu utna una numot a inawan, gong tin nubuku, gong tu rat, gong lako utna na inangon, gong lako mani ma gong kai tin namalu na kelkeles. <sup>4</sup> Ra mot in nanpat tiro un tu rumu, mot in kis ut tiro iai tuk una bung ra mot in nan gusun a tamon ra. <sup>5</sup> Ra lako taro ka det in gas pas mot, ra mot in nan gusun anundet a tamon, mot in tang ru a kubus gusun a kikumot, sur a ukinalong na utumarong torom det.\*"

<sup>6</sup> A kum nat na ususer det wan tup-tupukus una kum tamon, det warawai nama Wakak na Wasiso, ma det ulangolango pas a taro una kum tamon rop.

*A nuknukin o Erod i talara un o Iesu*  
*(Mt 14:1-2; Mk 6:14-16)*

<sup>7</sup> O Erod a mugumugu tagun a gapman i longoro a kum utna ri i wanpat, ra i talara a nuknukino uni, uni ara taro det watungi lena o Jon i sa laun melet gusun a minat. <sup>8</sup> Ma ara taro kai det watungi lena o Elaija i sa wanpat. Ara taro kai det watungi lena ara tagun a kum poropet tagun numugu i sa laun melet. <sup>9</sup> Ikut o Erod i watungi lena, "A sa tau kutus ru tar in lorin o Jon, ma iri, osi na musano melet ri, a longoro a kum utna ri uni?" Ra i nem doko i sur in tama o Iesu.

*O Iesu i tabor a limo na arip na musano*  
*(Mt 14:13-21; Mk 6:30-44; Jn 6:1-14)*

<sup>10</sup> A kum aposel det milet melet, ra det inanos o Iesu una kum utna ra det sa pam tari. I ben pas det kut, ra det wan gisen sur a tamon a risano o Betsaida. <sup>11</sup> Ikut, a kunur na taro det longoro i, ra det muri. I gas pas det, ra i wasiso torom det una matanitu

\* 9:5: A ukinalong ra, a kum Parisi det ser muri, ra det wan gusun a nubual anun a taro ra ausur a taro Juda. Iri a utumarong torom det ra det rosumur gusun a wasiso anun o God.

anun o God, ma i ulangolango pas det ra det misait.

<sup>12</sup> Ra i sa lirop, a noino ma aru nat na ususer det wan torom o Iesu, ra det watungi tano lena, "Un tulu ru a kunur na taro sur det in nan sur a kum lamlabino tamon milau, ma a kum natnat na tamon kai, sur det in nangan ma det in inep iai, uni a nubual ri i bakbak gusun a kum tamon." <sup>13</sup> O Iesu i balu det lena, "Mot ut mot in tabor det." Ra det balu i lena, "A limanin beret sot kut, ma arin kiripo kuri met losi. Kutiro u nemi sur met in kul pas lako utna sur in elar nama kunur na taro rop ri?" <sup>14</sup> A kunur na taro ra, a nilulukin a kum musano kut i elar nama limo na arip.

I watungi tana nun a kum nat na ususer lena, "Mot in tulu det sur det in kis tomo a limlimo na noino det." <sup>15</sup> Ra a kum nat na ususer det pami lenutra, ma a taro det kis rop tiro u piso. <sup>16</sup> O Iesu i los pas a limanin beret ma aru kiripo, i tamtama usapat una langit, i watung wakak pas torom o God uni, i tibiki ra i pitari tana kum nat na ususer, sur det in tibo a taro nami. <sup>17</sup> Det rop det wangon ma det masur. Numur det song bukus pas a noino ma aru rat nama utna ra det wangon kopos pas uni.

*O Pita i wasiso talapor un o Iesu*  
(Mt 16:13-19; Mk 8:27-29)

<sup>18</sup> Ara bung ra o Iesu sot kut i wararing, a kum nat na ususer det kis milau tari, ra i ting det lena, "A taro det watung iau nam osi?" <sup>19</sup> Det balu i lena, "Ara taro det watung ui o Jon a Tene Baptaiso. Ara taro det watung ui o Elaija, ma ara taro kai det watung ui, ara tagun a kum poropet tagun numugu, ra i sa laun melet." <sup>20</sup> Ra i ting det lena, "Ikut mot, mot watung iau nam osi?" Ra o Pita i balu i lena, "Ui a Karisito ra o God i tulu ru ui." <sup>21</sup> Ra i turbat dekdek det sur gong det inanos tar taio nami.

*O Iesu i wasiso mugu una nun a minat*  
(Mt 16:20-28; Mk 8:30-9:1)

<sup>22</sup> O Iesu i watungi lena, "A Nutun a Musano in taramo a susut na mamaut. A kum mugumugu, a kum lamlabino tene etabor torom o God, ma a kum tene ususer tagun a Warkurai det in rosumur gusuni ma din um doko i. Ra a tulu bung in rop, in katutur melet."

<sup>23</sup> Ra i watungi tandet rop lena, "Ra taio i nemi sur in mur iau, gong i mur a nuknukino. In los pas anun in nanai kutus

una kum bungbung rop ma in mur iau.

<sup>24</sup> Uni osi ra i maris bat anun a nilaun in iru, ikut osi ra in iru uni i mur iau, in laun. <sup>25</sup> Osi ra in utur ukai a kum ututna rop taginin una rakrakon bual, ma in banlaulau anun a nilaun uni, ma in iru tukum, in wakak pepetlai toromi? <sup>26</sup> Osi ra in maimai un iau ma una nung a kum wasiso, a Nutun a Musano kai in maimai uni, ra in nanpat nama nun a minamar, ma a minamar anun o Tamano ma anun a kum ensel anun o God. <sup>27</sup> A inanos mot nama lingmulus, lako taro tagun mot ri mot tur nin, ka mot in mat utmakai, ra mot in tama a matanitu anun o God."

*A pinin o Iesu i senene*  
(Mt 17:1-8; Mk 9:2-8)

<sup>28</sup> Ra i sa tiwal na bung bat tar a wasiso ri, o Iesu i ben pas o Pita, o Jon ma o Jems, ma det wan toto usapat una tangai sur det in wararing. <sup>29</sup> I wararing, ra in masarino i tamtama senene, ma anun a kum malu kai i kabang doko ma i pilpil. <sup>30</sup> Ma i wasiso tomo nam aru musano, o Moses ma o Elaija. <sup>31</sup> Der wanpat nama minamar, ma detul wasiso una minat anun o Iesu, ra in etoromi sapat o Jerusalem, sur in pam sot pas a nemnem anun o God. <sup>32</sup> O Pita detul, detul inep dumun. Ra detul tuangun pat, detul tama a minamar anun o Iesu, ma aru musano kai ra der tur tomo nami. <sup>33</sup> Aru musano der nem na wan mo gusun o Iesu, ra o Pita i watungi tano lena, "Tene Ususer, i wakak ra dat in kis nin. Metul in pam lako tulu turturup, ara anumi, ara anun o Moses, ma ara anun o Elaija". Ikut o Pita ke tasman asau ra i watungi.

<sup>34</sup> Ra i wasiso utmakai, a du bakut i wanpat ma i pulus bat pas det, ra detul ngara ra a bakut i pulus bat det. <sup>35</sup> Ma in nalngan ara tagisapat una bakut i watungi lena, "Iri a Nutunglik, ra a sa pilok pasi. Mot in longoro i." <sup>36</sup> Ra i wasiso rop pas, o Iesu sot mukut kura i. Ma ka detul wasiso uni. Ma una kum bung ra, ka detul inanos tar taio una kum utna ra detul sa tama tari.

*O Iesu i lakro ru a laulau na nion gusun ara natlik*  
(Mt 17:14-18; Mk 9:14-27)

<sup>37</sup> Una bung numur, o Iesu ma a tulu nat na ususer det wan piro tagisapat una tangai, ma a labino kunur na taro det etorom nam o Iesu. <sup>38</sup> Ra ara musano tagun det i kakabo lena, "Tene Ususer, a saring ui sur

un tama a nutunglik a nat musano, i ara sot kut. <sup>39</sup> A laulau na nion i ser solsolongi, ma a nat i ser kisin ma i kukukuk. A laulau na nion i ser gunu dekdeki, ma a wano i ser busu. A laulau na nion ke wan gusuni, ma i unguntung laulau a pinino. <sup>40</sup> A saring anum a kum nat na ususer sur det in lakro ru i, ikut ka det pet lar pasi.”

<sup>41</sup> O Iesu i balu i lena, “Mot a taro tagun uniri, ka mot nurnur ma mot a kum tene sakino. A sa kis suano i tomo nam mot. Nangisin mo mot in nurnur? Un ben a nutumlik urin.”

<sup>42</sup> Ra a nat i wan nanan utmakai torom o Iesu, a laulau na nion i woro piso tari una upiso ma i gunu dekdeki. O Iesu i wasiso dekdek torom a laulau na nion ra i lakro ru i, ra a nat i langolango melet. Numur i pitar melet tari torom o tamano. <sup>43</sup> Ma det rop det kisin una dekdekin o God.

*O Iesu i wasiso melet una nun a minat  
(Mt 17:22-23; Mk 9:30-32)*

Ra det kisin utmakai una kum utna o Iesu i sa pam tari, i watungi tan anun a kum nat na ususer lena, “Mot in longoro wakak a wasiso ri: Din pitar a Nutun a Musano ulaman a taro.” <sup>45</sup> Ikut ka det talapor una kukurai na wasiso ri. Di munu i kut gusun det, sur gong det talapor uni. Ma det ngara sur det in ting o Iesu uni.

*Osi ra i labo sakit  
(Mt 18:1-5; Mk 9:33-37)*

<sup>46</sup> A kum nat na ususer det engaras epotor tandet sur osi tagun det ra in labo taun det. <sup>47</sup> O Iesu i sa tasman a nuknukindet, i los pas ara natlik ma i utur tari nisano. <sup>48</sup> Ma i watungi tandet lena, “Osi ra in gas pas a natlik ri una risang, i gas pas iau ut. Ma osi ra in gas pas iau, i gas pas o naro ra i tulu ru iau urin. Uni i ra i natino tamot rop, i ut ra i labo sakit.”

*Osi ra ke turbat mot i warut mot  
(Mk 9:38-40)*

<sup>49</sup> O Jon i watungi tan o Iesu lena, “Tene Ususer, met tama ara musano i lakro ru a kum laulau na nion nama risam, ra met lari sur met in turbati, uni i ausur tagun dat.” <sup>50</sup> O Iesu i balu i lena, “Gong mot turbati, uni osi ra ke turbat mot, i warut mot.”

*A taro Samaria ka det nem o Iesu*

† 9:53: A kum te Samaria det ser lotu torom o God una nundet a ruma na etabor sapat una Tangai Gerasim. Ikut o Iesu i wan usapat o Jerusalem sur in lotu.

<sup>51</sup> Ra i sa milau a du bung sur din los pas o Iesu usapat una langit, a nuknukino i dekdek sur in nan usapat o Jerusalem, ma i turpas a inawan. <sup>52</sup> I tulu ru ara taro, sur det in mugu tano. Det wanpat un ara tamon una papor Samaria, sur det in waninar sur o Iesu. <sup>53</sup> Ikut a kum te Samaria ka det nemi sur in ruk una nundet a tamon, uni in nan ut usapat o Jerusalem.† <sup>54</sup> Ra anun aru nat na ususer, o Jems ma o Jon der tama a petutna ri, der iting lena, “Labino, u nemi sur mir in saring o God sur in pitar ru a sungun sur in nan rop ru det?” <sup>55</sup> O Iesu i iger tupukus, ma i turbat der. <sup>56</sup> Ra o Iesu tomo nama nun a kum nat na ususer det wan sur ara tamon gisen.

*Det ra det nem na mur o Iesu  
(Mt 8:19-22)*

<sup>57</sup> Ra o Iesu ma anun a kum nat na ususer det wan nanan una kisapi, ara musano i watungi tano lena, “An mur ui una kum nubual rop ra un nan iai.” <sup>58</sup> Ra o Iesu i watungi tano lena, “A kum lomlom na pap anundet a kum tung ut, ma a kum piko kai anundet a kum pios ut, ikut a Nutun a Musano katu rumu na ininep.” <sup>59</sup> I watungi tan ara musano bulung lena, “Un mur iau.” Ikut i balu i lena, “Labino, un mulaot ru iau munung sur an nan, an por ru tar o tita.” <sup>60</sup> Ikut o Iesu i watungi tano, “Un madek ru a kum minat det in por anundet a kum minat. Ikut ui, un nan ma un warawai nama matanitu anun o God.” <sup>61</sup> Ara melet i inanos o Iesu lena, “Labino, an mur ui, ikut un mulaot ru iau munung sur an nan, ma an wasiso na itula taru munung torom det una nung a rumu.” <sup>62</sup> O Iesu i watungi tano lena, “Osi ra in turpas a pinapam na kilkil piso, ma i iger unago numur, ke to pasi a pinapam una matanitu anun o God.”

## 10

*O Iesu i tulu ru a wonom mawit na noino  
ma aru musano*

<sup>1</sup> Numur a Labino i pilok pasi bulung a wonom mawit na noino ma aru musano kai, ma i tulu ru det aruru sur det in mugu tano una kum labino tamon, ma una kum tamon liklik, ra numur in nan iai. <sup>2</sup> Ra i watungi tandet lena, “A kinobot i sa makus, ma i sa labo doko, ikut kalako susut na kum tene pasong. Mot in saring a Labino, i ra a taman

a kinobot, sur in tulu ru a kum tene pasong sur ana kinobot. <sup>3</sup> Mot in nan! A tulu ru mot elar nama kum sipsip epotor tan a kum ngalngalia na pap. <sup>4</sup> Gong mot los tu paus na umubek mani, gong tu rat, ma gong tu su. Gong kai mot wasiso taio ra mot etoromi una kisapi.

<sup>5</sup> “Ra mot in nanpat tiro un tu rumu, mot in inanos mugu det lena, ‘A malmal torom mot.’ <sup>6</sup> Ra tu tene malmal in kis tiro iai, anumot a malmal in kis uni. Ra awu, anumot a malmal in milet melet torom mot. <sup>7</sup> Mot in kis ut tiro iai una rumu ra, mot in nangan ma mot in inum una utna ra di tabor mot nami, uni i tokodos sur din tabor a tene pinapam. Gong mot inep karkarai.

<sup>8</sup> Ra mot in nanpat un tu tamon, ma din ben ruk mot, mot in nan a utna ra di tabor mot nami. <sup>9</sup> Mot in ulangolango a kum misait tiro iai, ma mot in inanos tar a taro lena, ‘A matanitu anun o God i sa milau nisamot!’ <sup>10</sup> Ra mot in nanpat un tu tamon, ra ka di ben ruk mot, mot in tur kut una kisapi ma mot in watungi lena, <sup>11</sup> ‘A kubus tagun anumot a tamon, ra kuri una kum kikimet, met tang melet ru i sur a utumarong torom mot. Ikut mot in tasmani lena, a matanitu anun o God i sa milau.’ <sup>12</sup> A watungi tamot, una bung na warkurai, a warkurai torom o Sodom in dekdek, ikut torom a tamon ra, in laulau doko.”

*A warkurai na minabalu torom det ra ka det nukpukus*

(Mt 11:20-24)

<sup>13</sup> “In laulau torom mot a taro Korasin, ma in laulau kai torom mot a taro Betsaida. Ra gunuk di sa pam tar a kum utna na ukisin ri torom a taro Tair ma a taro Saidon, elar nami ra a sa pam tari torom mot, kanapi det in nukpukus lakit ma det in tobo, det in emar nama kum malu na tupunuk ma det in talus a pinpinindet nama kubus na sungun. Ikut mot, ka mot nukpukus. <sup>14</sup> A warkurai torom mot a taro Korasin ma a taro Betsaida, in laulau doko taun a warkurai torom a taro Tair ma a taro Saidon. <sup>15</sup> Ma mot kai a taro Kapernaum, pepetlai, mot nuki lena din ulabo pas mot usapat netes? Awu, din woro pirso ru mot kut una labino sungun.

<sup>16</sup> “Osi ra in longoro mot, i longoro iau ut. Ma osi ra in rosumur gusun mot, i rosumur gusun iau utkai. Ma osi ra i rosumur gusun iau, i rosumur utkai gusun o naro ra i tulu ru iau urin.”

*A wonom mawit na noino ma aru det milet melet*

<sup>17</sup> A wonom mawit na noino ma aru det, det milet melet nama gasgas ma det watungi lena, “Labino, ra met lakro ru a kum laulau na nion nama risam, det tarom kut.” <sup>18</sup> O Iesu i watungi tandet lena, “A tama o Satan i puku tagisapat una langit elar nam in nememe. <sup>19</sup> Tama i, a sa pitar tar a dekdek tamot sur mot in pas watwat a kum sui ma a kum bukalo kai, ma sur mot in winim pas a dekdekin a ebar, ma katu utna in banlaulau mot. <sup>20</sup> Ikut, gong mot gas, uni ra a kum laulau na nion det mur a numot a wasiso. Mot in gas, uni di sa tumus tar a risamot sapat una langit.”

*O Iesu i gas*

(Mt 11:25-27; 13:16-17)

<sup>21</sup> Una du bung ra, o Iesu i bukus nama gasgas tan a Tokodos na Nion ma i watungi lena, “Tita, ui a Labino tagun a langit ma a rakrakon bual rop. A watung ulabo pas ui, uni u munu a kum utna ri tan a kum tene mananos ma det ra det tastasman, ma u upuaso i kut, torom det ra det elar nama kum nat liklik. A lingmulus, Tita, uni anum a nemmem i lenutra.”

<sup>22</sup> “O Tita i sa pitar tar a kum utna rop torom iau. Katutaio i tasman o Nutunu, o Tamano kut i tasmani, ma kataio kai i tasman o Tamano, o Nutunu kut i tasmani, ma det kai ra o Nutunu i nemi sur in upuaso o Tamano torom det.”

<sup>23</sup> Ra o Iesu ma anun a kum nat na ususer mukut det kis, i tupukus torom det ra i watungi lena, “Mot dan ra mot tama a kum ututna ri! <sup>24</sup> A inanos mot, numugu a susut na poropet ma a susut na king det nem doko i sur det in tama a kum utna ri a pami umatamot, ikut ka det tama i. Ma det nem doko i kai sur det in longoro a kum utna ri mot longoro i, ikut ka det longoro i.”

*A wasiso elelar una wakak na te Samaria*

<sup>25</sup> Ara tene mananos tagun a kum Warkurai i katuttur ra i lar o Iesu, ra i tingi lena, “Tene Ususer, asau ra an pami sur an rakon a nilaun tukum?” <sup>26</sup> Ra o Iesu i balu i lena, “Asau ra di sa tumus tari una kum Warkurai? Asau u nuki uni?” <sup>27</sup> I balu i lena, “‘Un nem a Labino anum a God nam in balam rop, a niom rop, a dekdekin rop, ma a nuknukim rop.’

Lo 6:5

Ma ‘Un nem a pasam elar nami ra u nem ui ut.’”

Wok Pris 19:18

<sup>28</sup> O Iesu i watungi tano lena, “I tokodos ut anum a minabalu, un pami ut lenra, ra un laun.” <sup>29</sup> Ikut a tene ususer tagun a Warkurai i nemi sur in ukodos pasi umatan o Iesu, ra i iting lena, “Osi ra a pasang?”

<sup>30</sup> O Iesu i balu i lenri, “Ara musano i wan tagisapat o Jerusalem utong o Jeriko. Ra i wan nanan, a kum tene wolong det kalabor bat pasi. Det palos ru anum a kum malu, ma det um laulau tari, ra det wan pas gusuni ma milau mo sur in mat. <sup>31</sup> Ara tene etabor torom o God i wan una kisapi ra, i tama pas a musano ra, ra i wan lilias kut gusuni una ara papor. <sup>32</sup> Lenkutkai, ara musano bulung tagun a kabotaro anum o Liwai, i wan taru una musano ra, ra i wan lilias kut gusuni una ara papor kisapi.

<sup>33</sup> “Ikut ara te Samaria i wan nanan, i wan taru una musano ra, ra i tama i, i maris doko i. <sup>34</sup> I wan toromi, i lingis tar a wel ma a wain una nun a kum inangon ma i pulus bat tar det. I ukas pasi una nun a dongki, ra i usirok tari una rumu na usiro, ra i tamtamabati. <sup>35</sup> Una bung numur tano, i los pas aru denaria\* , i pitar tari torom a taman a rumu, ma i watungi tano lena, ‘Un tamtamabati. Ra an milet melet, an balu melet asau kai ra u tabor tari nami.’

<sup>36</sup> “Osi tagun a tulu musano ri der pasano nama musano ra a kum tene wolong det um tari?” <sup>37</sup> Ra a tene ususer tagun a Warkurai i balu i lena, “O naro ra i marisi.” Ra o Iesu i watungi tano lena, “Un nan ma un pami lenutra.”

*O Iesu i kis una rumu anum o Maria ma o Mata*

<sup>38</sup> O Iesu ma anum a kum nat na ususer det wan nanan, ra det wanpat un ara tamon, ra ara ino, a risano o Mata, i ben pas o Iesu utiro una nun a rumu. <sup>39</sup> Ma ara tisingo kai, a ino, a risano o Maria, i kis nisan aru kikin a Labino, ma i longlongoro anum a wasiso. <sup>40</sup> Ikut o Mata i taramo i ra i dekdek toromi a kum pinapam ra i pami, i wan torom o Iesu ra i watungi tano lena, “Labino, ko nuk pas iau? Tama i, a tising a ino ke warut iau. Iau mukut a pam a kum pinapam. Tulu ru i sur in warut iau.” <sup>41</sup> A Labino i balu i lena, “Mata, Mata, u nuknuk doko sur a susut na utna! <sup>42</sup> Ara utna kut i labo sakit sur a nuknukim in kis uni. O Maria i sa pilok pasi, ma katutaio ut in los ru i gusuni.”

\* 10:35: Ara denaria i elar nama ikul anum ara musano tagun ara bung ra i papam.

## 11

*A etowo anum o Iesu una niaring  
(Mt 6:9-13; 7:7-11)*

<sup>1</sup> Ara bung o Iesu i wararing un ara nubual. Ra i sa wararing rop, ara tagun anum a kum nat na ususer i watungi tano lena, “Labino, un ususer met nama niaring, elar nam o Jon i ususer anum a kum nat na ususer.” <sup>2</sup> Ra o Iesu i len tandet lena, “Ra mot in wararing, mot in wararing lenri, ‘Tamamet, i wakak ra din ru a risam. I wakak ra anum a matanitu in nanpat. <sup>3</sup> A bungbung rop un tabor met nam amet a utna na inangon.

<sup>4</sup> Un unus ru anumet a kum sakino petutna, uni met kai met dumano ru anundet a kum sakino petutna torom met. Gong u ben met una ululam.’”

<sup>5</sup> O Iesu i watungi tana nun a kum nat na ususer lena, “Ra taio tagun mot in nan torom tu pasano una labino mirum, ma in saring lena, ‘Pasang, a nem lako tul in beret munung. <sup>6</sup> Uni ara pasang i wanpat torom iau una nun a inawan ut, ra kalako utna sur an tabori nami.’ <sup>7</sup> Ra a pasano kura urumu in watungi lena, ‘Gong u ubalon iau! Met sa tagar, ma met nama kum nutnutung liklik met sa inep. Kan pirso melet mo sur an los tar tu utna tam.’ <sup>8</sup> A inanos mot, in pirso sur in pitar tar a beret tano, ausur i kibino ra der pasano, awu, i kibino uni ra i sasaring liklik ut.

<sup>9</sup> “A watungi tamot, mot in sasaring, ra din tabor mot, mot in sisio, ra mot in sio pasi, mot in pinpidik, ra din papos pas mot. <sup>10</sup> Uni det rop ra det sasaring din tabor det, ma osi ra i sisio in sio pasi, ma osi kai ra i pinpidik, din papos pasi. <sup>11</sup> Osi na pasamot a kum tamtaman a kum nat liklik, ra a nutunulik in saring sur tin kiripo, in tabori kut nam in nusui? <sup>12</sup> O, ra in saring sur tin nikiau, in tabori kut nama bukalo? <sup>13</sup> Mot a laulau na taro, ikut mot tasmani ut a wakak na etabor sur mot in tabor a kum nutnutumot nami. Ra mot ser pami lenra, i lingmulus sakit lena, osi ra in saring a Tamamot ra i kis sapat una langit, in tabori ut nama Tokodos na Nion.”

*O Iesu ma o Belsebul  
(Mt 12:22-30; Mk 3:20-27)*

<sup>14</sup> O Iesu i lakro ru a laulau na nion ra i ngat gusun ara musano. Ra a laulau na

nion ra i pirso gusuni, a musano ra i wasiso maragom. Ma a kunur na taro det kisin. <sup>15</sup> Ikut ara taro tagun det, det watungi lena, "I ser lakro ru a kum laulau na nion nama dekdekin o Belsebul, a labino anun a kum laulau na nion."

<sup>16</sup> A ramano taro kai det lar o Iesu sur in pam tu ukinalong sur in ese i lena, i tagisapat una langit. <sup>17</sup> Ikut o Iesu i sa tasman a nuknukindet, ra i watungi tandet lena, "Ra tu gapman det melet ut det in waim etalai, a gapman ra in rop kut. Ma ra lako taro tagun tu rumu det in waim etalai melet kut, det in nan sarara. <sup>18</sup> Ra o Satan in waim melet kut nam anun a kum tultul, anun a gapman in tur dekdek pepetlai? A watungi lenra uni mot watungi un iau lena, a lakro ru a kum laulau na nion nama dekdekin o Belsebul. <sup>19</sup> Ikut, ra iau, an lakro ru a kum laulau na nion nama dekdekin o Belsebul, anumot a taro, det ser lakro ru a kum laulau na nion nama dekdekin osi? Anundet a pinapam ut in upuaso i lena anumot a etakun i raro. <sup>20</sup> Ikut, ra an lakro ru a kum laulau na nion nama dekdekin o God, in ese i lena a matanitu anun o God i sa wanpat torom mot.

<sup>21</sup> "Ra ara dekdek na musano i sa emar pas nam anun a kum utna na inaim, ra i tamtababat anun a rumu, anun a kum utna in kis wakak. <sup>22</sup> Ikut, ra taio ra i dekdek tano in nanpat toromi ma in winim pasi, in ras ru anun a kum utna na inaim ra i nurnur taru uni, ma in los pas anun a kum utna rop, ma in tabor a taro nami.

<sup>23</sup> "O naro ra ka mir tar pasano mir ebar. Ma o naro ra ke warut iau u eben, i lu sarara ru a taro kut.

*A laulau na nion i milet melet  
(Mt 12:43-45)*

<sup>24</sup> "Ra tu laulau na nion in pirso pas gusun tu musano, in nan una kum nubual ra kalako danim iai, sur in mana, ikut ken sio pas tu nubual sur in mana uni. Ra in watungi lena, 'An milet melet sur anung a rumu, ra a sa pirso pas gusuni.' <sup>25</sup> Ra in nanpat, in tama i ra di sa surupu tari, ma di sa ukodos tari. <sup>26</sup> Numur in nan ra in ben melet pas a wonom mawit na laulau na nion, ra det laulau sakit tano, ma det in ruk rop taru una rumu ra, ma det in kis uni. Ma a nilaun anun a musano ra in laulau sakit mo tan a nilaun ra numugu i utur ukai i."

*Det ra det dan*

<sup>27</sup> Ra o Iesu i wasiso utmakai, ara ino tagun a kunur na taro ra, i watungi lena, "A ino ra i usus pas ui ma i ugu ui, i dan." <sup>28</sup> O Iesu i balu i lena, "Ikut det ra det longoro a wasiso anun o God ma det tarom uni, det dan sakit."

*A taro det sasaring sur tu ukinalong  
(Mt 12:38-42)*

<sup>29</sup> Ra a kunur na taro det bukus nanan, o Iesu i watungi tandet lena, "A taro tagun uniri, a sakino taro. Det tamtama sur tu ukinalong, ikut ka din pam taio torom det. Din pam a ukinalong kut elar nam i ra di sa pam tari un o Jona. <sup>30</sup> Uni o Jona i a ukinalong torom a taro Niniwe, lenkutkai ra a Nutun a Musano in nanpat a ukinalong torom a taro tagun uniri. <sup>31</sup> Una bung na warkurai, a kwin tagitong una matmatano tobar in tur ma in takun dekdek a taro tagun uniri, uni i wan ut tagitiro bakbak sur in longoro a mananos anun a King Solomon, ma o naro ra i labo taun o Solomon kuri ut nin, ikut ka mot longoro i. <sup>32</sup> Una bung na warkurai, a taro Niniwe det in tur ma det in takun dekdek a taro tagun uniri, uni det nukpukus una warawai anun o Jona, ma o naro ra i labo taun o Jona kuri ut nin, ikut ka mot longoro i.

*A lam tagun a pinindat  
(Mt 5:15; 6:22-23)*

<sup>33</sup> "Katutaio in ungangon tar tu lam ma in munu tari, o in wop bat tari nama paket. Awu! In ubek tari ut netes una nuna turtur, sur det ra det ruk det in tama a talapor. <sup>34</sup> Arin matam der elar nama lam una pinim. Ra arin matam der wakak, a pinim rop in bukus nama talapor. Ikut ra der laulau, a pinim rop in bukus nama dumirum. <sup>35</sup> Un utumarong ui, sako a talapor ra kura un ui in dumirum. <sup>36</sup> Ra a pinim rop in bukus nama talapor, ma katu dumirum uni, in talapor rop, elar nama lam ra a talaporino i sisio un ui."

*O Iesu i upuaso a kum niraro anun a kum Parisi ma a kum tene ususer tagun a Warkurai  
(Mt 23:1-36; Mk 12:38-40; Lk 20:45-47)*

<sup>37</sup> Ra o Iesu i sa wasiso rop, ara Parisi i ben pasi sur det in nangon tomo. O Iesu i ruk ma i kis sur in nangon. <sup>38</sup> Ma a Parisi ra, i tama i lena o Iesu ke gos lamano mugu pas, ra i kisin uni. <sup>39</sup> Ra a Labino i watungi tano lena, "Mot a kum Parisi mot gosgos pasi kut a surun a kap ma a pelet, ikut a balamot

i bukus nama petutna na ungonos pas a utna tan taio ma a kum sakino petutna. <sup>40</sup>Mot a kum longlong mot! Ka mot tasmani lena, o naro ra i pam a surun a kum utna, i pami utkai a balandet? <sup>41</sup>Mot in tabor a kum sibo na taro nama utna ra kura ubalan anumot a kum kap ma a kum pelet, sur katu dur kura un mot umatan o God.

<sup>42</sup>“In laulau doko torom mot a kum Parisi. Mot nuknuk doko sur a kum natnat na warkurai lenri, mot pitar in tekteken nanai torom o God tagun a noino natnat na duwai ra i sangsangnain wakak tagun anumot a kinobot, ikut ka mot pam a tokodos na warkurai torom a taro ma ka mot nem o God. I wakak sur mot in pam a tokodos na warkurai torom a taro ma mot in nem o God, ma gong kai mot dumano ru in tektekene tagun a noino, sur mot in pitari torom o God. <sup>43</sup>In laulau doko torom mot a kum Parisi, uni mot nem a kinkinis na labino sa numugu una kum rumu na lotu. Ma mot nemi kai sur a taro det in pitar a labino urur torom mot una kum nubual na inawan tomo. <sup>44</sup>In laulau doko torom mot, uni mot elar nama kum tungtung na minat ra katu ukinalong un det, ma a taro det wanan sapat netes un det ma ka det tasmani\*.”

<sup>45</sup>Ara tagun a kum tene ususer tagun a Warkurai i watungi tan o Iesu lena, “Tene Ususer, ra u watungi lenri, u watung laulau met kai.” <sup>46</sup>Ra o Iesu i balu i lena, “In laulau doko kai torom mot a kum tene mananos tagun a Warkurai, uni mot pitar tar a kum warkurai ra i ngangitin sur a taro det in muri, ma mot ut, ka mot warut det uni. <sup>47</sup>In laulau doko torom mot, uni a kum tumtubumot tagun numugu det um doko ru a kum poropet, ma mot utur a kum aim nisan a kum kulam na minat anundet, ikut ka mot mur anundet a wasiso. <sup>48</sup>Lenra mot upuaso i lena, mot mulaot tomo nama kum tumtubumot tagun numugu una nundet a pinapam ra det um doko a kum poropet, uni det um doko det, ma mot, mot utur a kum aim nisan a kum kulam na minat indet. <sup>49</sup>I mo ri a kibino, o God ra i mananos doko i watungi lena, ‘An tulu ru a kum poropet ma a kum aposel torom a taro. A taro ra det in um doko lako taro tagun det, ma det in ukadik lako taro kai tagun det.’ <sup>50</sup>Mot a taro tagun uniri, din pitar a warkurai na mina-

balu torom mot, una gapin a kum poropet rop ra di sa um doko tar det, turpasi ut una turturkibina rakrakon bual. <sup>51</sup>Turpasi ra di um doko o Abel ma i wan tuk ra di um doko o Sekaraia, i ra i iru epotor nisan a kabulu na tuntun etabor ma a nubual ra i Tabu, tiro urumu una rumu na etabor. A watungi tamot, din pitar a warkurai na minabalu torom a taro tagun uniri una kum utna rop ri. <sup>52</sup>In laulau doko torom mot a kum tene mananos tagun a Warkurai, uni mot rakon ru a ki tagun a matansako sur a mananos. Mot ut ka mot ruk uni, ma mot turbat det ra det nem na ruk.”

<sup>53</sup>Ra o Iesu i pirso gusun a rumu ra, a kum tene ususer tagun a Warkurai ma a kum Parisi det kankan doko ma det ting pukpukusi una susut na utna. <sup>54</sup>Ra det kis langlang o Iesu sur tu ngas na wasiso sur det in takuni nami.

## 12

### *O Iesu i utumarong det gusun a torotoro (Mt 10:26-27)*

<sup>1</sup>A ararip na taro det sa wanpat tomo, ra det isugut etalai det mukut, ra o Iesu i watung mugu i torom anun a kum nat na ususer lena, “Mot in tumarong una is anun a kum Parisi. A wasiso una nundet a petutna na torotoro. <sup>2</sup>A kum utna rop ra di rakup bat tari, numur in kis taltalapor, ma a utna rop ra i kis eno, numur in nanpat pupuaso. <sup>3</sup>Asau ra mot sa watung tari una dumirum, numur din longoro i una waspi, ma asau ra mot wasisik eno taru nami tiro urumu, numur din tur sapat netes una rumu, ma din watung puaso i.

### *Mot in ngara kut sur o God (Mt 10:28-31)*

<sup>4</sup>“A watungi tamot a kum paspasang: Gong mot ngaran det ra det um doko i kut a pinindi. Ra det sa pam tari lenra, ka det in pet lar pasi sur det in pam melet tu utna kai. <sup>5</sup>Ikut an inanos kapo mot un o naro ra mot in ngara suri: Mot in ngara sur o naro ra a dekdekino i labo sur in um doko mot, ma in woro ru mot una labino sungun kai. A lingmulus a watungi tamot, o God kut ra mot in ngara suri. <sup>6</sup>Di ser kul a limanin nipiko liklik nama nat na mani kut, niko? Ikut o God ken dumano ru tino lik tagun det. <sup>7</sup>I lingmulus sakit, o God i sa luk rop

\* 11:44: Ra tu te Juda in nan sapat netes una tamon na minminat in dur umatan o God.

tar a kum tekteken iwu na lorimot, ma i sa tasman tari. Gong mot ngara, uni mot labo sakit umatan o God taun a susut na piko.

*Osi ra i upuaso o Iesu ma osi ra i ipul ru i*  
(Mt 10:32-33; 12:32; 10:19-20)

<sup>8</sup> “A watungi tamot, osi ra in watung puaso i umatan a taro lena, i tagun iau, a Nutun a Musano kai in watung puaso i umatan a kum ensel anun o God lena, i tagun iau. <sup>9</sup> Ikut osi ra in ipul ru iau umatan a taro, a Nutun a Musano kai in ipul ru i umatan a kum ensel anun o God. <sup>10</sup> Det ra det in watung tar tu sakino wasiso una Nutun a Musano, din unus ru i kut, ikut osi ra in wasiso laulau una Tokodos na Nion, ka din unus lar pasi. <sup>11</sup> Ra din dat pas mot sur a warkurai una kum rumu na lotu, ma umatan a kum tene warkurai ma a kum mugumugu, gong mot nuknuk bing sur asau mot in balu lako kum etakun nami, o asau mot in watungi. <sup>12</sup> Uni una du bung ut ra, a Tokodos na Nion ut in ususer mot un asau sur mot in watungi.”

*A wasiso elelar una tene gongon ra ke mananos*

<sup>13</sup> Ara tagun a kunur na taro i watungi tano Iesu lena, “Tene Ususer, un inanos a tisinglik sur in isuaro a kum ululeng un mir, ra a tamamir i sa mat pas gusuni.” <sup>14</sup> Ra o Iesu i balu i lena, “Le, osi ra i ubek tar iau sur an tene warkurai ma sur an isuaro anumur a kum ululeng torom mur?” <sup>15</sup> Ra i watungi tandet, “Mot in nuk pasi, ma mot in tumarong mot gusun a nemnem sur a susut na ululeng, uni a nilaun anun taio ken kibino pas tagun anun a susut na ululeng.”

<sup>16</sup> Ra i inanos det una ara wasiso elelar lenri, “A kinobot anun ara tene gongon i wu a susut na wino. <sup>17</sup> Ma i nuknuk lena, ‘Asau an pami? Uni katu rumu ra an ubek a win anung a kinobot uni.’ <sup>18</sup> Ra i watungi lena, ‘An pami lenri, an rege ru anung a kum rumu na umubek tomo, ma an pam melet lako kum lamlabino, ra an ubek rop a win anung a kinobot ma anung a ululeng uni. <sup>19</sup> Ra an watungi tan a niong lena, ‘A niong, anum a kum ululeng i susut doko, sur in kis lako susut na kilalo. Un mana, un nangon, un inum ma un gas.’” <sup>20</sup> Ikut o God i watungi tano lenri, ‘Ui a longlong! Uniutri una mirum, un mat! Osi mo in los a kum ululeng ra u sa ubek tomo tari sur ui?’ <sup>21</sup> In lenra torom det ra det ubek tomo a ululeng

sur det ut, ikut ka det gongon umatan o God.”

*A nurnur torom o God*  
(Mt 6:25-34)

<sup>22</sup> O Iesu i watungi torom anun a kum nat na ususer lena, “Iri a kibino ra a watungi tamot lena, gong mot nuknuk doko una numot a nilaun sur asau mot in nani, ma una pinimot kai sur asau mot in emar nami. <sup>23</sup> Uni a nilaun i labo taun a utna na inangon, ma a pinindi kai i labo taun in namalu. <sup>24</sup> Mot in tama a kum kotkot. Ka det marut tu utna, ma ka det pasong tomo lako utna, ka tu rumu na umubek anundet, ikut o God i ser tabor det. Ma mot, mot labo doko taun a kum piko. <sup>25</sup> Osi tamot ra i nuknuk doko una nun a nilaun, in pet lari sur in tugus walos lilik anuna nilaun? Awu! <sup>26</sup> Ra ka mot in pam lar pas a utna lik ri, sur asau ra mot nuknuk doko sur lako kum utna kai?”

<sup>27</sup> “Mot in tama a kum purpur tagisa ubual, ra det lubung pepetlai. Ka det papam ma ka det ser pam malu. Ikut a watungi tamot, a ememar rop anun o King Solomon ut i tantama wakak bing, ikut ke tantama wakak elar nama kum purpur ra. <sup>28</sup> O God i mar a kum wuliso sa ubual nama kum wakak na purpurindet, ra i puspun uniri, ra markan din tun ru i una sungun. Ra i pami lenra una kum wuliso, i lingmulus ut ra in mar mot utkai. Anumot a nurnur i natino doko. <sup>29</sup> Gong mot nuknuk doko sur asau ra mot in nani, ma asau ra mot in inumi, ma gong mot ngara suri. <sup>30</sup> Uni a taro nin una rakrakon bual ra ka det nurnur, det nemnem doko sur a kum utna rop ri, ikut a Tamamot i tasmani lena mot sibo sur a kum utna ri. <sup>31</sup> Mot in nuknuk sur anun a matanitu, ra in tabor mot nama kum utna ri.

*A wakak na ululeng sapat una langit*  
(Mt 6:19-21)

<sup>32</sup> “A nat na kunur na sipsip, gong mot ngara, uni a Tamamot i sa gas sur in pitar tar a matanitu torom mot. <sup>33</sup> Mot in siuru anumot a kum ututna sur a mani, ma mot in tabor a kum sibo na taro nami. Mot in waninar pas anumot lako kum paus ra ken moroto, a wakak na ululeng sapat una langit ra ke ser rop, ma katu tene wolong in nan milau i, ma a koropos ken banlaulau i. <sup>34</sup> Uni a nubual ra anumot a wakak na ululeng i kis iai, anumot a nilaun rop in kis uni.

*A kum tultul ra det waninar*

<sup>35</sup>“Mot sa emar pas, ma mot sa ungangon pas anumot a kum lam, gong mot dumun, mot in kis na waninar mukut. <sup>36</sup>Ma mot in elar nama kum tultul ra det kis langlang sur anundet a labino ra in milet melet tagun a lukaro na nolin. Ra in nanpat ma in pinpidik, uniutra det in papos pasi. <sup>37</sup>Ra a labino in nanpat, ma anun a kum tultul det sa waninar, det dan. A inanos mot nama lingmulus, in emar pas sur in pam anun a pinapam, ma in ukis tar det nisan a kabulu na inangon ma i ut in tabor det. <sup>38</sup>Ra in nanpat kai torom det una labino mirum, o una lar, ma det in kis langlang ut suri, a kum tultul ra det in dan. <sup>39</sup>Mot in tasman a utna ri: Ra a taman a rumu in tasman a du bung ra a tene wolong in nanpat uni, ken madek ru anun a rumu sur din wolongi. <sup>40</sup>Mot kai, mot in koikoi taru, uni a Nutun a Musano in nanpat una du bung ra ka mot nuki lena in nanpat uni.”

*A lingmulus na tultul ma a tultul ra ke lingmulus*

*(Mt 24:45-51)*

<sup>41</sup>O Pita i ting o Iesu lena, “Labino, u watung a wasiso elelar ri un met kut, o una taro rop?” <sup>42</sup>A Labino i balu i lena, “A tene tamtamabat ra i lingmulus una nun a pinapam ma i mananos kai, anun a labino in ukis tari sur in mugumugu anun a kum tultul, sur in tamtabor det nama andet a utna na inangon una kum du bung na inangon. <sup>43</sup>A tultul ra, in dan ra anun a labino in nanpat ma in tama i ra i pam sot pas anun a pinapam. <sup>44</sup>A inanos mot nama lingmulus, anun a labino in ubek tari sur in tene tamtamabat una nun a kum utna rop. <sup>45</sup>“Ikut, ra a tultul i nuki lena, anun a labino ken nanpat lakit, ra i turpasi sur in um a kum tultul na musano ma a kum tultul na ino, ma in nangon, ma in inum ma in sipak. <sup>46</sup>Anun a labino in nanpat un tu bung o tu du bung ra a tultul ke tasmani, ma ke nuki lena in nanpat uni. Ra a labino in tau kutkutusi, ma in pitar tar a warkurai na minabalu toromi, sur in kis tomo nam det ra ka det nurnur.

<sup>47</sup>“Tu tultul ra i sa tasman tar a nemnem anun anun a labino, ikut ke waninar, ma ke papam elar nami ra a anun a labino i nemi, din taktakalo dekdeki. <sup>48</sup>Ikut tu tultul ra ke tasman asau ra anun a labino i nemi, ma i pam a utna ra ke tokodos, din rapus liliki kut. Ma torom taio ra di pitar tar a labino

tano, din nemi kai tu labino ut gusuni, ma osi ra di pitar tar a susut tano, din tingi ut sur lako susut.

*A kinkinis susuaro*

*(Mt 10:34-36)*

<sup>49</sup>“A wanpat sur an tagol tar a sungun una rakrakon bual, ma a nem doko i lena i sa wangon. <sup>50</sup>Anung a baptais na ngunungut kura utmakai sur din baptaiso iau nami, ma iri a los a tarai na maut tuk ut ra din pam sot pasi. <sup>51</sup>Pepetlai, mot nuki lena a wanpat sur an pitar a malmal una rakrakon bual? Awu, a wanpat sur a taro det in kis susuaro. <sup>52</sup>Turpasi uniri, a limo det una ara rumu det in kis susuaro, atul detul ut, ma aru tan der ut. <sup>53</sup>Det in kis susuaro, a musano gusun a nutunulik a musano, ma a nat musano gusun o tamano. A ino gusun a nutunulik a ino, ma a ino lik gusun o nano, ma a nolin na ino gusun o tubunu, ma o tubunu gusun o tubunu.”

*A taro ka det mananos una kum utna ra i wanpat uniri*

*(Mt 16:2-3)*

<sup>54</sup>O Iesu i wasiso melet torom a kunur na taro lena, “Ra mot tama a bakut una matmatano lubur, uniutra mot watungi lena, ‘Milau mo sur in bato,’ ma i lingmulus ut. <sup>55</sup>Ra a tobar i wuwu pat, mot watungi lena, ‘A suan in dekdek,’ ma i lingmulus ut. <sup>56</sup>Mot a kum tene torotoro! Mot mananos sur mot in palos a tamtama ina rakrakon bual ma a bakut. Ma pepetlai ra ka mot mananos sur mot in palos a kukurai na kum utna ra i wanpat una kum bungbung ri?”

*Un umarom pas anum a ebar*

*(Mt 5:25-26)*

<sup>57</sup>“Pepetlai ra mot ut ka mot tamtama wakak sur asau ra i tokodos? <sup>58</sup>Ra anum a ebar in ben pas ui sur a warkurai, un dekdek sur mur in emarom mugu ra mur wan nanan utmakai una kisapi, sako in dat pas ui torom a tene warkurai. Ra a tene warkurai in pitar tar ui torom a polis, ma a polis in uruk tar ui una karabus. <sup>59</sup>A inanos ui, kon pirso lar pas tuk ut ra un pitar rop ru a tintinip na toia ina num a kunukul.”

## 13

*Un nukpukus sako un iru*

<sup>1</sup>Una bung ra, ara taro det inanos o Iesu un ara taro Galili ra a kum tena inaim anun o Pailat det um doko det, ra kura ut det tun a etabor torom o God. <sup>2</sup>O Iesu i balu det

lena, “Pepetlai, mot nuki lenmakai, det a kum tene sakino doko taun a taro Galili rop, uni det iru lenra? <sup>3</sup> Awu! Ikut an inanos mot, ra ka mot in nukpukus gusun anumot a kum sakino petutna, mot kai mot in iru rop.

<sup>4</sup> “Ma asau mo mot nuki una noino ma tiwal na taro sapat o Jerusalem ra a rumu lekeleke tiro o Siloam i toropo ma i um doko rop ru det? Pepetlai, det a kum tene sakino doko taun det rop ra det kis sapat o Jerusalem? <sup>5</sup> Awu! Ikut an inanos mot, ra ka mot in nukpukus gusun anumot a kum sakino petutna, mot kai mot in iru rop.”

*A wasiso elelar un in nanai na fig ra kalako wino*

<sup>6</sup> Numur o Iesu i watung a wasiso elelar ri torom det, “Ara musano anunu in nanai na fig i tur epotor una ana kinobot na wain. I wan ra i tamtama sur lako wino, ikut kalako wino. <sup>7</sup> Numur i inanos a tene tamtamabat una kinobot ra lena, ‘Una tulu kilalo ri a tamtama sur lako win in nanai na fig ri ma kalako. Un tau ru i! Uni i urop a inangon tagun a piso.’ <sup>8</sup> Ikut a tene tamtamabat ra i balu i lena, ‘Labino, un madek tari munung ara kilalo melet ri, sur an kil talilisi in kibino, ma an ubek a wakak na piso uni. <sup>9</sup> Ra in wu una kilalo sapat, in wakak. Ra awu, un tau ru i mo.’”

*O Iesu i ulangolango ara ino una Bung na Sabat*

<sup>10</sup> Un ara Bung na Sabat o Iesu i ususer a taro un ara rumu na lotu. <sup>11</sup> Ara ino i kura iai, a laulau na nion kura uni. In surunu i tulukun a noino ma tiwal na kilalo, ma ke tur tokodos lar pasi. <sup>12</sup> O Iesu i tama i, ma i watungi toromi lena, “Le, u sa langolango gusun anum a misait.” <sup>13</sup> Ra o Iesu i ubek tar aru lamano sapat netes uni, uniuutra i tur tokodos mut, ra i watung ulabo pas o God.

<sup>14</sup> A mugumugu tagun a rumu na lotu i kankan, uni o Iesu i ulangolango pas a ino ra una Bung na Sabat. Ra i watungi tan a taro lena, “A wonom na bung kura sur din papam. Mot in nan urin una kum bungbung ra, sur din ulangolango pas mot, ma una Bung na Sabat gong.” <sup>15</sup> A Labino i balu i lena, “Mot a kum tene torotoro! Mot rop arara, mot ser palos ru anumot a kum bulumakau ma a kum dongki gusun anundet a kum rumu, ra mot ben pirso det una Bung na Sabat sur det in inum. <sup>16</sup> A ino ri tagun a kabotaro anun o Abaram, o Satan

i kerker tari a noino ma tiwal na kilalo. Asau a kibino ra ka din palos a kineker ri gusuni una Bung na Sabat?” <sup>17</sup> Ra i sa watung tari lenri tandet, det rop ra det pukus a pinapam anun o Iesu, det maimai, ikut a kunur na taro det gas una kum wakak na utna ra o Iesu i pami.

*A wasiso elelar un in wino mastad ma una is*

*(Mt 13:31-33; Mk 4:30-32)*

<sup>18</sup> O Iesu i iting lena, “A matanitu anun o God i elar nam asau? Asau an elaro i nami? <sup>19</sup> I elar nam in pitino mastad, ra ara musano i los pasi, ma i marut tari una nun a kinobot. I lubung, ra in nanai ino i labo pat, ma a kum piko det ser pam pios una kum kanokano.”

<sup>20</sup> O Iesu i iting melet lena, “Asau kai an elaro a matanitu anun o God nami? <sup>21</sup> I elar nama is ra ara ino i rakon pasi ma i pam tomo tari nama labino palawa, ra a palawa rop i mubus nami.”

*A nat na matansako lik*

*(Mt 7:13-14, 21-23)*

<sup>22</sup> Ra o Iesu i wan nanan usapat o Jerusalem, i ususer a taro una kum lam-labino tamon ma una kum natnat na tamon. <sup>23</sup> Ara i ting o Iesu lena, “Labino, pepetlai, a pak na taro kut din ulaun pas det?” Ra i watungi tandet lena, <sup>24</sup> “Mot in dekdek sur mot in ruk una nat na matansako lik, uni a susut na taro det in lari sur det in ruk uni, ikut ka det in pet lar pasi. <sup>25</sup> A taman a rumu in tur ra in tagar bat a matansako, ma mot in tur nago upiso, mot in pinpidik ma mot in watungi lena, ‘Labino, un papos pas met.’ In watungi kut tamot lena, ‘Ka tasman mot ma tagai mot.’ <sup>26</sup> Numur mot in watungi tano lena, ‘Met wangangon ma met ininum tomo nam ui, ma u ser towo met una numet a kum nubual na inawan tomo.’ <sup>27</sup> Ikut in balu mot lena, ‘Ka tasman mot ma tagai mot. Mot a kum tene sakino, mot in nan gisen gusun iau.’ <sup>28</sup> Ra mot in tama o Abaram, o Aisak ma o Jokop ma a kum poropet rop una matanitu anun o God, mot in tangtangis, ma mot in ungingit lokomot iai. Ikut din lu pirso ru mot. <sup>29</sup> Ma a taro tagun a wat na matmatano wuwu det in nanpat, ma det in kis una lukaro una matanitu anun o God. <sup>30</sup> Tama i, ara taro ra det mur uniri, numur det in mugu, ma ara taro ra det mugu uniri, numur det in mur.”

*O Iesu i maris o Jerusalem  
(Mt 23:37-39)*

<sup>31</sup>Una du bung ra, a kum Parisi det wanpat, ma det watungi tan o Iesu lena, “Un nan taginin ma un nan sur tu tamon gisen, uni o Erod i nem na um doko ui.” <sup>32</sup>O Iesu i balu det lena, “Mot in nan ma mot in inanos a lomlom na pap ra lenri, uniri ma markan an lakro ru a kum laulau na nion ma an ulangolango a taro, ma a tulu bung nami an urop anung a pinapam. <sup>33</sup>An nan uniri ma markan ma a bung palu kai, uni katu poropet in iru un tu tamon gisen, sapat ut o Jerusalem.

<sup>34</sup>“Jerusalem, Jerusalem, ui ra u ser um doko a kum poropet, ma det ra di tulu ru det torom ui, u duku doko ru det kut nama wadat. A susut na dino a nem na ben tomo a kum nutnutum, elar nama kereke ra i rakup bat tomo a kum nutnutunu utuntudu ina ru mebene, ikut ka mot nemi. <sup>35</sup>Tama! O God i sa wan gusun anumot a tamon. A inanos mot, ka mot in tama melet iau mo tuk una bung ra mot in watungi lena, ‘O naro ra i wanpat nama risan a Labino i dan.’” *Buk Song 118:26*

## 14

*O Iesu i ulangolango pas ara musano*

<sup>1</sup>Un ara Bung na Sabat, o Iesu i ruk sur in nangon una rumu anun ara mugumugu anun a kum Parisi, ra a taro det tama sursuri kut sur tu utna ra in pam rero i. <sup>2</sup>Ara musano ra i misait, a pinpinino i sursurung, i kis taru numugu tan o Iesu. <sup>3</sup>O Iesu i ting a kum tene ususer tagun a Warkurai ma a kum Parisi lena, “Pepetlai, i tokodos una Warkurai sur din ulangolango a taro una Bung na Sabat o awu?” <sup>4</sup>Ikut ka det balu i. O Iesu i pam pas a musano ra, i ulangolango pasi, ra i tulu ru i. <sup>5</sup>Ra o Iesu i ting det lena, “Osi tagun mot ra a nutunulik o anunu tu bulumakau in puku taru un tin nutung na danim una Bung na Sabat ra ken dat toto lakit pasi?” <sup>6</sup>Ma ka det balu lar pas anun a wasiso ri.

*Un unatino pas ui, ma un maris a sibo na taro*

<sup>7</sup>Ra o Iesu i kis una inangon ri, i tama a taro ra det wanpat, det pilok pasi ut a kum kiskis sa numugu. Ma i watung ara wasiso elelar tandet lena, <sup>8</sup>“Ra taio in ben pas ui una lukaro na nolin, gong u kis una kiskis sa numugu, sako in ben pas taio ra i labo

tam. <sup>9</sup>Ma o naro ra i eben una lukaro in nanpat ra in watungi tam lena, ‘Un katutur saro o naro ri.’ Ra un nan nama maimai sur a kiskis kunago numur. <sup>10</sup>Ikut, ra din ben pas ui, un nan ma un kis una kiskis nago numur sakit. Ra o naro ra i eben in nanpat, in watungi tam lena, ‘Pasang, un tur ra un nan urin numugu.’ Ma din ulabo pas ui umatandet ra mot kis tomo una inangon. <sup>11</sup>Uni det rop ra det ulabo pas det, din unatino det. Ma osi ra i unatino pasi, din ulabo i.”

<sup>12</sup>Numur o Iesu i watungi tan a Parisi ra i ben pasi sur a inangon lena, “Ra u waninar pas a inangon, gong u ben pas a kum paspasam, ma a kum tistisim, ma a kum kukum, ma a kum tene ululeng ra det kis milau nisam. Uni det ri det in ben pas ui ma det in balu i torom ui. <sup>13</sup>Ra u waninar pas a inangon, un ben pas kut a kum sibo na taro, det ra a pinindet i mat, det ra det kaukawar kut, ma a kum pulu. <sup>14</sup>Ra un pami lenri, un dan. Uni, kalako utna anundet sur det in balu i tam, o God in balu i tam una bung ra a kum tene tokodos det in laun melet.”

*A wasiso elelar una labino lukaro  
(Mt 22:1-10)*

<sup>15</sup>Ara tagun det ra det wangon tomo nam o Iesu i longoro a kum wasiso ri, i watungi tano lena, “Det ra det in nangon una lukaro una matanitu anun o God, det dan.” <sup>16</sup>Ra o Iesu i watungi tano lena, “Ara musano i waninar pas a tarai na lukaro, ma i inanos mugu tar a susut na taro sur det in nanpat. <sup>17</sup>Ma una bung na lukaro mo, i tulu ru anun a tultul torom det ra di sa inanos mugu tar det, nama wasiso lenri, ‘Mot in nan mo urin, uni a kum utna i sa waninar rop.’ <sup>18</sup>Ikut det rop det wasiso batbat det kut. A mugano i watungi kut tano lena, ‘A sa kul tar a du piso. An nan munung sur an tama i. A saring ui sur un madek ru iau mukut.’ <sup>19</sup>Ra ara kai i watungi lena, ‘A sa kul pas a noino karabau. An nan munung sur an lar tar det. A saring ui sur un madek ru iau mukut.’ <sup>20</sup>Ma ara kai i watungi lena, ‘Unikutri a nolin, ma kan pet lar pasi sur an nan.’

<sup>21</sup>“A tultul i millet melet ra i inanos anun a labino una kum wasiso ra. A labino ra in balano i sungun doko, ra i watungi tan anun a tultul lena, ‘Un nan lakit sur a kum tartarai na kisapi ma a kum natnat na kisapi

una tamon, ra un ben pas a kum sibo na taro, det ra a pinindet i mat, a kum pulu, ma det kai ra det kaukawar kut.’<sup>22</sup> Numur a tultul i watungi lena, ‘Labino, a sa pam tar a kum utna rop ra u utula suri, ikut a ramano kum kolo liklik kura utmakai una rumu.’<sup>23</sup> A labino i watungi tana tultul lena, ‘Un nan sur a kum tartarai na kisapi ma a kum natnat na kisapi sa ubual, ma un ungongos pas a taro sur det in ruk, sur anung a rumu in bukus wakak.’<sup>24</sup> A watungi tamot, katutaio tagun det, ra di sa inanos mugu tar det, in nangon tagun anung a lukaro.’”

*A kum wasiso elelar un osi ra i nem na mur o Iesu*

(Mt 10:37-38)

<sup>25</sup> A labino kunur na taro det wan tomo nam o Iesu. I tupukus torom det ra i watungi lena,<sup>26</sup> “Ra taio i nem na mur iau, ma i nem doko o tamano, o nano, anun a ino, a kum nutnutunu, a kum tistisino ma anun a nilaun kai, ikut anuna marmaris torom iau ken labo taun anun a marmaris torom det ri, i ausur anung a nat na ususer.<sup>27</sup> Ma osi ra ke los pas anun in nanai kutus ma i mur iau, ken pet lari sur in nanpat anung a nat na ususer.

<sup>28</sup> “Ra taio tagun mot i nemi sur in pam tu tarai na rumu, in kis munung ra in pam mugu pas a matana rumu rop, sur in tasmani ra anun a mani in elar sur in urop pasi, o awu.<sup>29</sup> Sako in utur kibin tari kut a rumu, ma ken urop lar pasi. Ra a taro rop ra det in tama i, det in urongon laulau uni,<sup>30</sup> ra det in watungi lena, ‘A musano ri i utur kibin tari kut a rumu, ikut ke urop lar pasi.’

<sup>31</sup> “Ra tu king tomo nama noino arip na taro na inaim anunu in nan una inaim tomo nam ara king gisen kai ra anun aru noino arip na taro na inaim, i wakak sur in kis ma in nuknuk mugu pas lena, pepetlai, det to pas aru noino arip na taro o awu.<sup>32</sup> Ra awu, in tulu ru anun a kum tultul sur det in ukodos a wasiso tomo nama king sur a malmal, ra det bakbak utmakai.<sup>33</sup> Lenkutkai ra torom mot, ra taio tagun mot ken madek ru anun a kum utna rop, i ausur anung a nat na ususer.

*A sol ra ke topas tu utna*

(Mt 5:13; Mk 9:50)

<sup>34</sup> “A sol i wakak, ikut ra a makasman ino i sa rop, din umakasman meleti mo pepetlai?<sup>35</sup> Ke to pasi sur din ubeki una kinobot ma ken uwakaki kai a piso, din woro ru i mukut.

Osi ra arin talngano kura, i wakak sur in longoro nami.”

## 15

*A wasiso elelar un ara sipsip ra i raro*

(Mt 18:12-14)

<sup>1</sup> Ara bung a kum tene los takis ma a kum tene sakino det wan torom o Iesu sur det in longoro i.<sup>2</sup> Ikut a kum Parisi ma a kum tene ususer tagun a Warkurai det ururai un o Iesu lena, “A musano ri, i lason kut tomo nama kum tene sakino, ma i wangon tomo nam det.”

<sup>3</sup> Ra o Iesu i watung a wasiso elelar tandet lena: “Ra taio tagun mot anunu tu mar na sipsip, ma ara tagun det in raro. Pepetlai, ken nan pas gusun a lisu na noino ma lisu tiro una nubual ra det wangon iai, ma in sisio sur ara ra i raro, tuk ra in sio melet pasi?<sup>4</sup> Ra i sa sio pasi, in ubek pasi un in kabarano, ra in nan nama gasgas.<sup>5</sup> In milet melet nami, ra in kabo tomo pas a kum paspasano ma det ra det kis milau, ra in watungi tandet lena, ‘Dat in gas, uni a sa sio melet pas anung a sipsip ra i raro.’<sup>7</sup> A watungi tamot, lenkutkai ra sapat una langgit, a gasgas una tene sakino ra i nukpukus in labo taun a gasgas una lisu na noino ma lisu ra det sa tokodos, ma ka det in nukpukus melet.

*A wasiso elelar un ara mani ra i raro*

<sup>8</sup> “Ra tu ino anunu tu noino mani, ra i sa ban raro ru ara. Pepetlai, ken ungangon pas a lam, ra in surupu a rumu, ma in sisio wakak ut suri, tuk ra in sio melet pasi?<sup>9</sup> Ra i sa sio pasi, in kabo tomo pas a kum paspasano ma det ra det kis milau, ra in watungi tandet lena, ‘Dat in gas, uni a sa sio melet pas ara mani ra a ban raro tari.’<sup>10</sup> A watungi tamot, lenkutkai ra a gasgas epotor nisan a kum ensel anun o God un ara tene sakino ra i nukpukus.”

*A wasiso elelar una musano aru nutnutunu*

<sup>11</sup> O Iesu i watungi lena, “Ara musano aru nutnutunu, aru nat musano.<sup>12</sup> A murmur i watungi tan o tamano lena, ‘Tita, un pitar tar anung a tinibo gusun anum a kum ululeng.’ Ra a tamander i isuaro tar anun a kum ululeng tander.<sup>13</sup> A iso bung bat tari kut, a murmur i ubek tomo pas anun a ululeng rop, ra i wan sur a tamon bakbak, ma i urop ru anun a ululeng una ngas na nilaun ra ke wakak.<sup>14</sup> Ra i sa urop ru a

ututna, a labino munurak i wanpat una tamon ra, ra i murak mo. <sup>15</sup> Ra i wan, ma i papam torom ara musano tagun a tamon ra. Ra a musano ra i tulu tari una nun in noworo na boro sur in tamtabor det. <sup>16</sup> I nemi sur in nan a kum pinino bin ra a kum boro det wanani sur in masur, ikut katu taio i tabori.

<sup>17</sup> “Ra a wakak na nuknuk i wanpat melet toromi, i watungi lena, ‘A kum tultul rop anun o tita det wangangon ma det masmasur pas kut gusun a kum utna. Ikut iau, kuri a mat nama munurak!’ <sup>18</sup> Uniri an katutur pas ra an milet melet sur o tita. An watungi tano lena, ‘Tita, a sa pam tar a sakino petutna torom o God ma torom ui kai. <sup>19</sup> Iau ka wakak mo sur un watung iau a nutumlik. Un ubek tar iau mukut sur an elar nam ara tagun anum a kum tultul.’”

<sup>20</sup> Ra i katutur pas ma i wan sur o tamano.

“Ra i bakbak utmakai, o tamano i sa tama pasi, ra in balano i tupukus nami. I kalabor toromi, i tal pasi ra i gom a wano. <sup>21</sup> Ra a nutunulik i watungi tano lena, ‘Tita, a sa pam tar a sakino petutna torom o God ma torom ui kai. Ka wakak mo sur un watung iau a nutumlik.’” <sup>22</sup> Ikut o tamano i watungi tan anun a kum tultul lena, ‘Aiapiap! Mot in los lakit tin namalu ra i wakak doko urin, ma mot in upipis tari nami. Mot in ubek tar a ring una lamano, ma mot in pas tari kai aru su un aru kikino. <sup>23</sup> Mot in nan, ma mot in dat pas tu barman na bulumakau ra i butbut urin, mot in um doko pasi, sur dat in nangon ma dat in gas tomo. <sup>24</sup> Uni a nutunglik ri i sa mat, ma iri i sa laun melet, i raro pas ma iri i sa wanpat melet.’ Ra a lukaro i turpasi.

<sup>25</sup> “Ikut a mugano nutunulik, i kis ut tiro una kinobot. Ra i wanpat tiro utamon milau a rumu, i longoro a tinangis na kaur ma a kekeleke na nilagor, <sup>26</sup> ra i kabo pas ara tultul, ra i tingi una kum utna ri. <sup>27</sup> Ra a tultul i inanosi lena, ‘O tisimlik i sa wanpat, ra o tamam i um doko pas a barman na bulumakau ra i butbut, uni der tamtama tomo melet, nama wakak na nilaun.’” <sup>28</sup> Ra o tisino a mugano i kankan, i putut kut, ke nemi sur in ruk. Ra o tamano i pirsor toromi, ra i umaromi. <sup>29</sup> Ikut i watungi tan o tamano lena, ‘Tama i! A susut na kilalo a sa papam torom ui elar nama tultul, ka rosumur una num a kum itula, ikut ko tabor tar iau mukut nam tu nat na meme lik, sur met in gas tomo nama kum paspasang. <sup>30</sup> Ikut ra

a nutumlik ri i wanpat, i ra i banlaulau ru anum a kum utna una kum pamuk na ino, u um doko pasi ut a barman na bulumakau ra i butbut suri.’” <sup>31</sup> Ra o Tamano i balu i lena, ‘Nutunglik, ui kuri ut u kis nisang, ma anung a kum ululeng rop, anumi ut. <sup>32</sup> I wakak sur dat in gas ma dat in nangon, uni o tisimlik ri i sa mat ma iri i sa laun melet, i raro pas, ma iri i sa wanpat melet.’”

## 16

*A wasiso elelar una tene tamtamabat ra i mananos*

<sup>1</sup> O Iesu i watung meleti tan anun a taro na ususer lena, “Ara tene gongon anuna ara tultul i tamtamabat anun a kum utna, ra di takuni lena i papam oros kut una kum utna anun a tene gongon ra. <sup>2</sup> I kabo pasi, ma i tingi lena, ‘Asau ra a longoro i un ui? Un tumus a wasiso talapor una num a pinapam na tamtamabat ma un pitari tang, uni kon tene tamtamabat melet mo anungi.’” <sup>3</sup> Ra a tene tamtamabat ra i nuknuk lena, ‘Asau mo ra an pami uniri, ra anung a mugumugu in rakon ru iau gusun a pinapam ri? Kalako dekdeking sur an kikil, ma an maimai kut kai ra an saring utna. <sup>4</sup> O! A sa nuk pas ara utna ra an pami, sur a taro det in gas pas iau una nundet a kum rumu, ra di sa lu ru tar iau gusun a pinapam ri.’

<sup>5</sup> “Ra i itula sur det rop taktakai ra det sa dinau pas tan anun a mugumugu. Ra i ting a mugano musano lena, ‘Aiso ra u dinau pasi tan anung a mugumugu?’” <sup>6</sup> Ra i balu i lena, ‘Ara mar na lamlabino koto na wel na oliw.’ Ma a tultul i watungi lena, ‘Un los anum a buk na dinau urin. Un kis ma un tumus lakit tar a limo na noino mukut uni.’” <sup>7</sup> Ra i tingi bulung ara, ‘Aiso ra u dinau pasi?’” <sup>8</sup> Ra i balu i lena, ‘Ara mar na bek na wit.’” <sup>9</sup> Ra i watungi tano lena, ‘Un los anum a buk na dinau urin. Un tumus tari mukut a tiwal na noino uni.’

<sup>8</sup> “Anun a labino i tasmani lena a tultul ri ke lingmulus una nun a pinapam, ikut i watung ulabo pasi kibino una nun a mananos ra i pam a torotoro ri nami. Uni a taro tagun a rakrakon bual, det mananos doko sur anundet a pinapam tomo nama taro tagun a rakrakon bual, ikut a taro tagun a talapor ka det mananos. <sup>9</sup> A watungi tamot, mot in umarom pas lako taro nama kum ululeng taginin upiso. Numur ra a kum ululeng ken gas mo sur tu utna, din gas pas

mot sur mot in kis una kum rumu ra det in tur tukum.

<sup>10</sup>“Osi ra i lingmulus una nat na utna kut, in lingmulus kai una kum lamlabino utna, ma osi ra ke lingmulus una nat na utna, ken lingmulus utkai una kum lamlabino utna.

<sup>11</sup>Ra ka mot lingmulus sur mot in papam wakak nama kum utna taginin upiso, osi kai in nurnur un mot sur mot in papam wakak nama kum utna tagisapat netes? <sup>12</sup>Ra ka mot tamtama wakak taru un tu utna anun taio, osi kai in pitar tar anumot tu utna torom mot? <sup>13</sup>Katu tultul in pet lar pasi sur in papam torom lako ru mugumugu. In nget ara pasander, ma in nem ara pasander, in nem doko ara ma in rosumur gusun ara. Ka mot in papam lar pas torom o God ma torom a mani kai.”

*A kum Warkurai anun o God ken rop  
(Mt 5:31-32; 19:9; Mk 10:11-12)*

<sup>14</sup>A kum Parisi det longoro a kum wasiso ri, ra det urongon laulau kut un o Iesu, uni det nem doko a mani. <sup>15</sup>Ra o Iesu i watungi tandet lena, “Mot, mot ukodos pas mot kut umatan a taro. Ikut o God i tasman a balamot. Uni a utna ra i labo doko umatan a taro i laulau doko umatan o God.

<sup>16</sup>“A kum Warkurai ma a kum etowo anun a kum poropet i tuk taru ut un o Jon. Turpasi una kilalo ra, di warawai nama Wakak na Wasiso una matanitu anun o God ma a taro rop det raras sur det in ruk uni. <sup>17</sup>Ke ngangitin sur a bakut ma a rakrakon bual der in rop, ikut i ngangitin doko sur tu nat na tumtumus lik in rop gusun a kum Warkurai anun o God.

<sup>18</sup>“Osi ra in lu ru anun a ino ma in nolin melet nam tu ino, a musano ra i pam a sakino torom anun a ino, uni i nolin melet nam a se ino. Ma osi ra in nolin nam tu ino ra anun a musano i lu ru i, i kai i pam a sakino, uni ausur a ino anunu.

*O Lasarus ma a tene gongon*

<sup>19</sup>“Ara tene gongon, i ememar nama kum wakak na malu, ma i ser wangon wakak una kum bungbung rop. <sup>20</sup>Di inep tar ara musano, a nat na soi, a tene sasaring, tiro umatansako tano, a risano o Lasarus, i wangangan a pinpinino. <sup>21</sup>I nemi sur in nan a kum mumumut na utna ra det puku taru gusun a kabulu na inangon anun a tene

gongon. Ma a kum pap det damdami kai a kum inangon una pinpinino.

<sup>22</sup>“Numur a nat na soi ra i mat, ra a kum ensel det los pasi ma det ukis tari upaporin o Abaram. Ra a tene gongon bulung i mat, ma di por ru i. <sup>23</sup>I kis una labino sungun, i taramo a labino ngunungut. I tatado usapat netes, ra i tama o Abaram i bakbak doko, ma o Lasarus kai kura una paporino. <sup>24</sup>Ra i kakabo lena, “Tita Abaram, un maris iau, un tulu ru o Lasarus sur in puk pas in kaskas na lamano una danim sur in ukotokoto tar in karmeng nami, uni a taramo a labino ngunungut nin una sungun.”

<sup>25</sup>“O Abaram i balu i lena, ‘Nutunglik, un nuk pasi, ra u laun utmakai, u pam ukai anum a kum wakak na utna, lenkutkai ra torom o Lasarus, i pam ukai a kum laulau na utna. Ikut uniri i utur ukai a gasgas nin, ma ui, u taramo a labino ngunungut. <sup>26</sup>Ma ara utna kai, in tarai na nala kuri epotor tamot ma met. Katutaio taginin in pet lar pasi sur in nan utiro torom mot, ma katutaio kai in nan tagitiro gusun mot urin torom met.’

<sup>27</sup>“Ra a tene gongon ra i watungi lena, ‘Tita, a saring ui sur un tulu ru o Lasarus sur a rumu anun o tamang. <sup>28</sup>Uni a limo na tistising a kum musano kura det uni, ma in utumarong tar det, sako det bulung det in nan urin una nubual na ngunungut ri.’ <sup>29</sup>Ra o Abaram i balu i lena, ‘A wasiso anun o Moses ma a kum poropet kura i kis torom det. I wakak sur det in longoro i.’ <sup>30</sup>A tene gongon ra i watungi lena, ‘Awu, Tita Abaram, ra ut ra taio tagun a kum minat in nanpat torom det, det in nukpukus.’ <sup>31</sup>Ra o Abaram i balu meleti lena, ‘Ra ka det longoro o Moses ma a kum poropet, ra taio kai in katatur melet gusun a minat, ken ukatur pas anundet a nurnur.’”

## 17

*A sakino petutna*

*(Mt 18:6-7, 21-22; Mk 9:42)*

<sup>1</sup>O Iesu i watungi tan anun a taro na ususer lena, “A kum utna in nanpat ut, ra in upuku a taro una sakino, ikut in laulau doko torom o naro ra i pam pat pasi. <sup>2</sup>In wakak toromi ra di sa kubus tar tu labino wat un in kabaranu, ma di sa woro murung tari usa utasi, sako in ben raro ara tagun a kum nat

\* 17:2: A wasiso Grik i lena “a kum natnatino”, a kukuraino lenri: a kum nat liklik, o det ra anundet a nurnur ke dekdek, o det ra a taro det tama pisopiso det.

liklik ri\* un tu sakino, ra kura numur in los a labino warkurai.

<sup>3</sup> “Mot in tumarong mot! Ra o tisimlik i pam a sakino, un wasiso dekdek toromi, ma ra i sa nukpukus, un dumano ru anun a niraro. <sup>4</sup> Ra i pam a sakino torom ui a wonom mawit na dino un ara bung, ma i wan torom ui a wonom mawit na dino ma i watungi tam lena, ‘A sa pam tar a sakino torom ui. Uniri a nukpukus.’ un dumano ru anun a niraro.”

#### *A nurnur*

<sup>5</sup> A kum aposel det watungi tana Labino, “Un ulabo pas anumet a nurnur.” <sup>6</sup> Ma a Labino i watungi lena, “Ra anumot a nurnur in natino elar nam in pitino mastad, mot in pet lar pasi sur mot in watungi tan in nanai ri lena, ‘Un taragot, ma un tur sa utasi!’ in muri kut anumot a wasiso.

#### *A pinapam anun a tultul*

<sup>7</sup> “Ra taio tagun mot anun a tultul i papam pas tiro ukinobot, o i tamtamabat tar a kum sipsip, ra i wanpat tagisa ubual, pepelai, un watungi mut tan anum a tultul lena, ‘Un nan urin, un kis ma un nangun?’ Awu. <sup>8</sup> Un watungi tano lenri, ‘Un emar pas, un waninar anga utna na inangun, ma un tabor iau, ra an nangun ma an inum. Ra numur ui bulung un nangun ma an inum.’ <sup>9</sup> Pepelai, a mugumugu in watung wakak torom a tultul ra i tarom toromi? Awu, uni anuna pinapam utra. <sup>10</sup> Lenkutkai ra torom mot, ra mot sa pam sot pas a kum utna di pitar tari tamot, mot in watungi lena, ‘Met a kum tultul oros kut, met pami kut anumet a pinapam.’”

#### *O Iesu i ulangolango pas a noino lepra*

<sup>11</sup> Ra o Iesu i wan nanan usapat o Jerusalem, i wan epotor tan aru papor Samaria ma o Galili. <sup>12</sup> I ruk una matansako ina tamon, ma det etorom nama noino musano ra det misait nama lepra. Det tur bakkak taru ut, <sup>13</sup> ma det kakabo dekdek lena, “Iesu, a Labino, un maris met.” <sup>14</sup> Ra o Iesu i tama det, i watungi tandet lena, “Mot in nan, ma mot in ese tar mot tan a kum tene etabor torom o God†.” Ra det wan nanan, det langolango mut. <sup>15</sup> Ara tagun det i tama i lena i sa langolango, i milet melet, ma i watung ulabo pas o God nam in labino walngano. <sup>16</sup> Ma i kis but keke

nisan aru kikin o Iesu ra i watung wakak toromi. A musano ra i a te Samaria. <sup>17</sup> O Iesu i tingi lena, “Pepelai, ka di ulangolango pas a noino rop? A lisu kai awai det mo? <sup>18</sup> I lai ra katutaio i milet melet sur in watung ulabo pas o God? Ikut a usiro lik ri.” <sup>19</sup> Ra i watungi tano, “Un katuttur, ma un nan. Anum a nurnur i sa ulangolango pas ui.”

#### *A inawan pat anun a matanitu anun o God (Mt 24:23-28, 37-41)*

<sup>20</sup> A ramano kum Parisi det ting o Iesu lena, “Nangisin a matanitu anun o God in nanpat?” Ra i balu det lena, “A matanitu anun o God ken nanpat nama kum ukinalong ra din tama i. <sup>21</sup> Ma ka din watungi lena, ‘Iri mi!’ o, ‘I mo ra i!’ Uni a matanitu anun o God kura ut un mot.”

<sup>22</sup> O Iesu i watungi tan anun a kum nat na ususer lena, “A du bung in nanpat ra mot in nemi sur mot in tama tar a bung tagun a kum bungbung anun a Nutun a Musano, ikut ka mot in tama i. <sup>23</sup> Lako taro det in watungi tamot lena, ‘Tama i, i mo ra i!’ o, ‘Kuri i nin!’ Gong mot mur tar det. <sup>24</sup> Uni una bung ra a Nutun a Musano in nanpat, a taro rop det in tama i. In elar nam in nememe, ra i meme i tagitong un ara papor maino, tuk un ara papor kai. <sup>25</sup> Ikut a Nutun a Musano in taramo mugu a susut na ngunungut, ma a taro tagun uniri det in rosumur gusuni.

<sup>26</sup> “A kum bungbung anun a Nutun a Musano in elar nama kum bungbung anun o Noa. <sup>27</sup> A taro det wangon, det inum, ma det unolin det, tuk una bung ra o Noa i kas una sip, ra in nabato i puku ma a lomom i wanpat ma det iru rop. <sup>28</sup> Lenkutkai ra una kum bungbung anun o Lot. A taro det wangon, ma det inum, det kukul, ma det siuru, det marut utna, ma det pam rumu. <sup>29</sup> Ikut una bung ra o Lot i wan gusun a tamon Sodom, a sungun ma a watat ra i kalop i puku tagisapat una bakut elar nam in nabato, ra det rop det iru uni.

<sup>30</sup> “In lenkutkai ra una bung ra a Nutun a Musano in nanpat puaso uni. <sup>31</sup> Una bung ra, ra taio in kis sapat netes una nun a rumu, gong i pirso sur in los pas anun a kum ututna tagisa urumu. Lenkutkai, ra taio in kis sa ukinobot, gong i milet melet unago utamon sur tu utna. <sup>32</sup> Mot in nuk

† 17:14: A ngasino anun a kum Juda i lenri: Osi ra a misait i rop gusuni, in nan in ese i torom a tene etabor torom o God, sur a tene etabor in tama i ra in upuaso i lena i sa langolango.

pas a ino anun o Lot. <sup>33</sup> Osi ra i nem doko i sur in maris bat anun a nilaun, in iru. Ikut osi ra ke maris bat anun a nilaun, in laun. <sup>34</sup> A watungi tamot, una bung na mirum ra, ra lako ru der in inep un ara bat, din los pas tu pasander kut, ma ara pasander awu. <sup>35-36</sup> Ra lako ru ino kai der in gino tomo a wit, din los pas tu pasander kut, ma ara pasander awu.” † <sup>37</sup> Ma a kum nat na ususer det tingi lena, “Labino, a kum utna ri in nanpatawai?” Ra i balu det lena, “A nubual ra a minat i inep uni, a kum kotkot det in nan tomo iai.”

## 18

*A wasiso elelar una ula ma a tene warkurai*

<sup>1</sup> O Iesu i watung a wasiso elelar torom anun a kum nat na ususer sur in ese det lena, det in wararing bolbolos, ma gong a pinindet i ngoro. <sup>2</sup> I watungi lena, “Ara tene warkurai i kis una ara tamon, ke ngara sur o God, ma ke nuk pas a taro kai. <sup>3</sup> Ara ula tagun a tamon ra, i wan liklik mukut toromi, ma i ser saringi lena, ‘Un ukodos tar iau tomo nama nung a ebar una numir a maut.’ <sup>4</sup> I sa suanoi ma ke tarom toromi, ra numur i nuki lena, ‘A lingmulus, ka ngara sur o God, ma ka ser nuk pas a taro, <sup>5</sup> ikut, an tama i sur an ukodos a ula ri, uni i utukidis liklik iau, sako in ungoro iau nama inawan pat liklik nin.’”

<sup>6</sup> A Labino i watungi tan a kum nat na ususer lena, “Mot in longoro a wasiso anun a tene warkurai ra ke lingmulus una nun a pinapam. <sup>7</sup> Pepetlai, o God ken ukodos anun a taro na pipilok, ra det tangis toromi una kum waspi ma una kum mirum kai? Pepetlai, ken warut lakit det? <sup>8</sup> A watungi tamot, in ukodos lakit det. Ikut, ra a Nutun a Musano in nanpat, pepetlai, in etorom pas lako taro ut nin upiso ra det nurnur uni o awu?”

*A wasiso elelar una Parisi ma a tene los takis*

<sup>9</sup> O Iesu i watung a wasiso elelar ri torom det ra det nurnur ut un det lena, det a kum tene tokodos, ma det nuk natino pas a taro rop. <sup>10</sup> “Aru musano der wan usapat una rumu na etabor sur der in wararing. Ara pasander a Parisi, ma ara pasander kai a tene los takis. <sup>11</sup> A Parisi i tur ma i wararing ut uni lenri, ‘God, a watung wakak torom

ui, uni ka elar nam ara taro kai, a kum tene wolong, det ra ka det tokodos, ma a kum musano ra det pam sakino una wardain, ma ka elar kai nama tene los takis ri i. <sup>12</sup> A ser wewel aru bung un ara wik, ma a ser pitar arara utna tagun ara noino utna ra a pam pat pasi.’” <sup>13</sup> Ikut a tene los takis i tur gisen taru, ke tatado usapat netes una langit, uni i maimai. I raprapusi kut a romrobono nama tupunuk, ma i watungi lena, ‘God, un maris iau, a tene sakino iau.’ <sup>14</sup> A watungi tamot, a musano ri, ra i milet melet sur anun a rumu, i sa tokodos umatan o God, ma ara pasander awu. Uni det rop ra det ulabo pas det, din unatino det. Ma osi ra i unatino pasi, din ulabo i.”

*Det turbat a kum nat liklik gusun o Iesu*

(Mt 19:13-15; Mk 10:13-16)

<sup>15</sup> A taro det los a kum nat liklik torom o Iesu sur in ubek aru lamano sapat netes un det. Ra anun a kum nat na ususer det tama i lenra, det turbat det. <sup>16</sup> Ikut o Iesu i kabo pas a kum nat liklik toromi, ra i watungi lena, “Mot in madek ru a kum nat liklik sur det in nan torom iau. Gong mot turbat det, uni a matanitu anun o God anundet ra det lenri. <sup>17</sup> A inanos mot nama lingmulus, osi ra ken ruk una matanitu anun o God elar nama natlik, ken ruk lar pas.”

*A tene gongon*

(Mt 19:16-30; Mk 10:17-31)

<sup>18</sup> Ara mugumugu i ting o Iesu lena, “Wakak na Tene Ususer, asau ra an pami sur an rakon a nilaun tukum?” <sup>19</sup> O Iesu i balu i lena, “Sur asau ra u watung iau lena a wakak? Katutaio i wakak, o God sot kut. <sup>20</sup> U tasman a kum Warkurai: ‘Gong u pam a sakino un tu ino anun taio, gong u um doko taio, gong u wolong, gong u etakun torotoro, un ru o tamam ma o nam.’” *Kisim Bek 20:12-16*

<sup>21</sup> A musano ra i balu i lena, “Turpasi ra a natlik utmakai tuk uniri, a ser mur a kum Warkurai rop ri.” <sup>22</sup> Ra o Iesu i longoro i, i watungi tano lena, “Ara utna mukut ra kabaut u pami. Un siuru ru anum a kum utna rop, ra a mani taguni, un tabor a kum sibo na taro nami. Ra un pami lenra, anum a wakak na ululeng kuspapat una langit. Numur un nan urin ma un mur iau.”

<sup>23</sup> Ra i longoro a wasiso ri i tupunuk doko, uni i a tene gongon sakit. <sup>24</sup> O Iesu i tama i,

† 17:35-36: Una ramano kum du buk una wasiso Grik, a ramano kum wasiso kai i kis una dino ri. I lenri: Ra lako ru musano der in papam sa ukinobot, din los pas tu pasander kut, ma ara pasander awu.

ra i watungi lena, “I ngangitin doko torom a kum tene gongon sur det in ruk una matanitu anun o God. <sup>25</sup>In ngangitin sur a kamel in ruk una mato na sur na susuk, ikut, i ngangitin doko ut, sur a tene gongon in ruk una matanitu anun o God. I lingmulus, ken pet lari.”

<sup>26</sup>Ra det longoro a wasiso ri, det iting lena, “Ra i lenra, osi mo ra din ulauni?” <sup>27</sup>O Iesu i balu det lena, “Asau ra a taro ka det pet lar pasi, o God in pet lar pasi.”

<sup>28</sup>O Pita i watungi tano lena, “Tama i, met sa wan gusun anumet a kum utna rop, ra met mur ui.” <sup>29</sup>O Iesu i watungi tandet lena, “A inanos mot nama lingmulus, ra taio in nan gusun anun a rumu, o gusun anun a ino, o a kum tistisino, o gusun o nano, o gusun o tamano, o a kum nutnutunu, kibino una matanitu anun o God, <sup>30</sup>una nilaun ri, din tabori nama susut na utna lenri ra i sa wan pas gusuni. Ma una nilaun numur din tabori nama nilaun tukum.”

*O Iesu i mantul u wasiso una nuna minat  
(Mt 20:17-19; Mk 10:32-34)*

<sup>31</sup>O Iesu i ben gisen pas anun a noino ma aru nat na ususer, ra i watungi tandet lena, “Tama i, iri dat wan nanan usapat o Jerusalem, ma din pam sot pas a kum utna rop ra a kum poropet det sa tumus tari una Nutun a Musano. <sup>32</sup>Uni din pitar tari torom det ra ausur a taro Juda. Det in urongon laulau uni, det in banlaulau i, det in ibisi, det in mirasi, ma det in um doko i. <sup>33</sup>Ra a tulu bung in rop, in katatur melet.” <sup>34</sup>A kum nat na ususer ka det talapor una kum utna rop ri. A kukuraino kura i parau, ma ka det tasman asau ra o Iesu i wasiso uni.

*O Iesu i utamtama pas a pulu  
(Mt 20:29-34; Mk 10:46-52)*

<sup>35</sup>Ra o Iesu i wan milau o Jeriko, ara musano a pulu i kis taru una papor ina kisapi, i ser saring utna. <sup>36</sup>I longoro a kunur na taro det wan nanan milau, ra i iting lena, “Asau ra?” <sup>37</sup>Ra det inanosi lena, “O Iesu a te Nasaret ri i wan sakit dat.” <sup>38</sup>Ra i kakabo sapat lena, “Iesu, a Nutun o Dewid, un maris iau.” <sup>39</sup>Det ra det mugu, det turbati sur in kis wowowon. Ikut i kakabo dekdek makai usapat lena, “Nutun o Dewid, un maris iau.” <sup>40</sup>O Iesu i tur sikot, ra i itula sur din ben pasi toromi. Ra a pulu i sa wan milau toromi, i tingi lena, <sup>41</sup>“Asau ra i nemi sur an pami un ui?” I balu i lena, “Labino, a nemi sur an tamtama.” <sup>42</sup>Ra o Iesu i watungi tano

lena, “Un tamtama! Anum a nurnur i sa utamtama pas ui.” <sup>43</sup>Uniutra i tamtama, i mur o Iesu, ra i watung ulabo pas o God. Ma a taro rop kai ra det tama i, det watung ulabo pas o God.

## 19

*O Iesu ma o Sakias*

<sup>1</sup>O Iesu i ruk utiro na tamon Jeriko, sur in nan sakit usapat o Jerusalem. <sup>2</sup>Ra ara musano i kis tiro iai, a risano o Sakias, a mugumugu anun a kum tene los takis, ma i a tene gongon. <sup>3</sup>I nemi sur in tama o Iesu, ikut o Sakias a kukur na musano kut, ma ke pet lar pasi sur in tama i, kibino una kunur na taro. <sup>4</sup>Ra i kalabor utong numugu, ra i ka toto un in nanai, sur in tama o Iesu, uni in nan sakit una kisapi ra.

<sup>5</sup>Ra o Iesu i wanpat tiro iai, i tatado usapat netes un in nanai, ra i watungi tano lena, “Sakias, un pirso lakit urin. Uniri an kis tomo nam ui una num a rumu.” <sup>6</sup>Ra i pirso lakit, ra i ben pas o Iesu utiro una nun a rumu nama gasgas. <sup>7</sup>A taro rop det tama i, ra det ururai uni lena, “A musano ri i wan sur in kis tomo nama tene sakino una nun a rumu.”

<sup>8</sup>O Sakias i tur ra i watungi tan a Labino lena, “Tama i, Labino, ara kukur utna tagun anung a ululeng an tabor a kum sibo na taro nami. Ra a sa toro pas lako utna tan taio, an balu meleti toromi a wat na dino.” <sup>9</sup>Ra o Iesu i watungi tan o Sakias lena, “Uniri, di sa ulaun pas det ra det kis una rumu ri, uni o Sakias kai tagun a kum tumtubun o Abaram. <sup>10</sup>Uni a Nutun a Musano i wanpat sur in sisio sur det ra det raro ma in ulaun pas det.”

*A wasiso elelar una kum tultul ra di pitar tar a mani torom det  
(Mt 25:14-30)*

<sup>11</sup>A taro det longoro a kum wasiso ri, ra det nuki lena a matanitu anun o God in nanpat lakit, uni o Iesu i sa milau o Jerusalem. Ra i watungi kai ara wasiso elelar <sup>12</sup>lena, “Ara mugumugu i wan sur ara tamon bakbak, sur din mulaot tari sur in king, ra numur in millet melet. <sup>13</sup>Numugu tan anun a inawan, i kabo pas anun a noino tultul toromi, ra i pitar tar ara ra kukur mani tandet, ra i watungi lena, ‘Mot in ulabo i, tuk una bung ra an millet melet uni.’ <sup>14</sup>Ikut a taro tagun anun a tamon det ngeti, ra det tulu ru ara taro sur det in muri, ma

det watungi lena, 'Ka met nem a musano ri sur in king anumet.'

<sup>15</sup> "Ra di sa ukis tari sur in king, i milet melet. I itula sur anun a kum tultul ra i pitar tar a mani tandet, sur in mananos una sau ra i sa wanpat una anundet a pinapam. <sup>16</sup> Ma a mugano i wan toromi ra i watungi lena, 'Labino, anum a mani a sa pam pat pas a noino melet taguni.' <sup>17</sup> I balu i lena, 'Wakak sakit, ui a wakak na tultul! An ubek tar ui sur un warkurai a noino lamlabino tamon, uni u lingmulus una nat na utna.' <sup>18</sup> Ara bulung i wan toromi ra i watungi lena, 'Labino, anum a mani a sa ulabo pas a limo melet.' <sup>19</sup> Ra i balu i lena, 'Ui kai un tamtamabat a limo na lamlabino tamon.' <sup>20</sup> Ma ara tultul bulung i wan toromi ra i watungi tano lena, 'Labino, anum a mani i melet mo ri, a pulus tari nam in namalu ra a ubek eno wakak tari. <sup>21</sup> A ngaran ui, uni ui a tene ngalngalia. U los a utna ra ausur u ubek tari, ma u ser pasong pas a utna ra ko marut tari.' <sup>22</sup> A labino i watungi tano lena, 'Ui a laulau na tultul, an warkurai ui elar nama num a wasiso ut. U sa tasman tari lena iau a tene ngalngalia. A ser los a utna ra ausur a ubek tari, ma a pasong a utna ra ka marut tari. <sup>23</sup> Ilai ra ko ubek tar anung a mani una beng sur an los pas anung a mani ma tu sibano kai una bung ra an nanpat uni?"

<sup>24</sup> "Ra i watungi tandet ra det tur milau taru tiro iai lena, 'Mot in los ru a mani gusuni, ma mot in pitar tari torom o naro ra anun ara noino.' <sup>25</sup> Ma det watungi tano lena, 'Labino, i anun ara noino kura mo tano.' <sup>26</sup> I balu det lena, 'A watungi tamot, osi ra a susut kura tano, din tabor meleti nama susut. Ikut osi ra kalako, din rakon ru i utkai asau lik ra kura tano.

<sup>27</sup> " 'Ra mot in ben pas anung a kum ebar ra ka det nemi sur an king anundet, mot in um doko det nin ut umatang.' "

*O Iesu i wan usapat o Jerusalem elar nama king*

(Mt 21:1-11; Mk 11:1-11; Jn 12:12-19)

<sup>28</sup> Ra o Iesu i sa watung tar a wasiso elelar ri, i mugu melet usapat o Jerusalem. <sup>29</sup> Ra i wanpat sapat o Betpage ma o Betani una tangai di watungi nama Tangai na Oliw, i tulu aru tagun anun a kum nat na ususer, nama wasiso lenri, <sup>30</sup> "Mur in nan sur a tamon kusa numugu tamur. Ra mur in nanpat, mur in tama ara barman na dongki

kura di ker ukai tari, ma katutaio utmakai i kas taru uni. Mur in palos pasi ma mur in beni urin. <sup>31</sup> Ra taio in ting mur lena, 'Mur palosi sur asau?' mur in watungi tano lena, 'A Labino i nemi.' "

<sup>32</sup> Der wan ra der pastorom a kum utna rop ra o Iesu i sa watung tari tander. <sup>33</sup> Ra der palos pas a barman na dongki, det ra anundet a dongki, det ting der lena, "Ai, mur palos a barman na dongki ra sur asau?" <sup>34</sup> Der balu det lena, "A Labino i nemi."

<sup>35</sup> Ra der beni torom o Iesu, der rakon ru anunder aru saket, ma der ubek tari netes una barman na dongki ma der ukis tar o Iesu netes uni. <sup>36</sup> Ra i wan nanan, ara taro det rakon ru anundet a kum saket, ma det talaso i una kisapi. <sup>37</sup> Ra i sa milau una kisapi ra i wan piroso una Tangai na Oliw, a labino gasgas i los a taro na ususer rop ma det watung ulabo pas o God una kum utna na ukisin ra det sa tama i. Det watung ulabo pasi nama labino walngandet lena,

<sup>38</sup> "A king ra i wanpat nama risan a Labino i dan! *Buk Song 118:26*

A malmal sapat una langit, ma o God ra i kis sapat netes a minamar anunu i labo sakit!"

<sup>39</sup> A ramano kum Parisi epotor una kunur na taro ra, det watungi lena, "Tene Ususer, un turbat anum a taro na ususer." <sup>40</sup> Ra o Iesu i balu det lena, "A watungi tamot, ra a taro ri ka det in ugaia, a kum watat ut det in kukukuk."

*O Iesu i tangis sur o Jerusalem*

<sup>41</sup> Ra o Iesu i sa milau o Jerusalem ra i tama i, i tangis suri, ra i watungi lena, <sup>42</sup> "Gunuk ra uniri, mot sa tasman tar a kisapi ra i topas a malmal! I parau umatamot! <sup>43</sup> Tu bung in nanpat, ra anumot a kum ebar det in utur in noworo talilis bat anumot a tamon, det in tur talilis mot ma det in turbat anumot a kum kisapi na rukruk ma pispiso, ma det in um mot gusun a kum papor ino. <sup>44</sup> Ma det in rege ginogino ru a tamon, ma det in um doko mot kai ra mot kis uni. Ma ka det in madek tar tu wat in inep netes un tu wat, uni ka mot tasman lele a du bung ra o God i wanpat uni torom mot."

*O Iesu i ruk una rumu na etabor*

(Mt 21:12-17; Mk 11:15-19; Jn 2:13-22)

<sup>45</sup> O Iesu i ruk unin noworo na rumu na etabor, ra i lu piroso ru a taro ra det siuru. <sup>46</sup> Ra i watungi tandet lena, "Di sa tumus tari

una Buk Tabu lenri, 'Din watung anung a rumu nama rumu na niaring.' *Aisaia 56:7* Ikut, mot sa pam pukus pasi sur in elar mukut nama 'nubual na parparau anun a kum tene wolong.' ” *Jer 7:11*

<sup>47</sup> Una kum bungbung rop, o Iesu i ser ususer a taro una rumu na etabor. Ikut a kum lamlabino tene etabor torom o God, ma a kum tene ususer tagun a Warkurai ma a kum mugumugu anun a taro, det nuknuk sur tu kisapi sur det in um doko i uni. <sup>48</sup> Ikut det lagano nuknuk taru sur tu utna ra det in pami, uni a labino kunur na taro det nem doko i sur det in longoro a wasiso anun o Iesu.

## 20

*Det ting o Iesu una dekdek ra i ser papam nami*

(*Mt 21:23-27; Mk 11:27-33*)

<sup>1</sup> Ara bung o Iesu i ususer a taro una rumu na etabor, ma i warawai nama Wakak na Wasiso, ra a kum lamlabino tene etabor torom o God, ma a kum tene ususer tagun a Warkurai tomo nama kum mugumugu det wan toromi. <sup>2</sup> Ra det watungi tano lena, “Un inanos met, asi na ngas na dekdek ra u pam a kum utna ri nami? Osi ra i pitar a dekdek ri tam?” <sup>3</sup> O Iesu i balu det lena, “Iau kai an ting mot nam ara iting. Mot inanos iau. <sup>4</sup> Tagai a dekdek ra o Jon i baptaiso a taro nami? Tan o God, o tan a taro kut?” <sup>5</sup> Ra det wasiso etetalai torom det lena, “Ra dat in watungi lena, ‘Tan o God,’ in balu dat kut lena, ‘Sur asau ra ka mot nurnur uni?’ <sup>6</sup> Ikut ra dat in watungi lena, ‘Tan a taro,’ a taro rop det in duku doko dat, uni det nurnur un o Jon lena i a poropet.” <sup>7</sup> Ra det balu i kut lena, “Ka met tasmani tagai i.” <sup>8</sup> Numur o Iesu i watungi tandet lena, “Iau kai kan inanos mot una dekdek ra a ser pam a kum utna ri nami.”

*A wasiso elelar una taro na pinapam una kinobot na wain*

(*Mt 21:33-46; Mk 12:1-12*)

<sup>9</sup> O Iesu i watung a wasiso elelar ri tan a taro lena, “Ara musano i marut tar a kinobot na wain, ra numur i pitar tari munung tan a ramano kum tene pinapam sur det in tamtamabati, ra i wan taru gusun det, ma i suano bat pasi tiro iai. <sup>10</sup> Ra a kalang i sa sot sur din git tomo a wino wain,

i tulu ru ara tultul torom a taro na pinapam, sur lako wino wain tagun anun a kinobot sur anunu kai. Ikut a taro na pinapam det umi, ma det tulu oros melet ru i kut. <sup>11</sup> I tulu melet ara tultul torom det, ikut det um meleti, det ban umaimai tari, ma det tulu oros melet ru i kut. <sup>12</sup> Numur i tulu melet a mantul na tultul, ra det um laulau tari, ma det woro pirso ru i. <sup>13</sup> Ra a taman a kinobot i watungi lena, ‘Asau mo ra an pami? An tulu ru a nutunglik, a nat na wakak. Kutiro det in urur uni.’ <sup>14</sup> Ikut, ra a taro na pinapam det tama pasi, det wasiso tomo pas lena, ‘I ra in keles o tamano, i mo ra i wan urin. Mot iap, dat in um doko i, sur anundat mo a kinobot.’ <sup>15</sup> Ra det sugut pirso ru i tagun a kinobot, ma det um doko ru i.

“Asau mo a taman a kinobot na wain ra in pami un det? <sup>16</sup> In nanpat ma in um doko ru a taro na pinapam, ma in pitar tar a kinobot ra torom lako taro gisen, sur det in tamtamabati.” Ra a taro det longoro a wasiso ri, det watungi lena, “Awu, ken lenra!” <sup>17</sup> Ikut o Iesu i nas det, ra i watungi lena, “Asau mo a kukurain a wasiso ri ra di sa tumus tari una Buk Tabu?

‘A wat ra a kum tene pam rumu det lakro ru tari,  
i ut ra, a wakak na wat ra i udekdek a rumu.’ *Buk Song 118:22*

<sup>18</sup> Det rop ra det puku taru una wat ri, det in tiginogino, ma osi ra a wat ri in puku taru uni, in tiginogino rop elar nama kubus.”

<sup>19</sup> A kum tene ususer tagun a Warkurai ma a kum lamlabino tene etabor torom o God det sisio sur tu kisapi sur det in pam ukai pas o Iesu una du bung utra, uni det tasmani lena i watung a wasiso elelar ri un det. Ikut det ngaran a taro.

*A iting una takis*

(*Mt 22:15-22; Mk 12:13-17*)

<sup>20</sup> A kum tene ususer tagun a Warkurai ma a kum lamlabino tene etabor torom o God det tama sursuri, ma det tulu ru a kum tene torotoro ma det toro lena det a lingmulus na taro. Ra det kis na usobor sur tu wasiso ra o Iesu in watung tari ra det in takuni nami, sur det in pitar tari una warkurai ma una dekdek ina mugumugu tagun a matanitu Rom. <sup>21</sup> Ra det watungi lena, “Tene Ususer, met tasmani lena i tokodos anum a wasiso ma anum a etowo. A magiram i takai kut torom a taro rop, ma

\* 20:22: A Sisa i a labino mugumugu una gapman Rom, ma a taro Israel kai det kis utuntudu ina nun a warkurai.

u ususer det una kisapi anun o God nama lingmulus. <sup>22</sup> Pepetlai, i tokodos sur dat in pitar a takis torom a Sisa \* o awu?" <sup>23</sup> O Iesu i sa tasman ru anundet a torotoro, ra i watungi tandet lena, <sup>24</sup> "Mot in ese iau nam tu mani. In masarin osi ri, ma a tumtumus ri uni anun osi?" Det balu i lena, "Anun a Sisa." <sup>25</sup> Ra i watungi tandet lena, "Asau ra anun a Sisa, mot in pitari torom a Sisa. Ma asau ra anun o God, mot in pitari torom o God." <sup>26</sup> Ma ka det usobor lar pasi umatan a taro nama wasiso ra. Det kisin doko una nun a minabalu, ma katu wasiso mo anundet.

*A iting una nilaun melet gusun a minat  
(Mt 22:23-33; Mk 12:18-27)*

<sup>27</sup> A ramano kum Sadusi, ra det ser ipul kut lena katu nilaun melet gusun a minat, det wan torom o Iesu, ma det tingi lena, <sup>28</sup> "Tene Ususer, o Moses i tumus tari tan dat lena, ra tu musano in mat pas gusun anun a ino, ma katu nutunder, o tisinolik in ben pasi ra in nolin nami, sur in ulabo tar lako kum nat una risan o tisinu. <sup>29</sup> Ara kabo tisinu, a wonom mawit na musano det. A mugano i nolin, ra i mat pas gusun anun a ino, ma katu nutunder. <sup>30</sup> Ra a murmur tano bulung i nolin nama ino ra, ma i bulung i mat kut gusuni. <sup>31</sup> Numur a mantul nami bulung i nolin nama ino ra. I lenkutkai ra, a wonom mawit det rop, det nolin pas nami, ma det mat kut. Ikut a ino ra ke usus tar tu nat un det. <sup>32</sup> Ra numur a ino bulung i mat. <sup>33</sup> Una nilaun melet gusun a minat, a ino ra, anun osi na pasandet? Uni a wonom mawit rop, det sa nolin pas nami."

<sup>34</sup> O Iesu i watungi tandet lena, "A taro tagun a kum kilalo ri det nolnolin. <sup>35</sup> ikut a taro ra det tokodos sur det in katutur melet gusun a minat, ma det in laun una nilaun numur, ka det in nolin melet mo. <sup>36</sup> Ma ka det in mat melet, uni det elar muket nama kum ensel. Det a kum nutnutun o God, uni det sa laun melet gusun a minat. <sup>37</sup> O Moses i ese i lena a kum minat det katutur melet. Una wasiso na Buk Tabu un in nanai ra i kunabor, o Moses i watung a Labino lena, 'A God anun o Abaram, a God anun o Aisak ma a God anun o Jekop†.' *Kisim Bek 3:6* <sup>38</sup> O God ausur a God anun a kum minat, i a God anundet ra det laun, uni umatano det rop det laun." <sup>39</sup> Ra a ramano kum tene ususer tagun a Warkurai det watungi

lena, "Tene Ususer, anum a wasiso i wakak doko." <sup>40</sup> Ma ka det wan melet mo toromi nam tu iting, uni det ngara.

*A Karisito i a Labino anun o Dewid  
(Mt 22:41-46; Mk 12:35-37)*

<sup>41</sup> O Iesu i watungi tandet lena, "Ilai ra di watungi lena a Karisito i a nutun o Dewid? <sup>42</sup> Uni o Dewid ut i watungi una Buk Song una Buk Tabu lena,

'A Labino i watungi torom anung a Labino, "Un kis una papor sot na lamang, <sup>43</sup> tuk ra an winim pas anum a kum ebar sur det in kis utuntudu ina num a warkurai." ' *Buk Song 110:1*

<sup>44</sup> O Dewid i watung a Karisito lena i anun a Labino. Ra i lenra, der tamano pepetlai?"

*O Iesu i utumarong a taro una petutna  
anun a kum tene ususer tagun a Warkurai  
(Mt 23:1-36; Mk 12:38-40; Lk 11:37-54)*

<sup>45</sup> Ra a taro rop det longoro o Iesu, i watungi tan anun a kum nat na ususer lena, <sup>46</sup> "Mot in tumarong mot gusun a kum tene ususer tagun a Warkurai. Det nemi sur det in nan tuptupukus nama kum wakak na ememar, ma det nemi kai sur a taro det in pitar a labino urur torom det una kum nubual na inawan tomo. Ma det nem a kinkinis sa numugu una kum rumu na lotu, ma a kinkinis na labino sa numugu una kum lukaro. <sup>47</sup> Det ser urop a kum ululeng anun a kum ula, ma det ser pam a kum walalos na niaring sur a taro det in tama det. In labo doko a warkurai na minabalu anun o God torom det."

## 21

*A etabor anun a ula  
(Mk 12:41-44)*

<sup>1</sup> O Iesu i kis una rumu na etabor, i tam-tama usa, ra i tama a kum tene gongon det wororo tar anundet a etabor una dinu ra di ser woro mani uni. <sup>2</sup> Ra i tama ara sibo na ula kai i woro tar aru toia kut. <sup>3</sup> Ra o Iesu i watungi lena, "A inanos mot nama lingmulus, a sibo na ula ri, i woro a labino mani taun det rop ra det woro anundet a kum mani. <sup>4</sup> Det woro tari kut a sibano tagun anundet a kum mani, ikut a sibo na ula ri, i sa woro rop ru asau ra in to pas anun a kinkinis."

*A kum ukinalong ina tintinip na bung  
(Mt 24:1-14; Mk 13:1-13)*

† 20:37: A wasiso ri i ese i lena o Abaram, o Aisak ma o Jekop detul mat ikut uniri detul laun.

<sup>5</sup> A ramano kum nat na ususer det watungi una rumu na etabor lena, di sa mar tari nama kum wakak na wat ma a kum etabor ra di pitari torom o God. Ikut o Iesu i watungi lena, <sup>6</sup> “A kum utna ri, ra mot tamtama det, a bung in nanpat numur ra din rege ginogino det rop, ma katu wat in inep netes un tu wat.”

<sup>7</sup> Det ting o Iesu lena, “Tene Ususer, nangisin mo a kum utna ri in nanpat? Ma asi na ukinalong ra in ese i lena i sa milau sur det in nanpat?” <sup>8</sup> I balu det lena, “Mot in tumarong, sako din toro pas mot. Uni a susut det in nanpat nama risang, ma det in warango det lena, ‘Iau a Karisito,’ ma lena, ‘A du bung i sa milau.’ Gong mot mur det. <sup>9</sup> Ra mot in longoro a kum inaim ma a kum inaim tomo nama gapman, gong mot ngara, uni a kum utna ri det in nanpat mugu, ikut a tintinip ina rakrakon bual ken nanpat utmakai.”

<sup>10</sup> O Iesu i watungi tandet lena, “A kum kabotaro det in tur na inaim torom a kum se kabotaro, ma ara gapman in tur na inaim torom ara gapman. <sup>11</sup> A kum lamlabino guri, ma a kum munurak ma a kum ngas na dekdek na misait una kum tamtamon, ma a kum ngas na utna ra in ungara a taro tagisapat una bakut, ma a kum lamlabino ukinalong tagisapat una bakut, det in nanpat.”

<sup>12</sup> “Numugu ra a kum utna ri ka det wanpat utmakai, din dat pas mot, din ukadik mot, ma din dat mot una kum rumu na lotu sur a warkurai, ma din uruk mot una kum karabus. Ma din dat pas mot sur a warkurai usa numugu umatan a kum king, ma a kum lamlabino mugumugu, uni mot anungi. <sup>13</sup> I ra a wakak na du bung, sur mot in wasiso talapor un iau torom det. <sup>14</sup> Numugu tano, gong mot nuknuk mugu sur asau ra mot in balu lako kum etakun nami. <sup>15</sup> Uni iau ut, an unuk tar a wasiso ma a mananos kai una nuknukimot, ra anumot a kum ebar rop, ka det in balu lar pasi, ma ka det in ipul ru i. <sup>16</sup> A kum tamtamamot ma a kum nanamot, a kum tistisimot, a kum kukumot, ma a kum paspasamot, det in mulaot ru mot sur din um doko lako taro tagun mot. <sup>17</sup> A taro rop det in nget mot uni mot anungi. <sup>18</sup> Ikut ka tin iwu na lorimot in raro. <sup>19</sup> Anumot a tuntunur dekdek in ulaun mot.

*O Iesu i watungi lena din kamar ru o*

### *Jerusalem*

*(Mt 24:15-21; Mk 13:14-19)*

<sup>20</sup> “Ra mot in tama a kum taro na inaim det tur talilis pas o Jerusalem, mot in tasmani lena i milau sur din kamar ru i. <sup>21</sup> Ma det ra det kis una papor Judia, det in kalabor eno usapat una kum tangai, ma det ra det kis una tamon Jerusalem det in pirso, ma det ra det kis sa ubual gong melet mo det ruk. <sup>22</sup> Uni a kum bungbung ra, det a kum bungbung na minabalu sur din pam sot pas a kum ututna rop ra di sa tumus tari una Buk Tabu. <sup>23</sup> Una kum bungbung ra, in laulau doko torom a kum tianan, ma torom a kum ino kai ra a kum nutnutundet, det sus utmakai. A labino ngunungut in nanpat una tamon Israel, ma a kankan anun o God in monong a taro ri. <sup>24</sup> Lako taro din um doko det nama totok na inaim, ma lako taro din ben pas det sur det in kis na karabus una kum tamtamon rop. Ma det ra ausur a taro Juda det in pas tataun o Jerusalem, ma in tuk ut una bung ra o God i kubus tari sur a taro ra ausur a taro Juda det in mana nama banlaulau a taro Juda.

*A Nutun a Musano in nanpat*

*(Mt 24:29-31; Mk 13:24-27)*

<sup>25</sup> “A kum ukinalong in nanpat sapat netes un in matanas, ma una kalang, ma una kum nangngang. Ma nin upiso a kum kankabo taro det in laulau nama nginara una karangop ina top ma a wungu ino, ma a nuknukindet kai in talara uni. <sup>26</sup> A taro det in matmat lalang nama nginara kibino una kum utna ra in nanpat una rakrakon bual, uni a kum utna sapat netes una bakut det in tugunugunu. <sup>27</sup> Una bung ra, det in tama a Nutun a Musano in nanpat una du bakut, nama dekdek ma a labino minamar. <sup>28</sup> Ra a kum utna ri in turpasi sur in nanpat, mot in tur, ma mot in tatado, uni a bung ra o God in ulaun pas mot uni i sa milau.”

*A wasiso elelar un in nanai na fig*

*(Mt 24:32-35; Mk 13:28-31)*

<sup>29</sup> O Iesu i watung a wasiso elelar ri tandet lena, “Mot in nuk melet pas in nanai na fig ma a kum duwai rop. <sup>30</sup> Ra mot tama a kum gomgomono det in sibil pat, mot tasmani lena a kum kalang na mararong i sa milau. <sup>31</sup> Lenkutkai, ra mot in tama a kum utna ra a wasiso taru uni in nanpat, mot in tasmani lena a matanitu anun o God i sa milau. <sup>32</sup> A inanos mot nama lingmulus, a kum utna rop ri in nanpat ra a taro tagun uniri det

laun utmakai. <sup>33</sup> A langit ma a rakrakon bual der in rop, ikut anung a kum wasiso ken rop.

*Mot in tumarong mot*

<sup>34</sup> “Mot in tumarong mot, sako mot in balon nama pam lukaro ma a ininum, ma a nginara sur a kum utna una nilaun nin upiso, ma a bung ra in nanpat kisin torom mot elar nam in nukun. <sup>35</sup> Uni in nanpat torom a taro rop una rakrakon bual. <sup>36</sup> Mot in tumarong mot una kum bungbung rop, mot in wararing sur mot in dekdek sur mot in walip gusun a kum utna rop ri ra milau det in nanpat. Ma mot in wararing kai sur mot in pet lar pasi sur mot in tur umatan a Nutun a Musano.”

<sup>37</sup> Una kum bungbung rop o Iesu i ususer a taro una rumu na etabor, ma una kum mirum i pirso, ma i kis una tangai, a risano o Oliw. <sup>38</sup> Ma una kum bungbung na kobot raut, a taro rop det wan toromi una rumu na etabor sur det in longoro i.

## 22

*O Judas i mulaot sur in pitar tar o Iesu torom a kum ebar*

(Mt 26:1-5, 14-16; Mk 14:1-2, 10-11; Jn 11:45-53)

<sup>1</sup> I sa milau a labino bung na lotu na beret ra kalako is uni, di watungi nama labino bung na lotu na Wanlakai. <sup>2</sup> Ra a kum lamlabino tene etabor torom o God, ma a kum tene ususer tagun a Warkurai, det nuknuk sur tu ngas na kisapi sur det in um doko o Iesu uni, uni det ngaran a taro.

<sup>3</sup> Ra o Satan i ruk taru un o Judas, ara risano kai o Iskariot, i ara tagun a noino ma aru nat na ususer. <sup>4</sup> I wan torom a kum lamlabino tene etabor torom o God, ma a kum mugumugu anun a kum tene tamtamabat una rumu na etabor, ra i wasiso tomo nam det sur in pitar petlan tar o Iesu torom det. <sup>5</sup> Det gas, ma det watungi lena det in kuli nam tu mani. <sup>6</sup> O Judas i mulaot, ra i nuknuk sur tu wakak na du bung, ra kalako susut na taro, ra in pitar tar o Iesu ulamandet.

*Aru nat na ususer der waninar a utna na Wanlakai*

(Mt 26:17-25; Mk 14:12-21; Jn 13:21-30)

<sup>7</sup> A labino bung na lotu na beret ra kalako is uni i wanpat, ra di ser um doko a kum sipsip uni sur din nani una labino bung na lotu na Wanlakai. <sup>8</sup> Ra o Iesu i tulu ru o Pita

ma o Jon, ma i watungi tander lena, “Mur in nan ma mur in waninar andat a utna sur a labino bung na lotu na Wanlakai.” <sup>9</sup> Ra der tingi lena, “U nemi sur mir in waninari awai?” <sup>10</sup> I balu der lena, “Ra mur in nanpat sapat o Jerusalem, mur in etorom nam ara musano i los in labino koto na danim, ra mur in muri utiro una rumu ra in ruk uni. <sup>11</sup> Ma mur in watungi tan a taman a rumu lena, ‘A Tene Ususer i watungi lena: Awai i a kukur rumu ra met nam anung a kum nat na ususer, met in nan a utna na Wanlakai iai?’ <sup>12</sup> Ma in ese tar mur una labino kukur rumu sapat netes, ra di sa waninar tari. Mur in waninar a utna tiro iai.” <sup>13</sup> Ra der wan, ma der pastoromi ut a kum utna rop ra o Iesu i sa watung tari tander. Ra der waninar a utna na Wanlakai.

*A tintinip na inangon anun a Labino*

(Mt 26:26-30; Mk 14:22-26; 1Kor 11:23-25)

<sup>14</sup> Ra a du bung i sa sot, o Iesu ma a kum aposel det kis una inangon. <sup>15</sup> Ra o Iesu i watungi tandet lena, “A nem doko i sur dat in nan a utna na Wanlakai, ra ka taramo i utmakai a ngunungut, <sup>16</sup> uni a watungi tamot lena, kan nan melet mo tu utna na Wanlakai tuk una bung ra o God in pam sot pas a kukurai ina Wanlakai una nun a matanitu.”

<sup>17</sup> O Iesu i los pas a kap ma i watung wakak pas uni, ra i watungi tandet lena, “Mot in los pas a kap ri, ma mot rop mot in inum taguni. <sup>18</sup> Uni a watungi tamot lena, kan inum melet mo lako wain, tuk ra a matanitu anun o God in nanpat.”

<sup>19</sup> Ra i los pas a beret, i watung wakak pas uni, i tibiki, ma i tabor det nami, ra i watungi lena, “Iri a pining, a pitari sur mot. Mot in pampami lenri, sur mot in ser nuk melet pas iau.” <sup>20</sup> Lenkutkai ra, numur tan a inangon, i los pas a kap ma i watungi lena, “A kap ri, a matok na kunubus tagun a gaping ra i tilingis sur mot, ra i dat tomo tar a taro nam o God. <sup>21</sup> Tama i! A laman o naro ra in pitar tar iau torom a kum ebar, kuri mir rarakon tomo una kabulu na inangon. <sup>22</sup> A lingmulus ut ra a Nutun a Musano in mat elar nam o God i sa kubus tari. Ikut in laulau sakit torom a musano ra in pitar tari torom a kum ebar.” <sup>23</sup> Ra det ting etetalai det lena, “Osi mo tagun dat in pam a utna ri?”

*Osi ra i labo taun det?*

<sup>24</sup> Det engaras sur osi tagun det din watungi lena i labo taun det. <sup>25</sup> Ra o Iesu i watungi tandet lena, "A kum king anun a taro ra ausur a taro Juda, det kuro laulau det, ma anundet a kum mugumugu det nemi sur din watung det lena det a kum wakak na tene warut. <sup>26</sup> Ikut torom mot ken lenra. Osi ra i labo taun mot in elar kut nami ra i natino, ma osi ra i mugumugu in elar kut nami ra i ser tartaromlu. <sup>27</sup> Osi ra i labo? O naro ra i kis una inangon, o, o naro ra i tartaromlu i? I ut ra i kis una inangon, niko? Ikut iau, a kis epotor tamot elar nami ra i ser tartaromlu.

<sup>28</sup> "Mot, mot tur tomo nam iau una kum mamaut ra i wanpat torom iau. <sup>29</sup> Ma an pitar tar a kinkinis na king tamot elar nam o Tita i sa pitar tari tang, <sup>30</sup> sur mot in nangon ma mot in inum una nung a kabulu una nung a matanitu. Ma mot in kis una kum kiskis na king, ra mot in warkurai a noino ma aru kabotaro Israel."

*O Iesu i wasiso mugu lena o Pita in ipul ru i (Mt 26:31-35; Mk 14:27-31; Jn 13:36-38)*

<sup>31</sup> O Iesu i watungi lena, "Saimon, Saimon, tama i, o Satan i sa sasaring pas sur in lar mot, elar nama tene minarut ra i tangtang susuaro a wit mulus gusun a pinino. <sup>32</sup> Ikut a sa wararing taru sur ui, Saimon, sur gong anum a nurnur i puku. Ra u sa nukpukus melet, un udekdek a kum tistisim." <sup>33</sup> O Pita i watungi tano lena, "Labino, a sa waninar taru, sur an nan tomo nam ui una karabus, ma una minat." <sup>34</sup> Ma o Iesu i balu i lena, "Pita, a watungi tam, uniri a kereke ken kurkurirakuk utmakai, ra un ipul a tulu dino lena, ko tasman iau."

*Det in los a paus na umubek mani, a rat ma in totok na inaim*

<sup>35</sup> Numur o Iesu i ting anun a kum nat na ususer lena, "Ra a tulu ru mot, ma katu paus na umubek mani anumot, o tu rat, o tu su, pepetlai, mot sibo ut sur tu utna?" Ra det balu i lena, "Awu." <sup>36</sup> Ra o Iesu i watungi tandet lena, "Ikut uniri, osi ra anunu tu paus na umubek mani, i wakak sur in losi ut, ma a rat kai. Ma osi ra ka tin totok na inaim, i wakak sur in siuru ru an a saket sur in kul pas tino. <sup>37</sup> A watungi tamot, din pam sot pas a tumtumus ri un iau, 'Di watung tomo det nama kum tene sakino.' Aisaia 53:12

Uni a kum utna ri di sa tumus tari un iau, milau mo din pam sot pasi." <sup>38</sup> Ra a kum nat na ususer det watungi lena, "Tama i, Labino, arin totok na inaim kuri ut." Ra o Iesu i balu det lena, "I elar kut."

*O Iesu i wararing*

*(Mt 26:36-46; Mk 14:32-42)*

<sup>39</sup> O Iesu i pirso gusun a tamon, ra i wan usapat una Tangai na Oliw, elar ut nami ra i ser pami. Ra a kum nat na ususer det muri. <sup>40</sup> Ra det wanpat una nubual ra, i watungi tandet lena, "Mot in wararing, sur gong mot puku una ululam." <sup>41</sup> I wan gisen lilik taru kut gusun det, i kis butkeke, ma i wararing lena, <sup>42</sup> "Tita, ra u nemi, un los ru a kap na mamaut ri gusun iau. Ikut gong u mur anung a nemnem, un muri ut anum a nemnem." [<sup>43</sup> Ra ara ensel tagisapat una langit i wanpat toromi, ma i udekdek tari. <sup>44</sup> I taramo a dekdek na tupunuk, ra i dekdek doko nama niaring. Ma a misongot na pinino i elar nama tutu na gap i puku pirso utiro upiso.] \*

<sup>45</sup> I urop a niaring ra i tur, i milet melet torom a kum nat na ususer, ra i tama det ra det sa inep dumun, uni a pinindet i tungulu nama tupunuk. <sup>46</sup> Ra i watungi tandet lena, "Ilai ra mot inep dumun kut? Mot in katuttur, ma mot in wararing, sur gong mot puku una ululam."

*Di dat pas o Iesu*

*(Mt 26:47-56; Mk 14:43-50; Jn 18:3-11)*

<sup>47</sup> Ra o Iesu i wasiso utmakai, a labino kunur na taro det wanpat. Ra o Judas, ara tagun a noino ma aru nat na ususer, i mugu pas det. I wan torom o Iesu sur in gom a pangpagor na wano. <sup>48</sup> Ra o Iesu i tingi lena, "Judas, pepetlai, un pitar tari mo a Nutun a Musano torom a kum ebar, nama egom?"

<sup>49</sup> Det ra det wan tomo nam o Iesu det tasman asau ra in nanpat, ra det tingi lena, "Labino, pepetlai, met in waim nama numet a kum totok na inaim?" <sup>50</sup> Ma ara tagun det i tau kutus ru in nosot na talngan a tultul anun a mugumugu na tene etabor torom o God.

<sup>51</sup> Ra o Iesu i turbati lena, "Gong!" Ra i pam in talngan a tultul, ma in talngano i wakak melet. <sup>52</sup> O Iesu i wasiso torom a kum lamlabino tene etabor torom o God, ma a kum mugumugu anun a kum tene tamtamabat tagun a rumu na etabor, ma a

\* 22:44: Una ramano kum du buk una wasiso Grik, aru dino 43 ma 44 ka der kis.

kum mugumugu anun a taro ra det wanpat suri. I watungi lena, “PePETlai, kutiro iau a tene inaim ma a tene wolong, sur i mo ri mot wanpat nama kum totok na inaim ma a kum nalnal sur iau?”<sup>53</sup> Una kum bungbung rop dat ser kis tomo una rumu na etabor ma ka mot pam ukai iau. Iikut uniri anumot a du bung, ra a dekdek ina dumirum i mugu mot.”

*O Pita i ipul ru o Iesu*

(Mt 26:57-58, 69-75; Mk 14:53-54, 66-72; Jn 18:12-18, 25-27)

<sup>54</sup> Det pam ukai pas o Iesu, ra det ben gisen ru i. Det beni utiro una rumu anun a mugumugu na tene etabor torom o God. Ra o Pita i mur nanan o Iesu, ikut i bakbak ut gusuni. <sup>55</sup> Ra det sa tagol tar a sungun nago utamon, ma det kis tomo, o Pita kai det ut. <sup>56</sup> Ara toraro, a tultul, i tama pasi ra i kis taru una talapor ina sungun, ra i nas dekdeki, ma i watungi lena, “A musano ri, i ser wan tomo utkai nam o Iesu.” <sup>57</sup> Iikut o Pita i ipul lena, “Le, ka tasman o Iesu.” <sup>58</sup> Numur lilik kut, ara bulung i tama pas o Pita ra i watungi lena, “Ui kai tagun det.” Ra o Pita i balu i lena, “Le, iau awu.”

<sup>59</sup> Numur lilik melet, ara bulung i ngongos lena, “A lingmulus ut, a musano ri i ser wan tomo utkai nam o Iesu, uni i a te Galili.” <sup>60</sup> O Pita i balu i lena, “Le, ka tasman asau ra u wasiso uni.” Ra i wasiso utmakai, uniuutra a kereke i kurkurirakuk mut. <sup>61</sup> A Labino i tupukus, i tamtama tokodos torom o Pita, ra o Pita i nuk pas a wasiso anun a Labino ra i sa watung tari tano lena, “Uniri, a kereke ken kurkurirakuk utmakai, ra un ipul a tulu dino lena, ko tasman iau.” <sup>62</sup> Ra i pirso gusun a nubual ra, i tangis dokodoko i.

*Di urongon laulau un o Iesu ma di mirasi*

(Mt 26:67-68; Mk 14:65)

<sup>63</sup> Det ra det tamtamabat o Iesu, det urongon laulau uni, ma det mirasi. <sup>64</sup> Det pulus bat pas arin matano, ma det watungi tano lena, “Ui a poropet, un inanos met, osi ra i takalo ui!” <sup>65</sup> Ma det mang sakosako i nama susut na wasiso utkai.

*O Iesu i tur umatan a taro na kiwung*

(Mt 26:59-66; Mk 14:55-64; Jn 18:19-24)

<sup>66</sup> Ra i waspi, a kum mugumugu anun a taro, a kum lamlabino tene etabor torom o God, ma a kum tene ususer tagun a Warkurai det wan tomo. Ma di ben pas o Iesu torom det una nundet a kiwung, ma

det watungi tano lena, <sup>67</sup> “Ra ui a Karisito, un inanos met.” Ra o Iesu i balu det lena, “Ra an inanos mot, ka mot in nurnur una nung a wasiso. <sup>68</sup> Ma ra an ting mot nam tu iting, ka mot in balu i. <sup>69</sup> Iikut, tur pasi uniri, a Nutun a Musano in kis una papor sot na laman o God, i ra i dekdek sakit.” <sup>70</sup> Ra det rop det ting o Iesu lena, “Ui a Nutun o God niko?” Ma i balu det lena, “Mot sa watung sot pasi, iau ut ri.” <sup>71</sup> Ra det watungi lena, “Dat nem melet lako wasiso na etakun sur asau? Uni dat sa longoro tar anun a wasiso ri.”

## 23

*O Iesu i tur una warkurai numugu tan o Pailat*

(Mt 27:1-2, 11-14; Mk 15:1-5; Jn 18:28-38)

<sup>1</sup> A taro na kiwung rop det tur, ra det ben o Iesu torom o Pailat. <sup>2</sup> Ra det turpasi sur det in takuni lena, “Met pastorom a musano ri i ben raro anumet a taro. I turbat met sur gong met pitar a takis torom a Sisa, ma i warango i kai lena, i a Karisito, a king.” <sup>3</sup> O Pailat i tingi lena, “Ui a king anun a taro Juda?” Ra o Iesu i balu i lena, “I ut ra u sa watung tari.” <sup>4</sup> O Pailat i watungi tan a kum lamlabino tene etabor torom o God ma a kunur na taro lena, “Ka tikin pas tu petutna a musano ri i raro uni.” <sup>5</sup> Iikut, det ngongos makai lena, “Anun a ususer i ukatutur a balan a taro, sur det in kutus a warkurai anun a gapman una papor Judia rop. I turpasi tong o Galili ra i tuk taru ut nin.”

*O Iesu i tur una warkurai umatan o Erod*

<sup>6</sup> Ra o Pailat i longoro i, i iting un o Iesu lena, “I a te Galili?” <sup>7</sup> Ra i sa tasmani lena o Iesu tagitong una papor Galili, ra o Erod i mugumugu iai, i tulu ru i toromi. Una bung ra, o Erod kai i kis sapat o Jerusalem.

<sup>8</sup> Ra o Erod i tama pas o Iesu, i gas doko, uni tagun numugu utmakai i nemi sur in tama i, uni i sa longoro tar a wasiso uni, ra i nemi sur in tama tu utna na ukisin ra in pami. <sup>9</sup> Ma o Erod i ting o Iesu nama susut na iting, ikut o Iesu ke balu i. <sup>10</sup> A kum lamlabino tene etabor torom o God ma a kum tene ususer tagun a Warkurai kura det tur tiro iai, det takun dekdek o Iesu. <sup>11</sup> O Erod ma anun a taro na inaim det urongon laulau uni, det nongoni, det mar tari nam in wakak na malu sakit, ra det tulu melet ru i torom o Pailat. <sup>12</sup> Numugu o Erod ma

o Pailat der ebar, ikut una bung ra, der emarom maragom.

*O Pailat i warkurai o Iesu sur in mat  
(Mt 27:15-26; Mk 15:6-15; Jn 18:39-19:16)*

<sup>13</sup> O Pailat i kabo tomo pas a kum lam-labino tene etabor torom o God, ma a kum mugumugu, ma a taro, <sup>14</sup> ra i watungi tandet lena, “Mot sa ben tar a musano ri torom iau, elar nam ara ra i ukatur a balan a taro, sur det in kutus a warkurai anun a gapman. Ra iri a sa ting tari umatamot, ma ka tikin pas tu petutna ra a musano ri i raro uni. <sup>15</sup> Ma o Erod kai, ke pastorom tu petutna, ra i tulu melet ru i urin torom dat. Tama i, ke pam tar tu utna sur in iru uni. <sup>16-17</sup> An miras tatari kut, ra an palos ru i.\*

<sup>18</sup> Ra a taro rop det kukukuk lena, “A musano ri in iru. Palos ru o Barabas torom met.” <sup>19</sup> O Barabas i ara musano ra di uruk tari una karabus, uni i waim nama gapman una tamon Jerusalem, ma i ser um doko a taro kai. <sup>20</sup> O Pailat i ting melet det, uni i nemi ut sur in palos ru o Iesu. <sup>21</sup> Ikut, det kukukuk dekdek kut lena, “Sak wati un in nanai kutus! Sak wati un in nanai kutus!” <sup>22</sup> Ra i mantul nami i ting det lena, “Asau a kibino? Asi na laulau na utna ra i sa pam tari? Ka pastorom tu sakino petutna sur in iru uni. An miras tatari kut, ra an palos ru i.” <sup>23</sup> Ikut, det dekdek nama kukukuk nama labino walngandet, sur din sak wati mukut un in nanai kutus. Ra det kukukuk tataan a wasiso anun o Pailat. <sup>24</sup> Ra o Pailat i mulaot mukut sur din pami elar nama nundet a nemnem. <sup>25</sup> Ra i palos ru o Barabas ra i kis una karabus, uni i waim nama gapman ma i um doko a taro, i ra det sasaring suri. Ma i pitar tar o Iesu tan a kum tene inaim elar nama nemnem anun a taro.

*Di sak wat o Iesu un in nanai kutus  
(Mt 27:32-44; Mk 15:21-32; Jn 19:17-27)*

<sup>26</sup> Ra det ben pas o Iesu sur din sak wati un in nanai kutus, det dat pas ara te Sairini, a risano o Saimon, ra i wan tagitong un ara tamon sur in nan usapat o Jerusalem. Ra det ubek tar in nanai kutus usapat netes uni, sur in los murmur o Iesu nami.

<sup>27</sup> A labino kunur na taro det mur o Iesu. Epotor tandet a wardain utkai, ra det tupunuk ma det tangisi. <sup>28</sup> O Iesu i

tupukus, ma i watungi tandet lena, “A wardain Jerusalem, gong mot tangis iau, mot in tangis mot ut, ma a kum nutnutumot. <sup>29</sup> Uni a kum bungbung na mamaut in nanpat ra a taro det in watungi lena, ‘A kum pobo na ino, ra ka det usus ma ka det ugu nat, det dan.’ <sup>30</sup> Ma

‘det in watungi torom a kum tangai lena, “Mot in puku sapat netes un met!”

ma torom a kum du tultul lena, “Mot in por met †!” ’

*Os 10:8*

<sup>31</sup> Ra det pam a kum utna ri ra in nanai i laun utmakai, asau det in pami ra i sa marang? ‡”

<sup>32</sup> Ma aru kai, aru laulau na musano, di ben der tomo nam o Iesu sur din sak wat der tomo nami.

<sup>33</sup> Ra det wanpat una nubual ra di watungi nama, “Nubual na Lor na Minat,” tiro iai det sak wat o Iesu un in nanai kutus, ma aru sakino musano kai, ara una papor sot, ma ara kai una kair. <sup>34</sup> Ra o Iesu i watungi lena, “Tita, un unus ru anundet a sakino petutna, uni ka det tasman asau ri det pami.” Ma det pilai laki sur det in isuaro anun a kum malu torom det taktakai.

<sup>35</sup> A taro det tur ra det ieli, ma a kum mugumugu det urongon laulau un o Iesu, det watungi lena, “I ulaun pas a taro gisen. Ra i a Karisito anun o God, anun a nat na pipilok, i wakak sur in ulaun pasi ut.” <sup>36</sup> Ma a kum tene inaim kai det urongon laulau uni. Det wan toromi, det pitar tar a wain ra i mititir tano, <sup>37</sup> ra det watungi lena, “Ra ui a king anun a taro Juda, uniri un ulaun pas ui mo.” <sup>38</sup> Di tumus tari kai a tumtumus sapat netes un in nanai kutus lena,

“IRI I A KING ANUN A TARO JUDA.”

<sup>39</sup> Ara tagun aru sakino musano ra der kete tomo nam o Iesu, i watung laulau i kut o Iesu lena, “Ui a Karisito, niko? Un ulaun pas ui ma mir kai!” <sup>40</sup> Ma ara pasander i kankan toromi, ra i watungi lena, “Pepetlai, ui ko ngara sur o God? Uni ui kai u los ara ngas na warkurai kut elar nami. <sup>41</sup> I tokodos ut un dar, uni dar los a minabalu una nundar a sakino petutna. Ikut, a musano ri ke pam tu niraro.” <sup>42</sup> Ra i watungi tan o Iesu lena, “Iesu, nuk pas iau, ra un ruk una num a matanitu.” <sup>43</sup> Ma i balu i lena, “A inanos ui

\* 23:16-17: Una ramano kum du buk una wasiso Grik, a ramano kum wasiso kai i kis una dino ri. I lenri: *Un ara ra labino bung na lotu na Wanlakai, o Pailat i ser palos ru ara musano gusun a karabus torom a taro.* † 23:30: Det wasiso lenri uni det los a labino maut ra det ling sur det in mat lakit. ‡ 23:31: In nanai i laun utmakai i ukinalong o Iesu, ma in nanai ra i marang i ukinalong a sakino taro. § 23:43: A Paradais i a wakak na tamon anundet ra det nurnur. Ra det in mat det in kis iai.

nama lingmulus, uniri un kis tomo nam iau una Paradais<sup>8</sup>.”

*O Iesu i mat*

(Mt 27:45-56; Mk 15:33-41; Jn 19:28-30)

<sup>44</sup> Ra in matanas i kis lekeleke, a bual rop i dumirum tuk una tulu pakano bung una lirop, <sup>45</sup> uni in matanas ke sisio. Ra in namalu ra di mabat kutus nami sa urumu una rumu na etabor i tararos potor sur aru dino. <sup>46</sup> Ra o Iesu i kukuk dekdek lena, “Tita, a pitar tar a niong un aru lamam.” Ra i sa watung tari lenri, i mat. <sup>47</sup> A mugumugu anun a kum tene inaim i tama a utna ri, ra i watung ulabo pas o God lena, “I lingmulus ut, a musano ri a tene tokodos.” <sup>48</sup> A kunur na taro kura det tur tomo taru sur det in tama a utna ri. Ra det tama i, det raprapus a kum romrobondet nama tupunuk ra det milet melet. <sup>49</sup> Ikut, a kum paspasan o Iesu, ma a wardain ra det muri tagitong o Galili, det tur bakbak taru ut, ma det tama a kum utna ri.

*Di inep o Iesu una kulam na minat*

(Mt 27:57-61; Mk 15:42-47; Jn 19:38-42)

<sup>50-51</sup> Ara musano, a risano o Josep, tagitong o Arimatia una papor Judia. I ara wakak na musano, ma a tene tokodos, ma i kiskis langlang sur a matanitu anun o God. I ara tagun a taro na kiwung, ikut, ke mulaot tomo nam det una nundet a warkurai ma una utna ra det pami. <sup>52</sup> I wan torom o Pailat ma i saring pas a minat in o Iesu tano. <sup>53</sup> I los pirso pasi, i pulus pasi nam in wakak na malu, ra i inep tari una kulam na minat, ra di sa kil tari una papor wat, ra katu minat utmakai i inep taru uni. <sup>54</sup> A bung ra, a bung na waninar, ma milau mo a Bung na Sabat in turpasi.

<sup>55</sup> A wardain ra det wan tomo nam o Iesu tagitong o Galili, det mur o Josep, ra det tama tar a kulam na minat, ma a ngas na ininep ra di pami una minatin o Iesu. <sup>56</sup> Ra det milet melet, ma det waninar pas a kum utna ra i sangsangnain wakak, ma a wel ra i sangsangnain kai. Ma una Bung na Sabat, det mana elar ut nama warkurai.

## 24

*O Iesu i katuttur melet gusun a minat*

(Mt 28:1-10; Mk 16:1-8; Jn 20:1-10)

<sup>1</sup> Ra i kobot raut, una mugano bung una wik, a wardain det los a kum utna ra i sangsangnain wakak ra det sa waninar pasi, ra det wan utiro una kulam na minat. <sup>2</sup> Ma

det pastoromi ra di sa bulus gisen ru a wat gusun a matansako na kulam na minat.

<sup>3</sup> Det ruk, ikut ka det tama i mo a minatin a Labino o Iesu. <sup>4</sup> Ra a nuknukindet i lokolokor utmakai uni, uniuira, aru musano, anunder arin namalu i pilpil doko, der wanpat torom det. <sup>5</sup> Det ngara, ra det tudung piso ma a masarindet unago piso. Ikut, der watungi tandet lena, “Ilai ra mot sisio sur a lalaun ino nin nisan a kum minat? <sup>6</sup> Ke kis mo nin, i sa katuttur melet. Mot in nuk pas a wasiso ra i sa watung tari tamot, ra i kis utmakai tomo nam mot tong o Galili. <sup>7</sup> I sa watung tari lenri, ‘Din pitar tar a Nutun a Musano una laman a laulau na taro, ma din sak wati un in nanai kutus. Ra a tulu bung in rop in katuttur melet.’”

<sup>8</sup> Ra det nuk melet pas a wasiso anun o Iesu.

<sup>9</sup> Ra det milet melet gusun a kulam na minat, det inanos una kum utna rop ri torom a noino ma ra nat na ususer ma torom det rop kai, ra det ser mur o Iesu. <sup>10</sup> A wardain ra det inanos a kum aposel det ri: O Maria Magdalen, o Joana, ma o Maria o nan o Jems, ma a ramano kum ino kai, ra det wan tomo nam detul. <sup>11</sup> Ikut, a kum aposel det longoro a wasiso anun a wardain elar nama wasiso oros kut, ma ka det nurnur un det. <sup>12</sup> Ikut o Pita i tur, i kalabor sur a kulam na minat. I par pirso, ra i kiet ma i tama a kum malu mukut, det inep gisen taru. Ra i milet melet, ma i nuknuk doko o asau ri i wan pat.

*A inawan utong o Emaus*

(Mk 16:12-13)

<sup>13</sup> Una bung ut ra, aru tagun det ra det ser mur o Iesu, der wan sur a tamon a risano o Emaus. A bakbak ino i elar nama noino ma ara kilomita tagisapat o Jerusalem. <sup>14</sup> Ra der wan nanan der wasiso etalai torom der una kum utna rop ri, ra i sa wanpat taru. <sup>15</sup> Ra der wasiso ma der ting etalai der una kum utna ri, o Iesu ut i wanpat torom der, ma detul wan tomo. <sup>16</sup> Ikut ara utna i pulus bat arin matander ra ka der tama lele pasi.

<sup>17</sup> O Iesu i ting der lena, “Asau ri mur wasiso nanan uni una numur a inawan?” Der tur taru kut ra der tamtama na tupunuk. <sup>18</sup> Ma ara pasander a risano o Kliopas, i tingi lena, “Ui mukut ara musano ra u kis na usiro sapat o Jerusalem, ma ko tasman a kum utna ri ra i wanpat sapat una kum bungbung ri?” <sup>19</sup> Ra i ting der lena, “A kum utna na sau?” Ma der balu i lena, “A kum utna un o Iesu a te Nasaret. I ara poropet,

ra i ser pam a kum dekdek na pinapam, ma anun a wasiso kai i dekdek, umatan o God ma a taro rop. <sup>20</sup> A kum lamlabino tene etabor torom o God ma anundat a kum mugumugu det pitar tari una warkurai sur in mat, ma di sak wati un in nanai kutus. <sup>21</sup> Ikut, met nurnur uni lena, i ra, in ulangolango a taro Israel. Ma ara utna kai, i sa tulu bung bat tar a kum utna ri det pami. <sup>22</sup> Ma i kai ri, a ramano kum ino tagun met, det ukisin met. Det wan kobot sur a kulam na minat, <sup>23</sup> ikut ka det tama a minat ino. Ra det milet melet, det watungi lena, det tama tar aru ensel una tamtama, ra der watungi lena i sa laun. <sup>24</sup> Numur ara taro kai tagun met, det wan pas tiro una kulam na minat, ra det tama tar a utna ri, lenkutkai ra a kum ino det inanos nami, ikut ka det tama o Iesu.”

<sup>25</sup> Ra o Iesu i watungi tander lena, “Mur longlong kut. Nangisin mur in nurnur una kum wasiso rop ra a kum poropet det sa watung tari?” <sup>26</sup> Det watungi lena, a Karisito in taramo a kum ngunungut ri, ra numur in ruk una nun a minamar.” <sup>27</sup> Turpasi una kum buk anun o Moses ma a kum poropet rop, o Iesu i papalos torom der una kum utna, ra di sa tumus tari uni ut, una Buk Tabu. <sup>28</sup> Ra detul wan milau sur a tamon ra der wan suri, o Iesu i lari sur in nan sakit kut. <sup>29</sup> Ma der turbat dekdeki lena, “Un kis tomo nam mir, uni i sa lirop. In matanas i ling na sup mo.” Ra detul ruk ma i kis tomo nam der.

<sup>30</sup> Ra detul kis sur detul in nangan, o Iesu i los pas a beret, i watung wakak pas uni, i tibik pasi, ma i tabor der nami. <sup>31</sup> Ra a matander i tapalos, ra der tama lele pasi maragom, ra i rorom pas mut gusun der. <sup>32</sup> Ra der wasiso etalai torom der lena, “I lingmulus ut, in balandar i pirok nama gasgas ra i wasiso torom dar, ra datul wan una kisapi ma i palos tar a wasiso na Buk Tabu torom dar.”

<sup>33</sup> Uniutra, der katutur ma der milet melet usapat o Jerusalem, ra der wan torom a noino ma ra nat na ususer ma ara taro kai ra det kis tomo. <sup>34</sup> Det watungi lena, “A lingmulus ut! A Labino i sa katutur melet, ma i tur pat torom o Saimon.” <sup>35</sup> Ra der inanos un asau ra i wanpat torom der una kisapi, ma una nunder a tamtama lele kai uni, ra i tibik a beret.

*O Iesu i tur pat torom anun a kum nat na*

*ususer*

*(Mt 28:16-20; Mk 16:14-18; Jn 20:19-23; Ap 1:6-8)*

<sup>36</sup> Ra der wasiso utmakai una kum utna ri, o Iesu ut i tur epotor tandet, ma i watungi tandet lena, “A malmal torom mot.” <sup>37</sup> A pinindet i sursurin ma det ngara doko, det nuki lena, a nion kut ra det tama i. <sup>38</sup> Ma i watungi tandet lena, “Ilai ra mot ngara? Ma ilai ra mot wur nuknuk?” <sup>39</sup> Mot in tama aru lamang ma a aru kiking. Iau mulus ut ri. Mot in tuk iau, ma mot in tama iau. A nion kalako pinino, ma kalako sursur kai. Ikut a pining ut ma a suring utkai, ra uniri mot tama i.” <sup>40</sup> Ra i sa watung tari lenri, i ese aru lamano ma a aru kikino tandet. <sup>41</sup> Det gas ma det kisin, ikut ka det nurnur utmakai. Ma i ting det lena, “Katu utna kuri sur an nani?” <sup>42</sup> Ma det tabori nama lik kiripo ra di sa tun tari. <sup>43</sup> Ra i rakon pasi, ma i wani umatandet.

<sup>44</sup> Ma i watungi tandet lena, “Ra a kis utmakai tomo nam mot, a sa inanos tar mot lenri: A kum utna rop ra di sa tumus tari un iau, una kum Warkurai anun o Moses, una wasiso anun a kum poropet ma una Kum Kelekele anun o Dewid din pam sot ropi.” <sup>45</sup> Ra o Iesu i utalapor a nuknukindet sur det in talapor una Buk Tabu. <sup>46</sup> I watungi tandet lena, “Di sa tumus tari lenri: A Karisito in iru, ra a tulu bung in rop, in katutur melet gusun a minat, <sup>47</sup> ma din warawai una risano torom a kum kamkabo taro rop turpasi sapat o Jerusalem. Din warawai torom det lena, det in nukpukus ma o God in unus ru anundat a kum sakino petutna. <sup>48</sup> Mot a kum tene wasiso una kum utna ri mot sa tama tari. <sup>49</sup> Tama i, i ra o Tita i sa uliliman taru uni, an tulu ru i torom mot. Ikut mot in kis ut nin una tamon ri, tuk ra din mar tar mot nama dekdek tagisapat netes.”

*O Iesu i wan toto usapat una langit*

*(Mk 16:19-20; Ap 1:9-11)*

<sup>50</sup> Numur i ben pirso pas det gusun a tamon Jerusalem, ra det wanpat un ara nubual milau o Betani, ra i kodos aru lamano, ma i watung udan det. <sup>51</sup> Ra i watung udan det utmakai, i wan gusun det, ra o God i ben toto pasi usapat una langit. <sup>52</sup> Det lotu toromi, ra det milet melet usapat o Jerusalem nama labino gasgas. <sup>53</sup> A kum bungbung rop det kis tiro una rumu na etabor, det ser watung ulabo pas o God.

## A Wakak na Wasiso un o Iesu Karisito o Jon i tumusi

### *A wasiso talapor mugu*

O Jon i ara tagun a noino ma aru nat na ususer anun o Iesu (tama Mt 4:21). I tama a kum utna ra o Iesu i pami ma i longoro anun a kum etowo. I tumus a buk ri numur tan a tulu buk ra o Matiu, o Mak ma o Luk detul tumusi. I tumus a buk ri uni i nemi lena dat in tasma o Iesu ma dat in nurnur uni, ma un o Iesu kut dat in laun tukum, tama Jon 20:31.

Ara labino utna ra o Jon i nem na inanos dat uni, i lenri: O Iesu i a God ma i a Nutun o God. Una turturkibin a buk ri, i wasiso talapor un o Iesu lena, i a God ma unarap utmakai i kis tomo nam o God. I inanos dat kai una kum utna na ukisin ra o Iesu i pami. O Jon i watung det nama kum ukinalong, uni det ulingmulusi lena o Iesu i a God. O Jon i inanos dat kai lena a susut na taro ka det nurnur un o Iesu, a kum mugumugu anun a taro Juda kai ka det nurnur.

### *A inawan ina buk Jon:*

A Wasiso i wanpat a musano (1:1-18)

O Jon a Tene Baptaiso ma a kum mugano nat na ususer anun o Iesu (1:19-51)

A pinapam anun o Iesu torom a taro (2:1-12:50)

A tintinip na wik ma a minat anun o Iesu (13:1-19:42)

A katkatatur melet anun o Iesu gusun a minat (20:1-31)

O Iesu i wanpat torom a kum nat na ususer tong o Galili (21:1-25)

### *O Iesu ut, i a Wasiso anun o God*

<sup>1</sup> Un narnarap utmakai ra ka di ukis utmakai a rakrakon bual, a Wasiso i sa kis mugu taru. A Wasiso i kis tomo nam o God, ma a Wasiso i ut a God. <sup>2</sup> Un narnarap utmakai i kis tomo nam o God. <sup>3</sup> Una Wasiso kut, o God i ukis a kum utna rop. Katu utna o God i ukis tari, ra ke ukisi nama Wasiso. <sup>4</sup> A nilaun i kis uni, ma a nilaun ra, i a talapor anun a taro rop. <sup>5</sup> A talapor i sisio una dumirum, ma a dumirum ke winim lar pasi.

<sup>6</sup> O God i tulu ru ara musano, a risano o Jon. <sup>7</sup> I wanpat sur in wasiso puaso una

talapor, sur a taro rop det in nurnur uni. <sup>8</sup> I ut ausur a talapor, i wanpat kut sur in wasiso puaso una talapor. <sup>9</sup> A talapor mulus, ra i ser utalapor a taro rop, in nanpat mo urin una rakrakon bual.

<sup>10</sup> A Wasiso i kis una rakrakon bual. Ma una Wasiso, o God i ukis a rakrakon bual, ikut a taro una rakrakon bual ka det tama lele pasi. <sup>11</sup> I wanpat sur anun a taro, ikut anun a taro ut ka det gas pasi. <sup>12</sup> Ikut, torom det ra det gas pasi, ma det nurnur una risano, i mulaot pas det sur det a kum nutnutun o God. <sup>13</sup> Ausur di watung det a kum nutnutun o God kibino una usus na kabotaro, o una nuknukin tu musano taginin upiso, o una nemnem na nolin. Awu, di usus det una nion, una nemnem ut anun o God.

<sup>14</sup> A Wasiso i wanpat a musano mulus, ma i kis epotor ta met. Met sa tama tar anun a minamar, a minamar anun a Nutunu, ara sot kut, ra i wan gusun o Tamano, i bukus nama marmaris ma a lingmulus. <sup>15</sup> O Jon i wasiso talapor uni, ma i watungi nam in labino walngano lena, "I ut ri, ra a wasiso mugu uni lena, 'I ra in mur tang, i labo tang, uni i laun raut numugu tang.'" <sup>16</sup> I bukus nama marmaris, ma gusun anun a labino marmaris i udan dat nama susut na wakak na utna ra i wanan pat torom dat. <sup>17</sup> Un o Moses, o God i pitar tar a kum Warkurai torom dat, ikut un o Iesu Karisito i pitar tar a marmaris ma a lingmulus torom dat. <sup>18</sup> Kataio utmakai i tama tar o God. Ikut ara Nutunu kut, ra i kis tomo nam o Tamano, i ut i ese o God torom dat. Ma i ut a God.

*O Jon a Tene Baptaiso i inanos talapor a taro uni ut*

(Mt 3:1-12; Mk 1:1-8; Lk 3:1-18)

<sup>19</sup> A kum mugumugu anun a taro Juda tagisapat o Jerusalem, det tulu ru a ramano kum tene etabor torom o God, ma a ramano taro tagun a kabotaro Liwai,\* torom o Jon sur det in tingi lena, "Ui osi?" <sup>20</sup> O Jon ke wasiso batbati, i wasiso talapor ut uni lena, "Ausur iau a Karisito." <sup>21</sup> Det ting meleti lena, "Osi ui? Ui o Elaija?" Ra i balu det lena, "Awu, ausur iau o Elaija." Det ting meleti lena, "Ui a poropet ra di len taru in nanpat?" I balu det lena, "Awu." <sup>22</sup> Numur det tingi lena, "Osi ui? Un inanos met sur met in inanos det ra det tulu ru met urin. Asau un watungi un ui ut?" <sup>23</sup> O Jon i balu

\* 1:19: A taro tagun a kabotaro Liwai det ser papam una rumu na etabor.

det, "Iau a musano ra a poropet Aisaia i wasiso mugu uni lena, 'Una nubual kalako taro uni, in nalngan ara i kakabo lena: Mot in pam kodos a kisapi anun a Labino.' " *Aisaia 40:3*

<sup>24</sup> A kum Parisi ra di tulu tar det torom o Jon, <sup>25</sup> det tingi lena, "U watungi lena, ausur ui a Karisito, ma ausur ui kai o Elaija, o a poropet, ra di len taru in nanpat. Io, ra i lenra, ilai sur u baptaiso a taro?" <sup>26</sup> O Jon i balu det lena, "Iau, a baptaiso mot nama danim, ikut ara kura i tur epotor tamot, ra ka mot tasman lele pasi. <sup>27</sup> I ra, in mur tang. Ka elar sur an palos aru su gusun aru kikino, uni a natino doko tano."

<sup>28</sup> A kum utna ri, i wanpat tong o Betani una ara papor danim Jodan, ra o Jon i baptaiso a taro iai.

*O Iesu a Barman na sipsip anun o God, ra in mat una sakino petutna anun a taro*

<sup>29</sup> Ara bung numur, o Jon i tama o Iesu i wan nanan toromi, ra i watungi uni lena, "Mot tama i, a Sipsip anun o God, i ra in lakro ru a sakino petutna anun a rakrakon bual. <sup>30</sup> A musano kut ri, i ra a wasiso mugu uni lena, 'A musano ra in mur tang, i labo tang, uni i laun raut numugu tang.' <sup>31</sup> Iau kai numugu ka tasmani. Ikut a baptaiso nama danim sur an upuaso a musano ri torom a taro Israel."

<sup>32-33</sup> Ma o Jon i watungi lena, "Ka tasmani lena osi a Karisito. Ikut o God, ra i tulu ru iau sur an baptaiso nama danim, i inanos iau lena, 'Un tama a Tokodos na Nion in nan pirso ma in kis un ara musano. I ra a musano ra in baptaiso nama Tokodos na Nion.' Ma a tama a Tokodos na Nion i wan pirso tagisapat una langit, i elar namin natabun ma i kis taru netes un o Iesu. <sup>34</sup> A sa tama tar a utna ri i wanpat, ra a inanos uni lena, i a Nutun o God."

*A kum mugano nat na ususer anun o Iesu*

<sup>35</sup> Ara bung palu melet, o Jon ma aru nat tagun anun a kum nat na ususer detul tur taru melet tiro. <sup>36</sup> I tama pas o Iesu i wan sakit detul, ra i watungi uni lena, "Tama i, a Sipsip anun o God."

<sup>37</sup> Aru nat na ususer der longoro a wasiso ra, ma der mur mut o Iesu. <sup>38</sup> O Iesu i tur tupukus, i tama der ra der muri, ra i ting der

lena, "Asau ra mur nemi?" Der balu i lena, "Rabai," (a kukuraino lena Tene Ususer), "kura u kis awai?" <sup>39</sup> O Iesu i balu der lena, "Mur iap sur mur in tama i." Io, der muri, ma der tama a dino ra o Iesu i kis iai. Ra detul wanpat, i sa wat na pakano bung pas, ma detul kis mukut tiro iai a kudulano lirop ra.

<sup>40</sup> Ara tagun aru musano ra der longoro a wasiso anun o Jon ma der mur o Iesu, a risano o Endru, a tisino Saimon Pita. <sup>41</sup> A mugano utna ra o Endru i pami, i sio pas o Saimon a tisinolik, ra i inanos lena, "Met sa sio pas a Mesaia!" (a kukuraino a Karisito)†.

<sup>42</sup> O Endru i ben pas o Saimon torom o Iesu. O Iesu i tama i, ra i watungi tano lena, "Ui o Saimon, a nutun o Jon,‡ din watung a risam nam o Kepas." (Una wasiso Grik di watungi nam o Pita, a kukuraino a wat.)

*O Iesu i kabo pas o Pilip ma o Natanael*

<sup>43</sup> Ara bung palu melet, o Iesu i nem na wan utung o Galili. I barato pas o Pilip, ra i watungi tano lena, "Un mur iau." <sup>44</sup> O Pilip, i tagitong o Betsaida, a tamon anun o Endru ma o Pita. <sup>45</sup> O Pilip i sio pas o Natanael, ra i inanos lena, "Met sa sio pas a musano ra o Moses i tumtumus mugu taru uni una Buk na Warkurai, ma a kum poropet kai det sa tumtumus mugu taru uni. I ra, o Iesu a te Nasaret, a nutun o Josep." <sup>46</sup> Ikut o Natanael i balu i lena, "O Nasaret! Pepetlai, tu wakak na utna ut in nanpat tagitiro iai?" O Pilip i balu i lena, "Un nan urin ma dar in nan sur un tama i."

<sup>47</sup> O Iesu i tama pas o Natanael i wan nanan toromi, ra i watungi lena, "A te Israel mulus ut ri, ke tasman a torotoro." <sup>48</sup> O Natanael i ting o Iesu lena, "U tasman lan iau?" I balu i lena, "Ra o Pilip ke ben pat ui utmakai urin, a sa tama mugu tar ui ra u kis taru nago utuntudu in nanai na fig."

<sup>49</sup> O Natanael i watungi tano lena, "Tene Ususer, ui a Nutun o God, ui a King anun a taro Israel." <sup>50</sup> O Iesu i watungi tano lena, "Pepetlai u nurnur un iau, uni a inanos ui lena u kis taru nago utuntudu in nanai na fig? Numur un tama a kum lamlabino utna sakit in nanpat, in labo tan a utna ri u tama i." <sup>51</sup> O Iesu i watung meleti lena, "A inanos mot nama lingmulus, mot in tama a langit

† 1:41: Mesaia, a du wasiso Ibru, ma una wasiso Grik, di watungi nama Karisito. O Iesu i a Mesaia, a musano ra o God i pilok pasi sur in ulaun a taro. A kum poropet tagun numugu det wasiso na poropet uni, lena in nanpat, ra a taro Juda det kis langlang suri. ‡ 1:42: O Jon a taman o Pita, ausur o Jon a Tene Baptaiso.

in papos, ma a kum ensel anun o God det in nanan toto ma det in nanan pirso torom a Nutun a Musano.”

## 2

*O Iesu i pukus a danim sur a wain*

<sup>1</sup> Numur, ra aru bung i rop, di pam a lukaro na unolin tong o Kana, una papor Galili. O nan o Iesu i wan una lukaro ra. <sup>2</sup> Di saring o Iesu ma anun a kum nat na ususer kai sur det in nan una lukaro na unolin. <sup>3</sup> Ra a wain i sa rop, o nan o Iesu i inanos i lena, “A wain i sa rop.” <sup>4</sup> O Iesu i balu i lena, “Nang, ilai ra u inanos iau uni? Anung a du bung ke sot utmakai.” <sup>5</sup> O nan o Iesu i inanos a kum tultul lena, “Mot in pami kut asau ra in watungi tamot.”

<sup>6</sup> Tiro iai, a wonomnin lamlabino koto na wat kura di utur tari sur a ngingis, elar ut nama warkurai tagun a lotu anun a taro Juda. Unin tekteken nokoto ri, di ser ubukusi nama ru noino galen na danim o a tulu noino.\* <sup>7</sup> O Iesu i watungi tan a kum tultul lena, “Mot in ubukus tar a kum koto nama danim.” Ra numur det titior bukus rop tar det. <sup>8</sup> Ra o Iesu i tulu det lena, “Mot in itup pas lako danim tagun a kum koto, ma mot in losi torom a mugumugu na lukaro.” Ra det pami ut lena. <sup>9</sup> A mugumugu na lukaro i inum tama a danim ra, ra i sa wain rop. Ke tasmani lena a wain ri i wan tagai. A kum tultul kut ra det itupi det tasmani. Ra i kabo gisen pas a musano ra di unolini una bung ra, <sup>10</sup> ma i watungi tano lena, “A taro rop det ser tabor mugu a taro nama wakak na wain. Ra det sa inum pas a susut na wain, det in tabor det mukut nama wain ra ke wakak bing. Ikut ui, u etabor maragom nama wain ra i wakak sakit.”

<sup>11</sup> Iri a mugano ukinalong ra o Iesu i pami. I pami tong o Kana una papor Galili. A ukinalong ra, i ese puaso anun a minamar, ma anun a kum nat na ususer det nurnur uni.

<sup>12</sup> Numur, ra a lukaro na unolin i sa rop, i wan utong o Kapernaum. Det wan tomo nam o nano, a kum tistisino ma anun a kum nat na ususer. Det kis tiro iai a kabano bung ut.

\* 2:6: 75 lita o 115 lita. † 2:15: A mani anun a gapman Rom det ser ruk nami una rumu na etabor, ra det kelesi sur a mani sur det in kul a takis nami tagun a rumu na etabor.

*O Iesu i lakro ru a kum tene siuru gusun a rumu na etabor*

(Mt 21:12-13; Mk 11:15-17; Lk 19:45-46)

<sup>13</sup> Ra a labino bung na lotu na Wanlakai anun a taro Juda i sa milau, o Iesu i wan usapat o Jerusalem. <sup>14</sup> I ruk un ara dino tagun a rumu na etabor, ra i tama a taro ra det siuru a kum bulumakau, a kum sipsip, ma a kum tabun. I tama i kai a kum tene keles mani, kura det kis nisan anundet a kum kabulu. <sup>15</sup> Io, i iris pas a kum warus sur in pam in narus na inaim, ra i lu pirso ru det rop nami. I lu pirso ru a kum bulumakau ma a kum sipsip, ma i woro sarara ru a kum mani anun a kum tene keles mani†, ma i woro bulus ru anundet a kum kabulu. <sup>16</sup> Ma i watungi tandet ra det siuru a kum tabun, “Mot in los pirso ru det taginin! Gong mot pukus a rumu anun o Tita sur a rumu na siurul” <sup>17</sup> Anun a kum nat na ususer det nuk pas a wasiso una Buk Tabu lena, “An iru uni anung a labino marmaris sur anum a rumu.” Buk Song 69:9

<sup>18</sup> A taro Juda det wanpat melet torom o Iesu ma det tingi lena, “Asi na ukinalong un ese met uni, sur met in tasmani lena u utur ukai a warkurai ra u pam a kum utna ri nami?” <sup>19</sup> O Iesu i balu det lena, “Mot in rege ru a rumu ri anun o God, ma an utur melet pasi kut un lako tulu bung.” <sup>20</sup> Det ting o Iesu lena, “Di pam tar a rumu ri una wat na noino ma wonom na kilalo, ra ui, un pam melet pasi kut un lako tulu bung?”

<sup>21</sup> O Iesu i wasiso una rumu anun o God, i wasiso elelar ut una pinino. <sup>22</sup> Numur, ra o Iesu i sa laun pat melet gusun a minat, anun a kum nat na ususer det nuk melet pas a wasiso ri. Io, det nurnur maragom una Buk Tabu, ma una wasiso ra o Iesu i sa watung tari.

<sup>23</sup> O Iesu i kis sapat o Jerusalem una labino bung na lotu na Wanlakai, ra a susut na taro det tama a kum ukinalong ra i pami, ma det nurnur una risano. <sup>24</sup> Ikut o Iesu ke nurnur un taio, uni i tasman a taro rop. <sup>25</sup> Ke sibo sur taio ra in inanos i petutna anun a taro, uni i ut i tasman wakak a balandet.

## 3

*O Iesu der nam o Nikodimas*

<sup>1</sup> Ara musano tagun det a kum Parisi, a risano o Nikodimas, i ara mugumugu anun a taro Juda. <sup>2</sup> I wan torom o Iesu una ra bung

na mirum ma i watungi tano lena, “Tene ususer, met tasman ui ra ui a tene ususer, ra o God i tulu ru ui. Katu musano in pam lar pas a kum ukinalong ra u ser pami, ra o God ke kis tomo nami.”<sup>3</sup> O Iesu i balu i lena, “A inanos ui nama lingmulus, osi ra ka di usus matoki, ken tama lar pas a matanitu anun o God.”<sup>4</sup> O Nikodimas i tingi lena, “Din usus matok petlan pas taio ra i sa takano? Pepletai, in ruk melet un in balan o nano sur in usus meleti?”

<sup>5</sup> Ra o Iesu i balu i lena, “A inanos ui nama lingmulus, osi ra ka di usus matoki una danim ma una nion, ken ruk lar pas una matanitu anun o God.”<sup>6</sup> Osi ra di ususi una pinindi, i ra a pinindi ut, ma osi ra di ususi una nion, i ra a nion ut.<sup>7</sup> Gong u kisin ra a watungi tam lena din usus melet mot.<sup>8</sup> A wuwu i wan tuptupukus elar nam anun a nemnem, u longoro a wungu ino, ikut, ko tasmani lena i wan tagai, ma i wan urai. Lenkaira torom det rop ra a Nion i usus matok det.”<sup>9</sup> Ra o Nikodimas i tingi lena, “In pepletai a utna ri?”<sup>10</sup> O Iesu i balu i lena, “Ui a labino tene ususer anun a taro Israel, ma ilai ra ko tasman a kum utna ri?”<sup>11</sup> A inanos ui nama lingmulus, met watung asau ra met tasmani, ma met wasiso un asau ra met sa tama tari, ikut ka mot nurnur un asau ra met wasiso uni.<sup>12</sup> A inanos mot una kum utna taginin upiso ma ka mot nurnur uni. Io, mot in nurnur pepletai ra an inanos mot una kum utna tagisapat una langit?<sup>13</sup> Kataio i wan pas usapat netes una langit, a Nutun a Musano sot kut ra i wan pirso tagisapat netes una langit.<sup>14</sup> Numugu, o Moses i ukete in nusui un in nanai una nubual kalako taro uni. Lenkutkai ra din ukete a Nutun a Musano usapat,<sup>15</sup> sur det rop, ra det nurnur uni, det in laun tukum.

<sup>16</sup> “O God i maris a rakrakon bual, ra i pitar tar a Nutunu ara sot kut, sur osi ra in nurnur uni, in laun tukum ma ken iru.”<sup>17</sup> O God ke tulu tar a Nutunu urin una rakrakon bual sur in pitar a warkurai na minabalu torom a rakrakon bual. I tulu tari kut sur in ulaun a rakrakon bual.<sup>18</sup> Osi ra i nurnur uni, ka din pitar a warkurai na minabalu toromi. Ikut, osi ra ke nurnur, i sa tur una dekdek na warkurai na minabalu uni ke nurnur un ara Nutun o God sot kut.<sup>19</sup> Iri a warkurai anun o God: A talapor i sa wanpat una rakrakon bual, ikut a taro det nem a dumirum kut ma a talapor awu, uni det pam a kum sakino petutna.<sup>20</sup> Det rop ra det ser pam a kum sakino petutna, det nget a talapor, ma ka

det wan suri, sako din tama pupuaso pas anundet a kum sakino petutna.<sup>21</sup> Ikut, osi ra i murmur a lingmulus, i ser wanpat una talapor, sur din tama pupuaso i lena anun a kum pinapam i kibino ut tan o God.”

*O Jon a Tene Baptaiso i wasiso talapor un o Iesu*

<sup>22</sup> Numur, o Iesu tomo nam anun a kum nat na ususer det wan tagisapat o Jerusalem sur ara tamon lik kura una papor Judia. Det kis tiro iai, ma i baptaiso a taro.<sup>23</sup> O Jon kai i baptaiso tong o Ainon milau o Saleim, uni a susut na danim kura iai. A taro det wanan toromi sur in baptaiso det.<sup>24</sup> A utna ri i wanpat, ra kabaut di uruk o Jon una karabus.<sup>25</sup> A ramano kum nat na ususer anun o Jon det wasiso na engaras tomo nama ara te Juda una nirurus keles, elar nama petutna una lotu Juda.<sup>26</sup> Det wan torom o Jon ra det inanos lena, “Tena ususer, a musano ra mur kis tomo pas nami tong un ara papor danim Jordan, i ra u inanos taru uni, uniri kurong mo kai i baptaiso. Ra a taro rop det wan mukut toromi.”<sup>27</sup> O Jon i watungi tandet lena, “Kataio in pam pas tu utna ra o God ke pitar tari tano.<sup>28</sup> Mot ut mot sa longoro tari ra a watungi lenri, ‘Ausur iau a Karisito. O God i tulu ru iau kut sur an mugu tano.’<sup>29</sup> Tu musano ra i nolin nam tu ino, anun a ino ut ra. A pasano a musano ra i nolin, in tur ma in longoro suri. Ra in longoro in nalngano, in gas doko. Uniri, anung a gasgas i elar nam anun a gasgas, ra anung a gasgas i sot maragom.”<sup>30</sup> O Iesu ut in labo nanan ma iau an natino nanan.

*O naro ra i wan pirso tagisapat una langit*

<sup>31</sup> “O naro ra i wan pirso tagisapat una langit, i labo sakit taun a taro rop. A musano ra taginin upiso, taginin ut i upiso, ma i wasiso kut una kum utna taginin upiso. I ra i wan tagisapat una langit, i labo sakit taun a taro rop.<sup>32</sup> Ma i inanos una kum utna ra i tama tari ma i longoro tari, ikut kataio i nurnur una nuna wasiso.<sup>33</sup> Ikut det ra det nurnur una nuna wasiso, det mulaot lena o God i a lingmulus.<sup>34</sup> I ra o God i tulu ru i, i wasiso nama wasiso anun o God, uni o God i pitar rop tar a Tokodos na Nion toromi.<sup>35</sup> O Tamano i nem a Nutunu, ra i pitar rop tar a kum utna ulamano.<sup>36</sup> Osi ra i nurnur una Nutun o God, i sa utur ukai a nilaun tukum. Ikut, osi ra ke ser tarom tan a Nutunu, ken utur ukai a nilaun, uni a kankan anun o God ken rop gusuni.”

## 4

*O Iesu i wasiso tomo nama ino Samaria*

<sup>1</sup> A kum Parisi det longoro i lena o Iesu i ben pas a susut na taro na ususer, det susut tan a taro na ususer anun o Jon, ma i baptaiso det. <sup>2</sup> Ikut o Iesu ut ke baptaiso taio, anun a kum nat na ususer kut det baptaiso. <sup>3</sup> Ra o Iesu i sa tasmani lena a kum Parisi det sa longoro i, i wan tagitiro una papor Judia ra i milet melet utong una papor Galili. <sup>4</sup> Una nuna inawan i wan pototong una papor Samaria.

<sup>5</sup> Tiro una papor Samaria, i wanpat una tamon Sikar, i milau kut una du piso ra, un ra bung ut, o Jekop i tabor tar a nutunu, o Josep nami. <sup>6</sup> In nutung na danim, ra o Jekop i sa kil tari, kura tiro iai. O Iesu i taramo a pinino i tungulu una nun a walos na inawan, ra i kis mo tiro nisan in nutung na danim ra. Una du bung ra, in matanas i sa kis lekeleke. <sup>7</sup> Io, ara ino Samaria i wanpat sur in itup, ra o Iesu i watungi tano lena, "Un tabor iau nam lako danim."

<sup>8</sup> Anun a kum nat na ususer det sa wan taru utiro una tamon, sur det in kul utna na inangon. <sup>9</sup> A ino Samaria i balu o Iesu lena, "Ui a te Juda, ma iau a ino Samaria. Sur asau ra u saring iau sur lako danim?" Uni a kum te Juda ka det emarom nama kum te Samaria. <sup>10</sup> Ikut o Iesu i balu i lena, "Ra u tasman a etabor anun o God, ma u tasman osi kai ra i saring ui sur lako danim, un saring, ma in tabor ui nama danim na nilaun." <sup>11</sup> A ino i watungi tano lena, "Labino, katu utna na ititup anum, sur un itup danim nami. In nutung na danim ri i dordorong doko. Ma tagai a danim na nilaun ra?" <sup>12</sup> U nuki lena u labo tan a tubundat o Jekop ra i tabor met nam in nutung na danim ri? Det tomo nama kum nutnutunu ma anun a kum wewegua kai, det rop det ininum taguni."

<sup>13</sup> O Iesu i balu i lena, "Det rop ra det inum a danim ri, det in muruk melet kut. <sup>14</sup> Ikut det ra det in inum a danim ra an tabor det nami, ka det in muruk melet mo. A danim ra an tabor det nami, in elar nam ara matmatano danim una nundet a nilaun, ra in burburak pat ma in tabor det nama nilaun tukum." <sup>15</sup> A ino i watungi tano lena, "Labino, un tabor iau nama danim ra, sur gong melet mo a muruk, ma gong mo a wan liklik urin sur an itup."

<sup>16</sup> Ra o Iesu i watungi tano lena, "Un nan ma un ben pas anum a musano ra mur in

milet melet urin." <sup>17</sup> A ino ra i balu i lena, "Katu musano anung." O Iesu i watungi tano lena, "A lingmulus ut ra u watungi lena katu musano anum. <sup>18</sup> U sa nolin pas nama limo na musano, ma ara ra u kis tomo nami uniri, ausur anum a musano. A lingmulus ut ra u watungi tang." <sup>19</sup> A ino i balu i lena, "Labino, uniri, a tasmani lena ui a poropet. <sup>20</sup> A kum tumtubumet tagun numugu det ser lotu torom o God una tangai ri, ikut mot a taro Juda mot watungi lena, din lotu torom o God sapat kut o Jerusalem."

<sup>21</sup> Ra o Iesu i watungi tano lena, "Tama i, a lingmulus ino ri an watungi tam, a du bung in nanpat, ra ka mot in lotu mo torom o Tita una tangai ri, ma sapat kai o Jerusalem, awu. <sup>22</sup> Mot a kum te Samaria ka mot tasman osi ra mot ser lotu toromi, ma met a taro Juda met tasmani ut osi ra met ser lotu toromi, uni a pinapam anum o God ra i ulaun a taro, i wanpat ut tagun a taro Juda. <sup>23</sup> A du bung in nanpat ma iri i sa wanpat, ra a kum tene lotu mulus det in lotu torom o Tita una nion ma una lingmulus. A kum ngas na tene lotu lenra, o Tita i nem doko det. <sup>24</sup> O God a nion. Det ra det lotlotu toromi, det in lotu ut una nion ma una lingmulus."

<sup>25</sup> Ra a ino i watungi tano lena, "A tasmani lena a Mesaia ra di watungi nama Karisito, in nanpat, ma in upuaso a kum utna rop torom met." <sup>26</sup> Ma o Iesu i balu i lena, "Iau ut ri a wasiso torom ui."

<sup>27</sup> Una du bung ut ra, a kum nat na ususer anum o Iesu det milet melet. Det tama o Iesu i wasiso tomo nam ara ino, ra det kisin. Ikut katutaio tagun det i iting lena, "U nem asau?" o lenri, "Sur asau ra u wasiso tomo nami?" <sup>28</sup> A ino ra i wan pas gusun anum in nadanim, i milet melet sur a tamon, ra i inanos a taro tiro iai lena, <sup>29</sup> "Ai, mot iap, sur mot in tama ara musano, i inanos iau una kum utna rop ra a sa pam tari numugu. Kutiro i mo ra a Mesaia?" <sup>30</sup> Io, a taro ra, det wan pas gusun a tamon, ma det wan torom o Iesu.

<sup>31</sup> Ra a ino i sa wan taru, a kum nat na ususer det inanos dekdeki lena, "Tene Ususer, un nangon pas." <sup>32</sup> Ikut o Iesu i balu det lena, "A nga utna na inangon kuri ut, ka mot tasmani." <sup>33</sup> A kum nat na ususer det ting etetalai det lena, "Kutiro taio i sa tabor tari nam lako utna na inangon?" <sup>34</sup> O Iesu i watungi tandet lena, "A nga utna na inangon iri i, an tarom una nemnem anum o

naro ra i tulu ru iau urin, ma an pam rop pas anun a pinapam. <sup>35</sup> Mot ser watungi lenri, 'A watnin kalang utmakai kura ra din pasong maragom.' Ikut a watungi tamot lena: Mot in tamtama tokodos usa numugu, ma mot in tama a kum kinobot, det sa taka rop, ma i sa sot sur din pasong. <sup>36</sup> Uniri a musano ra i pasong i los anun a ikul. Ma a wina nun a pasong, a utna sur a nilaun tukum, sur osi ra i marmarut ma osi ra i pasong, der in gas tomo. <sup>37</sup> A wasiso ra a taro det ser watungi, i lingmulus ut lenri, 'Ara i marmarut, ma ara i pasong.' <sup>38</sup> Io, a tulu mot sur mot in pasong una kinobot ra mot ut ka mot marut tari. Ara taro gisen ut det pam tari, ma mot, mot los a tinibo mukut tagun anundet a pinapam."

*A kum te Samaria det nurnur*

<sup>39</sup> A susut na te Samaria tagun a tamon ra, det nurnur un o Iesu. Det nurnur kibino una wasiso anun a ino, ra i watungi tandet lena, 'I inanos iau una kum utna rop ra a sa pam tari numugu.'

<sup>40</sup> Io, a taro Samaria det wan torom o Iesu ra det saringi sur in kis nisan det, ra i kis pas aru bung tiro iai. <sup>41</sup> A susut melet det nurnur, kibino una nuna wasiso. <sup>42</sup> Det watungi tan a ino ra lena, "Uniri met sa nurnur, ausur una wasiso kut ra u watungi un o Iesu, awu. Met ut, met sa longoro i ma met sa tasman mulusi lena, i a Tene Ulaun anun a rakrakon bual."

*O Iesu i ulangolango pas a nutun ara mugu-mugu*

<sup>43</sup> Ra aru bung i sa rop, o Iesu i wan utong o Galili. <sup>44</sup> O Iesu ut i sa watung tar a wasiso lenri, "A poropet, a taro una nun a tamon ka det ser ru i."

<sup>45</sup> A taro tagitong o Galili det sa wan pas una labino bung na lotu na Wanlakai sapat o Jerusalem, ma det sa tama tar a kum utna ra o Iesu i pami tiro iai. Io, o Iesu i wanpat tong o Galili, ra a taro det gas pasi.

<sup>46</sup> O Iesu i wan melet utong o Kana una papor Galili, a tamon ra i pukus tar a danim sur a wain iai. Ara mugumugu anun a gapman, a nutunu lik a musano i misait tong o Kapernaum. <sup>47</sup> I longoro i lena o Iesu i wan tagitiro o Judia utong o Galili, ra i

wan toromi, ma i saringi sur in nan utong o Kapernaum sur in ulangolango pas a nutunu lik a musano, i milau mo sur in mat. <sup>48</sup> O Iesu i watungi tano lena, "Ra ka mot tama a kum utna na ukisin ma lako kum ukinalong, ka mot in nurnur mut." <sup>49</sup> Ra a mugumugu anun a gapman i watungi lena, "Labino, dar in nan lakit sako a nutung lik in mat." <sup>50</sup> O Iesu i watungi tano lena, "Un nan kut, a nutum lik in laun." A musano ra i nurnur una wasiso anun o Iesu, ra i wan.

<sup>51</sup> Ra ke wanpat utmakai, anun a kum tultul det wan barato i ra det inanos i lena, "A nutum lik i sa langolango." <sup>52</sup> I ting det lena, "Asi na du bung mulus ra a nutunglik i langolango melet uni?" Det balu i lena, "Nubung, una ara pakano bung una lirop a mararong i rop gusuni." <sup>53</sup> A taman a nat i nuk melet pas a du bung ra o Iesu i watungi toromi lena, "A nutum lik in laun." Ra i tasman lele i lena a du bung ut ra o Iesu i wasiso uni, a mararong i rop. Io, det tamtamano rop det nurnur maragom un o Iesu. <sup>54</sup> A utna ri, i a manru na ukinalong o Iesu i pami tong o Galili, ra i wan tagitong o Judia.

5

*O Iesu i ulangolango pas ara musano*

<sup>1</sup> Numur, o Iesu i wan usapat o Jerusalem sur a labino bung na lotu anun a taro Juda. <sup>2</sup> Ara kabopolo, di watungi nam o Besata una wasiso Ibru, i kis sapat o Jerusalem, milau una labino matansako ra di watungi nama "Matansako na sipsip". Ma a limo na parada det tur talilis pas a kabopolo ra. <sup>3-4</sup> A susut na taro ra det misait nama kum ngas na misait, det ser kis tiro iai, a kum pulu, det ra ka det ser wan ma det ra a pinpinindet i mat.\*

<sup>5</sup> Ara musano i kis tiro iai i misait pas a tulu noino ma tiwal na kilalo. <sup>6</sup> O Iesu i tama pas a musano ra i inep taru tiro iai. I tasmani lena a musano ra i sa suano i a misait uni, ra i tingi lena, "Pepetlai, u nemi sur un langolango?" <sup>7</sup> A musano ra i balu i lena, "Labino, kataio i ser warut iau sur in los tar iau una du bung ra a danim i tonton uni. Ra a nem na wan sur an rurus, ara gisen kut in kalabor mugu batbat pas iau."

\* 5:3-4: A ramano kum tene mananos una Buk Tabu det nuki lena a ramano kum wasiso kai i kis una rino ri. I lena: Det kis langlang sur a danim ra in tonton. A ramano kum du bung, a ensel anun a Labino in nan pirso utiro una kabopolo ra, ma in utontoni. Taio kut ra in rurus mugu una kabopolo ra i tonton, in langolango mut gusun anun a misait.

<sup>8</sup> O Iesu i watungi tano lena, “Un katutur, un los anum a bat ra un nan.” <sup>9</sup> Uniutra a musano ra i langolango, i tur, ma i los pas anun a bat, ra i wan.

A utna ri i wanpat una Bung na Sabat.

<sup>10</sup> A ramano kum te Juda det watungi tan a musano ra o Iesu i ulangolango pasi lena, “A Sabat ri! I tabu sur din los a bat uni.” <sup>11</sup> Ra i balu det lena, “A musano ra i ulangolango pas iau, i watungi tang lena, an los pas anung a bat ra an nan.” <sup>12</sup> Det tingi lena, “Osi na musano ra i watungi tam lena un los pas anum a bat ma un nan?” <sup>13</sup> Ikut a musano ra ke tasman osi ra i ulangolango pasi, uni o Iesu i wan epotor tan a kunur na taro.

<sup>14</sup> Numur ut, o Iesu i barato pas a musano ra una rumu na etabor. I watungi tano lena, “Tama i, uniri u sa langolango. Gong melet mo u pam tu sakino, sako tu laulau na utna sakit in nanpat un ui numur.” <sup>15</sup> A musano ra i wan ma i inanos a kum te Juda lena, “O Iesu ut i ulangolango pas iau.” <sup>16</sup> Io, uniri, a kum te Juda det turpasi sur det in pam a kum sakino petutna torom o Iesu, uni i pam a kum utna ri una Bung na Sabat. <sup>17</sup> O Iesu i watungi tandet lena, “O Tita ke mana nama pinapam na warut, lenkutkai ra iau kan mana nama pinapam na warut torom a taro.” <sup>18</sup> Iri, a kibino ra a kum te Juda det nem doko i sur det in um doko o Iesu. Det kankan torom o Iesu, asur a kibino kut ra i papam una Bung na Sabat. A kibino utkai ra o Iesu ut i watung o God lena o Tamano, ma una wasiso ri, ra i elaro i ut nam o God.

*O Tamano i pitar a warkurai torom o Nutunu*

<sup>19</sup> O Iesu i balu det lena, “A inanos mot nama lingmulus, a Nutun o God ken pam oros pas tu utna elar nam anun a nemnem, in pami kut a kum utna ra i tama o Tamano i ser pami. Uni a kum utna rop ra o Tamano i pami o Nutunu kai in pami. <sup>20</sup> O Tamano i nem o Nutunu, ma i ese i una kum utna rop ra i ser pami. Ma in ese i kai una kum utna ra i labo taun a kum utna ri, sur mot in kisin uni. <sup>21</sup> A Nutunu in tabor det ra i nemi sur in tabor det nama nilaun, elar nam o Tamano i ukatutur pas a kum minat, ma i tabor det nama nilaun. <sup>22</sup> O Tamano ken kuro taio, ikut i pitar tar a warkurai rop tan o Nutunu, sur in warkurai nami, <sup>23</sup> sur a taro rop det in ru a Nutunu elar nam det ru o Tamano. Osi ra ke ru a Nutunu ke ru i kai o Tamano, i ra i tulu ru i urin.

<sup>24</sup> “A inanos mot nama lingmulus, osi ra i longoro anung a kum wasiso ma i nurnur un o naro ra i tulu ru iau urin, i sa utur ukai a nilaun tukum, ma ken iru una warkurai. I sa wan gusun a minat sur a nilaun tukum.

<sup>25</sup> A inanos mot nama lingmulus, a du bung in nanpat, ma iri i sa wanpat, ra a kum minat det in longoro in nalngan a Nutun o God, ma det ra det longoro i det in laun.

<sup>26</sup> O God a kimkibin a nilaun, ma i pitari kai torom o Nutunu sur i kai a kimkibin a nilaun. <sup>27</sup> O God i pitar tar a dekdok tano sur in warkurai a taro nami, uni, i a Nutun a Musano. <sup>28</sup> Gong mot kisin una wasiso ri. A du bung in nanpat, ra det rop ra det inep una kum tung na minat det in longoro in nalngano. <sup>29</sup> Det in katutur gusun a kum tung na minat. Det ra det sa pam tar a wakak na petutna det in katutur gusun a minat sur a nilaun tukum. Ma det kai ra det sa pam tar a sakino petutna, det in katutur gusun a minat sur a iniru tukum.”

*A wasiso talapor un o Iesu*

<sup>30</sup> O Iesu i wasiso utmakai torom a kum te Juda lena, “Ka pam oros tu utna elar nam anung a nemnem. A warkurai nama utna a longoro i. Ma anung a warkurai i tokodos, ma ka mur a nuknuking, a ser mur ut a nuknukin o naro ra i tulu ru iau urin. <sup>31</sup> Ra an wasiso talapor un iau ut melet, anung a wasiso talapor ken maut. <sup>32</sup> Ikut ara gisen ut i wasiso talapor un iau, ra a tasmani lena anun a wasiso talapor un iau i lingmulus sakit.

<sup>33</sup> “Mot tulu ru ara taro torom o Jon a Tene Baptaiso, ra i wasiso talapor torom det un iau. Ma anun a wasiso i lingmulus. <sup>34</sup> Ka sibo sur lako taro det in wasiso talapor un iau, ikut a watungi lenri sur din ulaun mot. <sup>35</sup> O Jon i elar nama lam, ra i kunabor ma i talapor, ma mot gas ra mot tamtama lilik pas kut una talapor ino.

<sup>36</sup> “Ikut an inanos mot una wasiso talapor un iau, ra i labo taun a wasiso talapor anun o Jon un iau. A kum pinapam ra a ser pami, det wasiso talapor un iau lena, o Tita i tulu ru iau urin. O Tita i pitar tar a kum pinapam ra tang, sur an pami. <sup>37</sup> Ma o Tita, i ra i tulu ru iau urin, i sa wasiso talapor taru un iau. Ka mot longoro in nalngano, ma ka mot tama tar kai in matano. <sup>38</sup> Ma ka mot utur ukai anun a wasiso una kum balamot, uni ka mot nurnur un o naro ra di tulu ru i urin. <sup>39</sup> Mot ser lukluki ut a Buk Tabu, uni

mot nuki lena mot in los a nilaun tukum uni. Ikut a Buk Tabu kai i wasiso ut un iau!<sup>40</sup> Ikut, mot a kum te Juda, ka mot nem na wan torom iau sur mot in los a nilaun.

<sup>41</sup> “Ka ling sur a taro det in ulabo pas iau.

<sup>42</sup> Ikut a tasman mot ut lena, ka mot nem o God nama balamot mulus.<sup>43</sup> A wanpat nama risan o Tita, ma ka mot gas pas iau. Ikut ra taio gisen in nanpat nama risano ut, io, mot in gas pasi.

<sup>44</sup> “Mot, mot nemi kut sur a taro det in ulabo pas mot, ma ka mot tiktikin sur a wasiso na ululabo anun o God torom mot, o God i ara sot kut. Ra i lenra, ka mot nurnur un iau.<sup>45</sup> Gong mot nuki lena iau an takun mot tan o Tita, awu. O Moses ra mot nurnur uni lena in warut mot, i ut in takun mot.<sup>46</sup> Ra gunuk mot nurnur un o Moses, io, mot in nurnur utkai un iau, uni anun a kum tumtumus i wasiso ut un iau.<sup>47</sup> Ikut ka mot nurnur una kum tumtumus anun o Moses, io, mot in nurnur pepeplai una anung a kum wasiso?”

## 6

*O Iesu i tabor a limo na arip na musano*  
(Mt 14:13-21; Mk 6:30-44; Lk 9:10-17)

<sup>1</sup> Io, numur, o Iesu i wan kutus una du tasi Galili, ra di watungi kai nama du tasi Taiberias.<sup>2</sup> A labino kunur na taro det muri, uni det sa tama tar a kum ukinalong ra i pami, ra i ulangolango pas det ra det misait.<sup>3</sup> O Iesu i wan toto usapat una du tangai lik ma i kis tomo nam anun a kum nat na ususer.<sup>4</sup> Ma a labino bung na lotu na Wanlakai anun a taro Juda i sa milau sur in nanpat.

<sup>5</sup> O Iesu i tamtama tokodos, ra i tama pas a labino kunur na taro det wan toromi, i watungi tan o Pilip lena, “Dat in kul lako utna na inangon awai sur dat in tabor a taro ri nami?”<sup>6</sup> O Iesu i watungi lenri sur in lar kut o Pilip. Uni i ut i sa tasman asau ra in pami.<sup>7</sup> Ra o Pilip i balu i lena, “Lako utna na inangon ra din kul pasi nam lako ru mar na denari,\* ken elar nam det, a lililik kut ra det in nani.”<sup>8</sup> Ara melet tagun anun a kum nat na ususer a risano o Endru, a tisin o Saimon Pita, i watungi tan o Iesu lena,<sup>9</sup> “Ara nat lik kuri i los a limanin beret kut ra di pami nama bali, ma arin natnat na kiripo. Ikut pepeplai, in elar ut nama kunur na taro ri?”

\*

6:7: Ara denari i elar nama ikul anun ara musano una ra bung na pinapam.

<sup>10</sup> A dino ra, in wuliso rop kut, io, o Iesu i tulu anun a kum nat na ususer sur det in ukis a taro tiro iai. A kunur na taro ra, a nilulukin a kum musano kut i elar nama limo na arip.<sup>11</sup> O Iesu i los pas a limanin beret, i watung wakak pas uni torom o God, ma i tibo a taro nami, ra det kis tiro iai. I tibo det kai nama kiripo, elar nam anundet a nemnem.<sup>12</sup> Ra det sa masur rop, i watungi tan anun a kum nat na ususer lena, “Mot in ubek tomo wakak a utna rop ra det wangon kopos pas uni, sur gong di banlaulau a utna na inangon.”<sup>13</sup> Ra det ubek tomo rop pas a utna ra a taro det wangon kopos pas uni, ma det song bukus pas a noino ma aru rat tagun a limanin beret ra.<sup>14</sup> A taro det tama a ukinalong ri i pami, ra det watungi lena, “I lingmulus ut, a musano ri, i a poropet ra di watungi lena in nanpat urin na rakrakon bual.”<sup>15</sup> Ra o Iesu i sa tasmani lena det nem na wan toromi sur det in ungongos pasi sur in king, io i wan gisen pas gusun det usapat netes una tangai.

*O Iesu i wan sapat netes una du tasi*  
(Mt 14:22-33; Mk 6:45-52)

<sup>16</sup> Ra i sa lirop matano mirum, a kum nat na ususer anun o Iesu det wan piso unago una du tasi Galili.<sup>17</sup> Det kas taru una pot, ra det turpasi sur det in nan kutus una du tasi Galili sur o Kapernaum. I sa mirum, ma o Iesu ke wanpat utmakai torom det.<sup>18</sup> A dekdek na wuwu i wanpat ma a top i umenene det.<sup>19</sup> Ra det sa ulusu bakkak, i elar nama limo na kilomita, det tama pas o Iesu i wan sapat netes una du tasi torom det una pot. Ra det ngara doko.<sup>20</sup> Ikut o Iesu i lena, “Gong mot ngara, iau kut ri.”<sup>21</sup> Io, det gas pasi sur in kas una pot, ra uniuutra, det sot una nubual ra det wan suri.

*A taro det sisio sur o Iesu*

<sup>22</sup> Una bung numur, a kunur na taro ra det kis tong una ra rapor tasi, det tasmani lena ara pot sot kut i kis tiro iai. Det tasmani lena, a kum nat na ususer kut det wan, ikut o Iesu ut ke kas tomo nam det. Det kut det wan tagitiro iai.<sup>23</sup> A ramano kum pot tagitong o Taiberias det sot milau una nubual ra a Labino i watung wakak una beret, ma a kunur na taro det wangon iai.<sup>24</sup> Ra a kunur na taro det sa tasmani lena, o Iesu ma anun a kum nat na ususer ka det

kis tiro iai, det kas una kum pot ma det wan utong o Kapernaum ra det sisio sur o Iesu.

*O Iesu i a beret na nilaun*

<sup>25</sup> A taro det sio pas o Iesu tong una ara papor du tasi Galili, ra det tingi lena, “Tene Ususer, nangisin kut ra u wan taru urin?”

<sup>26</sup> O Iesu i balu det lena, “A inanos mot nama lingmulus, ausur mot sisio sur iau uni mot tama a kum ukinalong ra a pami, awu. Mot sisio kut sur iau uni mot wan a beret ma mot masur nami. <sup>27</sup> Gong mot papam kut sur a utna na inangon ra i ser mereseng. Mot in papam sur a utna ra in kis tukum sur a nilaun kura numur, ra a Nutun a Musano in tabor mot nami. Uni o Tamano, o God i sa ese tari lena i mulaot un asau ra a Nutun a Musano i pami.” <sup>28</sup> Det tingi lena, “Asau met in pami sur met in pam a pinapam anun o God?” <sup>29</sup> O Iesu i balu det lena, “Iri i a pinapam anun o God, ra mot in nurnur un o naro ra di tulu ru i urin.” <sup>30</sup> Ra det ting meleti lena, “Asi na ukinalong un pami sur met in tama i, ma met in nurnur un ui? Asau un pami?” <sup>31</sup> A kum tumtubumet tagun numugu, det wan a mana† una nubual kalako taro uni, elar ra di sa tumus tari una Buk Tabu lena, ‘I tabor det nama beret tagisapat una langit ma det wani.’”

*Buk Song 78:24*

<sup>32</sup> O Iesu i watungi tandet lena, “A inanos mot nama lingmulus, ausur o Moses ra i tabor det nama beret tagisapat una langit, o Tita ut i tabor det nami. Ra uniri, i tabor mot nama beret mulus tagisapat una langit. <sup>33</sup> I ra i wan pirso tagisapat una langit, i ut a beret anun o God, ma i pitar a nilaun torom a taro una rakrakon bual.”

<sup>34</sup> Det watungi tano lena, “Labino, un tabor met nama beret ra, una kum bungbung rop.” <sup>35</sup> O Iesu i balu det lena, “Iau ut a beret na nilaun. Osi ra in nan torom iau ken murak, ma osi ra in nurnur un iau ken muruk melet mo. <sup>36</sup> A sa watung tari tamot lena mot sa tama tar iau, ikut ka mot nurnur. <sup>37</sup> Det rop ra o Tita i pitar tar det tang, det in nan torom iau, ma osi ra in nan torom iau kan lu ru i. <sup>38</sup> Uni a wan pirso tagisapat una langit, ausur sur an mur a nuknuking, awu, a wan sur an mur ut a nemnem anun o Tita, i ra i tulu ru iau urin. <sup>39</sup> Iri i a nemnem anun o Tita, i ra i tulu ru

iau urin, lena, gong taio tagun det ra i sa pitar tar det tang in iru. An ukatutur pas det rop melet gusun a minat una bung na warkurai. <sup>40</sup> Una nemnem anun o Tita, det rop ra det tamtama torom a Nutunu ma det nurnur uni, det in laun tukum, ma iau an ukatutur pas det gusun a minat una bung na warkurai.

<sup>41</sup> A ramano kum te Juda det wasiso na ururai eno un o Iesu, uni i watungi lena, “Iau a beret ra i wan pirso tagisapat una langit.” <sup>42</sup> Ra det watungi uni lena, “O Iesu a nutun o Josep kut. Dat tasman o tamano ma o nano. Io, ilai ra i watungi lena i wan pirso tagisapat una langit?” <sup>43</sup> O Iesu i watungi tandet lena, “Gong mot wasiso na ururai eno. <sup>44</sup> O Tita i tulu ru iau urin. Kataio in pet lar pasi sur in nan torom iau, ra o Tita ken ben tari torom iau. Ra o Tita in ben tari torom iau, iau ut an ukatutur pasi gusun a minat una bung na warkurai. <sup>45</sup> A kum poropet det sa tumus tari lena, ‘O God in ususer det rop.’”

*Aisaia 54:13*

Io, det rop ra det longoro o Tita ma det ususer tano, det in nan torom iau. <sup>46</sup> Kataio i tama tar o Tita. Ikut, i ut ra i wan pas gusun o God, i tama tar o Tita. <sup>47</sup> A inanos mot nama lingmulus, osi ra i nurnur un iau, i sa los pas a nilaun tukum.

<sup>48</sup> “Iau a beret na nilaun. <sup>49</sup> A kum tumtubumot tagun numugu det wan a mana una nubual kalako taro uni, ikut det sa mat. <sup>50</sup> Ikut a beret ri, i wan tagisapat una langit. Osi ra in nani, ken mat. <sup>51</sup> Iau ut a beret a laun ino, ra i wan pirso tagisapat una langit. Osi ra in nangon tagun a beret ri, in laun tukum. A lingmulus, a beret ra an etabor nami, i a pining. A pitari sur a taro una rakrakon bual det in laun uni.”

<sup>52</sup> A ramano kum te Juda det engaras etetalai, ra det watungi lena, “A musano ri in tabor petlan dat nama pinino sur dat in nani?” <sup>53</sup> Ra o Iesu i watungi tandet lena, “A inanos mot nama lingmulus, ra ka mot in nan a pinin a Nutun a Musano ma ka mot in inum a gapino, katu nilaun mulus in kis un mot. <sup>54</sup> Osi ra in nan a pining ma in inum a gaping, i sa los a nilaun tukum, ma iau an ukatutur pasi gusun a minat una bung na warkurai. <sup>55</sup> Uni a pining, i a utna na inangon mulus, ma a gaping, i a danim na

† 631: A mana i ara ngas na utna na inangon, i elar nama beret. O God i pitar pirso i, tagisapat una langit, ma o Moses i tabor a taro Israel nami, una nubual kalako taro uni, una nundet a inawan tagisa o Ilijp usa o Kenan.

ininum mulus. <sup>56</sup>Osi ra in nan a pining ma in inum a gaping, in laun un iau, ma iau an laun uni. <sup>57</sup>O Tita ra i kimkibino una nilaun, i tulu ru iau, ma i tabor iau nama nilaun. Lenkutkai ra torom osi ra i wan a pining, an tabori nama nilaun. <sup>58</sup>Iri a beret ra i wan tagisapat una langit, ausur i elar nam ara ra a kum tumtubundat tagun numugu det wani, ma det sa mat. Osi ra in wangon tagun a beret ri, in laun tukum.” <sup>59</sup>O Iesu i ususer a taro una rumu na lotu tong o Kapernaum ra i watung a kum wasiso ri.

*A kum wasiso na nilaun tukum*

<sup>60</sup>A susut tagun anun a taro na ususer det longoro a kum wasiso ri, ra det watungi lena, “A etowo ri i ngangitin doko. Osi mo in gas suri?” <sup>61</sup>O Iesu i tasmani lena anun a taro na ususer det wasiso na ururai eno uni. Ra i ting det lena, “Pepetlai, a wasiso ri i banlaulau mot? <sup>62</sup>In pepetlai torom mot, ra mot in tama a Nutun a Musano ra in milet melet usapat sur a tamon ra numugu i kis pas iai? <sup>63</sup>A Nion, i ra i pitar a nilaun. A dekdekin a pinin a musano katu utna i gas uni. A kum wasiso ra a watungi tamot, i a Nion ma i a nilaun. <sup>64</sup>Ikut ara taro tagun mot ka det nurnur.”

Numugu ut o Iesu i sa tasman det ra ka det nurnur uni, ma i kai ra in usobor tari. <sup>65</sup>Ma i watungi kai lena, “Iri i a kibino ra a watungi tamot lena, kataio in nan torom iau ra o Tita ken pitar a dekdek tano, sur in mur iau.”

<sup>66</sup>Io, a susut tagun anun a taro na ususer det tupukus pas gusuni, ma ka det muri mo. <sup>67</sup>O Iesu i watungi tan anun a noino ma aru nat na ususer lena, “Pepetlai, mot kai, mot nemi sur mot in nan tupukus mo gusun iau?” <sup>68</sup>O Saimon Pita i balu i lena, “Labino, met in nan mo torom osi? Uni anumi kut, a kum wasiso na nilaun tukum. <sup>69</sup>Met sa nurnur ma met tasmani lena ui a Tene Tokodos anun o God. <sup>70</sup>O Iesu i watungi tandet lena, “A sa pilok pas mot, a noino ma aru, niko? Ikut ara tagun mot, i a tarangan kut!” <sup>71</sup>I wasiso un o Judas, a nutun o Saimon Iskariot, i ara tagun a noino ma aru nat na ususer, i ra in usobor tar o Iesu.

7

*A kum tistisin o Iesu ka det nurnur uni*

<sup>1</sup>Io, numur o Iesu i wan tuptupukus una kum tamtamon tong una papor Galili. Ke nem na wan tuptupukus tong una papor Judia, uni a ramano kum te Juda det epak sur det in um doko i. <sup>2</sup>A kum bung na lotu anun a taro Juda, ra di watungi nama kum lamlabino bung na lotu na rumu na turturup\*, i sa milau. <sup>3</sup>Io, a kum tistisin o Iesu det watungi tano lena, “I wakak sur un nan taginin ma un nan utong o Judia sur anum a taro na ususer det in tama a kum utna na ukisin ra un pami. <sup>4</sup>Kataio i ser pam eno a kum utna, ra i nemi sur a taro det in tasmani. U ser pam a kum utna ri, in wakak ra un pam puaso i sur a taro una rakrakon bual rop det in tasman uil” <sup>5</sup>A kum tistisino det wasiso lenri, uni det kai ka det nurnur uni.

<sup>6</sup>O Iesu i watungi tandet lena, “Anung a du bung ke sot utmakai, sur an nan una kum lamlabino bung na lotu, ikut torom mot, anumot a kum du bung i langolango kut. <sup>7</sup>A taro tagun a rakrakon bual ka det in nget mot, ikut det nget iau, uni a inanos det una nundet a kum sakino petutna. <sup>8</sup>Mot, mot in nan usapat una kum lamlabino bung na lotu. Ikut iau, kan nan lakit sur a kum lamlabino bung na lotu ri, uni anung a du bung ke sot utmakai.” <sup>9</sup>Ra i sa wasiso taru, io, i kis sikot tong o Galili.

*O Iesu i wan sur a kum lamlabino bung na lotu*

<sup>10</sup>Ra a kum tistisin o Iesu det sa wan sur a kum lamlabino bung na lotu, io, numur o Iesu i mur det, ikut ke upuaso i torom a taro. I wan eno nanan kut. <sup>11</sup>A ramano kum te Juda det sisio sur o Iesu una kum lamlabino bung na lotu, det iting lena, “A musano ri awai i?”

<sup>12</sup>A susut na taro det wasiso eno un o Iesu. Ara taro det watungi uni lena, “I ara wakak na musano,” ma ara taro kai det watungi lena, “Awu, i ben raro a taro.” <sup>13</sup>Ikut kataio i wasiso puaso uni, uni det ngaran a ramano kum taro Judia.

*O Iesu i ususer a taro ra det wanpat una kum lamlabino bung na lotu*

<sup>14</sup>Ra det sa kis epotor una kum lamlabino bung na lotu, o Iesu i turpasi sur in ususer

\* 7:2: Una kum lamlabino bung na lotu na turturup, a taro Israel det ser pam a kum turturup ra det ser inep uni, sur det in ukinalong a kum kilalo ra det kis una nubual kalako taro uni.

a taro una rumu na etabor. <sup>15</sup> A ramano kum te Juda det kisin doko ra det watungi lena, “A musano ri ke etowo pas. Ikut i tasman petlan a kum utna ri?” <sup>16</sup> O Iesu i balu det lena, “Anung a kum etowo, ra a ususer a taro nami, ausur anung, anun o naro ra i tulu ru iau urin. <sup>17</sup> Osi ra i nem na mur a nemnem anun o God, in tasmani lena anung a kum etowo i wan tagai. I wan tagisapat tan o God, o a nuknuking kut. <sup>18</sup> Osi ra i wasiso kut nama nuknukino, i nemi kut sur din ulabo pasi. Ikut iau, a nemi sur din ulabo pas o God ra i tulu ru iau urin. A wasiso nama lingmulus, ma katu torotoro i kis un iau. <sup>19</sup> O Moses i sa pitar tar a kum Warkurai tamot, ikut kataio tagun mot i tarom uni. Sur asau ra mot nem na um doko iau?”

<sup>20</sup> A kunur na taro det balu i lena, “A laulau na nion kura un ui. Osi i nem na um doko ui?” <sup>21</sup> O Iesu i balu det lena, “A pam ara utna na ukisin, ma mot rop mot kisin uni. <sup>22</sup> O Moses i pitar tar a warkurai tamot sur mot in tok talilis a kum nat musano. Ikut a warkurai ri, ausur anun o Moses, a taro ut tagun numugu det turpasi. Ma a ramano kum du bung utkai mot tok talilis una Bung na Sabat. <sup>23</sup> Mot ser tok talilis una Bung na Sabat, sur gong di kutus a warkurai anun o Moses. Ra mot pami lenra, sur asau ra mot kankan torom iau ra a ulangolango pas a kudulano musano una Bung na Sabat? <sup>24</sup> Gong mot warkurai kut nama matamot, mot in warkurai nama warkurai ra i tokodos.”

*Ara taro ka det nurnur lena o Iesu i a Karisito*

<sup>25</sup> Ara taro tagisapat o Jerusalem det iting lena, “I mo ri a musano ra det nem na um doko i? <sup>26</sup> Tama i, iri i tur ma i wasiso umatan a taro, ma ka det wasiso balu i. Kutiro a kum mugumugu det sa tasmani lena i a Karisito? <sup>27</sup> Ra a Karisito in nanpat, ka din tasmani lena in nanpat tagai. Ikut a musano ri det tasmani kut anun a tamon.”

<sup>28</sup> O Iesu i ususer utmakai una rumu na etabor, i wasiso nam in labino walngano ma i watungi lena, “Pepetlai, mot tasman mulus iau ut, ma a tamon kai a wan taguni? Ka wanpat urin una nuknuking. O naro ra i tulu ru iau, i watung a lingmulus ino. Ma mot, ka mot tasman o naro ra. <sup>29</sup> Ikut iau, a tasmani, uni a wan ut tagisapat tano, ma i ut i tulu ru iau.”

<sup>30</sup> Io, a kum te Juda det nemi lena det in pam ukai pasi, ikut kataio i pami, uni anun a du bung ke sot utmakai. <sup>31</sup> A susut tagun a kunur na taro det nurnur uni, ra det watungi lena, “A musano ri i pam tar a susut na utna na ukisin. Kutiro a Karisito ut ri?”

<sup>32</sup> A kum Parisi det longoro a taro det waswasiso eno lenri un o Iesu, ra a kum lamlabino tene etabor torom o God, ma a kum Parisi, det tulu ru a kum tene tamtamabat tagun a rumu na etabor, sur det in pam ukai pasi. <sup>33</sup> Ra o Iesu i watungi tandet lena, “Iau kan kis suano i nin nisamot, an nan melet torom o naro ra i tulu ru iau urin. <sup>34</sup> Mot in sisio sur iau, ikut ka mot in sio pas iau, ma ka mot in nan lar pasi kai una tamon ra an kis iai.” <sup>35</sup> A ramano kum te Juda det ting etetalai det lena, “A musano ri in nan mo urai, ra ka dat in sio lar pasi? Pepetlai, in nan sur a kum tamon anun a taro Grik ra anundat a taro det kis iai? Kutiro in ususer mo a taro Grik? <sup>36</sup> Uni i watungi lena dat in sisio suri ma ka dat in sio pasi, ma ka dat in nan lar pasi kai una tamon ra in kis iai. Asau a kukuraina nun a wasiso ri?”

*A wasiso elelar una Tokodos na Nion*

<sup>37</sup> A tintinip na bung ina kum lamlabino bung na lotu, i a labino bung sakit. Una bung ra, o Iesu i tur ma i wasiso nam in labino walngano, i watungi lena, “Osi ra i muruk, i wakak ra in nan torom iau ma in inum. <sup>38</sup> Osi ra i nurnur un iau, ‘a kum danim na nilaun det in sal pat tagun anun a nilaun,’ elar nami ra di sa tumus tari una Buk Tabu.” <sup>39</sup> Una wasiso ri, o Iesu i wasiso una Tokodos na Nion. Ka di pitar utmakai a Tokodos na Nion, uni o Iesu ke los utmakai anun a minamar. Numur, det ra det nurnur un o Iesu, din tabor det nami.

*A nuknukin a taro un o Iesu ke takai*

<sup>40</sup> Ara taro tagun a kunur na taro ra det longoro a wasiso ri, det watungi lena, “A lingmulus ut, a musano ri, i a poropet ra o God i tulu ru i urin.” <sup>41</sup> Ara taro kai det watungi lena, “I a Karisito.” Ma ara taro kai det watungi lena, “Awu. A Karisito ken nanpat tagitong o Galili. <sup>42</sup> A Buk Tabu i watungi lena, a Karisito in nanpat tagun a kabotaro anun o Dewid. In nanpat tong o Betliem, a tamon ra numugu o Dewid i kis iai.” <sup>43</sup> Ma a nuknukin a taro uni, ke takai. <sup>44</sup> Ara taro det nem na pam ukai i, ikut katu pasan det i pam sikoti.

*A kum mugumugu ka det nurnur*

<sup>45</sup> A kum tene tamtamabat tagun a rumu na etabor det milet melet, ra a kum lamlabino tene etabor torom o God ma a kum Parisi det ting det lena, “Sur asau ra ka mot dat pas o Iesu urin?” <sup>46</sup> A kum tene tamtamabat tagun a rumu na etabor det balu det lena, “Katutaio utmakai i ser wasiso elar nama musano ri!” <sup>47</sup> A kum Parisi det ting det lena, “Pepetlai, mot kai i sa ben raro pas mot? <sup>48</sup> Pepetlai, mot nuki lena taio tagun met a kum mugumugu ma a kum Parisi, i sa nurnur uni? Kalakol! <sup>49</sup> A kunur na taro ri, ra det nurnur un o Iesu, ka det tasman a kum Warkurai anun o Moses. A kankan anun o God i sa kis un det.”

<sup>50</sup> Ara Parisi tagun det, a risano o Nikodimas, i ra numugu i wanpat pas torom o Iesu, i watungi tandet lena, <sup>51</sup> “Una nundat a Warkurai, ka dat in takun oros pas taio ra ka di longoro i utmakai. Din longoro mugu tari sur din tasman asau i pami.” <sup>52</sup> Det balu i kut lena, “Ni, ui kai a te Galili ui? Un ususer una Buk Tabu ma un mananos uni lena a poropet ken nanpat tagitong o Galili.”

*A ino ra i pam a sakino*

[ <sup>53</sup> Ra a taro rop det wan susuaro sur anundet a kum tamtamon.

## 8

<sup>1</sup> O Iesu i wan toto usapat una Tangai na Oliw. <sup>2</sup> Una kobot raut una bung numur, o Iesu i milet melet sur a rumu na etabor, ra a taro rop det wan tomo toromi. Ra i kis ma i ususer det. <sup>3</sup> A kum tene ususer tagun a Warkurai, ma a kum Parisi det ben ruk ara ino torom o Iesu. A ino ra di pastoram pasi ra i pam a sakino tomo nam ara musano. Det ungonos pas a ino ra, sur in tur numugu umatan a taro. <sup>4</sup> Det watungi tan o Iesu lena, “Tene Ususer, a ino ri di pastoram pasi ra i pam a sakino nam ara musano. <sup>5</sup> Una Warkurai anun o Moses, ra tu ino in pami lenra, din duku doko i nama kum watat. Io ui, asau ra un watungi uni?” <sup>6</sup> Det watungi lenri, uni det nem na lari kut o Iesu ra in watung tar tu wasiso, sur det in takuni nami. Ikut o Iesu i tudung piso, ra i tumtumus nam in kaskas na lamano una piso.

<sup>7</sup> Det iting liklik lenra, ra i tur ma i watungi tandet lena, “Osi tagun mot ra ke pam tar tu sakino petutna, io, in duku mugu

a ino ri nam tu wat.” <sup>8</sup> O Iesu i tudung piso melet, ra i tumtumus una piso. <sup>9</sup> Det longoro tar a wasiso ri anun o Iesu, ra det rop det pirso. A kum takano det pirso mugu. Ra numur det rop det pirso taktakai. O Iesu mukut i kis tiro iai, der nama ino ra di utur tari nisano. <sup>10</sup> O Iesu i tur, ra i watungi tan a ino lena, “Le, det ra det takun ui, awai det mo? Kataio tagun det i takun ui?” <sup>11</sup> A ino i balu i lena, “Awu.” Ra o Iesu i watungi tano lena, “Iau kai kan takun ui. Un nan kut, ma gong melet mo u pam a sakino.”\*]

*O Iesu a talapor anun a rakrakon bual*

<sup>12</sup> O Iesu i wasiso melet torom a taro, ra i watungi lena, “Iau a talapor anun a rakrakon bual. Osi ra i mur iau, in pam ukai a talapor na nilaun, ma ken nan melet una dumirum.” <sup>13</sup> A kum Parisi det watungi tano lena, “Anum a wasiso talapor ke maut, uni ui ut, u wasiso talapor melet un ui.” <sup>14</sup> Ra o Iesu i balu det lena, “Ra iau ut an wasiso talapor un iau, anung a wasiso i lingmulus, uni a tasman a tamon ra a wan gusuni, ma a tamon ra an nan suri. Ikut mot, ka mot tasman a tamon ra a wan gusuni, ma a tamon ra an nan suri. <sup>15</sup> Mot, mot warkurai kut nama warkurai anun a taro, ma iau ka warkurai taio. <sup>16</sup> Ikut ra an warkurai taio, anung a warkurai i tokodos, uni, asur iau kut a pami, mir ut nam o Tita, i ra i tulu ru iau urin. <sup>17</sup> Di sa tumus tari una numot a Warkurai lenri, ‘Ra lako ru anunder a wasiso i elar kut un tu utna, anunder a wasiso i lingmulus.’ <sup>18</sup> Iau ri a wasiso talapor un iau, ma o Tita ra i tulu ru iau urin, i kai i wasiso talapor un iau.”

<sup>19</sup> Det tingi lena, “Awai i o tamam?” O Iesu i balu det lena, “Ka mot tasman iau ma ka mot tasman kai o Tamang. Ra gunuk mot in tasman iau, io, mot in tasman o Tita kai.” <sup>20</sup> O Iesu i watung a wasiso ri tiro una rumu na etabor, una nubual ra di ser ubek a mani na etabor iai. Kataio i pam ukai i, uni anun a du bung ke sot utmakai.

*O Iesu i utumarong a taro ra ka det nurnur*

<sup>21</sup> O Iesu i watung meleti tan a taro lena, “An nan gusun mot, mot in sisio sur iau, ma mot in mat nam anumot a kum sakino petutna. A tamon ra an nan suri, ka mot in nan lar pas iai.” <sup>22</sup> A ramano kum te Juda det lena, “Sur asau ra i watungi lena, ‘A tamon ra an nan suri, ka mot in nan lar pas

\* 8:11: A ramano kum tene mananos una Buk Tabu det nuki lena, o Jon ke tumus a kum rino 7:53 tuk 8:11. Det nuki lena, ara gisen ut i tumus murmuri.

iai"? Kutiro in um doko i duk?"<sup>23</sup> O Iesu i balu det lena, "Mot taginin ut mot upiso, ma iau, a wan ut tagisapat netes. Mot tagun a rakrakon bual, iau ausur tagun a rakrakon bual."<sup>24</sup> Iri a kibino ra a watungi tamot lena, mot in mat nam anumot a kum sakino petutna. Ra ka mot nurnur un iau lena iau ut i, ri iau,<sup>†</sup> io, mot in mat nam anumot a kum sakino petutna."<sup>25</sup> Ma det tingi lena, "Osi ui?" O Iesu i balu det, "A sa inanos tar mot turpasi una nung a pinapam, tuk uniri."<sup>26</sup> A susut na utna an watungi un mot ra an warkurai mot uni, uni i ra i tulu ru iau i lingmulus, ma iau, a inanos kut a taro una rakrakon bual una kum utna a longoro i gusuni."<sup>27</sup> Ka det tasmani lena, o Iesu i wasiso torom det un o Tamano.<sup>28</sup> Ma o Iesu i watungi lena, "Ra mot in utur toto a Nutun a Musano usapat netes, mot in tasmani lena iau ut i ri iau, ma mot in tasmani kai lena ausur iau sot kut a papam, o Tita i ususer iau un asau a watungi."<sup>29</sup> I ra i tulu ru iau, i kis torom iau, ke wan gusun iau, uni a ser pam a kum utna ra i gas nami."

<sup>30</sup> A susut ra det longoro a kum wasiso ri, det nurnur un o Iesu.

#### *A lingmulus ino in ulangolango mot*

<sup>31</sup> O Iesu i watungi torom a kum te Juda ra det nurnur uni lena, "Ra mot in tarom una nung a etowo, io, mot anung a taro na ususer mulus."<sup>32</sup> Ma mot in tasman a lingmulus ino, ma a lingmulus ino in ulangolango mot."<sup>33</sup> Det balu o Iesu lena, "Met a kum nutnutun o Abaram, tuk uniri ka met papam na karabus torom taio. Sur asau ra u watungi lena a lingmulus ino in ulangolango met?"

<sup>34</sup> O Iesu i balu det lena, "A inanos mot nama lingmulus, osi ra i pam a sakino, i a karabus anun a sakino petutna."<sup>35</sup> A musano ra i papam na karabus kut torom tu kabo tamano, ken kis tukum torom det, ikut a nat ra o tamano ma o nano der usur pasi, i ra tagun der mulus."<sup>36</sup> Io, ra a Nutun o God in ulangolango mot, mot in langolango mulus."<sup>37</sup> A tasmani ut lena, mot a kum nutnutun o Abaram, ikut uniri mot lari sur mot in um doko iau, uni anung a wasiso ke kis un mot."<sup>38</sup> A wasiso un asau ra a tama i

tan o Tita, ma mot kai, mot pam asau ra mot longoro i tan a tamamot."

<sup>39</sup> Det balu i lena, "Met, met tamano nam o Abaram."<sup>40</sup> O Iesu i balu det lena, "Ra mot tamano mulus nam o Abaram, io, mot in pam a kum utna ra o Abaram i pami."<sup>41</sup> Ikut mot nem na um doko iau, uni a inanos mot nama lingmulus ino ra a longoro i tan o God. O Abaram ke pam tu utna lenri."<sup>42</sup> Mot, mot pam ut a kum pinapam ra a tamamot i pami."

Det watungi tan o Iesu lena, "Ausur di usus oros tar met kut, a tamamet ut ra o God."

<sup>43</sup> O Iesu i watungi tandet lena, "Ra gunuk mot tamano mulus nam o God, io, mot in nem iau, uni a wan tagisapat tan o God, ra iri a kis nin. Ka wanpat urin una nung a nemnem, i ut i tulu ru iau."<sup>44</sup> Sur asau ra ka mot tasman lele anung a wasiso? Uni ka mot longoro lar pasi."<sup>45</sup> A tamamot ra o Satan, ma mot nemi ut lena mot in mur anun a nemnem. Tagun numugu utmakai, i a tene um doko a taro, ma ke tasman a lingmulus ino, uni katu lingmulus i kis uni. Ra i watung a torotoro, i wasiso nam anun a wasiso mulus ut, uni i ut a tene torotoro ma a taman a torotoro."<sup>46</sup> A watung a lingmulus ino, iri i a kibino ra ka mot nurnur un iau."<sup>47</sup> Osi tagun mot in takun sot pas iau un tu sakino petutna? A watung a lingmulus ino, ra ilai ra ka mot nurnur un iau? Osi ra anun o God i ser longoro a kum wasiso anun o God. Ikut mot, ka mot longoro i, uni ausur mot anun o God."

#### *O Iesu i labo taun o Abaram*

<sup>48</sup> A ramano kum te Juda det watungi tan o Iesu lena, "Met tasman mulusi lena ui a te Samaria, ma a laulau na nion kura un ui."

<sup>49</sup> Ra o Iesu i balu det lena, "Katu laulau na nion kuri un iau. A urur torom o Tita, ma mot, ka mot urur torom iau."<sup>50</sup> Ka pam a kum utna ri sur a taro det in ulabo pas iau uni, ikut ara sot kut, a tene warkurai, i ulabo pas iau."<sup>51</sup> A inanos mot nama lingmulus, osi ra i tarom una nung a wasiso, ken mat."

<sup>52</sup> A ramano kum te Juda det watungi tano lena, "Uniri met tasman mulus ui lena a laulau na nion kura un ui! O Abaram i sa mat, ma a kum poropet kai det sa mat, ikut ui, u watungi lena osi ra i tarom una num a

<sup>†</sup> 8:24: "Iau ut i, ri iau" Una du wasiso ri, o Iesu i watungi ut nama risan o God. Una buk Kisim Bek 3:14, o God i watungi ut nama rising ri, ra i inanos o Moses lena, a taro Israel kai det in watungi nama rising ri. A ramano kum du buk utkai o Iesu i watungi uni ut a God, kura una buk Jon 4:26; 6:20; 8:28; 8:58; 13:19; 18:5.

wasiso ken mat. <sup>53</sup>Pepeulai, u nuki lena ui u labo tauna a tamamet o Abaram? O Abaram i sa mat, ma a ramano kum poropet kai det sa mat. U nuki lena ui osi na ngas na musano ui?" <sup>54</sup>O Iesu i balu det lena, "Ra an ulabo melet pas iau ut, anung a wasiso na ulabo ri ke gas un tu utna. Ikut o Tita ut i ulabo pas iau, i ra mot watungi lena i anumot a God. <sup>55</sup>Mot, ka mot tasman o God, ikut iau, a tasmani. Ra an watungi lena ka tasmani, iau kai an tene torotoro elar nam mot. A tasman o God, ma a tartarom una nun a wasiso. <sup>56</sup>A tamamot o Abaram i gas sur in tama anung a inawan pat. I tama i, ra i gas doko uni." <sup>57</sup>A kum te Juda det watungi tano lena, "Ke limo na noino kilalo utmakai una nilaun anum. Ilai ra u watungi lena, u sa tama tar o Abaram?" <sup>58</sup>O Iesu i balu det lena, "A inanos mot nama lingmulus, numugu ra ka di usus utmakai o Abaram, iau a sa kis mugu taru."

<sup>59</sup>Ra det los watat pas sur det in dukuduku o Iesu nami, ikut i parau ra i wan gusun a rumu na etabor.

## 9

### *O Iesu i utamtama pas a pulu*

<sup>1</sup>Ra o Iesu i wan nanan, i tama pas ara musano a pulu. O nano i usus pasi, i sa pulu taru. <sup>2</sup>A kum nat na ususer det tingi lena, "Tene Ususer, sur asau ra di usus pasi, i sa pulu? Osi mo i pam a sakino petutna, i ut, o, o tamano ma o nano?" <sup>3</sup>O Iesu i balu det lena, "A musano ri ke pam tar tu sakino petutna, o tamano ma o nano kai awu. I pulu kut sur a taro det in tama a dekdekin o God uni. <sup>4</sup>I wakak sur dat in pam ut a kum pinapam anun o naro ra i tulu ru iau urin ra i waspi utmakai. Ra i sa mirum, kataiao melet mo in pet lar pasi sur in papam. <sup>5</sup>Ra a kis nin upiso, iau a talapor anun a rakrakon bual."

<sup>6</sup>O Iesu i sa watung tari lenri, ra i ibis taru una piso, i gisgis pas a ibisino tomo nama piso, ra i talus arin matan a pulu nami. <sup>7</sup>O Iesu i watungi tano lena, "Un nan, ma un gos pas arin matam una kabopolo Siloam." (Siloam a kukuraino di tulu i.) I wan, ra i gos pas arin matano. Ra i milet, arin matano der sa tamtama.

<sup>8</sup>A kum paspasano, ma a taro ra det tamtama i ra i ser sarsaring utna det iting lena, "Kutiro a musano ra i kiskis ma i ser sarsaring utna, niko?" <sup>9</sup>Ara taro det watungi lena, "I ut ra." Ara taro kai det

watungi lena, "Awu, i tamtama elar kut nama musano ra." Io, i ut i watungi lena, "Iau ut ri." <sup>10</sup>Det tingi lena, "Di utamtama petlan pas arin matam?" <sup>11</sup>I balu det lena, "A musano ra di watungi lena o Iesu i gisgis pas a ibisino nama piso ra i talus tar arin matang nami. Ra i tulu ru iau ma i watungi lena, 'Un nan utong una kabopolo Siloam sur un gos pas arin matam.' A wan ma a gos pas arin matang, ra a tamtama mut." <sup>12</sup>Det tingi lena, "Ma i, awai i?" A musano ra i balu det lena, "Ka tasmani."

### *A kum Parisi det ting a pulu*

<sup>13</sup>Det ben pas a musano ra numugu i pulu torom a kum Parisi, <sup>14</sup>uni o Iesu i gisgis pas a ibisino nama piso ma i utamtama pas a pulu una Bung na Sabat. <sup>15</sup>A kum Parisi det ting melet a musano lena, "Di utamtama petlan pas ui?" I balu det lena, "I talus tar arin matang nama piso ra i gisgis tari nama ibisino, a gos pasi, ra a tamtama mut." <sup>16</sup>A ramano kum Parisi det watungi lena, "A musano ra i pam a utna ri, i asur tagun o God, uni i papam una Bung na Sabat." A ramano kai det watungi lena, "Ra a musano ri a sakino musano, in pam petlan a kum utna na ukisin ri?" Ra a nuknukindet ke takai uni. <sup>17</sup>Ara dino melet a kum Parisi det ting a musano ra lena, "Asau un watungi una musano ra i utamtama pas ui?" I balu det lena, "I ara poropet."

<sup>18</sup>A ramano kum te Juda ka det nurnur lena a musano ri numugu i pulu ma di sa utamtama pasi. Ra det itula pasi ut o tamano ma o nano, ma det ting der lena, <sup>19</sup>"A nutumur ut ri? I ra mur watungi lena mur usus pasi, i sa pulu? I tamtama pepeulai?" <sup>20</sup>O tamano ma o nano der balu det lena, "Mir tasmani lena a nutumir ut ri, ma mir tasmani lena mir usus pasi, i sa pulu. <sup>21</sup>Ikut ka mir tasmani ra i tamtama pepeulai, ma ka mir tasmani kai osi ra i utamtama pasi. I sa tarai na musano, mot in tingi, i ut in wasiso talapor uni." <sup>22</sup>O tamano ma o nano der wasiso lenri, uni der ngaran a kum te Juda, ra det watungi lena, ra taio in nurnur un o Iesu lena i a Karisito, din turbat ru i gusun a rumu na lotu. <sup>23</sup>Iri i a kibino ra o tamano ma o nano der watungi lena, "I sa tarai na musano, mot in tingi."

<sup>24</sup>Det ben melet pas a musano ra di usus pasi, i sa pulu, ma det watungi tano lena, "Un liliman umatan o God ra anum a wasiso i lingmulus ut! Met tasmani lena a musano

ra i utamtama pas ui, a tene sakino.”<sup>25</sup> I balu det lena, “Ka tasmani ra i a tene sakino, o awu. Ara utna kut ra a tasmani: Numugu a pulu, ma uniri a sa tamtama.”<sup>26</sup> Det tingi lena, “Asau ra i pami un ui? Ma i utamtama petlan pas ui?”<sup>27</sup> I balu det lena, “A sa watung tari tamot, ma ka mot longoro i. Sur asau ra mot nem na longoro meleti? Kanapi mot kai mot nemi sur mot anun a kum nat na ususer?”

<sup>28</sup> Det watung laulau i, ma det watungi uni lena, “Ui anun a nat na ususer, ikut met a kum nat na ususer anun o Moses.”<sup>29</sup> Met, met tasmani lena o God i wasiso torom o Moses, ikut a musano ra, ka met tasmani ra i wan tagai.”<sup>30</sup> A musano i balu det lena, “Ai, a utna na ukisin! Ka mot tasmani ra i wan tagai, ikut i sa utamtama pas iau.”<sup>31</sup> Dat tasmani lena o God ken longoro a niaring anun a kum tene sakino, in longoro det kut ra det ru i ma det tartarom una nun a nemnem.”<sup>32</sup> Turpasi una turturkibin a rakrakon bual tuk uniri, ka di tasman tar taio ra in utamtama pas arin matan tu pulu, ra di usus pasi, i sa pulu.”<sup>33</sup> Ra a musano ri ausur tagun o God ken pam lar pas tu utna.”<sup>34</sup> Det balu i lena, “Di usus pas ui una sakino petutna, ma ui, u nemi lena un ususer met!” I o, det lakro ru i mut gusun a rumu na lotu.

#### *Osi ra ke nurnur i a pulu*

<sup>35</sup> O Iesu i longoro i lena, di sa lu ru tar a musano ra, ra i sisio suri, ma i sio pasi ra i tingi lena, “U nurnur ut una Nutun a Musano?”<sup>36</sup> I balu i lena, “Labino, un inanos iau, osi ra a Nutun a Musano, sur an nurnur uni.”<sup>37</sup> O Iesu i watungi tano lena, “Iri u sa tama i, iau ut ri a wasiso tam.”<sup>38</sup> A musano ra i watungi lena, “Labino, a nurnur un ui!” I kis butkeke ma i lotu toromi.

<sup>39</sup> O Iesu i watungi lena, “A wanpat urin una rakrakon bual nama warkurai, sur det ra det pulu det in tamtama, ma det ra det tamtama det in pulu.”<sup>40</sup> A ramano kum Parisi ra det tur tomo nami, det longoro a wasiso ri, ra det tingi lena, “U nuki lena met kai met pulu?”<sup>41</sup> I balu det lena, “Ra gunuk mot pulu, kataio in takun mot un tu sakino petutna. Ikut iri mot watungi lena mot tamtama, io, anumot a sakino petutna i kis utmakai.”

## 10

*A wasiso elelar una tene tamtamabat anun a kum sipsip*

<sup>1</sup> O Iesu i watungi lena, “A inanos mot nama lingmulus, i ra ke ruk una matansako tagun in noworo na sipsip, ma i ka tito kut unarumu, i a tene wolong ma a tene ras oros kut a kum utna.”<sup>2</sup> Ikut a musano ra i ruk tokodos una matansako, i a tene tamtamabat mulus anun a kum sipsip.”<sup>3</sup> A tene tamtamabat ina matansako in papos saro tari sur in ruk. A kum sipsip det longoro lele in nalngano. I ser kabo det nama kum risandet ma i ser ben pirso det.”<sup>4</sup> In ben pirso rop pas anun a kum sipsip, ra in mugu pas det ma det in muri, uni det longoro lele in nalngano.”<sup>5</sup> Ka det in mur tu usiro, det in kalabor gisen kut gusuni, uni ka det longoro lele in nalngano.”<sup>6</sup> O Iesu i watung a wasiso elelar ri tandet, ikut ka det tasman asau ra i wasiso uni.

*O Iesu a wakak na tene tamtamabat anun a kum sipsip*

<sup>7</sup> Io, o Iesu i watung meleti lena, “A inanos mot nama lingmulus, iau a matansako anun a kum sipsip.”<sup>8</sup> Det rop ra det wanpat mugu tang, a kum tene wolong ma a kum tene ras oros pas a kum utna, ma a kum sipsip ka det longoro det.”<sup>9</sup> Iau a matansako, osi ra i ruk uni, din ulauni. In ruk ma in pirso ma in etorom kut ana utna na inangon.”<sup>10</sup> A tene wolong i ruk kut sur in wolong, ma in um doko a kum sipsip ma in banlulau det. Ikut iau, a wanpat sur det in utur ukai a nilaun, a nilaun ra i bukus nama wakak ino.

<sup>11</sup> “Iau a wakak na tene tamtamabat anun a kum sipsip. A pitar anung a nilaun sur an matbat det.”<sup>12-13</sup> A musano ra di doki kut, ausur a tene tamtamabat mulus anun a kum sipsip, ma a kum sipsip ausur anunu. Ra in tama pas a ngalngalia na pap in nanpat, in kalabor pas gusun a kum sipsip, uni i papam kut sur a mani, ma ke maris a kum sipsip. Ma a ngalngalia na pap in karkarot det ma in lu sarara ru det.

<sup>14</sup> “Iau a wakak na tene tamtamabat anun a kum sipsip. A tasman anung a kum sipsip, ma anung a kum sipsip kai det tasman iau,<sup>15</sup> elar nam o Tita i tasman iau, ma a tasman o Tita, ma a pitar anung a nilaun sur an matbat det.”<sup>16</sup> Anung a ramano kum sipsip kai, ka det kis un in noworo na sipsip ri. An ben pas det utkai, ma det in longoro in nalngang, sur det rop det in kis kut un in teken noworo, ma ara sot kut in tene tamtamabat anundet.

<sup>17</sup> “O Tita i nem mulus iau, uni iau ut a pitar anung a nilaun, sur numur an los melet pasi. <sup>18</sup> Kataio in rakon ru anung a nilaun, iau ut an pitari. Iau ut a pam a warkurai sur an pitari, ma iau ut a pam a warkurai sur an los melet pasi. Iri i a pinapam ra o Tita i tulu ru iau sur an pami.”

<sup>19</sup> A kum te Juda det tapagol una kum wasiso ri anun o Iesu. <sup>20</sup> A susut gusun det, det watungi lena, “A laulau na nion kura uni, ma i sa toboroboro. Asau ra mot longoro i suri?” <sup>21</sup> Ikut ara taro det watungi lena, “Ausur a ngas na wasiso ri anun taio ra a laulau na nion kura uni. Pepetlai, a laulau na nion in pet lar pasi sur in utamtama a taro ra det pulu?”

*A kum te Juda ka det nurnur un o Iesu*

<sup>22</sup> Io, numur det ukinalong a labino bung na lotu sur det in nuk melet pas a bung ra det papos a rumu na etabor uni. Det ukinalong a labino bung na lotu ri sapat o Jerusalem epotor una kum kalang na kotokoto. <sup>23</sup> O Iesu i wan nanan una parada ra di watungi nama parada anun o Solomon, una rumu na etabor. <sup>24</sup> A kum te Juda det tur talilis pas o Iesu, ma det tingi lena, “Un nangisin mo un inanos mulus met? Ra ui a Karisito, un inanos kapo met.” <sup>25</sup> Ra o Iesu i balu det lena, “A sa watung tari tamot, ikut ka mot nurnur. A kum pinapam ra a pami una risan o Tita, det wasiso talapor un iau. <sup>26</sup> Ikut ka mot nurnur, uni ausur mot anung a kum sipsip. <sup>27</sup> Anung a kum sipsip det ser longoro in nalngang. A tasman det, ma det murmur iau. <sup>28</sup> Ma a pitar a nilaun tukum tandet, ma ka det in iru. Ma kataio in ras ru det gusun a lamang. <sup>29</sup> O Tita ra i pitar tar det tang, i labo taun a kum utna rop, ma kataio in ras ru det gusun a laman o Tita. <sup>30</sup> Mir nam o Tita, mir takai kut.”

<sup>31</sup> A kum te Juda det los watat melet sur det in duku doko o Iesu nami. <sup>32</sup> O Iesu i watungi tandet lena, “A sa pam ese tar a susut na utna na ukisin umatamot, ra o Tita i pitar tari tang sur an pami. Asi na utna tagun a kum utna na ukisin ri mot nem na duku iau uni?” <sup>33</sup> Det balu i lena, “Met nem na duku ui, ausur un tu utna na ukisin ra u pami, ikut met nem na duku ui uni u watung laulau o God! Ui a musano kut ui, ra u watungi lena ui o God.” <sup>34</sup> O Iesu i watungi tandet lena, “Mot sa tasmani ut lena di sa tumus tari una numot a kum Warkurai ra o God i lena, ‘Mot a kum god’. *Buk Song 82:6*

<sup>35</sup> I watung det lena det a kum god, det ra di pitar tar a wasiso anun o God tandet. Ma kataio in pet lar pasi sur in rakon ru a wasiso na Buk Tabu. <sup>36</sup> Ma iau, o Tita ut i pilok pas iau, ma i tulu ru iau urin una rakrakon bual. Io, ilai ra mot takun iau lena a watung laulau o God uni a watungi lena iau a Nutun o God? <sup>37</sup> Ra kan pam a kum pinapam anun o Tita, gong mot nurnur un iau. <sup>38</sup> Uniri a pami ut anun a kum pinapam. Ikut ra ka mot nurnur una nung a wasiso, mot in nurnur un iau kibino una kum pinapam a pami, sur mot in tasmani lena o Tita kuri un iau, ma iau kura un o Tita.”

<sup>39</sup> Ara dino melet det nem na pam ukai o Iesu, ikut i wan eno pas kut gusun det.

<sup>40</sup> O Iesu i wolos melet a danim Jordan sur a nubual ra numugu o Jon i baptaiso iai, ra i kis tiro. <sup>41</sup> A susut na taro det wan torom o Iesu ma det wasiso etetalai torom det lena, “O Jon ke pam tu utna na ukisin, ikut a kum wasiso rop i sa watung tari una musano ri, i lingmulus sakit.” <sup>42</sup> Ma a susut na taro tiro iai det nurnur uni.

## 11

*O Lasarus i mat*

<sup>1-2</sup> Ara musano tagitong o Betani, a risano o Lasarus, i misait. Detul tisino nam o Maria mo Mata. O Maria ri, i ra i lingis tar in nokoto na polo sangsangnain una aru kikin a Labino, ma i us sengesenge der nama iwu na lorino. <sup>3</sup> O Maria der sinoino nam o Mata der pitar ru a wasiso sur o Iesu lenri, “Labino, a pasam, ra u ser nem doko i, i misait.”

<sup>4</sup> O Iesu i longoro i, ra i watungi lena, “Ausur o Lasarus in mat una misait ri. I misait kut, sur din tama a minamar anun o God, ma sur din mar kai a Nutun o God nami.”

<sup>5</sup> O Iesu i maris o Mata ma a tisinoino o Maria ma a tisinder o Lasarus. <sup>6</sup> Ikut ra i longoro i lena o Lasarus i misait, i kis melet pas ut aru bung una tamon ra i kis iai. <sup>7</sup> Numur o Iesu i inanos a kum nat na ususer lena, “Dat in milet melet utong una papor Judia.” <sup>8</sup> Ma det watungi tano lena, “Ai, Tene Ususer, urabung kut a kum te Juda det nem na duku doko ui, ra uniri u nem na milet melet kut utong?” <sup>9</sup> O Iesu i watungi lena, “Ara bung i elar nama noino ma aru du bung, niko? Ra taio i wanan una suan ken tutuka, uni i tamtama una talapor

ina rakrakon bual. <sup>10</sup>Ikut ra taio i wanan una mirum in tutuka, uni kalako talapor.”

<sup>11</sup>O Iesu i watung tar a wasiso ri tandet, ra numur i lena, “A pasandat o Lasarus i sa inep dumun, ma an nan sur an wangun pasi.” <sup>12</sup>A kum nat na ususer det balu i lena, “Labino, ra i inep dumun kut, in langolango melet.” <sup>13</sup>O Iesu i wasiso una minat in o Lasarus, ikut a kum nat na ususer det nuki lena o Lasarus i inep dumun kut. <sup>14</sup>Io, o Iesu i watung palosi maragom tandet lena, “O Lasarus i sa mat. <sup>15</sup>Ra iau, a gas un mot ra ka kis tong, sur mot in nurnur. Io, uniri dat in nan mo toromi.” <sup>16</sup>O Tomas ra di watungi kai nama kasango i watungi tan a kum nat na ususer lena, “Dat in nan tomo sur dat kai dat in mat tomo nami.”

*O Iesu i a nilaun melet, ma i a nilaun mulus*

<sup>17</sup>O Iesu i wanpat, ra i longoro i lena di sa uruk ru tar a minat in o Lasarus una kulam na minat, ma i sa wat na bung bat tari. <sup>18</sup>A tamon ra, o Betani, i milau kut o Jerusalem, i elar kut nama tulu kilomita, <sup>19</sup>ra a susut na te Juda det wanpat torom o Mata ma o Maria sur det in kis umaui der una tisinder ra i mat.

<sup>20</sup>O Mata i longoro i lena o Iesu kura mo i wan nanan urin, ra i pirso, i wan barato i. Ikut o Maria i kis utmakai tiro urumu.

<sup>21</sup>O Mata i watungi tan o Iesu lena, “Labino, ra gunuk un kis ut nin, o tisinglik ken mat.

<sup>22</sup>Ikut a tasmani lena, ra un saring o God sur tu utna uniri, in pitari kut tam.” <sup>23</sup>O Iesu i watungi tano lena, “O tismilik in laun melet kut.” <sup>24</sup>O Mata i balu i lena, “A tasmani lena in laun melet una bung ra o God in ukatutur melet pas a taro gusun a minat.” <sup>25</sup>O Iesu i watungi tano lena, “Iau a nilaun melet gusun a minat, ma iau a nilaun mulus. I ra i nurnur un iau, ra in mat, in laun melet, <sup>26</sup>ma i ra i laun ma i nurnur un iau, ken mat. U nurnur ut una wasiso ri?” <sup>27</sup>O Mata i balu i lena, “Ma Labino, a nurnur lena ui a Karisito a Nutun o God, i ra o God i tulu ru i urin una rakrakon bual.”

<sup>28</sup>Numur ra o Mata i sa watung tari lenri, i milet melet ma i kabo eno pas a tisinoino o Maria, ma i inanosi lena, “A Tene Ususer i sa wanpat ma i iting sur ui.” <sup>29</sup>O Maria i longoro i lenri, ra i pirso lakit ma i wan toromi. <sup>30</sup>O Iesu ke wanpat utmakai una tamon, i kis utmakai una nubual ra o Mata i barato pasi iai. <sup>31</sup>A kum te Juda ra det kis tomo nam o Maria tiro urumu sur det in umaromi, det tama i ra i pirso lakit pas

gusun det unago utamon, ra det muri. Uni det nuki lena in nan sur a kulam na minat sur in domos iai.

<sup>32</sup>O Maria i wanpat una nubual ra o Iesu i kis iai, ra i tama pasi, i kis butkeke taru numugu nisano, ma i watungi lena, “Labino, ra gunuk un kis ut nin, a tisinglik ken mat.”

<sup>33</sup>O Iesu i tama o Maria tomo nama kum te Juda ra det wan tomo nami det domos nanan, ra i nukruk doko una niono ma in balano i tupunuk. <sup>34</sup>O Iesu i ting det lena, “Kura mot ubek tar a minat ino awai?” Det balu i lena, “Labino, wan urin sur una tama i.” <sup>35</sup>Io, o Iesu i tangis. <sup>36</sup>A kum te Juda det watungi lena, “Mot tama i, i maris doko i!” <sup>37</sup>Ikut ara taro tagun det, det watungi lena, “I utamtama pas a matan a pulu, ilai ra ke ulangolango pasi kai a musano ri, sur gong i mat?”

*O Iesu i ulaun pas o Lasarus*

<sup>38</sup>In balano Iesu i maut doko, ra i wanpat nisan a kulam na minat. A kulam na minat ra, a mato kura tiro una papor wat, ma di ubek bat tari nama labino wat. <sup>39</sup>O Iesu i watungi tandet, “Mot in bulus karai ru a wat.” Ra o Mata, a tisin a musano ra i mat, i balu i lena, “Labino, i sa singino, uni i sa wat na bung bat tari!” <sup>40</sup>O Iesu i watungi tano lena, “Pepeulai, ka watung tari tam lena, ra un nurnur un tama a minamar anun o God?”

<sup>41</sup>Io, det bulus karai ru a wat. O Iesu i tatado usapat netes, ra i watungi lena, “Tita, a watung wakak torom ui, uni u sa longoro iau. <sup>42</sup>A tasmani lena u ser longoro iau, ikut a wasiso lenri, kibino una taro ri, sur det in nurnur lena ui u tulu ru iau.”

<sup>43</sup>I sa watung tari lenri, ra i kakabo nam in labino walngano lena, “Lasarus, un pirso!”

<sup>44</sup>O Lasarus i pirso, tomo nama kum malu ra di rau tar aru lamano ma aru kikino nami, ma ara du malu kai ra di pulusbat tar in masarino nami. O Iesu i watungi tandet lena, “Mot in palos ru a kum malu na minat gusuni sur in nan.”

*Det wasiso tomo sur det in um doko o Iesu (Mt 26:1-5; Mk 14:1-2; Lk 22:1-2)*

<sup>45</sup>A susut na te Juda ra det kis nisan o Maria, det tama a utna ri o Iesu i pami, ma det nurnur uni. <sup>46</sup>Ikut ara taro gusun det ka det nurnur, ra det wan torom a kum Parisi ma det inanos det una utna ri o Iesu i pami. <sup>47</sup>A kum lamlabino tene etabor torom o God, ma a kum Parisi det kabo tomo a taro na kiwung, ma det watungi lena, “Asau dat in

pami? A musano ri i pam a susut na utna na ukisin. <sup>48</sup>Ra dat in madek ru i, a taro rop det in nurnur uni, ma a kum taro na inaim tagitong o Rom det in nanpat ma det in rege ru anundat a rumu na etabor ma det in rakon ru anundat a gapman kai.”

<sup>49</sup>Ara tagun det a risano o Kaiapas, a mugumugu na tene etabor torom o God una kilalo ra, i watungi lena, “Ai, ka mot mananos. <sup>50</sup>Ka mot tasmani lena in wakak torom mot ra taio in matbat a taro, sur gong dat a taro Juda rop dat in iru.”

<sup>51</sup>Ausur i watung orosi kut. I wasiso na poropet lenra, uni i a mugumugu na tene etabor anun o God una kilalo ra. I wasiso un o Iesu lena in mat una taro Juda. <sup>52</sup>Ma ausur in mat un det kut, una taro rop utkai anun o God ra det kis una ramano kum tamon gisen, sur in ben tomo pas det ma det in takai kut.

<sup>53</sup>Una bung ut ra, a kum mugumugu anun a taro Juda det turpas a wasiso sur lako kum kisapi sur det in um doko o Iesu. <sup>54</sup>Lenra o Iesu ke ser wan mo umatandet. I wan pas tagitiro, sur a tamon Eparaim ra i milau una nubual kalako taro uni, ra det kis tiro nam anun a kum nat na ususer.

<sup>55</sup>A labino bung na lotu na Wanlakai anun a taro Juda i sa milau, ra a susut na taro tagun a kum tamon det mugu usapat o Jerusalem, sur det in utalapor mugu pas det umatan o God ra ka di pam utmakai a labino bung na lotu, elar nama ngasino tagun anundet a lotu. <sup>56</sup>Tiro iai, det sisio sur o Iesu. Det tur tomo taru una rumu na etabor, ra det ting etetalai det lena, “Asau mot nuki, in nan ut urin una labino bung na lotu, o awu?” <sup>57</sup>A kum lamlabino tene etabor ma a kum Parisi det sa itula taru lena, ra taio i sa tama tar o Iesu, in inanos lakit uni ra kura i kis awai, sur det in pam ukai pasi.

## 12

*O Maria i waninar o Iesu sur a bung ra in mat ma din uruki una kulam na minat*

(Mt 26:6-13; Mk 14:3-9)

<sup>1</sup>A wonom na bung utmakai numugu tan a labino bung na lotu na Wanlakai, o Iesu i wanpat utong o Betani, a tamon anun o Lasarus, a musano ra o Iesu i ulaun melet pasi gusun a minat. <sup>2</sup>Ra det pam a inangon tiro sur u ugagas o Iesu. O Mata i wapor

utna torom det, ma o Lasarus i ara tagun det ra det kis tomo nam o Iesu una inangon.

<sup>3</sup>Ra o Maria i los pas in nokoto na polo sangsangnain ra di watungi nama nad, ma a matano i ka doko. I lingisi una ru kikin o Iesu ma i us der nama iwu na lorino. Ma a sangnain ino, i ubukus pas a rumu ra.

<sup>4</sup>Ara gusun a kum nat na ususer anun o Iesu, o Judas Iskariot, i ra in usobor tar o Iesu, i watungi lena, <sup>5</sup>“Sur asau ra ka di siuru in nokoto na polo sangsangnain ri sur lako tulu mar na denari\* sur din tabor a kum sibo na taro nami?” <sup>6</sup>O Judas ke maris a sibo na taro, awu. I watungi lenri uni i ser tamtamabat anundet a mani ma i ser loslos eno i, uni i a tene wolong. <sup>7</sup>O Iesu i longoro a wasiso anun o Judas, ra i watungi lena, “Madek ru a ino ri, uni i sa pam tar a pinapam ri un iau sur a bung ra an mat ma din uruk a minating una kulam na minat.

<sup>8</sup>A kum sibo na taro det in laun bolbolos tomo ut nam mot. Ikut iau, kan kis tukum nisamot.

*Det epak sur det in um doko o Lasarus*

<sup>9</sup>A kunur na taro tagun a taro Juda det longoro i lena o Iesu kurong i o Betani, ra det wan utong. Ausur det wan sur det in tama o Iesu kut, det wan utkai sur det in tama o Lasarus, i ra o Iesu i sa ulaun pasi gusun a minat. <sup>10</sup>Io, a kum lamlabino tene etabor det epak sur det in um doko o Lasarus utkai. <sup>11</sup>Uni a susut na te Juda det wan gusun det ma det nurnur un o Iesu, i kibino un o Lasarus.

*O Iesu i wan usapat o Jerusalem elar nama king*

(Mt 21:1-11; Mk 11:1-11; Lk 19:28-40)

<sup>12</sup>Una bung numur, a labino kunur na taro ra det wanpat sur a labino bung na lotu na Wanlakai, det longoro i lena o Iesu kai i sa wan nanan usapat o Jerusalem. <sup>13</sup>Ra det los pas a kum dono baibai ma det wan sur det in barato o Iesu nami. Ra det kukukuk lena,

“Osana! O naro ra i wanpat nama risan a Labino i dan! Buk Song 118:25-26  
Dat in watung ulabo pas a king anun a taro Israel!”

<sup>14</sup>O Iesu i sio pas a dongki, ra i kis taru netes uni, elar nama Buk Tabu i sa watung tari uni lena,

<sup>15</sup>“A taro Sion, gong mot ngara.

\* 12:5: Ara denari i elar nama ikul anun ara musano un ara bung na pinapam.

Tama i, anumot a king i wanpat nanan, i kis una matok na dongki.” *Sekaraia* 9:9

<sup>16</sup> A kum nat na ususer anun o Iesu ka det tasman lele i lena a kum utna ri di sa tumus mugu tari una Buk Tabu. Ikut ra o Iesu i sa kis una nuna minamar, io det tasmani maragom lena di sa tumus tar a kum utna ri un o Iesu, ma di sa pam tari kai a kum utna ri uni.

<sup>17</sup> A susut na taro ra det tur tomo nam o Iesu una bung ra i kabo pirso pas o Lasarus tagun a kulam na minat ma i ulaun pasi, det inanos nanan nami. <sup>18</sup> Ra a susut na taro det wan sur det in barato o Iesu, uni det sa longoro tar a wasiso una utna na ukisin ri. <sup>19</sup> A kum Parisi det wasiso etetalai torom det lena, “Mot tama i, ka dat in pam lar pas tu utna ra dat nem na pami uni. Uni a taro rop det sa muri.”

*A taro Grik det nem na tama o Iesu*

<sup>20</sup> A ramano kum te Grik kai det wan usapat o Jerusalem una labino bung na lotu na Wanlakai, sur det in lotu. <sup>21</sup> Ra det wan torom o Pilip, a te Betsaida. O Betsaida ara tamon una papor Galili. Ma det watungi tano lena, “Le, met nemi sur met in tama o Iesu.” <sup>22</sup> O Pilip i wan ra i inanos o Endru. Io, der wan ma der inanos tar o Iesu. <sup>23</sup> Ra o Iesu i watungi tander lena, “A du bung i sa wanpat sur o God in mar a Nutun a Musano. <sup>24</sup> A inanos mot nama lingmulus, ra in niwino wit ken puku taru una piso, ma ken mat pas, in kis len taru ut ra, in rene kut. Ikut ra in mat pas, in wu lako susut na wino. <sup>25</sup> I ra i maris anun a nilaun, in iru, ma i ra ke maris bat anun a nilaun nin una rakrakon bual, in utur ukai a nilaun sur a nilaun tukum. <sup>26</sup> Ra taio i nemi sur iau anun a Labino, i wakak sur in mur iau, ma i anung a tultul ra in kis tomo nam iau una dino ra an kis iai. Osi ra i papam torom iau, o Tita in ulabo pasi.

*O Iesu i wasiso una nun a minat*

<sup>27</sup> “Uniri in balang i maut doko. Asau mo ra an leni? Peptelai, an watungi lena, ‘Tita, un ulaun iau gusun a du bung ri?’ Awu, kan wararing lenri, uni, i kutri, i a kibino ra a wan suri urin, sur an taromo a ngunungut una bung ri. <sup>28</sup> Tita, un ulabo pas a risam!”

Io, in nalngan ara tagisapat una lagit i watungi lena, “A sa ulabo tari, ma an ulabo meleti ut.” <sup>29</sup> A kunur na taro ra

det tur taru tiro det longoro i. Ara taro det watungi lena a pungpugur, ma ara taro kai det watungi lena, “Ara ensel i wasiso toromi.” <sup>30</sup> Ikut o Iesu ut i watungi lena, “In nalngan ara ri, ausur i wasiso sur in warut iau, awu, i wasiso sur in warut mot ut. <sup>31</sup> A du bung ri din warkurai a rakrakon bual. Uniri din lakro ru a labino anun a rakrakon bual. <sup>32</sup> Ikut iau, ra din utur toto pas iau taginin upiso usapat netes, an dat pas a taro rop torom iau.”† <sup>33</sup> I watungi lenri sur in utalapori lena in mat peptelai.

<sup>34</sup> A kunur na taro ra, det watungi tano lena, “Met longoro i tagun a Buk na Warkurai lena, a Karisito in kis tukum. Sur asau ra u watungi lena din utur toto pas a Nutun a Musano usapat netes? Osi ra a Nutun a Musano?” <sup>35</sup> O Iesu i watungi tandet lena, “A talapor ken kis siun mo torom mot. Ra a talapor i kis utmakai torom mot, mot nan tuptupukus. Numur a dumirum in pulusbat mot. I ra i wanana dumirum, ken tasmani lena in nan urai. <sup>36</sup> Ra a talapor i kis utmakai torom mot, mot in nurnur uni, sur mot a kum nutun a talapor.” Ra o Iesu i sa watung rop tar a wasiso ri, i wan eno pas gusun det.

*A ramano taro Juda ka det nurnur un o Iesu*

<sup>37</sup> O Iesu i sa pam tar a susut na utna na ukisin umatandet, ikut ka det nurnur uni, <sup>38</sup> sur a wasiso ra a poropet Aisaia i wasiso taru uni in nanpat mulus. I watungi lena, “Labino, osi i nurnur una kum wasiso ra met watungi?”

Ma osi ra di sa ese tar a dekdekin a Labino tano?” *Aisaia* 53:1

<sup>39-40</sup> Ma o Aisaia i sa watung tari kai lena, “O God i sa upulu bat ru a kum matmatandet, ma i sa udumun bat ru a kum nuknukindet, sur gong det tamtama nama kum matmatandet, ma gong det tasman lele i una kum nuknukindet, ma ka det in tupukus torom iau, sur an ulaun pas det.” *Aisaia* 6:10

Iri i a kibino ra ka det nurnur. <sup>41</sup> O Aisaia i watungi lenri uni i sa tama mugu a minamar anun o Iesu, ra i wasiso uni.

<sup>42</sup> A susut na taro det nurnur un o Iesu. A ramano kum mugumugu kai tagun a taro Juda det nurnur, ikut ka det wasiso puaso

† 12:32: O Iesu i wasiso na pidik una nun a minat un in nanai kutus.

uni, sako a kum Parisi det in turbat ru det gusun a kum rumu na lotu. <sup>43</sup> Ka det wasiso talapor, uni det nemi kut a wasiso na ululabo anun a taro torom det, ma ka det nuk pas a wasiso na ululabo anun o God torom det.

*A kum wasiso anun o Iesu in kuro a taro*

<sup>44</sup> O Iesu i wasiso nam in labino walngano lena, “I ra i nurnur un iau, ausur i nurnur kut un iau, i nurnur utkai uni ra i tulu ru iau urin. <sup>45</sup> Ma i ra i tama iau, i sa tama tari ra i tulu ru iau urin. <sup>46</sup> A sa wanpat urin una rakrakon bual elar nama talapor, suri ra i nurnur un iau, ken kis una dumirum. <sup>47</sup> Ra taio i longoro anung a kum wasiso ma ke muri, iau kan kuro i. Uni ka wanpat sur an kuro a rakrakon bual, a wanpat kut sur an ulauni. <sup>48</sup> I ra ke nem iau ma ke tarom una nung a kum wasiso, anung a kum wasiso ut ra, det in kuro i una bung na warkurai. <sup>49</sup> Uni a kum wasiso ra a sa watung tatari, ausur anung, o Tita ut i tulu ru iau nami urin, sur an wasiso kut nami. <sup>50</sup> Ma a tasmani lena anun a warkurai a kum utna rop tukum. A kum wasiso a watungi, o Tita i tulu ru iau nami sur an watungi.

### 13

*O Iesu i gos a kum kikin anun a kum nat na ususer*

<sup>1</sup> A labino bung na lotu na Wanlakai i sa milau, ra o Iesu i tasmani lena i sa milau sur in nan mo gusun a rakrakon bual, ma in nan torom o Tamano. I maris doko anun a taro ra det kis una rakrakon bual, ra uniri i ese anun a labino marmaris torom det, a marmaris ra katu tuktukino. <sup>2</sup> Una mirum, o Iesu tomo nam anun a kum nat na ususer det wangon tomo. Numugu tan anundet a inangon, o Satan i sa unuknuk tar o Judas Iskariot, a nutun o Saimon, sur in usobor tar o Iesu. <sup>3</sup> O Iesu i tasmani lena o Tamano i sa pitar rop tar a dekdek toromi, sur in warkurai a kum utna rop nami. Ma i tasmani lena i wan pas ut gusun o God, ma in millet melet torom o God. <sup>4</sup> Io, i katutur pas gusun a inangon, i rakon ru anun in teken namalu ra i rakup bat anun a ememar nami, ra i los pas a tawol ma i ker pasi uni. <sup>5</sup> I lingis pas a danim una besen ra i gos a kum kikin anun a kum nat na ususer nami, ma i us sengesenge det nama tawol ra i ker pasi uni.

<sup>6</sup> I wan torom o Saimon Pita, ra o Pita i tingi lena, “Ai, Labino, ui un gos aru

kiking?” <sup>7</sup> O Iesu i balu i lena, “A utna ri a pami ko tasmani, ikut numur un tasmani.” <sup>8</sup> O Pita i watungi lena, “Gong! Gong u gos aru kiking.” O Iesu i balu i lena, “Ra kan gos aru kikum, ui ausur ara tagun iau.” <sup>9</sup> O Saimon Pita i balu i lena, “Labino, gong u gos kut aru kiking, un gos utkai aru lamang ma in loring!” <sup>10</sup> O Iesu i watungi tano lena, “I ra i sa rurus pas, a pinino rop i sa talapor, din gos tar aru kikino mukut. Mot, mot sa talapor, ikut, ausur mot rop.” <sup>11</sup> O Iesu i sa tasman tar o naro ra in usobor tari. I ra a kibino ra i watungi lena, “Ausur mot rop mot talapor.”

<sup>12</sup> I sa gos tar a kum kikindet, ra i ubek melet pas anun in namalu ra i rakon ru tari, i kis melet ma i ting det lena, “Mot tasmani ut a utna ri a pami un mot?” <sup>13</sup> Mot watung iau nama ‘Tene Ususer’ ma a ‘Labino’. I tokodos ut anumot a wasiso, uni a risang ut ra. <sup>14</sup> Iau anumot a Labino ma a Tene Ususer, ma a sa gos tar a kum kikumot. I wakak sur mot kai mot in ser gos etetalai a kum kikumot. <sup>15</sup> A sa pam tar a larlar ri torom mot, i wakak sur mot kai mot in pami lenri a pami. <sup>16</sup> A inanos mot nama lingmulus, a tultul ke labo taun anun a labino. Ma i ra di tultulu i, ke labo taun i ra i itula. <sup>17</sup> Ra mot tasman a kum utna ri, ma mot in pami, mot in dan.

<sup>18</sup> “Ausur a wasiso un mot rop, a tasman det ut ra a pilok pas det. Ikut din pam sot pasi ut a wasiso ra di sa tumus tari una Buk Tabu lena, ‘A musano ra mir wangon tomo nami, in tupukus taru melet sur iau, ma in pas pispiso iau.’ *Buk Song 41:9*

<sup>19</sup> A inanos mugu tar mot una utna ri ra in nanpat. Io, ra in nanpat, mot in nurnur lena iau a Karisito. <sup>20</sup> A inanos mot nama lingmulus, osi ra i gas pas o naro ra a tulu i, i gas pas iau utkai. Ma osi ra i gas pas iau, i gas pasi utkai o naro ra i tulu ru iau urin.”

*O Iesu i wasiso un o naro ra in usobor tari ulaman a kum ebar*

*(Mt 26:20-25; Mk 14:17-21; Lk 22:21-23)*

<sup>21</sup> O Iesu i sa watung tari lenri, ra i taramo a labino maut una niono, ra i watung puaso i lena, “A inanos mot nama lingmulus, ara tagun mot in pitar tar iau ulaman a kum ebar.” <sup>22</sup> A kum nat na ususer det tama etetalai det, ikut ka det tasmani lena osi tagun det ra i watung a wasiso ri uni. <sup>23</sup> Ara nat na ususer i kis milau o Iesu. A nat na ususer ri o Iesu i nemnem doko i. <sup>24</sup> O Saimon Pita i pet ukinalong pas a nat na

ususer ra, ma i watungi lena, “Un ting o Iesu lena, osi ra i watung a wasiso ri uni.”<sup>25</sup> A nat na ususer ra, i ere torom o Iesu ra i tingi lena, “Labino, osi ra u watung a wasiso ri uni?”<sup>26</sup> O Iesu i balu i lena, “An puk pas a du beret una dis, ma osi ra an pitari tano, i ut ra.” Ra i puk pas a du beret, ma i pitari tan o Judas Iskariot, a nutun o Saimon.<sup>27</sup> O Judas i rakon pas a du beret gusun o Iesu, ra o Satan i ruk taru mut uni. Ra o Iesu i watungi tan o Judas lena, “A utna ra u nem na pami, un pam lakiti.”<sup>28</sup> Ikut kataio tagun det ra det kis tomo una inangon i tasmani lena sur asau ra o Iesu i watungi lenra toromi.<sup>29</sup> O Judas i ser tamtamabat anundet a mani. Io, iri a kibino ra a ramano kum nat na ususer det nuki lena o Iesu i inanosi sur in kul lako utna ra det sibo suri una labino bung na lotu. A ramano kum nat na ususer kai det nuki lena o Iesu i inanosi, sur in tabor a kum sibo na taro nam tu utna.<sup>30</sup> Ra o Judas i sa rakon pas a du beret, i pirso pas mut. Ma a bual i sa mirum.

*A Nutun a Musano in los a minamar*

<sup>31</sup> Ra o Judas i sa wan taru, o Iesu i watungi tandet lena, “Uniri din mar a Nutun a Musano, ma o God kai in los a minamar uni.<sup>32</sup> O God in los a minamar uni, ma o God in pitar a minamar torom a Nutun a Musano. Uniutra o God in pitari tano.

<sup>33</sup> “A kum paspasang, uniri kan kis siun mo torom mot. Mot in sisio sur iau. Ikut, a wasiso ra a sa watung tari tan a kum te Juda, uniri an watungi bulung tamot lena, ‘Ka mot in nan lar pas una tamon ra an nan iai.’

*O Iesu i pitar a matok na warkurai*

<sup>34</sup> “Uniri a pitar a matok na warkurai torom mot lena, mot in nem etetalai mot. Mot in nem etetalai mot elar nam iau ra a nem mot.<sup>35</sup> Ra mot in nem etetalai mot, a taro rop det in tasmani lena mot anung a kum nat na ususer.”

*O Iesu i wasiso mugu un o Pita ra in ipul ru i*

(Mt 26:31-35; Mk 14:27-31; Lk 22:31-34)

<sup>36</sup> O Saimon Pita i tingi lena, “Labino, un nan urai?” O Iesu i balu i lena, “A tamon ra an nan suri, kon nan lar pas iai uniri, ikut numur un mur iau.”<sup>37</sup> O Pita i tingi lena, “Labino, sur asau ra kan mur ui uniri? Ka ngara ra an matbat ui.”<sup>38</sup> Ra o Iesu i balu i lena, “Pepetlai, a lingmulus ut ra un matbat iau? A inanos ui nama lingmulus, a kereke

ken kurkurirakuk utmakai, ra un ipul a tulu dino lena, ko tasman iau.”

## 14

*O Iesu i a kisapi*

<sup>1</sup> O Iesu i watungi tandet lena, “Gong i mamaut a balamot, mot in nurnur un o God, ma mot in nurnur kai un iau.<sup>2</sup> A rumu anun o Tita, a susut na kukur rumu kura uni. Ma ra awu, an inanos mot ut uni. An nan sur an waninar tar a dino sur mot.<sup>3</sup> Ra a sa waninar tar a dino sur mot, an milet melet, ma an ben pas mot torom iau sur mot kai mot in kis una tamon ra a ser kis iai.<sup>4</sup> Mot tasmani ut a kisapi sur a tamon ra an nan suri.”

<sup>5</sup> O Tomas i watungi tano lena, “Labino, ka met tasman a tamon ra un nan suri, io, met in tasman petlan a kisapi suri?”<sup>6</sup> O Iesu i balu i lena, “Iau a kisapi, ma iau a lingmulus, ma iau a nilaun. Kataio in nan torom o Tita un tu kisapi gisen, un iau kut.<sup>7</sup> Ra mot in tasman mulus iau, mot in tasman kai o Tita. Io, iri mot sa tasmani, ma mot sa tama i.<sup>8</sup> O Pilip i watungi tano lena, “Labino, un ese tar o Tamam torom met, i kut ra met nemi.”<sup>9</sup> O Iesu i balu i lena, “Pilip, a sa kis siun tomo nam mot, pepetlai, ko tasman iau utmakai? Osi ra i tama iau, i sa tama tar o Tita. Sur asau u watungi lena an ese tar o Tita torom mot?<sup>10</sup> Ko nurnur lena iau kura un o Tita, ma o Tita kuri un iau, niko? A kum wasiso ra a watungi tamot, ausur anung. O Tita ra kuri un iau i pam anun a pinapam.<sup>11</sup> Mot in nurnur un iau ra a watungi lena kura iau un o Tita, ma o Tita kuri un iau. Ma ra ka mot nurnur una nung a wasiso, io, mot in nurnur kut un iau, kibino una kum utna na ukisin ra a pami.

<sup>12</sup> “A inanos mot nama lingmulus, o naro ra i nurnur un iau, in pam a kum pinapam elar nami ra iau a ser pami. Ma in pam a kum lamlabino pinapam tan a kum pinapam ra a sa pam tari, uni an nan torom o Tita.<sup>13</sup> Ma a kum utna rop ra mot saringi nama risang, an pam sot pasi, sur o Tita in los a minamar un o Nutunu.<sup>14</sup> Ra mot in sasaring sur tu utna nama risang, an pam sot pasi.

*O Iesu i watungi lena in tulu ru a Tokodos na Nion*

<sup>15</sup> “Ra mot in nem iau, mot in tarom una anung a kum warkurai.<sup>16</sup> Ma an saring o Tita, ra in tulu ru ara Tene Warut bulung

torom mot, sur in kis tukum torom mot. <sup>17</sup>I a Tokodos na Nion, ra in upuaso a lingmulus. A taro tagun a rakrakon bual ka det in nemi, uni ka det in tama lele i ma ka det in tasmani. Ikut mot, mot tasman a Tene Warut, uni i kis tomo nam mot ma in kis un mot. <sup>18</sup>Ra an nan gusun mot, ka mot in kis na nat na soi, uni an milet melet kut torom mot.

<sup>19</sup>“Ken suano i kut, ra a taro tagun a rakrakon bual ka det in tama iau mo. Ikut mot, mot in tama iau. Ma mot in laun, uni a laun. <sup>20</sup>A bung ra an katutur melet gusun a minat, mot in tasmani lena kura iau un o Tita, ma mot kai kuri un iau, ma iau kura un mot. <sup>21</sup>Osi ra i utur ukai anung a kum warkurai ma i tarom uni, i ra i nem iau. O Tita in nemi, ma iau kai an nemi, ma an ese iau toromi.”

<sup>22</sup>O Judas (ausur o Judas Iskariot) i ting o Iesu lena, “Labino, sur asau ra un ese tar ui torom met kut, ma ausur torom a taro una rakrakon bual?” <sup>23</sup>O Iesu i balu i lena, “Ra taio i nem iau, in tarom una anung a kum etowo. O Tita in nemi, ma mir nam o Tita mir in nan toromi, ma mir in kis tomo nami. <sup>24</sup>I ra ke nem iau, ken tarom una nung a kum etowo. A kum wasiso ra mot longoro i ausur anung. anun o Tita, i ra i tulu ru iau urin.

<sup>25</sup>“A watung a kum wasiso ri torom mot, ra a kis utmakai tomo nam mot. <sup>26</sup>A Tene Warut, a Tokodos na Nion ra o Tita in tulu ru i una risang. In ususer mot una kum utna rop, ma in unuk tar mot melet nama kum wasiso ra a sa watung tari tamot. <sup>27</sup>A pitar a malmal torom mot. Anung a malmal ra, a tabor mot nami. Ka tabor mot elar nama rakrakon bual i etabor. Gong a balamot i mamaut, ma gong mot ngara. <sup>28</sup>Mot sa longoro tari, ra a sa watung tari torom mot lena, ‘An nan pas ma an milet melet torom mot.’ Ra mot in nem iau, mot in gas ra an nan torom o Tita, uni i, i labo tang. <sup>29</sup>A sa inanos mugu tar mot una kum utna ra numur in nanpat, ma ra i sa wanpat, mot in nurnur.

<sup>30</sup>“Kan wasiso liklik mo torom mot, uni a labino taginin una rakrakon bual milau mo in nanpat. Kalako dekdek ino sur in winim pas iau nami, <sup>31</sup>ikut an pam sot rop pas ut a kum pinapam ra o Tita i tulu ru iau sur an pami, sur a rakrakon bual in tasmani lena a nem o Tita.

Mot tur ma dat in nan.”

## 15

### *O Iesu ut in nanai na wain*

<sup>1</sup>O Iesu i watungi lena, “Iau ut in nanai na wain mulus, ma o Tita i a tene tamtamabat una kinobot na wain. <sup>2</sup>I ser tau ru a kum kanokano rop nin un iau ra ka det ser wu, ma i ser burup det ra det ser wu, sur det in wu a susut na wino. <sup>3</sup>Mot sa talapor, kibino una wasiso ra a sa watung tari tamot. <sup>4</sup>Mot in laun un iau, ma iau an laun un mot. Ka mot in wu ra ka mot lalaun un iau, elar nama kano wain ken wu oros ra ken patop un in nanai ino.

<sup>5</sup>“Iau ut in nanai na wain, ma mot a kum kanokano. I ra i lalaun un iau, ma iau a lalaun uni, in wu a susut na wino. Ikut ra mot lalaun gisen gusun iau, ka mot in pam lar pas tu utna. <sup>6</sup>Ra taio ken lalaun un iau, i elar nama kano duwai, ra di woro ru i ra numur in marang. Din ubek tomo det, ma din woro det una sungun, sur det in nangon rop tiro iai. <sup>7</sup>Ra mot in laun un iau, ma anung a wasiso in laun un mot, io, mot in saring iau sur tu utna ra mot nemi, ra din pitari ut tamot.

<sup>8</sup>“Ra mot in wu a susut na wimot, o Tita in los a minamar, ma a wimot in ese i lena mot anung a kum nat na ususer mulus. <sup>9</sup>O Tita i nem iau, lenkaira a nem mot. Mot in lalaun una nung a marmaris. <sup>10</sup>Ra mot in tarom una nung a kum warkurai, mot in lalaun una nung a marmaris, elar nam iau, a tarom una kum warkurai anun o Tita, ra a lalaun una nun a marmaris.

<sup>11</sup>“A watung a kum wasiso ri tamot, sur anung a gasgas in kis un mot, ma anumot a gasgas in bukus una numot a nilaun. <sup>12</sup>Iri i anung a warkurai torom mot lena, mot in nem etetalai mot, elar nam iau a nem mot. <sup>13</sup>Ra taio in pitar ru anun a nilaun sur in mat una kum paspasano, anun a marmaris i labo sakit. Katu marmaris anun taio i elar nami. <sup>14</sup>Ra mot in tarom una nung a kum warkurai, io, mot a kum paspasang. <sup>15</sup>Kan watung mot melet mo lena a kum tultul, uni a tultul ke tasman a utna ra anun a labino i pami. Ikut a watung mot lena a kum paspasang, uni a sa watung rop tar a kum wasiso tamot ra a longoro i gusun o Tita. <sup>16</sup>Ausur mot pilok pas iau, iau ut a pilok pas mot. Ra a pitar a pinapam tamot sur mot in nan ma mot in wu a wimot, ma a wimot in kis tukum. Ma o Tita in tabor mot nama kum utna rop ra mot sasaring suri nama

risang. <sup>17</sup>Mot in nem etetalai mot. Iri anung a warkurai torom mot.

*A taro tagun a rakrakon bual det in nget mot*

<sup>18</sup>“Ra a taro tagun a rakrakon bual det in nget mot, mot in nuk pasi lena det sa nget mugu tar iau. <sup>19</sup>Ra mot anun a rakrakon bual, io, a rakrakon bual in nem mot elar nam mot anunu. Ikut mot ausur anun a rakrakon bual, a sa pilok pas mot gusuni. Iri a kibino ra i nget mot. <sup>20</sup>Mot in nuk pas a wasiso ra a sa watung tari tamot lena, ‘A tultul ke labo taun anun a labino.’ Ra det banlaulau iau, det in banlaulau mot kai. Ra det tarom una nung a wasiso, det in tarom kai una numot a wasiso. <sup>21</sup>Det in banlaulau mot kibino una risang, uni ka det tasman o naro ra i tulu ru iau urin.

<sup>22</sup>“Ra gunuk kan nanpat ma kan wasiso torom det, io, ka din takun det una nundet a kum sakino petutna, ma det in langolango ut. Ikut uniri, ka nundet tu wasiso sur det in watungbat det nami gusun anundet a sakino petutna. <sup>23</sup>I ra i nget iau, i nget utkai o Tita. <sup>24</sup>A sa pam tar a kum utna na ukisin ra kataio in pam lar pasi. Ra gunuk kan pam tar a kum utna na ukisin ra nisandet, ka din takun det una nundet a kum sakino petutna, ma det in langolango ut. Ma iri, det sa tama tar a kum utna na ukisin ra a sa pam tari, ikut det nget mir rop nam o Tita. <sup>25</sup>Di pami lenri, sur din pam sot pas a wasiso ra di sa tumus tari una Buk na Warkurai lena, ‘Det nget iau, ma katu kibino.’ *Buk Song 35:19*

<sup>26</sup>“An tulu ru a Tene Warut torom mot tagisapat gusun o Tita, i a Tokodos na Nion ra in upuaso a lingmulus. Ra in nanpat in wasiso puaso un iau. <sup>27</sup>Ma mot kai mot in wasiso puaso un iau, uni mot kis tomo nam iau tagun a turturkibin na nung a pinapam tuk uniri.

## 16

<sup>1</sup>“A watung a kum utna ri tamot, sur gong anumot a nurnur i puku. <sup>2</sup>Det in turbat mot gusun a kum rumu na lotu. Numur a du bung in nanpat, ra a taro ra det um doko mot, det in nuki lena det pam ut a pinapam anun o God. <sup>3</sup>A taro det in pam a kum utna ri torom mot, uni ka det tasman mir nam o Tita. <sup>4</sup>A sa watung tar a kum wasiso ri tamot, sur ra a du bung ra in nanpat, mot in tasmani lena a sa utumarong mugu tar mot uni.

*A pinapam anun a Tokodos na Nion*

“Ka watung a kum wasiso ri tamot una turturkibin na nung a pinapam, uni a kis utmakai tomo nam mot. <sup>5</sup>Io uniri, an nan torom o naro ra i tulu ru iau urin. Ikut kataio tagun mot i ting iau lena, ‘Un nan urai?’ <sup>6</sup>Mot tupunuk doko uni a watung a kum wasiso ri torom mot. <sup>7</sup>A inanos mot nama lingmulus lena, in wakak torom mot ra an nan. Ra ka nan, a Tene Warut ken nanpat torom mot. Ikut ra an nan, io, an tulu ru i urin torom mot.

<sup>8</sup>“Ra in nanpat, in ese a taro una rakrakon bual una nundet a sakino petutna, ma in ese det kai una tokodos na petutna ma una warkurai anun o God. <sup>9</sup>In ese det lena, ra ka det in nurnur un iau, i ra anundet a sakino petutna. <sup>10</sup>Ma in ese det kai una tokodos na petutna, uni an nan torom o Tita ma ka mot in tama melet iau mo. <sup>11</sup>Ma in ese det kai lena o God i sa pitar tar a warkurai na minabalu ta a labino tagun a rakrakon bual, ma i sa upuku ru tari.

<sup>12</sup>“A susut na wasiso ra an watungi tamot, ikut ke to pas mot utmakai. <sup>13</sup>A Tokodos na Nion, ra i ser upuaso a lingmulus ino, in nanpat, ma in utalapor mot una kum lingmulus ino rop un o God. A kum wasiso ra in watungi ausur anunu, in watungi kut a kum wasiso ra i longoro i, ma in inanos mot una kum utna ra in nanpat numur. <sup>14</sup>In pitar a minamar torom iau, ra in los pas anung a wasiso, ma in inanos mot nami. <sup>15</sup>A kum utna rop ra anun o Tita, anungi. I ra a kibino ra a watungi lena, a Tokodos na Nion in los pas anung a wasiso ma in inanos mot nami.

*A tupunuk ma a gasgas*

<sup>16</sup>“Ken suano i kut, ra ka mot in tama iau mo. Ma ken suano meleti kut, mot in tama melet iau.” <sup>17</sup>Anun a ramano kum nat na ususer det ting etetalai det lena, ‘Asau a kukuraina nun a wasiso ri ra i watungi lena, ken suano i kut ra ka dat in tama i mo, ma ken suano meleti kut dat in tama meleti? Ma i watungi kai lena, ‘Uni an nan torom o Tita’. <sup>18</sup>Asau a kukuraino ra i watungi lena, ‘ken suano i?’ Ka dat tasman a utna ri i wasiso uni!”

<sup>19</sup>O Iesu i tasmani lena det nem na tingi, ra i watungi torom det lena, ‘A watungi lena, ‘Ken suano i kut ra ka mot in tama iau mo, ma ken suano meleti kut mot in tama melet iau.’ Iri a wasiso ra mot ting etetalai

mot uni, niko? <sup>20</sup> A inanos mot nama ling-mulus, mot in tupunuk ma mot in tangis, ikut a rakrakon bual in gas. Mot in tupunuk, ikut numur anumot a tupunuk in tupukus sur a gasgas, <sup>21</sup> elar nama ino ra i milau sur in usus, in taramo a ngunungut, ikut, ra i sa usus pas, in dumano a ngunungut ma in gas. In gas uni i sa usus tar a nat urin una rakrakon bual. <sup>22</sup> Lenkaira torom mot, uniri mot tupunuk, ikut an tama melet mot, ra mot in gas. A ngas na gas ri, kataio in pet lar pasi sur in rakon ru i gusun mot.

<sup>23</sup> “Una bung ra, ka mot in ting melet iau mo un tu utna. A inanos mot nama lingmulus, o Tita in tabor mot nama kum utna ra mot saring nama risang. <sup>24</sup> Tuk uniri, ka mot sasaring utmakai sur tu utna nama risang. Mot in sasaring ma din tabor mot, sur a gasgas in bukus una numot a nilaun.

*O Iesu i winim pas a rakrakon bual*

<sup>25</sup> “A watung a kum utna ri tamot una kum wasiso elelar, ikut a du bung in nanpat ra kan wasiso melet mo torom mot nama wasiso elelar, an inanos talapor mulus mot mo un o Tita. <sup>26</sup> Una kum bung ra, mot in sasaring nama risang. Ka watungi lena iau an saring o Tita sur in warut mot, <sup>27</sup> uni o Tita ut in nem mot. I nem mot uni mot nem iau, ma mot nurnur lena a wanpat tagun o God. <sup>28</sup> A wan pas gusun o Tita, ra a wan urin una rakrakon bual. Uniri, an nan mo gusun a rakrakon bual, ma an milet melet torom o Tita.”

<sup>29</sup> Anun a kum nat na ususer det watungi tano lena, “Uniri ko wasiso mo nama wasiso elelar, u wasiso talapor mulus maragom. <sup>30</sup> Uniri met tasmani lena u tasman a kum utna rop. Ko sibo sur taio in ting ui nam tu iting, uni u sa tasman a nukukimet rop. Io, met nurnur maragom lena u wan pas ut gusun o God.” <sup>31</sup> O Iesu i watungi tandet lena, “Ilai, mot nurnur maragom? <sup>32</sup> A du bung in nanpat, ma iri i sa wanpat, ra din lu susuaro ru mot gusun iau, ra mot in nan susuaro sur anumot a kum tamon taktakai, ra iau mukut an kis. Ikut ausur iau kut ra an kis, mir ut nam o Tita.

<sup>33</sup> “A watung a kum wasiso ri tamot sur mot in laun un iau, ma a balamot in bukus nama malmal. Nin una rakrakon bual, mot in taramo a mamaut. Ikut gong mot ngara, uni a sa winim pas a rakrakon bual.”

17

*O Iesu i wararing una nuna kum nat na ususer*

<sup>1</sup> Ra o Iesu i sa watung rop tar a kum wasiso ri, i tamtama tito usapat una langit, ra i watungi lena, “Tita, a du bung i sa wanpat, un pitar a minamar torom a Nutum, sur a Nutum in pitar a minamar torom ui. <sup>2</sup> U pitar tar a warkurai tang sur a taro rop, sur an pitar a nilaun tukum torom det rop ra u pitar tar det tang. <sup>3</sup> A nilaun tukum i lenri: A taro det in tasman ui, ra ui kut a God mulus, ma det in tasman o Iesu Karisito kai, i ra u tulu ru i urin. <sup>4</sup> A sa pam sot pas a kum pinapam ra u pitar tari tang sur an pami. Ma una pinapam ra, a sa ese tar a minamarim nin una rakrakon bual. <sup>5</sup> Tita, uniri, ra an kis tomo melet nam ui, un pitar a minamar tang. A minamar ra numugu a kis uni tomo nam ui, ra ka di ukis utmakai a rakrakon bual.

<sup>6</sup> “Det ra u sa pilok pas det gusun a rakrakon bual, ma u pitar tar det tang, a sa watung puaso tar ui tandet. Det anum ra u pitar tar det tang, ma det sa tarom una num a kum wasiso. <sup>7</sup> Uniri, det sa tasmani lena a kum utna rop ra u pitar tari tang, i wanpat mulus ut gusun ui. <sup>8</sup> A sa inanos tar det nama kum wasiso ra u pitar tari tang, ma det sa tarom uni. Ma det tasman mulusi lena a wan ut gusun ui, ma det sa nurnur lena ui ut u tulu ru iau urin.

<sup>9</sup> “A wararing un det. Ausur a wararing una taro tagun a rakrakon bual, ikut a wararing un det ra u pitar tar det tang, uni det anum. <sup>10</sup> Det rop ra anung, anum utkai, ma det rop ra anum, anung utkai. Ma anung a minamar din tama i un det. <sup>11</sup> Uniri an nan torom ui, kan kis siun melet mo una rakrakon bual, ikut det, kuri utmakai det una rakrakon bual. Tita, u tokodos sakin, un tamtamabat det nama dekdekin a risam, a rising ra u pitar tari tang. Un tamtamabat det sur det in takai kut, elar nam ui ma iau, dar takai kut. <sup>12</sup> A kis tomo nam det, ra a tamtamabat det nama dekdekin a risam, a rising ra u pitar tari tang. A tamtamabat det, ma kataio tagun det i iru. Ara sot kut in iru, o Judas, i ra i wan sur a iniru tukum. I wanpat lenra, sur din pam sot pas a wasiso ra di sa tumus tari una Buk Tabu.

<sup>13</sup> “Iri an nan torom ui, ikut a watung a kum wasiso ri ra a kis utmakai nin una rakrakon bual, sur anung a labino gasgas in

ubukus anundet a nilaun. <sup>14</sup> A sa watung tar anum a kum wasiso tandet, ma a rakrakon bual i nget det, uni ausur det taginin una rakrakon bual, elar nam iau kai, ausur iau taginin una rakrakon bual. <sup>15</sup> Ka saring ui sur un rakon ru det gusun a rakakon bual, awu. Ikut a saring ui sur un tamtamabat det gusun a Tene Sakino. <sup>16</sup> Ausur iau taginin una rakrakon bual, ma det kai ausur det taginin una rakrakon bual. <sup>17</sup> Anum a kum wasiso i lingmulus. Un utalapor det nam anum a lingmulus na wasiso, sur det anum a taro mulus. <sup>18</sup> U tulu ru iau urin una rakrakon bual, lenkutkai ra iau, a tulu ru det una rakrakon bual. <sup>19</sup> A pitar tar iau ut torom ui, sur det kai, det anum a taro mulus una num a lingmulus na wasiso.

<sup>20</sup> “Ausur a wararing kut un det, a wararing utkai una taro ra numur det in nurnur un iau, a taro ra a kum tene nurnur det in wasiso puaso un iau torom det. <sup>21</sup> Tita, a wararing lena det rop ra det nurnur un iau, det in takai kut, elar nam ui kuri un iau ma iau kura un ui. A nemi sur det in lalaun un dar, sur a taro una rakrakon bual det in nurnur lena ui u tulu ru iau urin. <sup>22</sup> A sa pitar tar a minamar tandet, a minamar ra u pitar tari tang, sur det in takai kut, elar nam dar, ra dar takai kut. <sup>23</sup> Iau kura un det, ma ui kai kuri un iau, sur det ara mukut, sur a taro una rakrakon bual det in tasmani lena, u tulu ru iau urin, ma det in tasmani kai lena, u nem det elar nami ra u nem iau.

<sup>24</sup> “Tita, a nemi lena, det ra u sa pitar tar det tang, det in kis tomo nam iau una tamon ra an kis iai, sur det in tama anung a minamar, a minamar ra u pitar tari tang, uni u nem iau numugu ra ka di ukis a rakrakon bual utmakai. <sup>25</sup> Tita, ui a tene tokodos, a taro una rakrakon bual ka det tasman ui. Ikut iau, a tasman ui, ma anung a taro na ususer kai det tasmani lena ui, u tulu ru iau urin. <sup>26</sup> A sa watung ese tar ui torom det, ma kan mana nama wasiso talapor un ui torom det, sur det in tasman ui, sur a marmaris ra u nem iau nami, in kis un det ma iau utkai an laun un det.”

## 18

*O Judas i ben tar det torom o Iesu*

*(Mt 26:47-56; Mk 14:43-50; Lk 22:47-53)*

<sup>1</sup> Ra o Iesu i sa wararing pas, i ben pas anum a kum nat na ususer, ra det wanlakai

in nala na danim Kidron. Det wanlakai, ra det wan ruk utiro una ara kinobot na duwai na oliw. <sup>2</sup> O Judas, i ra i usobor tar o Iesu i tasman a kinobot ra, uni a susut na dino o Iesu ma anum a kum nat na ususer det ser wan tomo iai. <sup>3</sup> Ra o Judas i mugu pas a kum tene inaim tagitiro o Rom, ma a kum tene tamtamabat tagun a rumu na etabor. A kum lamlabino tene etabor torom o God, ma a kum Parisi det tulu ru det. Det los a kum utna na inaim, a kum lam ma a kum utna ra i kunabor ra det sulu saro det nami.

<sup>4</sup> Ikut o Iesu i sa tasman a kum utna rop ra in nanpat toromi, ra i wan torom det ma i ting det lena, “Osi ra mot sisio suri?” <sup>5</sup> Det balu i lena, “O Iesu a te Nasaret.” I balu det lena, “Iau kut ri.” O Judas, i ra a tene usobor, kura ut i tur tomo nam det. <sup>6</sup> Una du bung ra o Iesu i watungi lena, “Iau kut ri,” det tur isu unago numur, ra det puku una piso. <sup>7</sup> O Iesu i ting melet det lena, “Osi ra mot sisio suri?” Det balu i lena, “O Iesu a te Nasaret.” <sup>8</sup> O Iesu i balu det lena, “A sa watung tari tamot lena, iau kut ri. Ra mot sisio ut sur iau, io, mot in madek ru det ri det in nan.” <sup>9</sup> O Iesu i watungi lenri, sur in pam sot pas a wasiso ra i sa watung tari lena, “Det rop ra u pitar tar det tang, kataio tagun det in iru.”

<sup>10</sup> O Saimon Pita i losi ut anunu in totok na inaim. I dat pasi ra i tau kutus ru in nosot na talngan o Malkus, a tultul anum a mugumugu na tene etabor torom o God. <sup>11</sup> Ra o Iesu i watungi tan o Pita lena, “Uruk melet anum in totok una bano. Pepetlai, kan inum tagun a kap na mamaut ra o Tita i pitar tari tang?”

*Det ben pas o Iesu torom o Anas*

<sup>12</sup> A kum tene inaim tagitong o Rom tomo nam anundet a mugumugu, ma a kum tene tamtamabat tagun a rumu na etabor anum a taro Juda, det pam ukai pas o Iesu, ma det ker pas aru lamano. <sup>13</sup> Det ben mugu i torom o Anas i ra der inumunu nam o Kaiapas, a mugumugu na tene etabor torom o God una kilalo ra. <sup>14</sup> O Kaiapas, i ra i watungi torom a kum te Juda lena, in wakak ra taio in matbat a taro rop.

*A mugano ipul anum o Pita*

*(Mt 26:69-70; Mk 14:66-68; Lk 22:55-57)*

<sup>15</sup> O Saimon Pita ma ara nat na ususer kai der wan nanan numurun o Iesu. A

\* 18:13: O Anas ma o Kaiapas, der rop di watung der nama mugumugu na tene etabor torom o God.

mugumugu na tene etabor i tasman wakak a nat na ususer ra der wan tomo nam o Pita. A nat ra, i ruk tomo nam o Iesu utiro una nubual anun a tene etabor ra. <sup>16</sup> O Pita kura utmakai i tur taru nago utamon nisan a matansako. Ra a nat na ususer ra a mugumugu i tasmani, i millet melet, ma i wasiso torom a toraro ra i tamtamabat a matansako, sur in papos saro pas o Pita. <sup>17</sup> A toraro ra i tamtamabat a matansako i ting o Pita lena, “Ai, ui utkai ara nat na ususer anun a musano ri, ni?” O Pita i balu i lena, “Awu, iau awu.”

<sup>18</sup> A bung na mirum ra, i kotokoto doko. Io, a kum tultul ma a kum tene tamtamabat tagun a rumu na etabor det sur tomo pas a kabo lakit na sungun, det tur talilis pasi ma det minori. O Pita kai i tur tomo nam det sur in minor.

*O Iesu i tur umatan o Anas*  
(Mt 26:59-66; Mk 14:55-64; Lk 22:66-71)

<sup>19</sup> O Anas, a mugumugu na tene etabor torom o God i ting o Iesu una nuna kum nat na ususer, ma una kum wasiso ra i ser ususer a taro nami. <sup>20</sup> O Iesu i balu i lena, “A sa waswasiso talapor umatan a taro rop, ma a ser ususer det una kum rumu na lotu ma una rumu na etabor, ra a taro Juda det ser wan tomo iai. Ka inanos eno tar det un tu utna. <sup>21</sup> Gong u ting iau. Un ting a taro ra det ser longoro iau. Det ra, det tasman a kum utna ra a waswasiso uni.”

<sup>22</sup> Ra o Iesu i sa watung tari lenra, ara tagun a kum tene tamtamabat i pasor in masarino, ma i watungi tano lena, “Sur asau ra u balu a wasiso anun a mugumugu na tene etabor lenra?” <sup>23</sup> O Iesu i balu i lena, “Ra a sa watung tar tu utna i raro, un watung talapori torom a taro rop ri. Ikut ra a utna ri a watungi i lingmulus ut, sur asau ra u pasor iau?” <sup>24</sup> Ra ka di palos utmakai a kineker gusun aru lamano, o Anas i tulu ru i torom o Kaiapas, i kai a mugumugu na tene etabor torom o God.

*O Pita i ipul ru o Iesu aru dino melet*  
(Mt 26:71-75; Mk 14:69-72; Lk 22:58-62)

<sup>25</sup> Ra o Pita kura utmakai i minor liklik, det tingi lena, “Ai, ui utkai ara tagun anun a kum nat na ususer, ni?” O Pita i ipul, ra i watungi lena, “Awu, iau awu.” <sup>26</sup> Ara tultul anun a mugumugu na tene etabor, a kukun o naro ra o Pita i tau kutus ru in talngano, i watungi lena, “Lar kut ui kut, ra a tama tomo tar mur nam o Iesu sapat una

kinobot na duwai na oliw?” <sup>27</sup> O Pita i ipul melet lena, “Awu.” Ra uniutra, a kereke i kurkurirakuk mut.

*O Iesu i tur umatan o Pailat*  
(Mt 27:1-2, 11-14; Mk 15:1-5; Lk 23:1-5)

<sup>28</sup> Una kobot raut, di ben pas o Iesu gusun a rumu anun o Kaiapas sur a labino rumu anun o Pailat, ara mugumugu tagun a gapman Rom. A kum te Juda ka det nem na ruk una nun a rumu, uni det sa utalapor pas det sur det in nangon una labino bung na lotu na Wanlakai. Uni osi ra in ruk torom taio, ra ausur a te Juda, in dur umatano God. <sup>29</sup> Io, o Pailat i pirso torom det ra i ting det lena, “Asau ra mot takun a musano ri uni?” <sup>30</sup> Ma det balu i lena, “Ra gunuk a musano ri ken pam tu niraro, ka met in pitari torom ui sur un warkurai i.” <sup>31</sup> O Pailat i watungi torom det lena, “Mot in ben pasi, ma mot ut mot in warkurai i elar nam anumot a warkurai.” A kum te Juda det watungi tano lena, “Torom met i tabu sur met in um doko taio.” <sup>32</sup> A utna ri i wanpat sur din pam sot pas a wasiso anun o Iesu, ra i sa watung mugu tari una nuna ngas na minat.

<sup>33</sup> Io, numur o Pailat i ruk melet ra i kabo pas o Iesu, ma i tingi lena, “Ui a king anun a taro Juda?” <sup>34</sup> O Iesu i balu meleti kut nama iting lena, “Ilai, anum ut a wasiso ra u watungi lenra un iau, o det inanos tar ui kut un iau?” <sup>35</sup> O Pailat i balu i lena, “Ausur iau a te Juda. Anum a taro ut tomo nama kum lamlabino tene etabor torom o God, det ut ra det pitar tar ui tang sur an warkurai ui. Asau ra u sa pam tari?” <sup>36</sup> O Iesu i balu i lena, “Anung a matanitu ausur taginin una rakrakon bual. Ra gunuk anung a matanitu taginin una rakrakon bual, anung a kum tultul det in waim bat iau, sur gong a tur una warkurai anun a taro Juda. Ikut anung a matanitu ausur taginin.”

<sup>37</sup> Io, o Pailat i tingi lena, “I lingmulus ut, ui a king?” O Iesu i balu i lena, “I lingmulus ut ra u watungi lena iau a king. Di usus iau, ra a wanpat nin una rakrakon bual, sur an wasiso una lingmulus. Det rop ra det murmur a lingmulus, det longoro in nalngang.” <sup>38</sup> Ra o Pailat i tingi lena, “Asau a lingmulus?”

*Di mulaot ru o Iesu sur din sak wati un in nanai kutus*

(Mt 27:15-31; Mk 15:6-20; Lk 23:13-25)

Ra o Pailat i sa ting tari lenri, i pirso melet torom a taro Juda. I watungi tandet lena,

“Ka pastorom anunu tu niraro. <sup>39</sup> Ikut, ara ngasino a ser pami torom mot, una kum kilkilalo rop una kum lamlabino bung na lotu na Wanlakai, a ser palos ru ara karabus torom mot. Pepetlai, mot nemi sur an palos ru a ‘king anun a taro Juda’ torom mot?”  
<sup>40</sup> Det kukukuk lena, “Gong! Ka met nem o Iesu. Palos ru o Barabas!” O Barabas i a tene sakino sakit.

## 19

<sup>1</sup> Ra o Pailat i itula sur din ben gisen pas o Iesu ma din taktakalo i nam in narus na inaim. <sup>2</sup> A kum tene inaim det liko pas in narus a lokloko ma det ubek tari un in lorino elar nama kukup anun a king, ma det mar tari nam in merek na malu. <sup>3</sup> Det wanan toromi, ma det watungi lena, “Ui a king anun a taro Juda!” Ra det in kubu pasor in masarino.

<sup>4</sup> O Pailat i pirso melet, ra i watungi tandet lena, “Mot tama i, iri a ben pirso tari umatamot, sur mot in tasmani lena, ka sio pas anunu tu niraro.” <sup>5</sup> Ra o Iesu i pirso, di sa mar tari nam in narus a lokloko un in lorino, ma in merek na malu. O Pailat i watungi tandet lena, “Mot tama a musano ri!” <sup>6</sup> Ra a kum lamlabino tene etabor torom o God, ma a kum tene tamtamabat tagun a rumu na etabor det tama o Iesu, det kukukuk lena, “Sak wati un in nanai kutus! Sak wati un in nanai kutus!” Ra o Pailat i watungi tandet lena, “Mot in ben pasi, sur mot ut, mot in sak wati un in nanai kutus. Iau ka sio pas anunu tu niraro.” <sup>7</sup> A kum te Juda det balu i lena, “Anumet a warkurai i lenri, din um doko i, uni i watungi lena i a Nutun o God.”

<sup>8</sup> O Pailat i longoro a wasiso ri, ra i ngara doko. <sup>9</sup> I ruk melet usa urumu, ra i ting o Iesu lena, “Ui tagai ui?” Ikut o Iesu ke balu i. <sup>10</sup> O Pailat i watungi tano lena, “Sur asau ra ko balu iau? Ko tasmani lena, a utur ukai a warkurai sur an ulangolango ui, o an sak wat ui un in nanai kutus?” <sup>11</sup> O Iesu i balu o Pailat lena, “Ra gunuk o God ken pitar tar a warkurai tam, kalako dekdekim sur un pam tu utna un iau. Ikut, o naro ra i pitar tar iau torom ui sur un warkurai iau, anun a sakino i laulau sakit. Anun a sakino i laulau sakit tan anum a sakino.”

<sup>12</sup> O Iesu i watung tari lenra, ra o Pailat i lari sur in ulangolango ru i. Ikut a kum te

Juda det kukukuk toromi lena, “Ra un palos ru i, ka mur pasano nama Sisa! Uni taio ra i ulabo pasi lena i a king, i kutus a warkurai anun a Sisa.”<sup>†</sup> <sup>13</sup> O Pailat i longoro a kum wasiso ri, ra i ben pirso pas o Iesu unago upiso. Numur o Pailat i kis taru una kiskis na warkurai, kura una dino ra di watungi o Gabata una wasiso Ibru. A kukuraino i lena, di ubekbat a piso nama kum watat. <sup>14</sup> Ra in matanas i sa kis lekeleke, o Pailat i watungi tan a taro Juda lena, “Mot tama i, anumot a king iri i.” A utna ri, i wanpat una bung na waninar, a bung numugu tan a labino bung na lotu na Wanlakai. <sup>15</sup> A taro Juda det kukukuk dekdek lena, “Sak doko i! Sak doko i! Sak wati un in nanai kutus!” O Pailat i ting det lena, “Mot nemi lena an sak wat anumot a king un in nanai kutus?” A kum lamlabino tene etabor torom o God det balu i lena, “A Sisa sot kut i anumet a king!” <sup>16</sup> Ra o Pailat i pitar tar o Iesu torom a kum tene inaim, sur det in sak wati un in nanai kutus. Ra det ben pas o Iesu.

*Di sak wat o Iesu un in nanai kutus  
 (Mt 27:32-44; Mk 15:21-32; Lk 23:26-43)*

<sup>17</sup> O Iesu i pirso gusun a tamon Jerusalem, i los pas anun in nanai kutus ra i wan sur a nubual ra di watungi nama “Nubual na Lor na Minat,” ma una wasiso Ibru di watungi lena o Golgota. <sup>18</sup> Tiro iai, di sak wati un in nanai kutus. Ma di sak wat aru musano kai tomo nami, una ru papor ino, ma o Iesu i kete epotor tander. <sup>19</sup> Ma o Pailat i pitar a wasiso sur din tumus a tumtumus, sur din ubeki sapat netes un in nanai kutus. A tumtumus ra i lena:

O IESU A TE NASARET, A KING ANUN A  
 TARO JUDA.

<sup>20</sup> A susut na taro Juda det luk a tumtumus ri, uni a nubual ra di sak wat o Iesu un in nanai kutus iai, i milau kut o Jerusalem, ma di tumus a tumtumus ri una tulu ngas na wasiso, a wasiso Ibru, Latin ma Grik. <sup>21</sup> A kum lamlabino tene etabor torom o God det watungi tan o Pailat lena, “Gong u tumusi lena, ‘A King anun a taro Juda.’ Un tumusi kut lena, ‘A musano ri i watungi lena i a king anun a taro Juda.’” <sup>22</sup> O Pailat i balu det lena, “A tumtumus ra a sa tumus tari in lenutra.”

<sup>23</sup> Ra a kum tene inaim det sa sak wat tar o Iesu un in nanai kutus, det los pas anun a kum malu ra i rakupbat anun a

\* 19:2: In merek na malu i tamtama elelar nama ememar anun a king. † 19:12: A Sisa i a labino mugumuguna una gapman Rom, ma a taro Israel kai det kis tuntudu una nun a warkurai.

ememar nami, ma det isuaro pasi una a wat na tinibo, a rara tene inaim anun ara tinibo. Det los pasi kai anun in namalu ra i pipisi. In namalu ra, katu sunusuk uni, in teken kudulano malu kut. <sup>24</sup>A kum tene inaim det wasiso etetalai torom det lena, “Gong dat rarosi, dat in pilai laki sur osi na pasandati in losi.” Det pami lenra sur din pam sot pas a wasiso na Buk Tabu. I watungi lena,

“Det isuaro anung a kum malu un det, ma det pilai laki suri.” *Buk Song 22:18*  
Iri a kum utna ra a kum tene inaim det pami.

<sup>25</sup>O nan o Iesu i tur milau nisan in nanai kutus anun o Iesu. I tur tomo nama tisino a ino, ma o Maria kai a ino anun o Kilopas, ma o Maria Magdalen. <sup>26</sup>O Iesu i tama o nano det tur tomo nam ara nat na ususer ra o Iesu i nem doko i, ra i watungi tan o nano lena, “Nang, i ra i, a nutum lik.” <sup>27</sup>I watungi kai tan a nat na ususer ra lena, “I ra i, o nam.” Turpasi ut una bung ra, a nat na ususer ra, i ben pas o nan o Iesu, sur in kis una nun a rumu.

#### *O Iesu i mat*

(*Mt 27:45-56; Mk 15:33-41; Lk 23:44-49*)

<sup>28</sup>O Iesu i tasmani lena i sa pam rop ru tar a kum pinapam, ra i watungi lena, “A muruk.” I watungi lenri sur in pam sot pas a wasiso ra di sa tumus tari una Buk Tabu. <sup>29</sup>In teken nokoto na wain ra i mititir kura tiro. Det los pas ara utna ra i ser dop a polo, ra det puk pasi una wain ra. Det ubek pasi un in nanai ra di watungi namin isop, ra det tulsu toto i usapat sur a wan o Iesu. <sup>30</sup>Ra o Iesu i sa dop pas a wain ra, i watungi lena, “I sa rop.” I lukun pirso in lorino, ra i ubek ru anun a nilaun.

#### *Di so a papor ino Iesu*

<sup>31</sup>A kum te Juda det saring o Pailat sur din sak pakpak tar a kum kikinidetul, sur detul in mat lakit, ma din los pirso ru a pinindetul gusun a tulin nanai kutus, uni a bung ra, i a bung na waninar, a bung numugu tan ara labino Bung na Sabat, ma ka det nemi lena a pinindetul in kete una tulin nanai kutus una Bung na Sabat. <sup>32</sup>Io, a kum tene inaim det wan, ma det sak pakpak aru kikin a mugano musano, ra numur ara pasander bulung, ra di sak wat tomo detul nam o Iesu una tulin nanai kutus. <sup>33</sup>Ikut ra det wanpat torom o Iesu, det tama i ra i sa mat, io, ka det sak pakpak aru kikin mo. <sup>34</sup>Ara tene

inaim i so mukut a papor ino Iesu nama bele, ra a gap ma a danim i sal pirso mut.

<sup>35</sup>A musano ra i tama a kum utna ri, i wasiso uni sur mot kai mot in nurnur. A utna ri i wasiso uni, i lingmulus, ma i ut i tasmani lena i lingmulus. <sup>36</sup>Di pam a kum utna ri sur din pam sot pas a wasiso ra di sa tumus tari una Buk Tabu lena, “Ka din sak pakpak tu sur ino.” *Buk Song 34:20*

<sup>37</sup>Di pam sot pas a wasiso na Buk Tabu kai lena, “Det in tama i ra det so tari.” *Sekaraia 12:10*

*Di uruk a minat in o Iesu una kulam na minat*

(*Mt 27:57-61; Mk 15:42-47; Lk 23:50-56*)

<sup>38</sup>Numur, o Josep a te Arimatia i saring o Pailat sur a minat in o Iesu. I kai ara nat na ususer ra i ser murmur eno kut o Iesu, uni i ngaran a kum te Juda. Ra o Pailat i mulaot tari sur in nan ma in palos pirso pas a minat in o Iesu. <sup>39</sup>O Nikodimas, i ra numugu i wan torom o Iesu una ara bung na mirum, i kai i wanpat. I los pas ara utna ra i sangsangnain wakak, ra di pami tagun a mira ma a alo. A maut inder i elar nama tulunoino ma wat na kilogram. <sup>40</sup>Der los pas a minat in o Iesu, numur der ubek a kum utna ra i sangsangnain uni, ma der pulusi nama kum wakak na malu. A pinapam ra i elar nama ngasino anun a taro Juda, ra det ser pami una kum minat. <sup>41</sup>Ara kinobot kura milau nisan a nubual ra di sak wat o Iesu un in nanai kutus iai. Ara matok na kulam na minat kura tiro, ra ka di inep utmakai tu minat uni. <sup>42</sup>Det inep tar a minat in o Iesu una kulam na minat ra, uni i milau kut. Det pami lenra uni a bung ra, a bung na waninar, a bung numugu tan a Bung na Sabat anun a taro Juda.

## 20

*O Iesu kapinaimi tiro una kulam na minat*  
(*Mt 28:1-8; Mk 16:1-8; Lk 24:1-12*)

<sup>1</sup>Una lar una mugano bung una wik, o Maria Magdalen i wan utiro una kulam na minat. I tama i lena di sa ukarai ru tar a wat gusun a matansako na kulam na minat.

<sup>2</sup>I kalabor torom o Saimon Pita der nama nat na ususer ra o Iesu i ser nem doko i, ma i watungi tander lena, “Di sa los ru pas a Labino gusun a kulam na minat, ma ka met tasmani, ra kura di inep tari awai.”

<sup>3</sup>Io, o Pita der nama nat na ususer ra, der wan sur a kulam na minat. <sup>4</sup>Der rop

der kalabor, ikut ara pasander i kalabor pas gusun o Pita, ma i kalabor pat mugu tiro nisan a kulam na minat. <sup>5</sup>I par pirso, ma i kiet, ra i tama a kum malu, ikut ke ruk. <sup>6</sup>O Saimon Pita i wanpat murmur tano, ra i ruk una kulam na minat, ma i tama i mukut a kum malu det inep taru tiro iai. <sup>7</sup>Ikut in namalu ra di rau tar in lorin o Iesu nami, ke kis tomo nama kum malu. Di sa pul tari, ma di ubek gisen tari ut. <sup>8</sup>Io, a nat na ususer, ra i mugu pat taru nisan a kulam na minat, i kai i ruk. I tama i ra i nurnur. <sup>9</sup>Ka der talapor utmakai una wasiso na Buk Tabu ra i lena, o Iesu in katuttur melet gusun a minat. <sup>10</sup>Io, aru nat na ususer der milet melet sur a tamon.

*O Iesu i wanpat torom o Maria Magdalen  
(Mt 28:9-10; Mk 16:9-11)*

<sup>11</sup>O Maria Magdalen i tur nago utamon nisan a kulam na minat ma i tangis. Ra kura utmakai i tangis, i par pirso ma i kiet ruk una kulam na minat. <sup>12</sup>I tama pas aru ensel kura der tiro, der emar nama kum kamkabang na malu ma der kis taru una nubual ra di inep tar a minat in o Iesu iai. Ara i kis una ulalong, ma ara pasander i kis una papadus. <sup>13</sup>Der tingi lena, “Le, ulai ra u tangis?” I balu der lena, “Det sa los gisen ru anung a Labino, ma ka tasmani ra kura mo di inep tari awai.”

<sup>14</sup>Ra i tupukus, i tama pas o Iesu kura i tur taru, ikut ke tasmani lena o Iesu ut ra. <sup>15</sup>O Iesu i tingi lena, “Le, ulai ra u tangis? Osi ra u sisio suri?” O Maria i nuki lena a musano ra, i a tene tamtamabat a kinobot, ra i watungi tano lena, “Ra ui u los gisen ru a minat in o Iesu, un inanos iau ra kura u inep tari awai, sur an nan ma an los pasi.” <sup>16</sup>O Iesu i watungi tano lena, “Maria!” Ra o Maria i tupukus ma i watungi tano nama wasiso Ibru lena, “Raboni!” a kukuraino lena tene ususer.

<sup>17</sup>O Iesu i watungi tano, “Gong u pam a pining, uni ka wan toto utmakai torom o Tita. Ikut un nan torom a kum tistising, ra un inanos det lena, an nan usapat netes torom o Tita, i ra a Tamamot kai, torom anung a God, i ra anumot a God kai.” <sup>18</sup>Ra o Maria Magdalen i wan torom a kum nat na ususer ra i inanos det lena, “A sa tama tar a Labino.” Ma i inanos det kai una kum utna ra o Iesu i sa watung tari tano.

*O Iesu i wanpat puaso torom anun a kum nat na ususer*

*(Mt 28:16-20; Mk 16:14-18; Lk 24:36-49)*

<sup>19</sup>Ra i mirum una mugano bung una wik, a kum nat na ususer det kis tomo, ma det ukaibat pas det tagisa urumu, uni det ngaran a ramano kum te Juda. O Iesu i wanpat ma i tur epotor tandet, ra i watungi tandet lena, “A malmal torom mot.” <sup>20</sup>Ra i sa watung tari lenri, i ese aru lamano ma a paporino tandet. A kum nat na ususer det gas doko, ra det tama a Labino. <sup>21</sup>O Iesu i watung meleti tandet lena, “A malmal torom mot. O Tita i tulu ru iau, lenkutkai ra a tulu mot.” <sup>22</sup>Ra i sa watung tari lenri, i wup det nama wuwu na wano, ma i watungi tandet lena, “A Tokodos na Nion ri, mot in utur ukai i una nilaun anumot. <sup>23</sup>Ra mot in dumano ru a kum sakino petutna anun taio, o God kai in unus ru i gusuni. Ra ka mot in dumano ru tu sakino petutna anun taio, o God kai ken unus ru i.”

*O Iesu der nam o Tomas*

<sup>24</sup>O Tomas, ra di watungi kai nama kasango, i ara gusun det a noino ma aru nat na ususer, ke kis tomo nam det ra o Iesu i wanpat pas torom det. <sup>25</sup>A kum nat na ususer ka det mana nama inanosi lena, “Met sa tama tar a Labino!” O Tomas i watungi kut tandet lena, “Ra kan tama a kinan a nil una aru lamano, ma kan uruk in kaskas na lamang uni, ma ra kan uruk a lamang una kinan a bele una papor ino, iau kan nurnur.”

<sup>26</sup>Ra i sa ra wik bati, a kum nat na ususer det kis tomo melet tiro urumu, det tomo nam o Tomas. Det ukaibat pas det ut tagisa urumu. Ikut o Iesu i tur puaso epotor tandet, ra i watungi tandet lena, “A malmal torom mot!” <sup>27</sup>Numur i watungi tan o Tomas lena, “Uruk in kaskas na lamam nin, ma un tama aru lamang. Tulsu a lamam urin, ma un uruki una paporing. Ra gong mo u wur nuknuk, un nurnur kut.” <sup>28</sup>O Tomas i watungi tano lena, “Anung a Labino ma anung a God!” <sup>29</sup>O Iesu i inanosi lena, “U nurnur maragom uni u tama iau, niko? Det ra ka det tama iau, ikut det nurnur, det dan.”

*A kibino ra di tumus a buk ri*

<sup>30</sup>O Iesu i pam a susut na ukinalong kai umatan anun a kum nat na ususer, ra ka di tumus ukai det una buk ri. <sup>31</sup>Ikut di tumus ukai pas a ramano kum utna ri, sur mot in

nurnur lena o Iesu i a Karisito, a Nutun o God. Ra mot in nurnur uni, mot in laun nama risano.

## 21

*O Iesu i wanpat melet torom a wonom mawit na nat na ususer*

<sup>1</sup> O Iesu i wanpat melet torom anun a kum nat na ususer una usalin ina du tasi Tiberias. <sup>2</sup> I lenri: Ara bung o Saimon Pita ma o Tomas, ra di watungi kai nama kasango, ma o Natanael a te Kana tagun a papor Galili, ma aru nutun o Sebedi, ma aru kai tagun a kum nat na ususer, det kis tomo. <sup>3</sup> Ra o Saimon Pita i watungi tandet lena, "An nan, an woro a uben." Det balu i lena, "Dat tomo." Io, det kas pas una pot ra det wan. Ikut una bung na mirum ra, ka det dat lako kiripo.

<sup>4</sup> Una komkobot raut, o Iesu i tur taru nago una usalin, ikut a kum nat na ususer ka det tasmani lena o Iesu ut ra. <sup>5</sup> Ra o Iesu i kakabo torom det lena, "A kum nat, mot dat pas lako kiripo ut?" Det ipul kut lena, "Awu." <sup>6</sup> O Iesu i watungi tandet lena, "Mot in woro a uben una papor sot na lamamot, sur mot in dat lako kiripo." Det woro i lari ra i watungi. Io, det lagano datdat tar a uben, uni i bukus nama kum kiripo. <sup>7</sup> A nat na ususer ra o Iesu i nem doko i, i watungi tan o Pita lena, "A Labino ut nago!" O Saimon Pita i longori lena a Labino ut nago, ra i pipis melet pas in namalu ra i palos tari ra i woro a uben, ma i sirok losop utiro utasi. <sup>8</sup> A kum nat na ususer det mur nama pot unago una usalin. Ma det dat piso pas a uben ra i bukus nama kum kiripo, uni ka det babbak gusun a usalin, i elar kut nama limo na noino sinanga.

<sup>9</sup> Det sirok gusun a pot, ra det tama a lakit na sungun ma a kiripo kusapat netes uni, ma det tama kai a beret. <sup>10</sup> O Iesu i watungi tandet lena, "Mot in los lako kiripo urin tagun a kum kiripo ra uniutri mot uben pasi." <sup>11</sup> Io, o Pita i kas una pot, ra i dat pirso a uben unago una usalin, ma i ulit ru a kum kiripo gusuni. I bukus nama kum lamlabino kiripo, a niluluk indet i elar nam ara mar ma limo na noino ma tul. Det susut doko, ikut a uben ke tararos. <sup>12</sup> O Iesu i watungi tandet lena, "Mot wan urin ma mot in nangon." Kataio tagun anun a kum nat na ususer i pet lar pasi sur in tingi lena, "Ui osi?" Det sa tasmani lena i a Labino ut ra. <sup>13</sup> O Iesu i los

pas a beret ma i tabor det nami, ra numur i tabor det bulung nama kiripo.

<sup>14</sup> Iri i, a mantulu dino ra o Iesu i wanpat torom anun a kum nat na ususer, numur tan anun a katkatatur melet gusun a minat.

*O Iesu i wasiso torom o Pita*

<sup>15</sup> Ra det sa wangon rop, o Iesu i watungi tan o Saimon Pita lena, "Saimon, nutun o Jon, u nem doko iau taun det ri, niko?" I balu i lena, "Lingmulus, Labino, u tasmani lena a nem ui." O Iesu i watungi tano lena, "Un tabor anung a kum nat na sipsip."

<sup>16</sup> O Iesu i manru iting toromi lena, "Saimon, nutun o Jon, pepetlai, u nem doko iau?" I balu i lena, "Lingmulus, Labino, u tasmani lena a nem ui." Ma o Iesu i watungi tano lena, "Un tamtamabat anung a kum sipsip."

<sup>17</sup> Ra o Iesu i mantulu dino u watungi tano lena, "Saimon, nutun o Jon, pepetlai, u nem iau?" O Pita i tupunuk, uni o Iesu i tingi a tulu dino lena, "U nem iau?" I watungi tano lena, "Labino, u tasman a kum utna rop. U tasmani lena a nem ui." Ma o Iesu i watungi tano lena, "Un tabor anung a kum sipsip."

<sup>18</sup> "A inanos ui nama lingmulus, ra u barman, ui ut u ser mar pas ui, ma u ser wan una kum nubual ra u nem na wan iai. Ikut ra un takano, un kodos aru lamam, ma ara gisen ut in mar ui, ma in ben tar ui una nubual ra ko nem na wan iai." <sup>19</sup> O Iesu i watung lenri, sur in ese a ngas na iniru ra in los o Pita. Un anun a iniru ra, in ulabo pas o God. Ra i sa watung tari lenri, i inanos lena, "Un mur iau."

*O Pita i ting o Iesu un o Jon*

<sup>20</sup> O Pita i tur tupukus ma i tama a nat na ususer ra o Iesu i ser nem doko i, kura i mur der. A nat na ususer ra, i ra i ere torom o Iesu una nundet a tintinip na inangon, ra i ting o Iesu lena, "Labino, osi ra in usobor tar ui?" <sup>21</sup> O Pita i tama i, ra i ting o Iesu uni lena, "Labino, pepetlai un o naro ri?" <sup>22</sup> O Iesu i balu o Pita lena, "Ra a nemi lena in laun tuk an millet, asur a utna anumi. Ikut ui, un mur iau." <sup>23</sup> A wasiso i wanpat torom det ra det nurnur, lena a nat na ususer ri ken mat. Ikut o Iesu ke watungi lena ken mat, awu, i watungi kut lena, "Ra a nemi lena in laun tuk an millet, asur a utna anumi."

<sup>24</sup> A nat na ususer ri, i ra i wasiso puaso una kum utna ri, ma i tumus ukai i. Ma det tasmani lena a kum utna ri i wasiso puaso uni, i lingmulus sakit.

<sup>25</sup> A susut na utna utkai o Iesu i sa pam tari. Ra gunuk din tumus rop pas det taktakai, a nuki lena a rakrakon bual ke labo sur din ubek a kum buk rop uni.

## A kum Pinapam anun a kum Aposel

*A wasiso talapor mugu*

A buk ri, o Luk i tumusi. I tugus tomo i nam anun a mugano buk ra i tumusi, a Wakak na Wasiso un o Iesu Karisito. Una buk Aposel dat tama i lena, a Tokodos na Nion, i udekdek a kum nat na ususer sur det in warawai nama Wakak na Wasiso un o Iesu.

A buk ri, i wasiso una taro na nurnur anun o Karisito, i turpasi tong una papor Judia ma numur i wan susuaro una rakrakon bual rop. A kum mugano te Karisito det tagun a taro Juda kut. Det nuki lena a lotu anun o Karisito anundet kut, ma ausur anun a taro gisen kai. Ikut numur o God i ese i lena, i nemi sur a taro rop det a kum te Karisito. (Ap 10). A kum te Karisito tagun a taro Juda det nemi lena, a kum te Karisito ra ausur a taro Juda, det kai det in mur a kum warkurai anun a lotu Juda. A tinotok talilis una pinindi i ara warkurai ra det nemi lena, a taro gisen kai det in muri. Ikut ra det kis tomo un ara labino kiwung det warkurai pasi sur a ramano kum warkurai kut, a kum te Karisito ra ausur a taro Juda det in muri. (Ap 15).

Ara labino utna ra a buk ri i wasiso uni, a pinapam anun a Tokodos na Nion, a nion o God. A Tokodos na Nion i wanpat mugu torom a taro na ususer anun o Iesu una bung na Pentikos. A Tokodos na Nion ut i mugu a nuknukindet ma i pitar a dekdek tandet.

Una ramano kum inawan anun o Pol, o Luk i wan tomo nami. (Ap 16:10-17; 20:5-21; 27:1-28:16).

*A inawan ina buk Aposel:*

A tintinip na wasiso anun o Iesu torom a kum nat na ususer (1:1-26)

A kum nat na ususer det warawai sapat o Jerusalem (2:1-8:3)

A kum nat na ususer det warawai tong una papor Judia ma una papor Samaria (8:4-12:25)

A mugano inawan anun o Pol (13:1-14:28)

A kiwung anun a kum aposel sapat o Jerusalem (15:1-35)

A manru na inawan anun o Pol (15:36-18:22)

A mantulu du inawan anun o Pol (18:23-21:16)

Di ukarabus o Pol sapat o Jerusalem (21:17-23:22)

O Pol i kis tong o Sisaria (23:23-26:52)

O Pol i wan utong o Rom (27:1-28:30)

<sup>1-3</sup>Torom o Tiopilus,

Una nung a mugano buk, a tumus a kum utna rop ra o Iesu i sa pam tari ma i sa ususer tar a taro nami, una turturkibin anun a pinapam, tuk una bung ra o God i ben toto pasi usapat una langit. Numur tan anun a minat, i wanan pat melet torom anun a kum aposel, ma a kum utna ra i pami i ulingmulusi lena, i sa laun melet gusun a minat. A wat na noino bung i kis melet pasi nin upiso ra i wanan pat torom det, ma i wasiso una matanitu anun o God. Ra i ususer tar anun a kum aposel nama dekdek ina Tokodos na Nion, a kum aposel ra i pilok pas det. <sup>4</sup>Un ara bung tagun a kum bung numur tan anun a katkatatur melet gusun a minat, det kis tomo una inangon, ra i turbat det lena, "Gong mot wan gusun o Jerusalem, mot in kis langlang pas a Tokodos na Nion, ra o Tita i sa liliman taru uni, ra a sa inanos tar mot nami. <sup>5</sup>O Jon i baptaiso nama danim, ikut ken suano i, ra din baptaiso mot nama Tokodos na Nion."

*O Iesu i wan toto usapat una langit*

<sup>6</sup>Ra a kum aposel det kis tomo nam o Iesu, det tingi lena, "Labino, pepetlai, uniri un pitar melet tar a gapman torom met a taro Israel, sur met ut met in tamtamabat met ma met in kis langolango gusun a gapman Rom?"\* <sup>7</sup>I balu det lena, "Ausur a utna anumot sur mot in tasman a bung o a du bung ra o Tita i sa kubus tari sur in pitari uni. <sup>8</sup>Ikut a Tokodos na Nion in kis un mot, ma mot in utur ukai a dekdek, ma a utna ra mot tama i un iau mot in wasiso uni sapat o Jerusalem, ma una kum tamon rop tong una ru papor Judia ma o Samaria, ma una rakrakon bual rop."

<sup>9</sup>Ra i sa rop anun a wasiso, o God i ben toto pasi usapat una langit. Ra det tamtama utmakai, a bakut i pulus bat pasi gusun a matmatandet.

\* 16: Una kum kilalo ra, a taro Israel det kis utuntudu ina gapman Rom. Det nuki lena o Iesu in winim pas a gapman Rom ma det in langolango.

<sup>10</sup> Det tatatado utmakai usapat una bakut ra o Iesu i wan gusun det, ra aiapiap kut aru musano der emar nama kum kabang na malu der tur pat nisan det. <sup>11</sup> Ma der watungi lena, “Mot a kum te Galili, sur asau ra mot tur ma mot tatatado usapat una bakut? O Iesu mo sapat, i ra o God i sa ben pasi gusun mot usapat una langit, in nanpat melet urin, lenutri mot sa tama ru i, ra i wan usapat netes.”

*O Matias i keles o Judas Iskariot*

<sup>12</sup> Numur a kum aposel det wan gusun a tangai di watungi nama Tangai na Oliw ra det milet melet usapat o Jerusalem. I milau i kut o Jerusalem. <sup>13</sup> Ra det wanpat sapat o Jerusalem, det ruk una rumu ma det kis una kukurumu sapat netes. A kukurumu ra det ininep ma det kiskis uni. Det ri, ra det kiskis tomo tiro iai: O Pita, o Jon, o Jems, o Endru, o Pilip, o Tomas, o Batolomiu, o Matiu, o Jems a nutun o Alpius, o Saimon ara tagun a taro Silot<sup>†</sup>, ma o Judas, a nutun ara Jems gisen. <sup>14</sup> Det tomo nam o Maria o nan o Iesu, ma a kum tistisin o Iesu, ma a ramano kum wardain kai. Det rop ka det mana nama niaring una kum bungbung.

<sup>15</sup> Un ara bung epotor tan a kum bungbung ra, a kum tene nurnur det kis tomo. Det elar nam ara mar ma ru noino det. O Pita i tur ma i watungi lena, <sup>16</sup> “A kum tisting, a wasiso anun a Tokodos na Nion, ra o Dewid i wasiso taru uni numugu utmakai una Buk Tabu, uniri di sa pam sot pasi. I wasiso un o Judas, i ra i mugu det ra det pam pas o Iesu. <sup>17</sup> I ara tagun met, ma i kai i los a tinibo tomo nam met una pinapam ri.”

<sup>18</sup> Ra o Judas i kul pas a du piso nama mani tagun anun a sakino pinapam ra i pam tari. Numur i puku pirso tiro iai una nun a du piso, in masarino i mugu. Ra in balano i tupurus potor, ma in narus na balano i tilior piso rop. <sup>19</sup> Det rop ra det kis tiro o Jerusalem, det longoro i, ma det watung a piso ra nam anundet a wasiso, Akeldama, a kukuraino, a piso na gap.

<sup>20</sup> O Pita i watungi utkai lena, “Di sa tumus tari una Kum Kelekele anun o Dewid lena, ‘A kinano in belbel,

ma gong taio i kis uni.’ *Buk Song 69:25*

Ma di tumus tari kai lenri,

‘Taio in kelesi una nun a pinapam.’ *Buk Song 109:8*

<sup>21-22</sup> I wakak ra dat in pilok pas tu musano, sur i kai in tene wasiso talapor tomo nam dat, un o Iesu lena i katuttur melet gusun a minat. I wakak ra a musano ra, taio ut tagun dat ra dat ser kis tomo nam o Iesu, turpasi ra o Jon i baptais, tuk una bung ra di ben pas o Iesu gusun dat usapat una langit.”

<sup>23</sup> Ra det watung pat pas aru musano: O Josep, di watungi nam o Basabas, ma ara risano kai o Jastus, der nam o Matias. <sup>24</sup> Ma det wararing lena, “Labino, u tasman a balan a taro rop, un ese met, osi mulus tagun der ri u sa pilok pasi, <sup>25</sup> sur in los a pinapam na aposel, ra o Judas i sa mat pas gusuni ma i sa wan sur a tamon ra i sot nam anun a sakino petutna.” <sup>26</sup> Det pam a pinapam na pipilok nama ru wat, ra a wat anun o Matias i wanpat. Ra det luk tomo pasi nama noino ma ra aposel.

## 2

*A inawan pat anun a Tokodos na Nion una bung na Pentikos*

<sup>1</sup> Una bung na Pentikos, a kum tene nurnur rop det kis tomo un ara rumu. <sup>2</sup> Ra a wungu tagisapat una langit i elar nama wunguina labino wuwu, i wanpat kisin torom det, ma i ubukus pas a rumu ra det kis uni. <sup>3</sup> Ra det tama a kum utna i elar nama kum kunkunabor ina sungun, det wan sarara ma det kis netes un det taktakai. <sup>4</sup> Det rop det bukus nama Tokodos na Nion, ma det turpas a wasiso nama kum wur ngas na wasiso ra a Tokodos na Nion i pitar tari torom det.

<sup>5</sup> Una kum bung ra, a susut na te Juda kai det kis tiro o Jerusalem. Det a kum tene lotu, tagun a kum tamon rop una rakrakon bual. <sup>6</sup> Det longoro a wungu ri, ra det kalabor pat tomo, ma i toboroboro a nuknukindet, uni det ut taktakai det longoro anundet a kum wasiso, ra a kum tene nurnur det wasiso nami. <sup>7</sup> Det rop det kisin ma det nuknuk doko una utna ri, ra det watungi lena, “Tama i, det rop ri ra det wasiso, a taro Galili kut! <sup>8</sup> Asau a kibino ra dat rop taktakai dat longoro det, det wasiso nam anundet a kum wasiso ut? <sup>9</sup> Dat a kum te Patia, a kum te Midia, a kum te Elam, ma dat tagitong una kum papapor Mesopotemia, Judia, Kapadosia, Pontus, Asia, <sup>10</sup> Pirigia ma o Pampilia, ma tagitong o Ilijp. Dat tagitong una papor

<sup>†</sup> 1:13: Silot i a risan a taro, ra det tur tomo, uni det nemi sur det in lakro ru a gapman Rom.

Libia ra i milau o Sairini, ma tagitong o Rom. <sup>11</sup>Dat a taro Juda ma ara taro tagun dat ra det ruk una lotu Juda. Ma dat tagitong o Krit ma o Arabia. Dat rop dat longoro det ra det wasiso una kum lamlabino pinapam anun o God nam anundat a kum wasiso.”  
<sup>12</sup>Ra det rop det kisin, ma i toboroboro a nuknukindet, ra det ting etetalai det lena, “Asau a kukurai na utna ri?” <sup>13</sup>Ikut ara taro det urongun un det, ma det watungi lena, “Det inum a wain ra det sipak nami.”

*A warawai anun o Pita*

<sup>14</sup>O Pita i tur tomo nama noino ma ra aposel, ma i wasiso nam in labino walngano torom a taro lena, “Mot a taro Juda, ma mot rop ra mot kis nin o Jerusalem, an palos a utna ri torom mot, ma mot in longoro wakaki. <sup>15</sup>Mot watungi lena det sipak. Ikut awu, uni i lisu na pakano bung utmakai una kobot. <sup>16</sup>A utna ri mot tama i, a poropet Joel i sa wasiso mugu taru uni lena,  
<sup>17</sup>‘O God i watungi lena:

Una kum tintinip na bung\*  
 an pitar pirso a Niong torom a taro rop.

A kum nutnutumot, a kum musano ma a wardain, det in wasiso na poropet. Anumot a kum barman det in tama a kum tantama, ma anumot a kum takano na musano det in ririon a kum ririon.

<sup>18</sup>Una kum bung ra, an pitar a Niong torom det kai anung a kum tultul na musano ma anung a kum tultul na wardain, ma det in wasiso na poropet.

<sup>19</sup>Ma an ese tar a kum utna na ukisin sapat una bakut, ma a kum ukinalong nin upiso una rakrakon bual, a kum utna ra, a gap, a sungun, ma a labino mis.

<sup>20</sup>In matanas in dumirum, ma a kalang in merek elar nama gap, ra numur a bung anun a Labino in nanpat, a labino bung ra, a bung na minamar.

<sup>21</sup>Ra det rop ra det wararing torom a Labino, in ulaun det.’ *Joel 2:28-32*

<sup>22</sup>“A taro Israel, mot in longoro iau. An inanos mot un o Iesu, a te Nasaret. Mot ut mot tasmani lena, una dekdekin o God

i pam a kum utna na ukisin, ma a kum dekdek na pinapam ma a kum ukinalong. I pami epotor torom mot, sur o God in ese i torom mot lena, i ut i tulu ru i. <sup>23</sup>Di pitar tar o Iesu torom mot, elar nami ra o God i sa tasman mugu tari, una nuknukina. Ra mot tomo nama kum sakino taro, mot sak wati un in nanai kutus. <sup>24</sup>Ikut, o God i ukatutur melet pasi, ma i los ru a minat gusuni, uni a minat ke pam ukai lar pasi. <sup>25</sup>O Dewid i sa watung tari un o Iesu lena,

‘A tasmani lena a Labino i kis bolbolos tomo nam iau.

Kan neder,  
 uni kuri i una sot na lamang, i udekdek iau.

<sup>26</sup>In balang i gas doko, ra a wasiso nama gasgas,

a nurmur lena un ulaun melet a pining.

<sup>27</sup>Uni kon madek tar iau un in nutung na minat, ma kon madek tar anum a Tene Tokodos sur in mereseng.

<sup>28</sup>U sa ese tar iau una kum kisapi sur an los a nilaun.

An kis tomo nam ui, ma un ubukus iau nama gasgas.’ *Buk Song 16:8-11*

<sup>29</sup>“A kum tistinging, an wasiso talapor torom mot un o Dewid, a tubundat tagun numugu. I sa mat ma di sa por ru i, ma anun a kulam na minat kuri ut nisan dat tuk uniri. <sup>30</sup>Ikut o Dewid a poropet, ra i tasmani lena, o God i sa liliman dekdek taru toromi lena, i ut in ukis tar taio tagun a kabotaro anunu sur in kelesi una nun a kiskis na king.

<sup>31</sup>O Dewid i sa tasman mugu tar a utna ra in nanpat, ma i watung a wasiso ri una nilaun melet anun o Karisito, lena ka din madek ru i un in nutung na minat ma a pinino ken mereseng. <sup>32</sup>O Iesu ut ra, o God i ukatutur pasi gusun a minat, ma met rop met tama i, ra met wasiso talapor uni. <sup>33</sup>Di ulabo pasi ma di ukis tari una sot na laman o God, ma o God o Tamano i pitar a Tokodos na Nion toromi, elar nam i ra i liliman tari nami. Ra uniri o Iesu i sa pitar pirso a utna ri, ra mot tama i, ma mot longoro i. <sup>34</sup>O Dewid ke wan usapat una langit, ikut i watungi lenri,

‘A Labino i watungi torom anung a Labino†  
 lena,

“Un kis una papor sot na lamang,

<sup>35</sup>tuk ra an winim pas anum a kum ebar

\* 2:17: A kum tintinip na bung i turpasi una bung ra o Iesu i kis nin upiso ma in tuk una bung ra in millet melet.

† 2:34: “A Labino” i wasiso un o God, ma “anung a Labino” i wasiso un o Iesu.

sur det in kis utuntudu ina num a warkurai.”<sup>36</sup> Buk Song 110:1

<sup>36</sup> “Mot a taro Israel rop mot in tasman wakaki: O Iesu ra mot sak wat tari un in nanai kutus, o God i sa ukis tari sur i a Labino ma a Karisito.”

<sup>37</sup> Det longoro a wasiso ri, ra i so a balandet, ma det ting o Pita ma a kum aposel lena, “A kum tistisimet, asau met in pami?”

<sup>38</sup> O Pita i balu det lena, “Mot rop taktakai mot in nukpukus, ma din baptaiso mot nama risan o Iesu Karisito, sur din unus ru anumot a kum sakino petutna, ra din tabor mot nama Tokodos na Nion. <sup>39</sup> Uni a etabor ri ra o God i sa liliman taru uni, in nan torom mot, ma torom a kum nutnutumot, ma det utkai ra det kis bakbak. In nan torom det rop, ra a Labino anundat a God in kabo pas det toromi.” <sup>40</sup> Ma i utumarong det nama susut na wasiso kai, ma i udekdek det lena, “Mot in tumarong, ma mot in nan gisen gusun a sakino petutna anun a taro tagun uniri, sur gong mot los a warkurai na minabalu.” <sup>41</sup> Det ra det mur a wasiso anun o Pita, di baptaiso det. Det elar nama tulu arip det, ra di luk tomo det nama kum tene nurnur. <sup>42</sup> Ma det pitar tar anundet a nilaun una etowo anun a kum aposel, una kinkinis tomo nama marmaris, ma una inangon tomo, ma una niaring.

*A kinkinis tomo anun a kum tene nurnur*

<sup>43</sup> A kum aposel det pam a susut na utna na ukisin, ma a susut na ukinalong kai, ra a taro rop det urur un o God. <sup>44</sup> A kum tene nurnur rop det kis tomo, ma a kum utna rop ra anundet taktakai, anundet rop kut. <sup>45</sup> Ra det siuru anundet a kum du piso ma anundet a kum utna, ma a mani taguni, det isuaro i torom osi ra i sibo. <sup>46</sup> Det ser kis tomo una rumu na etabor una kum bungbung rop. Ra det ser wangon tomo una nundet a kum rumu nama gasgas ma a lingmulus ubalandet. <sup>47</sup> Ra det watung ulabo pas o God, ma a taro rop det gas nam det. Ma una kum bungbung rop, a Labino i ulaun a susut na taro, ra di luk tomo det nama kum tene nurnur.

### 3

*Di ulangolango pas a musano ra ke ser wan*

<sup>1</sup> Ara bung o Pita ma o Jon der wan usapat una rumu na etabor, una du bung na niaring, una tulu pakano bung una lirop. <sup>2</sup> A taro det los tar ara musano ra ke ser wan, di usus pasi lenutra. Ma una kum bungbung

rop, det ser ukis tari nisan a matansako ina in noworo ina rumu na etabor, di watungi nama Wakak na Matansako, sur in sarsaring utna gusun det ra det ser ruk. <sup>3</sup> I tama pas o Pita ma o Jon ra der ling na ruk, ra i saring der sur lako mani. <sup>4</sup> Der tamtama tokodos toromi, ra o Pita i watungi lena, “Un tama mir!” <sup>5</sup> I tarom torom der, ma i kis langlang sur tu utna tander.

<sup>6</sup> Ra o Pita i watungi lena, “Iau katu mani, ikut uniri an tabor ui nama utna ra anung. Una risan o Iesu Karisito, a te Nasaret, un tur ma un nani!” <sup>7</sup> O Pita i pam a sot na lamano, ma i ukatutur pasi. Uniutra aru kikino i dekdek mut. <sup>8</sup> Ra i katutur lakit mut, ma i wanan maragom. Detul ruk una rumu na etabor, ra i wan, ma i sirsirok ra i watung ulabo pas o God. <sup>9</sup> A taro rop det tama i lena i wanan, ma i watung ulabo pas o God, <sup>10</sup> ra det kisin doko una utna ri di pami uni, ra det tasmani lena i kut ra i kiskis, ma i sarsaring utna nisan a Wakak na Matansako. <sup>11</sup> A musano ri i pam ukai pas o Pita ma o Jon, ra a taro rop det kisin doko ma det kalabor torom detul una parada ina rumu na etabor, ra di watungi nama Parada anun o Solomon.

*O Pita i warawai una rumu na etabor*

<sup>12</sup> O Pita i tama det, ra i watungi tandet lena, “Mot a taro Israel, ilai ra mot kisin una utna ri ra mot tama dekdek mir? Pepet-lai, mot nuki lena mir ulangolango pas a musano ri nama dekdekimir ut, o uni mir tokodos umatan o God? Awu! <sup>13</sup> O God ut i pami. A God anun o Abaram ma o Aisak ma o Jekop, a God anun a kum tumtubundat tagun numugu, i ulabo tar a risan o Iesu anun a tultul. Mot pitar tari sur din um doko i, ma mot ipul ru i kut umatan o Pailat, ra i nem na palos ru i. <sup>14</sup> Mot ipul ru i, ra a Tasur na Musano ma a Tene Tokodos, ra mot sasaring sur din palos tar a tene umum doko a taro torom mot. <sup>15</sup> Ra mot um doko ru o Iesu, i ra a kibin a nilaun, ikut o God i ukatutur melet pasi gusun a minat. Ma met, met tama i ma met wasiso talapor uni. <sup>16</sup> Una nurnur una risan o Iesu, di ulangolango pas a musano ri, ra mot tama i ma mot tasmani. A nurnur una risan o Iesu i ulangolango pas a musano ri umatam mot rop.

<sup>17</sup> “A kum tistising, a tasmani lena, mot tomo nam anumot a kum mugumugu kai mot pam orosi kut a utna ri un o Iesu, ka mot tasman asau ra mot pami. <sup>18</sup> Ikut una

kum utna ri mot pami, o God i pam sot pas a kum utna ra i sa watung mugu tari nama wasiso anun a kum poropet rop, lena anun a Karisito in mat. <sup>19</sup>Mot in nukpukus, ma mot in nan torom o God, sur in unus ru anumot a kum sakino petutna, <sup>20</sup>sur mot in taramo a wakak na nilaun ra a Labino in pitari. Ma in tulu ru a Karisito torom mot, o Iesu i ra o God i sa pilok pasi. <sup>21</sup>In kis sapat netes una langit, tuk una bung ra o God in umatok melet a kum utna rop, ra i sa watung tari numugu utmakai nama wasiso anun a kum tokodos na poropet anunu. <sup>22</sup>Uni o Moses i watungi lena, 'A Labino anumot a God, in tulu ru tu poropet elar nam iau torom mot, tagun anumot a taro ut. Mot in longoro a kum utna rop ra in watungi tamot. <sup>23</sup>Ma osi det ra ka det longoro a poropet ra, din um doko ru det, ra au mo sur det a taro anun o God.'

*Lo 18:15, 18-19*

<sup>24</sup>"A kum poropet rop, ra det wasiso puaso una wasiso anun o God, turpasi un o Samuel, ma det ra det wanpat numur tano, det wasiso mugu una kum bungbung ri. <sup>25</sup>A wasiso anun a kum poropet, anumot, ma a kunubus kai, ra o God i uliliman tari torom a kum tumtubumot tagun numugu. I watungi torom o Abaram lena, 'Un o tubum an udan a kum kamkabo taro rop una rakrakon bual.'

*Stat 22:18*

<sup>26</sup>O God i tulu ru anun a Tultul, i tulu mugu ru i torom mot a taro Juda, sur in ben pukus mot taktakai gusun anumot a kum sakino petutna, sur mot in dan."

#### 4

##### *O Pita ma o Jon der tur una warkurai*

<sup>1</sup>O Pita ma o Jon der wasiso torom a taro, ra a kum tene etabor torom o God, ma a mugumugu anun a kum a tene tamtamabat tagun a rumu na etabor, ma a kum Sadusi, det wan torom der. <sup>2</sup>Det kankan torom der, uni der ususer a taro un o Iesu, ma der warawai nami lena i sa laun melet gusun a minat, lenkutkai ra a taro det in laun melet. <sup>3</sup>Ra det pam ukai pas der ma det uruk tar der una karabus, sur der in kis tuk una bung palu, uni i sa lirop. <sup>4</sup>Ikut, a susut na taro ra det longoro a wasiso anun o Pita ma o Jon, det nurnur. Ra a niluluk ina kum musano kut ra det nurnur i elar nama limo na arip.

<sup>5</sup>Una bung numur, a kum mugumugu, ma a taro na kiwung ma a kum tene ususer tagun a Warkurai, det kis tomo sapat o

Jerusalem. <sup>6</sup>Det tomo nam o Anas, a mugu-mugu na tene etabor torom o God, ma a kum kukunu ri det: o Kaiapas, o Jon, Aleksanda, ma ara taro kai. <sup>7</sup>Di ben pas o Pita ma o Jon, ra der tur umatandet ma det ting der lena, "Osi na ngas na dekdek ra mur pam a utna ri nami? Ma a risan osi ra mur pami nami?"

<sup>8</sup>O Pita i bukusi nama Tokodos na Nion, ra i watungi tandet lena, "Mot a kum mugu-mugu anun a taro ma a taro na kiwung kai, <sup>9</sup>uniri mot ting mir una wakak na pinapam ra mir pami una musano ra ke ser wan ma di ulangolango petlan pasi. <sup>10</sup>Mot nama taro Juda rop, mot in tasmani lena, a musano ri ra i tur numugu tamot, di ulangolango pasi nama risan o Iesu Karisito a te Nasaret, i ra mot sak watu tari un in nanai kutus, ma o God i ukatatur melet pasi gusun a minat.

<sup>11</sup>I 'A wat ra mot a kum tene pam rumu mot pilok ru i,

i ut ra a wakak na wat, ra i udekdek a rumu.'

*Buk Song 118:22*

<sup>12</sup>Katutaio gisen in ulaun dat, ma katu risan taio kai taginin una rakrakon bual, ra o God i pitar tari torom dat a taro, sur din ulaun dat nami."

<sup>13</sup>Det tasmani lena, o Pita ma o Jon aru musano oros kut, ma ka der ususer pas un tu labino wortowo. Ma det kisin doko un der ra der wasiso ma ka der ngara. Ra det tasmani lena numugu detul ser imurmur tomo ut nam o Iesu. <sup>14</sup>Ikut det tama a musano ra di ulangolango pasi, i tur tomo nam der, ra ka det pet lar pasi mo sur det in balu der. <sup>15</sup>Det tulu gisen ru detul munung gusun a kiwung, ra det wasiso tomo pas, ma det watungi lena, <sup>16</sup>"Asau dat in pami una ru musano ri? Uni der sa pam ru ara labino utna na ukisin, ma i sa talapor torom det rop ra det kis nin o Jerusalem. Dat in ipul pepetlai mo? <sup>17</sup>Dat in turbat dekdek der, sur gong melet mo der wasiso torom taio nama risan o Iesu, sako a wasiso ri in nan kakaka torom a taro rop."

<sup>18</sup>Numur det kabo melet pas der, ma det turbat der sur gong melet mo der wasiso ma der ususer lako taro nama risan o Iesu. <sup>19</sup>Ikut o Pita ma o Jon der balu det lena, "Pepetlai, i tokodos umatam o God ra mir in tarom tamot, ma torom o God gong? Mot ut mot in tama i. <sup>20</sup>Ikut mir, ka mir in mana lar pas nama wasiso un asau ra met sa tama tari, ma met sa longoro tari."

<sup>21</sup> Ra det sa turbat dekdek tar der, det palos ru der. Ka det sio lar pas tu utna ra det in um der uni, uni a taro rop det watung ulabo pas o God una utna na ukisin ra der sa pam tari. <sup>22</sup> Uni a musano ra di pam tar a utna na ukisin uni, i sa langolango, anun a kilalo i labo taun a wat na noino.

*A kum tene nurnur det wararing*

<sup>23</sup> Ra di sa palos ru o Pita ma o Jon, der milet melet torom a kum paspasander, ra der inanos det una kum utna rop ra a kum lamlabino tene etabor torom o God ma a kum mugumugu det sa watung tari tander. <sup>24</sup> Ra det longoro i, det wararing tomo torom o God lena, “Labino, u ukis a bakut, a rakrakon bual, a tasi, ma a kum utna rop ubalandetul. <sup>25</sup> Una Tokodos na Nion, u pitar a wasiso torom a tubumet o Dewid, anum a tultul. Ra o Dewid i watungi lena,

‘Asau a kibino ra a taro, ra ausur a taro Israel det kankan doko?’

Ma sur asau det epak sur det in pam a sakino?

Ikut anundet a epak i utna oros kut.

<sup>26</sup> A kum king taginin una rakrakon bual det tur na inaim, ma a kum mugumugu det wan tomo, sur det in banlaulau a Labino ma anun a Mesaia, i ra i sa pilok pasi.’ *Buk Song 2:1-2*

<sup>27</sup> A lingmulus ra o Erod ma o Pontias Pailat, ma a kum taro ra ausur a taro Israel, ma a kum taro Israel kai, det wan tomo una tamon ri sur det in banlaulau o Iesu, anum a Wakak na Tultul, ra u sa pilok pasi. <sup>28</sup> Ra det pami lenra, det pam sot pas a kum utna ra numugu u sa waninar tari una dekdekim ma una num a nemnem sur in nanpat. <sup>29</sup> Labino, un nuk pas anundet a kum dekdek na wasiso, ma un warut met anum a kum tultul sur gong met ngara ra met in wasiso puaso nama num a wasiso. <sup>30</sup> Un warut met nama dekdekim sur a kum misait det in langolango, ma a kum utna na ukisin ma a kum ukinalong det in nanpat una risan o Iesu, anum a Wakak na Tultul.”

<sup>31</sup> Ra det sa wararing pas, a rumu ra det kis tomo uni i tugunu, ma det rop det bukus nama Tokodos na Nion, ma det wasiso nama wasiso anun o God, ma ka det ngara.

*A kum tene nurnur det isuaro anundet a kum utna*

<sup>32</sup> A kum tene nurnur rop, i takai kut a nuknukindet ma a balandet, ma kataio tagun det i watung tu utna sur anunu kut. Det ubek tomo a kum utna sur anundet rop.

<sup>33</sup> A kum aposel det wasiso nama dekdek, una nilaun melet anun a Labino o Iesu gusun a minat, ra det sa tama tari. Ra a labino marmaris anun o God i kis un det rop. <sup>34</sup> Kataio tagun det i sibo sur tu utna, uni det ra anundet a kum du piso ma det kai ra anundet a kum rumu det siuru pasi, ra a mani taguni, <sup>35</sup> det losi torom a kum aposel. Ra det isuaro i torom osi ra i sibo.

<sup>36</sup> Ma o Josep kai, ara musano tagun a ailan Saipras, tagun a kabotaro Liwai, ma a kum aposel det watungi nam o Banabas, a kukuraino lena “tene udekdek a taro ra det los a mamaut”. <sup>37</sup> Anun ara du piso i siuru pasi, ra a mani taguni, i los tari torom a kum aposel.

## 5

*O Ananias ma o Sapaira*

<sup>1</sup> Ara musano a risano o Ananias, der nama nun a ino a risano o Sapaira der siuru ara du piso. <sup>2</sup> Ra der mulaot sur der in pam sikot ara kukur mani ra di sa kul tar a du piso nami, ma ara kukur mani kut o Ananias i losi torom a kum aposel. <sup>3</sup> Ra o Pita i watungi tano lena, “O Ananias, pepetlai ra u mulaot pas o Satan sur in ruk un in balam ra u toro a Tokodos na Nion? Asau a kibino ra u munu pas ara kukur mani ra di sa kul tar a du piso nami? <sup>4</sup> Ra a du piso i kis utmakai torom ui, anumi ut. Ma ra u siuru i, ui ut u warkurai sur a mani ra u siuru pasi taguni. Pepetlai ra u pam a sakino utna ri? Ausur u toro a taro, u toro i ut o God.” <sup>5</sup> O Ananias i longoro a wasiso ri, i puku pirso ra i mat. Ra det rop ra det longoro a wasiso uni det ngara doko. <sup>6</sup> Numur a kum barman det wanpat, ma det pulus pas a minat in o, det los pirso i, ma det por ru i.

<sup>7</sup> A tulu aua numur, anum a ino i ruk, ke tasman a utna ra i sa wanpat. <sup>8</sup> Ra o Pita i tingi lena, “Un inanos iau, i kut ri a matan a du piso, ra mur siuru pasi?” Ra i balu i lena, “I kut ra.” <sup>9</sup> O Pita i watungi tano lena, “Ilai ra mur nama num a musano mur epak pas sur mur in lar a Nion a Labino? Tama i, det ra det sa por tar anum a musano, kuri kut det una matansako. Uniutri det in los pirso ui bulung.” <sup>10</sup> Uniutra i bulung i puku pirso taru numugu nisan o Pita, ra i mat. Ra a kum barman det ruk, det tama i lena i sa

mat, det los pirso pas a minat ino, ra det por tari milau nisan anun a musano. <sup>11</sup>Ra a taro na lotu rop det ngara doko, ma det rop kai ra det longoro a kum utna ri.

*A kum ukinalong ma a kum utna na ukisin*

<sup>12</sup>A kum aposel det pam a susut na ukinalong ma a susut na utna na ukisin nisan a taro. Ma a kum tene nurnur rop det ser kis tomo una parada ina rumu na etabor, di watungi nama Parada anun o Solomon. <sup>13</sup>A taro gisen det ngara sur det in kis tomo nam det, ikut ka det watung laulau det, det urur un det. <sup>14</sup>Ikut a susut na taro melet, a wardain ma a kum musano, det nurnur maragom una Labino, ma di luk tomo det nama taro na nurnur. <sup>15</sup>A taro det tama a pinapam anun a kum aposel, ra det los tar a kum misait ma di inep tar det una papor kisapi una kum kabulu na ininep ma una kum bat, sur o Pita in nan sakit det ra a niono in nan netes una lako taro tagun det, ra det in langolango. <sup>16</sup>Ra a susut na taro tagitong una kum tamon milau o Jerusalem, det wanpat. Det los a kum misait, ma det ra a kum laulau na nion det banlaulau det, ma di ulangolango pas det rop.

*A kum aposel det tur una warkurai*

<sup>17</sup>A mugumugu na tene etabor torom o God, ma a kum paspasano tagun a kum Sadusi, a nuknukindet i laulau nama kum aposel, uni det tama a taro det mur a kum aposel. <sup>18</sup>Ra det pam ukai pas det, ma det uruk det una karabus. <sup>19</sup>Ra una mirum, ara ensel anun a Labino i papos a kum matansako ina karabus, ra i ben pirso ru det <sup>20</sup>ma i watungi lena, “Mot in nan, ma mot in tur una rumu na etabor, ma mot in inanos a taro nama kum wasiso rop una matok na nilaun ri.” <sup>21</sup>Ra a kum aposel det mur a wasiso ra. Una kobot raut det ruk una rumu na etabor ma det ususer a taro.

A mugumugu na tene etabor torom o God i wanpat, tomo nama kum paspasano, ra det kabo tomo pas a taro na kiwung rop, a kum mugumugu anun a taro Israel. Ma det itula utong una karabus sur din ben pas a kum aposel. <sup>22</sup>Ikut, ra a kum tene tamtamabat tagun a rumu na etabor det wan, ka det tama det mo una karabus. Ra det millet melet, det watungi lena, <sup>23</sup>“Met wanpat una karabus, ra met tama i lena di sa tagar dekdek tari, ma a kum tene tamtamabat det tur ut una kum matansako,

ikut ra met papos saro i, ka met tama det mo.”

<sup>24</sup>Ra a mugumugu anun a kum tene tamtamabat tagun a rumu na etabor ma a kum lamlabino tene etabor torom o God, det longoro a wasiso ri, i toboroboro a nuknukindet uni, ra det nuknuk doko un asau mo ra in nanpat. <sup>25</sup>Ra ara musano i wanpat, ma i watungi tandet lena, “Tama i, a taro ra mot uruk det una karabus, kurong det mo una rumu na etabor, ma det ususer a taro.” <sup>26</sup>Ra a kum tene tamtamabat ma anundet a mugumugu det ben pas a kum aposel. Det ben wakak pas det kut, uni det ngaran a taro, sako det in dukuduku det.

<sup>27</sup>Ra det sa ben pas a kum aposel, det utur tar det umatana taro na kiwung. Ma a mugumugu na tene etabor torom o God i watungi tandet lena, <sup>28</sup>“Met sa turbat tar mot lena, gong mo mot ususer a taro nama risan o Iesu. Ikut uniri, o Jerusalem i sa bukus nam anumot a etowo, ra mot nemi, sur mot in takun met una minat in o Iesu.”

<sup>29</sup>Ikut, o Pita ma a kum aposel det balu i lena, “Met in muri ut a wasiso anun o God, ma ka met in mur a wasiso anun a taro. <sup>30</sup>A God anun a kum tumtubundat tagun numugu, i ukatutur melet pas o Iesu, i ra mot sak wat tari un in nanai kutus. <sup>31</sup>I ut ra o God i ulabo pasi ma i ukis i una papor sot na lamano, sur in Labino Mugumugu ma in Tene Ulaun, ma in pam a kisapi sur a taro Israel det in nukpukus, ma din unus ru anundet a kum sakino petutna. <sup>32</sup>Met tama a kum utna ri ma met wasiso uni, ma a Tokodos na Nion i ulingmulus anumet a wasiso. A Tokodos na Nion, i a etabor anun o God torom det ra det ser tarom tano.”

<sup>33</sup>Det longoro a wasiso ri, ra det kankan doko, ma det nem na um doko a kum aposel. <sup>34</sup>Ikut ara Parisi, a risano o Gamaliel, a tene ususer tagun a Warkurai, ra a taro rop det ser ru i, i tur una kiwung, ra i watungi lena a kum aposel det in pirso pas munung. <sup>35</sup>Ma i watungi torom a taro na kiwung lena, “Mot a taro Israel, mot in nuknuk wakak sur asau ra mot in pami una taro ri. <sup>36</sup>A ramano kum kilalo numugu o Tiudas i wanpat, ma i watungi lena i a labino, ra a susut na taro, i elar nama wat na mar, det muri. Ikut ra di um doko ru i, det rop ra det muri det wan susuaro, ra anundet a pinapam i rop oros kut. <sup>37</sup>Numur tan a musano ri, ara bulung, o Judas, a te Galili, i wanpat una kilalo na tumtumus rising, ra i ben gisen

pas a ramano taro sur det in waim nama gapman. I kai i iru, ma det rop ra det muri, det wan susuaro.

<sup>38</sup> “Uniri a watungi tamot lena: Gong mot pam tar tu utna un det, mot in palos ru det. Ra a utna ri det pami, i kibino pas kut una taro, in rop kut. <sup>39</sup> Ikut ra i kibino ut un o God, mot in lagano urop ru i. Sako numur in talapor torom mot lena, mot waim tomo nam o God.”

<sup>40</sup> Ma det mulaot una nun a wasiso, ra det kabo melet pas a kum aposel, det miras tatar det, ma det turbat det lena gong mo det wasiso nama risan o Iesu. Numur det palos ru det. <sup>41</sup> Ra a kum aposel det pirso gusun a kiwung, ma det gas, uni o God i tama det lena det wakak sur det in los a maimai una risan o Iesu. <sup>42</sup> Ra una kum bungbung rop una rumu na etabor, ma una nundet a kum rumu, ka det mana nama etowo ma a warawai nama Wakak na Wasiso lena o Iesu i a Karisito mulus.

## 6

*Di pilok pas a wonom mawit na musano sur det in tabor a sibo na taro*

<sup>1</sup> Una kum bung ra, a niluluk ina taro na ususer i ka toto nanan. Det tagun aru ngas na taro, ara taro Juda ra det wasiso nama wasiso Grik, ma ara taro Juda kai ra det wasiso nama wasiso Ibru. Det ra det wasiso Grik, det ururai un det ra det wasiso Ibru, lena, “Ra mot ser tibo a kum ula nama utna na inangon una kum bungbung, mot wanan sakit ru i kut a kum ula tagun met.” <sup>2</sup> Ra a noino ma aru aposel det kabo tomo pas a taro na ususer rop, ma det watungi tandet lena, “Ke tokodos sur met in balon mukut una etabor nama utna na inangon, ma ka met in pam a pinapam na warawai nama wasiso anum o God. <sup>3</sup> A kum tistisimet, mot in pilok pas lako wonom mawit na wakak na musano tagun mot, det ra det mananos ma det bukus nama Tokodos na Nion, sur met in pitar tar a pinapam na etabor ri torom det. <sup>4</sup> Ma met, met in balon ut nama niaring ma a pinapam na warawai nama wasiso anum o God.”

<sup>5</sup> Det rop det gas una wasiso ri. Ra det pilok pas o Stiwen, a musano ra i bukus nama nurnur ma a Tokodos na Nion. Ra det pilok pasi kai o Pilip, o Prokorus, o Nikano, o Timon, o Pamenas, ma o Nikolas, a musano tagitong o Antiok, ra ausur a te Juda, ikut i ruk una lotu Juda. <sup>6</sup> Ra det ben pas det torom a kum aposel. Ma det ubek

a kum lamandet sapat netes un det, ma det wararing.

<sup>7</sup> A wasiso anum o God i wan sarara, ma a niluluk ina taro na ususer sapat o Jerusalem, i labo nanan kai. Ma a susut na tene etabor torom o God kai, det nurnur ma det tarom una Wakak na Wasiso.

*Di takun o Stiwen*

<sup>8</sup> O Stiwen i bukus nama dekdek ma a marmaris anum o God, ra i pam a kum lam-labino utna na ukisin, ma a kum ukinalong utkai umatan a taro. <sup>9</sup> Ikut ara taro Juda det engaras nam o Stiwen. A taro ri tagun a rumu na lotu ra di watungi lena, Anun a Langolango na Taro. Det tagun aru tamon, o Sairini ma o Aleksanderia ma tagitong una ru papor, o Silisia ma o Asia. <sup>10</sup> Det lagano balubalu tar anuna wasiso, uni a Tokodos na Nion ut i pitar a mananos tano.

<sup>11</sup> Ma det ungonos eno pas a ramano kum musano, sur det in watungi lena, “Met longoro tari ut ra i wasiso laulau un o Moses ma un o God kai.” <sup>12</sup> Ra det usungun balan a kum mugumugu, ma a kum tene ususer tagun a Warkurai ma a taro oros kai. Det wan torom o Stiwen, det pam ukai pasi, ma det beni sur in tur sa numugu umatan a taro na kiwung. <sup>13</sup> Ra det ben pas a taro sur det in takuni nama kum torotoro na wasiso, ma det watungi lena, “A musano ri ke mana nama wasiso laulau una nundet a tokodos na rumu na etabor ma una kum Warkurai kai anum o Moses. <sup>14</sup> Met longoro i, ra i watungi lena o Iesu, a te Nasaret, in rege ru a rumu ri, ma in keles ru a kum ngasino ra o Moses i sa ususer tar dat nami.”

<sup>15</sup> Det rop ra det kis una kiwung, det tama dekdek o Stiwen, ma det tama i lena, in masarino i elar namin masarin a ensel.

## 7

*A warawai anum o Stiwen*

<sup>1</sup> A mugumugu na tene etabor torom o God i ting o Stiwen lena, “I lingmulus ut a kum wasiso ri?” <sup>2</sup> Ra i balu i lena, “A kum tistising, ma a kum tamtamang, mot in longoro iau. A God na minamar i wanpat torom a tubundat o Abaram, ra i kis utmakai tiro o Mesopotamia, ma ke wan utmakai utiro o Aran. <sup>3</sup> Ra i watungi tano lena, ‘Un nan gusun anum a tamon, ma gusun a kum kukum kai, ma un nan sur a tamon ra an ese tar ui uni.’ Stat 12:1

<sup>4</sup>“Ra i wan gusun a tamon anun a kum Kaldia, ma i kis tiro o Aran. Ra o tamano i sa mat, o God i tulu melet ru i sur a tamon ri, ra uniri mot kis uni. <sup>5</sup>O God ke pitar tar tu du piso utmakai tano sur anunu, o tu nat na nubual lik. Awu ut. Ikut i liliman taru sur numur in pitar tar a piso ri tano ma torom a kum tumtubunu numur. Una du bung, ra o God i uliliman tari, o Abaram katu nutunu utmakai. <sup>6</sup>Ra o God i watungi tano lena, ‘A kum tumtubum numur tam, det in kis na usiro una usiro na tamon, ma det in papam na karabus, ma din banlaulau det awat na mar na kilalo. <sup>7</sup>Ikut an akadik a taro ra det dat pas a kum tumtubum sur a pinapam na karabus. Ma numur det ra det papam na karabus det in piro gusun a tamon ra, ma det in lotu torom iau una tamon ri.’ *Stat 15:13-14*

<sup>8</sup>O God i pam tar a kunubus tomo nam o Abaram. Ma a ukinalong ina kunubus ra a tinotok talilis una pinindi. O Abaram i ulabo o Aisak, numur ra i sa tiwal na bung bati, o Abaram i tok talilis a pinino Aisak. Numur o Aisak i ulabo o Jekop, ma o Jekop i ulabo a noino ma aru tumtubundat.

<sup>9</sup>“Ma a kum tumtubundat ra, det nuknuk laulau un o Josep, a tisindet, ra det siuru ru i sur in papam na karabus tong o Ijip. Ikut o God i kis tomo ut nami, <sup>10</sup>ra i ulaun pasi gusun a kum maut ra i monongi. I pitar a wakak na mananos tano, ma i waruti sur o Pero, a king tagitong o Ijip, in gas nami. Ra o Pero i ukis tari sur in mugumugu una tamon Ijip ma in mugumugu kai una rumu anun o Pero.

<sup>11</sup>“Numur a labino munurak i wanpat tong o Ijip ma o Kenan kai, ma a susut na maut i monong a taro, ma kalako utna na inangon ana kum tumtubundat. <sup>12</sup>Ra o Jekop i sa tasmani lena a wit kurong o Ijip, i tulu ru a kum nutnutunu, a kum tumtubundat, tagitong o Kenan utong o Ijip a mugano dino. <sup>13</sup>I manru inawan anundet, o Josep i inanos det lena, i a tisindet. Ra o Pero kai i talapor maragom una kum tistisino Josep. <sup>14</sup>Numur o Josep i itula sur o tamano o Jekop, det tomo nama kum tumtubunu. Det rop a wonom mawit na noino ma limo. <sup>15</sup>Ra o Jekop ma a kum tumtubundat det wan ma det kis tong o Ijip. Numur det mat tong. <sup>16</sup>A susut na kilalo numur, di los pas a sursur indet, ma di uruk det una kulam na minat, tong o Kenan una tamon Sikem. A kulam na minat ra, o Abaram i sa kul pasi

gusun a kum nutnutun o Amor.

<sup>17</sup>“Ra i sa milau nanan a du bung ra o God in pam sot pas anun a liliman ra i sa inanos tar o Abaram nami, a niluluk in anundet a taro i sa ka toto bing tong o Ijip. <sup>18</sup>Ra ara matok na king i turpasi sur in mugmugu tong o Ijip, ra ke talapor una pinapam anun o Josep ra i pami numugu. <sup>19</sup>I toro tar anundet a taro, ma i banlaulau det, ra i ungongos tar det sur det in los piro ru anundet a kum natmiso, gusun a kum rumu, ma det in madek ru det, sur det in mat.

<sup>20</sup>“Una kilalo ra, di usus o Moses uni. Ma i ara wakak na nat sakit umatan o God, ra di ugu i a tulu kalang una rumu anun o tamano. <sup>21</sup>Numur di los piro ru i, ra a nutun o Pero, a ino, i los pasi, ma i ugu pasi sur a nutunulik. <sup>22</sup>Ra di ususer o Moses una kum ngas na mananos rop anun a taro Ijip, ma i ara dekdek na musano una nun a kum wasiso ma una nun a kum pinapam.

<sup>23</sup>“Ra o Moses i sa wat na noino kilalo anunu, i nuki lena in nan ma in tama tar anun a taro Israel. <sup>24</sup>I tama ara te Ijip i um laulau ara tagun det, i kalabor torom der ra i um doko ru a te Ijip, sur in balu ara pasander. <sup>25</sup>O Moses i nuki lena anun a taro det in tasman lele i lena, o God i tulu ru i sur in ulaun pas det, ikut ka det tasmani.

<sup>26</sup>“A bung numur tano, i tama melet aru te Israel, ra der waim, ra i nemi sur in umalmal der, ma i watungi tander lena, ‘Aru musano, mur pasano kut. Pepetlai ra mur banlaulau etalai melet mur?’ <sup>27</sup>Ikut, i ra i um laulau a pasano, i sugut gisen ru o Moses, ma i watungi tano lena, ‘Osi ra i ubek tar ui sur un mugumugu ma un tene warkurai anumet?’ <sup>28</sup>U nemi sur un um doko iau, elar nama te Ijip, ra nubung un um doko tari, niko?’ *Kisim Bek 2:14*

<sup>29</sup>O Moses i longoro a wasiso ri, ra i kalabor eno utong o Midian. Una nun a kinkinis na usiro tong iai, i ulabo aru nutnutunu, aru musano.

<sup>30</sup>“Ra i sa wat na noino kilalo uni tiro iai, ara ensel i wanpat toromi epotor una kunabor un in nanai, una nubual kalako taro uni, milau a Tangai Sainai. <sup>31</sup>Ra o Moses i tama i, i kisin doko uni. I wan milau sur in tama wakaki, ra i longoro in nalngan a Labino i watungi lena, <sup>32</sup>‘Iau a God anun a kum tumtubum tagun numugu, a God anun o Abaram, o Aisak ma o Jekop.’ *Kisim Bek 3:6*

Ra o Moses i neneder, ma i ngara sur gong i tama i. <sup>33</sup> Ra a Labino i watungi tano lena, 'Un palos ru aru su, uni a du piso ra u tur taru uni, anungi ut. <sup>34</sup> A sa tama a kum ngunungut ra i monong anung a taro ra det kis tong o Ijip, ma a sa longoro anundet a tinangis. Iri a sa wan pirso, sur an ulangolango pas det. Wan urin, sur an tulu melet ru ui utong o Ijip.' *Kisim Bek 3:5, 7-8, 10*

<sup>35</sup> "Numugu a taro Israel det ban lulu ru o Moses nama wasiso lenri, 'Osi ra i ubek tar ui sur un mugumugu ma un tene warkurai anumet?' Ikut, i ut ra, o God i tulu ru i sur in mugumugu ma in ulangolango pas a taro. I tulu ru i nama wasiso anun a ensel ra i wanpat toromi un in nanai ra i kunabor. <sup>36</sup> Ra o Moses i mugu pirso pas det tagitong o Ijip, i pam a kum utna na ukisin ma a kum ukinalong tong o Ijip ma tong una Merek na Tasi, ma tiro kai una nubual kalako taro uni, i elar nama wat na noino kilalo. <sup>37</sup> O Moses ut i watung tari tan a taro Israel lena, 'O God in tulu ru tu poropet elar nam iau tagun a kum tumtubumot ut.' *Lo 18:15*

<sup>38</sup> O Moses i kis tomo nama kum tumtubundat tagun numugu, a taro Israel, una nubual kalako taro uni. Ra a ensel i wasiso toromi una Tangai Sainai. O Moses i los pas a wasiso na nilaun, ma i tumus ukai tari sur anundat uniri.

<sup>39</sup> "Ikut a kum tumtubundat tagun numugu ka det nem na tarom tan o Moses. Det rosumur gusuni, ma det nuknuk melet utong o Ijip. <sup>40</sup> Ra det watungi tan o Aron lena, 'Un pam pas anundat lako kum god sur det in mugu dat, uni o Moses, ra i mugu pirso pas dat tagitong o Ijip, ka dat tasmani mo ra asau kura i sa wanpat uni.' *Kisim Bek 32:1*

<sup>41</sup> Una du bung ra, det pam pas a nat na bulumakau nama gol, ma det gas una pinapam na lamandet ra det etabor toromi. <sup>42</sup> Ikut o God i rosumur gusun det, ma i maked ru det sur det in lotu torom a kum nangnang, elar nami ra di sa tumus tari una buk anun a kum poropet lena,

'Mot a taro Israel,

una wat na noino kilalo ra mot kis una nubual kalako taro uni,  
ka mot etabor torom iau, ma ka mot um doko tu wewegua sur mot in etabor nami torom iau.

<sup>43</sup> Mot loslos a rumu na lotu anun a torotoro na god Molek,  
nama malalar ina in nangnang anun Repan, anumot a torotoro na god.  
A kum torotoro na god ri mot pam pas det, sur mot in lotu torom det.

Ra an rakon ru mot' *Amos 5:25-27*  
ma mot in nan lakai ru o Babilon ma utong sakit.

<sup>44</sup> "A kum tumtubundat tagun numugu det los nanan a rumu na sel una nubual kalako taro uni. A rumu na sel ra, i upuaso i lena o God i kis tomo nam det. Ra di sa pam tari murmur a wasiso anun o God torom o Moses, elar nama malalar ra i tama tari.

<sup>45</sup> Ma a kum tumtubundat tagun numugu det pitari torom a kum nutnutundet. Ra det bulung det los nanani ra o Josua i mugu det, ra o God i lu ru a taro gusun a kum tamon, sur a kum tamon ra anun a taro Israel mo. Ra i kis tiro iai, tuk una kilalo anun o Dewid, <sup>46</sup> i ra o God i nem doko i. Ra o Dewid i saring o God sur in pam tu rumu, sur a taro anun o Jekop det in lotu uni. <sup>47</sup> A rumu ra, o Solomon i pami. <sup>48</sup> Ikut o God a Labino Sakit ke kis una kum rumu ra a taro det pami, elar nama poropet i watungi lena,

<sup>49</sup> 'A Labino i watungi: A langit i anung a kiskis na king,  
ma a rakrakon bual a utna ra a ubek aru kiking netes ini.

Pepetlai, i to pas mot sur mot in pam tu rumu anung?

Awai i anung a nubual na mana?

<sup>50</sup> Pepetlai, ausur iau, a pam a kum utna rop ri?" *Aisaia 66:1-2*

<sup>51</sup> Ra o Stiwen i watungi tan a taro na kiwung lena, "Mot a kum tene pitarngat mot, a balamot i bakbak gusun o God ma a talngamot i kutkut. Mot turbat liklik a Tokodos na Nion, elar nama kum tumtubumot tagun numugu det pampami. <sup>52</sup> A kum tumtubumot tagun numugu det banlaulau a kum poropet rop. Det um doko det ra det wasiso mugu una inawan pat urin anun a Tene Tokodos, i ra uniri mot usobor tari, ma mot um doko ru i. <sup>53</sup> Mot ra mot sa los ukai a kum Warkurai anun o God, ra a kum ensel det pitar tari torom mot, ikut ka mot muri."

*Det duku doko o Stiwen*

<sup>54</sup> Ra a taro na kiwung det longoro a kum wasiso anun o Stiwen, det kankan doko, ma det karot bum toromi. <sup>55</sup> O Stiwen i bukus nama Tokodos na Nion, ma i tatado usapat

una langit, ra i tama a minamar anun o God, ma o Iesu kai, kura i tur taru una papor sot na laman o God.<sup>56</sup> Ra i watungi lena, “Tama i! A tama a langit i papos, ma a Nutun a Musano kura i tur taru una papor sot na laman o God.”<sup>57</sup> Ra det bari nama labino walngandet, det song bat a kum taltalngandet, ma det kalabor bat pasi.<sup>58</sup> Det dat pirso ru i gusun a tamon, ra det dukuduku i. Ma det ra det takun o Stiwen, det palos ru anundet a kum saket, ra det ubek tari nisan aru kikin ara barman, a risano o Sol.<sup>59</sup> Ra kura utmakai det dukuduku i, o Stiwen i wararing lena, “Labino o Iesu, un los pas a niong.”<sup>60</sup> Ra i kis butkeke una piso, ma i kakabo lena, “Labino, gong u balu a sakino petutna ri det pami.” I watung lentari ra, ra i mat.

## 8

<sup>1</sup> Ra o Sol i mulaot sur din um doko o Stiwen.

*O Sol i banlaulau a taro na lotu*

Una bung ra di um doko o Stiwen, a taro det turpasi sur det in ukadik a taro na lotu sapat o Jerusalem, ma a taro na nurnur rop det wan sarara una aru papor Judia ma o Samaria. Ikut, a kum aposel ka det wan, det kis ut.<sup>2</sup> A kum tene lotu mulus det por tar o Stiwen, ma det domosi.<sup>3</sup> Ra o Sol i banlaulau a taro na lotu. I ruk una nundet a kum rumu, i dat pas a kum musano ma a wardain, ra i uruk tar det una karabus.

*Di warawai nama Wakak na Wasiso tong una papor Samaria*

<sup>4</sup> Ma det ra det wan sarara tagisapat o Jerusalem, det warawai nama Wakak na Wasiso una kum tamon ra det wan iai.<sup>5</sup> O Pilip i wan utiro una labino tamon tong una papor Samaria, ma i warawai una Karisito torom det.<sup>6</sup> A kunur na taro det longoro a wasiso anun o Pilip, ma det tama a kum utna na ukisin ra i pami, ra det nem doko i sur det in longoro a kum wasiso ra i watungi.<sup>7</sup> I lakro ru a kum laulau na nion gusun a susut, ma a kum laulau na nion ra, det pirso, det kukukuk dekdek. Ma i ulangolango pas a susut ra a pinpinindet i mat, ma det kai ra ka det wan lar pas.<sup>8</sup> Ma a taro tagun a tamon ra, det gas doko.

*O Saimon a tene sangsagor*

<sup>9</sup> Ara musano tagitiro iai, a risano o Saimon. I ser sangsagor una susut na kilalo, ra a taro Samaria det ser kisin una kum utna

ra i pampami. Ma i warango pasi ut umatan a taro.<sup>10</sup> A taro rop, a kum lamlabino ma a taro oros kut, det rop det ru i, ma det watungi uni lena, “A musano ri i utur ukai a dekdekin o God, a dekdek ra di watungi nama Labino Dekdek.”<sup>11</sup> Ra det ser longoro wakaki, uni tagun numugu utmakai, i ser ukisin det nama anun a kum sangsagor.

<sup>12</sup> Ikut uniri, a kum musano ma a wardain det nurnur una Wakak na Wasiso ra o Pilip i warawai nami, una matanitu anun o God, ma una risan o Iesu Karisito, ma di baptaiso det.<sup>13</sup> O Saimon utkai i nurnur, ma di baptaiso tari. I mur likliki mukut o Pilip, ra i tama a kum ukinalong ma a kum utna na ukisin ra o Pilip i pami, ra i kisin doko uni.

<sup>14</sup> A kum aposel ra det kis sapat o Jerusalem, det longoro i lena a taro Samaria kai det sa tarom una wasiso anun o God, ra det tulu ru o Pita ma o Jon torom det.<sup>15</sup> Ra der wanpat, der wararing un det sur det in los a Tokodos na Nion,<sup>16</sup> uni ke kis utmakai un taio tagun det. Di baptaiso tar det kut nama risan a Labino o Iesu.<sup>17</sup> Numur o Pita ma o Jon der ubek a lamander sapat netes un det, ra det losi maragom a Tokodos na Nion.

<sup>18</sup> O Saimon i tama i ra aru aposel der ubek a lamander sapat netes una taro ma di tabor det nama Tokodos na Nion. Ra i los a mani torom der,<sup>19</sup> ma i watungi lena, “Mur in pitar a dekdek ra tang, sur iau kai an ubek a lamang sapat netes un faio sur in los a Tokodos na Nion.”<sup>20</sup> Ra o Pita i balu i lena, “Ui tomo nam anum a mani mur in iru, uni u nuki lena un kul a etabor anun o God nama mani.<sup>21</sup> Katu tinibo ma katu utna anum kuri nin una utna ri, uni ke tokodos in balam umatan o God.<sup>22</sup> Un nukpukus gusun anum a sakino petutna ri, ma un wararing torom a Labino. Kutiro in unus ru a sakino nuknukim,<sup>23</sup> uni a tama ui lena in balam i bukus nama sakino nuknuk, ma a sakino petutna i ker ukai ui.”<sup>24</sup> Ra o Saimon i balu i lena, “Mur in wararing torom a Labino un iau, sur gong tu utna tagun a kum utna ra mur watung tari, in nanpat un iau.”

<sup>25</sup> Ra o Pita ma o Jon der sa wasiso talapor taru una kum utna ra a Labino i pami, ma der sa warawai taru kai nam anun a wasiso, der milet melet usapat o Jerusalem. Ma una nunder a inawan, der warawai nanan nama Wakak na Wasiso una susut na tamon una papor Samaria.

*O Pilip i etorom nam ara musano a te Itiopia*

<sup>26</sup> A ensel anun a Labino i watungi tan o Pilip lena, “Un katutur, ma un nan utong una matmatano tobar sur a kisapi tagisapat o Jerusalem utong o Gasa. A kisapi ra, i wan una nubual kalako taro uni.” <sup>27</sup> Ra o Pilip i katutur pas, ma i wan. Ra der etorom nam ara musano tagitong o Itiopia, a labino tene tamtamabat a ututna anun a Kandake, a kuin anun a taro Itiopia. A musano ri i wan usapat o Jerusalem ra i lotu torom o God. <sup>28</sup> Numur i milet melet sur anun a tamon. Una nuna inawan, i kis taru una karis, ma i luk nanan a buk anun a poropet Aisaia. <sup>29</sup> Ra a Tokodos na Nion i watungi tan o Pilip lena, “Un nan milau a karis, ma un nan tomo nami.” <sup>30</sup> Ra o Pilip i kalabor sur a karis, ra i longoro a musano ra i luk a buk anun a poropet Aisaia, ma i tingi lena, “Le, u talapor ut un asau ra u luki?” <sup>31</sup> Ra i balu i lena, “An tasman petlani, ra kataio in watung palosi torom iau?” Ra i ting o Pilip sur in kas ma der in kis tomo.

<sup>32</sup> Iri i, a kum wasiso na Buk Tabu ra i luki: “Di beni elar nama sipsip, sur din um doko i.

Ke wasiso, elar nama sipsip ra i tur wowowon torom o naro ra i kumuri.

<sup>33</sup> Di ban umaimai tari, ma ka di warkurai i nama tokodos ino. Osi ra in wasiso una nun a kum nat?

Katu nutunu, uni i rop anun a nilaun taginin una rakrakon bual.” *Aisaia 53:7-8*

<sup>34</sup> Ra a te Itiopia i watungi tan o Pilip lena, “Un inanos iau, a poropet i watung a wasiso ri un osi? Uni ut, o un taio gisen?” <sup>35</sup> Ra o Pilip i turpas a papalos toromi. I inanosi una Wakak na Wasiso un o Iesu, turpasi ut una buk ra a te Itiopia i luki.

<sup>36-37</sup> Ra der wan nanan una kisapi, der wan taru un ara danim, ra a te Itiopia i watungi tan o Pilip lena, “Tama i, iri i a danim, asau melet mo i turbat iau sur gong di baptaiso iau?”\* <sup>38</sup> Ra i turbat a karis sur in tur. Numur der wan pirso sur a danim, ra o Pilip i baptaiso i. <sup>39</sup> Ra der saur gusun a danim, uniutra a Nion a Labino i los ru o Pilip. Ra a te Itiopia ke tama meleti mo. Ikut a te Itiopia i wan melet una nun a inawan nama labino gasgas una nun a nilaun. <sup>40</sup> O Pilip i tama i lena, kurong mi una tamon Asdot. I

wan tagitiro iai, ra i warawai nanan nama Wakak na Wasiso una kum tamtamon tuk tong o Sisaria.

## 9

*O Sol i nukpukus  
(Ap 22:6-16; 26:12-18)*

<sup>1</sup> Una kum bungbung ra, o Sol i ungara a taro na ususer anun a Labino nama dekdek na wasiso lena, in um doko det. I wan torom a mugumugu na tene etabor torom o God, <sup>2</sup> ra i saringi lena, “Un tumus tar lako kum pas, sur an losi utong una kum rumu na lotu tong o Damaskas.” A mugumugu i tumus tari una kum pas lena, ra in barato lako kum musano ma wardain, ra det mur a Kisapi anun o Iesu, in dat det usapat o Jerusalem, sur det in karabus.

<sup>3</sup> Ra i wan milau o Damaskas, a labino talapor tagisapat una langit i wanpat kisin, ma i sisio talilis uni. <sup>4</sup> Ra i puku pirso una piso, ra i longoro in nalngan ara i watungi tano lena, “Sol, Sol, sur asau ra u ser banlaulau iau?” <sup>5</sup> Ra o Sol i tingi lena, “Labino, osi ui?” Ra i balu i lena, “Iau o Iesu ra u ser banlaulau iau. <sup>6</sup> Uniri, un katutur ma un nanpat utiro una tamon Damaskas, ra din inanos ui nam asau ra un pami.”

<sup>7</sup> A taro ra det wan tomo nami, det ngara ra ka det wasiso lar pas, uni det longoro in nalngan ara, ikut ka det tama i. <sup>8</sup> Ra o Sol i katutur tagitiro upiso, i palos arin matano, ikut ke tama lar pas tu utna mo. Det pam benbeni mukut utiro o Damaskas. <sup>9</sup> Ma a tulu bung, i pulu kut, ke wangon ma ke inum kai.

<sup>10</sup> Ra ara tagun a taro na ususer, a risano o Ananias, i kis tong o Damaskas. A Labino i kabo i una tamtama lena, “Ananias!” Ra i balu i lena, “Labino, iri kut iau.” <sup>11</sup> Ra a Labino i watungi tano lena, “Un katutur, ma un nan sur a rumu anun o Judas, una kisapi di watungi nama Tokodos na Kisapi, ma un iting sur o Sol, a te Tasus, kurong i wararing. <sup>12</sup> Ma una tamtama, o Sol i sa tama tar a musano, a risano o Ananias, i ruk toromi, ra i ubek aru lamano netes uni sur in tamtama melet.” <sup>13</sup> Ra o Ananias i balu i lena, “Labino, a sa longoro a susut na wasiso una musano ra, ma una kum laulau na utna ra i ser pami una num a taro sapat

\* 8:36-37: A ramano kum tena mananos una Buk Tabu det nuki lena a ramano kum wasiso kai i kis una dino ri. I lenri: Ra o Pilip i watungi tano lena, “Ra u nurmur nam in balam rop, i wakak kut sur din pami.” Ra a te Itiopia i balu i lena, “A nurmur lena o Iesu Karisito i a Nutun o God.”

o Jerusalem. <sup>14</sup> Ra a kum lamlabino tene etabor torom o God det sa mulaot tari, sur in dat det rop ra det lotu una risam. Ra uniri, i sa wanpat nin.” <sup>15</sup> Ikut a Labino i watungi tano lena, “Un nan kut, uni a sa pilok pasi, sur i anung a tene pinapam. In wasiso puaso una risang torom a taro ra ausur a taro Israel, torom a kum king, ma torom a taro Israel kai. <sup>16</sup> Ma an inanos lena, in taramo a susut na mamaut una risang.”

<sup>17</sup> Ra o Ananias i wan, ma i ruk una rumu ra o Sol i kis iai. Ra i ubek aru lamano netes uni, ma i watungi lena, “Tisinglik o Sol, a Labino o Iesu, i ra i tur pat pas torom ui una kisapi ra u wan urin, i ut i tulu ru iau urin sur un tamtama melet, ma sur un bukus nama Tokodos na Nion.” <sup>18</sup> Uniutra a kum utna i elar nam a walong na kiripo, i puku pirso gusun arin matano, ra i tamtama melet. I tur ma di baptaiso i. <sup>19</sup> Ra i sa wangon pas, a pinino i dekdek melet.

#### *O Sol i warawai tong o Damaskas*

O Sol i kis pas a kabano bung torom a taro na ususer tong o Damaskas. <sup>20</sup> Uniutra i turpasi sur in warawai una kum rumu na lotu anun a taro Juda. I warawai un o Iesu lena, i a Nutun o God. <sup>21</sup> Det rop ra det longoro i, det kisin uni, ma det watungi lena, “Ai! A musano kut ri, ra i umum doko det ra det ser lotu torom o Iesu sapat o Jerusalem. Ra uniri, i wanpat bulung urin, sur in dat pas lako taro ra det ser lotu torom o Iesu, usapat torom a kum lamlabino tene etabor torom o God.” <sup>22</sup> Ma a warawai anun o Sol i dekdek ra i watung a kum utna ra i ulingmulus pasi lena, o Iesu i ut a Karisito. Ma a taro Juda ra det kis tiro o Damaskas det nuknuk doko una nun a wasiso, ma ka det pet lar pasi sur det in balu i.

<sup>23</sup> Ra i sa rop a susut na bung, a taro Juda det epak sur det in um doko o Sol. <sup>24</sup> Ikut o Sol i sa tasmani lena det epak suri. Una kum mirum ma a waspi, det tamtama una kum matansako ina tamon sur o Sol, sur det in um doko i. <sup>25</sup> Ikut, anun a kum nat na ususer, det ben pasi una mirum, ma det ukete pirso i nama rat una papor nin noworo na wat ra di pam bat a tamon nami.

#### *O Sol i kis sapat o Jerusalem*

<sup>26</sup> Ra o Sol i wanpat sapat o Jerusalem, i lari sur in kis torom a taro na ususer, ikut det rop det ngarani kut, ma ka det nurnur uni lena, i kai ara tagun a taro na ususer.

<sup>27</sup> Ikut o Banabas i ben pasi, ra der wan tomo

torom a kum aposel, ma i inanos det lena, “O Sol i sa tama tar a Labino, ma a Labino i wasiso toromi una nun a inawan utong o Damaskas. Tong o Damaskas, i warawai una risan o Iesu ma ke ngara.” <sup>28</sup> Uniri, det nurnur maragom uni. Ra o Sol i kis tomo nama kum aposel. I wan tuptupukus sapat o Jerusalem, ra i wasiso una risan a Labino, ma ke ngara. <sup>29</sup> I wasiso tomo nama taro Juda ra det wasiso Grik, ma i balu anundet a kum iting, ikut det lari sur det in um doko i. <sup>30</sup> Det ra det tar tistisino una nurnur, det longoro i. Ra det beni utong o Sisaria, ra nurnur det tulu ru i utong o Tasus.

<sup>31</sup> Numur a taro na lotu tong una tulu papor Judia, Galili ma o Samaria, det kis na malmal. Det kis nama urur torom a Labino, ra a Tokodos na Nion i ukarik det sur det in tur dekdek. Ra a niluluk ina taro na nurnur i labo nanan.

#### *O Pita i kis tong o Lida ma o Jopa*

<sup>32</sup> Ra o Pita i wan nanan una kum tam-tamon, i wan utkai torom a taro anun o God tong o Lida. <sup>33</sup> Tiro iai, i barato pas ara musano, a risano o Ainias, a pinino i mat, ma i inep kut una bano, elar nama tiwal na kilalo. <sup>34</sup> Ra o Pita i watungi tano lena, “Ainias, o Iesu Karisito i sa ulangolango pas ui. Un katatur, ma un pul pas a bam.” Ra uniutra i katatur. <sup>35</sup> Numur, det rop ra det kis una ru tamon, o Lida ma o Saron, det tama a musano ra, ma det nukpukus torom a Labino.

<sup>36</sup> A ra ino tagun a taro na ususer i kis tong o Jopa, a risano o Tabita, ma una wasiso Grik di watungi nam o Dokas. A ino ri, i ser pam a susut na wakak na pinapam, ma i ser tabor a sibo na taro. <sup>37</sup> Una kum bungbung ra o Pita i papam tong o Lida, o Dokas i misait, ra i mat. Det rus tari, ma det inep tari una ara kukur rumu sapat netes. <sup>38</sup> O Lida i kis milau i kut o Jopa. Ma a ramano taro na ususer tagitong o Jopa, det sa longoro i lena o Pita i kis tong o Lida, det tulu ru aru musano toromi, ra der saringi lena, “Un maris met, ma un nan lakit torom met.”

<sup>39</sup> Ra o Pita i tarom ma detul wan tomo. Ra i wanpat, det ben pasi usapat una kukur rumu kusapat netes. Ra a kum ula rop det tur talilis pasi ma det domos. Det ese a kum kolos ma a kum malu, ra o Dokas i mabon tar det ra i laun utmakai. <sup>40</sup> O Pita i tulu pirso ru det rop gusun a kukur rumu ra, i kis butkeke, ma i wararing. I tupukus torom a ino ra i mat, ma i watungi lena, “Tabita, un

katutur.” Ra o Tabita i tamtama pat, ma i tama o Pita, ra i kis mut. <sup>41</sup>Ra o Pita i pam pas a lamano, ma i ukatuturi. Numur i kabo pas a kum tene nurnur, ma a kum ula, ra i tulu tar o Tabita torom det, i sa laun. <sup>42</sup>A taro rop tong o Jopa det talapor un asau ra i wanpat, ma a susut, det nurnur una Labino. <sup>43</sup>O Pita i kis suano pasi tiro o Jopa tomo nama ra musano a risano o Saimon, a tene pam ututna tagun a pinin a wewegua.

## 10

*O Konelias ra asur a te Juda, i itula sur o Pita*

<sup>1</sup>Tong o Sisaria, ara musano i kis, a risano o Konelias, i ara mugumugu anun ara mar na taro na inaim, det tagun a taro na inaim tagitong o Itali. <sup>2</sup>O Konelias ma det rop ra det kis una nun a rumu det a kum tene lotu mulus ma det ser urur torom o God. O Konelias i a tene etabor, i ser tabor a kum sibo na taro, ma a kum bungbung rop i ser wararing torom o God.

<sup>3</sup>Ara bung na lirop una tulu pakano bung i tama ara tamtama. I tama pupuaso a ensel anun o God i wanpat toromi ma i kabo i lena, “Konelias!” <sup>4</sup>Ra o Konelias i tamtama dekdek toromi nama labino nginara, ra i tingi lena, “Labino, asau ra?” Ra a ensel i balu i lena, “Anum a kum wararing ma a kum etabor torom a kum sibo na taro, det wan usapat torom o God, elar nama etabor ra i ugagasi. <sup>5</sup>Uniutri un tulu ru lako taro utong o Jopa, sur det in ben pas ara musano, o Saimon, ara risano kai o Pita. <sup>6</sup>Kura i kis nisan o maurano, o Saimon, i ra a tene pam ututna nama pinin a wewegua. Anun a rumu i tur milau nago utasi.” <sup>7</sup>Ra a ensel, ra i wasiso toromi i sa wan, o Konelias i kabo pas aru tagun anun a kum tultul, ma ara tene lotu mulus tagun anun a taro na inaim. <sup>8</sup>I inanos detul una kum utna rop ri, ra i tulu detul utong o Jopa.

*A tamtama anun o Pita*

<sup>9</sup>Una bung numur detul wan. Ra in matanas i kis lekeleke, detul wanpat milau a tamon Jopa, ra o Pita kai i ka tito usapat netes una rumu, sur in wararing. <sup>10</sup>Ra i wararing, i taramo a munurak ma i nem na wangon. Ra di waninari utmakai a utna na inangon, i tama a tamtama. <sup>11</sup>I tama a langit i papos, ma ara utna i elar nam in labino malu, ra di pam pas a wat na kukurino ma di ukete pirso i. <sup>12</sup>Tiro ubalano, a kum wur

ngas na wewegua rop, det ra det wanan netes una piso ma det ra det kaukawar, ma a kum piko kai. <sup>13</sup>In nalngan ara i watungi tan o Pita lena, “Pita, un katutur. Un um doko det, ma un mani.” <sup>14</sup>Ra o Pita i watungi lena, “Labino, awu ut! Ka wan tar tu utna ra i dur umatam, ma i tabu torom met a taro Juda.” <sup>15</sup>Ra in nalngan ara i balu meleti lena, “Gong u watung a utna ra o God i sa utalapor tari lena, a dur na utna.” <sup>16</sup>A utna ri di pami elar nama tulu dino, ra uniutra di dat tito melet pasi usapat una langit.

<sup>17</sup>Ra a nuknukin o Pita i toboroboro utmakai una kukurai na tamtama ri, a tulu musano ra o Konelias i tulu ru detul, detul sa sio pas a rumu anun o Saimon, ra uniri detul tur una matansako. <sup>18</sup>Numur detul kakabo ruk, detul iting lena, “O Saimon ara risano kai o Pita kura i tiro?” <sup>19</sup>Ra o Pita i nuknuk utmakai una tamtama ra, a Tokodos na Nion i watungi tano lena, “Tama i! A tulu musano detul sisio sur ui. <sup>20</sup>Un katutur, ma un nan pirso. Gong u nuknuk larlar sur un nan tomo nam detul, uni iau ut a tulu ru detul urin.” <sup>21</sup>Ra o Pita i pirso torom detul ma i watungi lena, “Iau kut ri, ra motul sisio sur iau. Motul wan urin sur asau?” <sup>22</sup>Detul balu i lena, “O Konelias, a mugumugu anun ara mar na taro na inaim i tulu ru metul. O Konelias i ara tene tokodos ma a tene urur un o God, ma a taro Juda rop det ru i. A ensel anun o God i inanos tari lena, in itula pas ui utong una nuna rumu, sur in longoro anum tu wasiso.” <sup>23</sup>Ra o Pita i ben ruk pas detul sur detul in inep pas.

*O Pita i wanpat tiro una rumu anun o Konelias*

Ra i sa waspi, o Pita i turpas a inawan, ma a ramano kum musano ra det tar tistisino una nurnur tagitiro o Jopa, det wan tomo nam det. <sup>24</sup>Una bung numur, det wanpat tong o Sisaria. O Konelias i sa tasmani lena det na wanpat, ra i sa kabo tomo pas a kum kukunu, ma a kum paspasano, ra det kis langlang sur o Pita. <sup>25</sup>Ra o Pita i ruk, o Konelias i wan barato i, ma i kis butkeke taru nama urur nisan, ra i lotu toromi. <sup>26</sup>Ra o Pita i dat utur pasi, ma i watungi lena, “Un tur, iau kai a musano kut.”

<sup>27</sup>Ra der wasiso nanan, o Pita i ruk ma i tama a susut na taro kura det sa kis tomo. <sup>28</sup>Ra i watungi tandet lena, “Mot tasmani lena i tabu una numet a warkurai sur met a kum te Juda met in lason tomo nam taio

ra ausur a te Juda, ma met in lumu i kai. Ikut uniri o God i sa ese tar iau lena, gong a watungi un taio lena i dur umatan o God, ma gong a nuki lena i tabu torom met sur met in lason tomo nami. <sup>29</sup> Iri a kibino ra ka putut ra di itula sur iau urin. Ra uniri an ting mot lena: Asau ra mot itula sur iau suri?"

<sup>30</sup> Ra o Konelias i balu i lena, "Ara bung a wararing una nung a rumu una du bung lenri, una tulu pakano bung una lirop, ra a tama ara musano i wanpat torom iau. Ma uniri i sa tulu bung bati. A musano ra a tama i, i emar nam in namalu ra i pilpil doko, i wanpat kisin torom iau, <sup>31</sup> ra i watungi lena, 'Konelias, o God i sa longoro anum a niaring, ma i sa tasman anum a kum etabor rop torom a sibo na taro. <sup>32</sup> Un itula utong o Jopa, sur o Saimon, i ra ara risano kai o Pita. Kura i kis na usiro nisan o Saimon, a tene pam ututna nama pinin a wewegua, ra i kis milau nago utasi.'

<sup>33</sup> "Uniutra, a itula mut sur ui. I wakak sakit ra u wan urin. Ra kuri met rop met kis umatan o God, sur met in longoro a kum wasiso rop ra a Labino i sa watung tari tam sur un inanos met nami."

#### *O Pita i warawai*

<sup>34</sup> O Pita i watungi lena, "A tasman mulusi lena, a kum kamkabo taro rop det elar kut umatan o God. <sup>35</sup> I gas pas a taro tagun a kum kamkabo taro rop, ra det ru i ma det pam a tokodos na petutna. <sup>36</sup> Mot tasmani lena, o God i sa pitar tar anun a wasiso torom a taro Israel. A wasiso ri, i a Wakak na Wasiso na malmal. A malmal ra i pam tomo o God ma a taro, ra i kibino un o Iesu Karisito, i ra a Labino anun a taro rop. <sup>37</sup> Mot tasman a kum lamlabino utna ra i wanpat una kum tamon tong o Israel, turpasi tong o Galili numur tana baptais ra o Jon i warawai uni. <sup>38</sup> Mot tasmani lena, o God i sa pitar tar a Tokodos na Nion ma a dekdek torom o Iesu, a te Nasaret. Mot tasmani kai lena, i wan tuptupukus, ra i pam a kum wakak na pinapam, ma i ulangolango pas det rop ra det kis utuntudu ina dekdekin o Satan. O Iesu i pam a kum utna ri, uni o God i kis tomo nami.

<sup>39</sup> "Ma met a kum tene wasiso puaso una kum utna rop ra met tama i ra i pampami una kum tamon anumet a taro Juda, ma sapat o Jerusalem kai. Di sak wati un in nanai kutus, ra i mat. <sup>40</sup> Ikut numur tan a tulu bung o God i ukatutur melet pasi gusun a minat, ma i ese tari torom a taro. <sup>41</sup> Ausur

torom a taro rop, torom det kut ra o God i sa pilok mugu tar det sur det in tama i ma det in wasiso puaso uni. Met a taro ra, met wangon ma met inum tomo nami numur tan a katkatutur anunu gusun a minat. <sup>42</sup> Ma i tulu ru met, sur met in warawai ma met in wasiso puaso uni, lena i ut ra o God i sa pilok pasi sur in tene warkurai anundet ra det laun ma det kai ra det sa mat. <sup>43</sup> Ma a kum poropet rop det wasiso puaso un o Iesu, lena osi ra i nurnur uni, din unus ru anun a kum sakino petutna nama risano."

*A Tokodos na Nion i wan pirso taru un det ra ausur a taro Juda*

<sup>44</sup> Ra o Pita kura utmakai i wasiso una rumu anun o Konelias, a Tokodos na Nion i wan pirso un det rop, ra det longoro a wasiso ra. <sup>45</sup> Ra a kum tene nurnur tagun a taro Juda ra det wan tomo nam o Pita, det kisin, uni o God i etabor utkai nama Tokodos na Nion torom a taro ra ausur a taro Juda. <sup>46</sup> Uni det longoro det, ra det wasiso nama kum ngas na wasiso ma det watung ulabo pas o God. <sup>47</sup> Ra o Pita i watungi lena, "Katutaio in turbat lar pas det ri sur gong di baptaiso det nama danim, uni a Tokodos na Nion i kis un det elar nami ra i kis un dat." <sup>48</sup> Ra i itula sur din baptaiso det nama risan o Iesu Karisito. Ra numur det saring o Pita sur in kis munung torom det tu kabano bung.

## 11

#### *O Pita i wasiso talapor una nun a pinapam*

<sup>1</sup> A kum aposel ma det ra det tar tistisino una nurnur ra det kis tiro Judia, det longoro i lena a taro kai ra ausur a taro Juda det sa nurnur una wasiso anun o God. <sup>2</sup> Ra o Pita i wan usapat o Jerusalem, a taro ra det nemi sur a kum tene nurnur rop din tok talilis a pinindet, det bori, uni i sa kutus a warkurai anun a taro Juda. <sup>3</sup> Det watung tano lena, "U pam a utna ra i tabu torom dat a taro Juda, ra u ruk torom a taro ra ka di tok talilis a pinindet, ma u wangon tomo nam det."

<sup>4</sup> Ra o Pita i wasiso talapor torom det una kum utna rop ra i wanpat lena, <sup>5</sup> "A kis tiro una tamon Jopa, ra a wararing, a tama ara tamtama. A tama ara utna i elar namin tarai na malu ra di pam pas a wat na kukurino ma di ukete piro i tagisapat una langit torom iau. <sup>6</sup> Ra a tamtama tiro ubalano, a tama a kum wewegua, det ra di ser ugu det ma a kum lomlomino, ma det

ra det kaukawar, ma a kum piko kai. <sup>7</sup> Ra a longoro in nalngan ara i watungi tang lena, 'Pita, un tur, un um doko det ma un nan det.' <sup>8</sup> Ra a watungi lena, 'Labino, ke sot sur an nani. Ka wan tar tu utna ut ra i dur umatam, ra i tabu torom met a taro Juda.' <sup>9</sup> Ra in nalngan ara tagisapat una langit i watung meleti lena, 'A utna ra o God i sa utalapor tari, gong u watungi lena i dur.' <sup>10</sup> A utna ri di pami elar nama tulu dino, ra numur di dat toto melet pasi usapat una langit.

<sup>11</sup> "Una du bung ut ra, a tulu musano ra di tulu ru detul tagitong o Sisaria torom iau, detul wanpat una rumu ra met kis uni. <sup>12</sup> Ra a Tokodos na Nion i inanos iau sur an nan tomo nam detul, ma gong a nuknuk larlar uni. Ma a wonom na musano kai ri, ra met tar tistisino una nurnur met wan tomo nam detul utong o Sisaria ra met ruk una rumu anun a musano ra i itula sur iau. <sup>13</sup> Ra i inanos met lena, i tama tar a ensel i wanpat una nun a rumu ma i watungi lena, 'Un itula utong o Jopa sur din ben pas o Saimon, ara risano kai o Pita. <sup>14</sup> In inanos ui un lako kum wasiso ra in ulaun ui tomo nam det rop ra det kis una num a rumu.' <sup>15</sup> Ra a turpas a wasiso, a Tokodos na Nion i kis un det, elar nami ra i pami un dat numugu. <sup>16</sup> Ra a nuk pas a wasiso anun a Labino, ra i watungi lena, 'O Jon i baptaisio nama danim, ikut numur din baptaisio mot nama Tokodos na Nion.' <sup>17</sup> O God i sa pitar tar a Tokodos na Nion lar a etabor tandet, elar nami ra i sa pitar tari tandat, ra dat nurnur una Labino, o Iesu Karisito. Ra osi na ngas na musano iau, sur an turbat o God?"

<sup>18</sup> Ra det longoro a wasiso ri, ka det wasiso melet mo, ma det watung ulabo pas o God lena, "O God i sa pam tar a kisapi sur det kai ra ausur a taro Juda, det in nukpukus ma det in laun."

*A Wakak na Wasiso i wanpat tong o Antiok*

<sup>19</sup> A taro na nurnur ra det wan sarara tagisapat o Jerusalem, uni di banlaulau det numur tana minat in o Stiwen, det wan bak-bak utong o Saipras, ma una papor Ponisia, ma a tamon Antiok. Det wasiso torom a taro Juda kut nama Wakak na Wasiso un o Iesu. <sup>20</sup> Ikut ara taro tagun a taro na nurnur ra, a taro Saipras ma a taro Sairini, det wan utong o Antiok, ra det wasiso torom a taro ra ausur a taro Juda kai, nama Wakak na Wasiso una Labino o Iesu. <sup>21</sup> A dekdek ina Labino i kis un det ra det wasiso, ma a susut

na taro doko det nurnur ma det tupukus torom a Labino.

<sup>22</sup> A taro na lotu sapat o Jerusalem det longoro a wasiso un asau ra i wanpat, ra det tulu ru o Banabas utong o Antiok. <sup>23-24</sup> O Banabas i ara wakak na musano, i bukus nama Tokodos na Nion ma a nurnur. Ra i wanpat, i tama asau ra a marmaris anun o God i pami una nundet a nilaun, ra i gas doko. Ra i udekdek det rop sur det in tur dekdek mulus nama nurnur torom a Labino una nundet a nilaun rop. Ra a susut na taro det tupukus torom a Labino.

<sup>25</sup> Numur o Banabas i wan bulung utong o Tasus, sur in sisio sur o Sol. <sup>26</sup> Ra i sa sio pasi, i ben pasi utong o Antiok. Ara kudulano kilalo der kis tomo nama taro na lotu tiro iai, ma der ususer a susut na taro doko. A rising "a taro anun o Karisito", di watung mugu i una taro na ususer tong o Antiok.

<sup>27</sup> Una kilalo ra, a ramano kum poropet det wan tagisapat o Jerusalem utong o Antiok. <sup>28</sup> Ara tagun det, a risano o Agabus, i tur, ra i wasiso nama dekdek ina Tokodos na Nion. I wasiso mugu taru una labino munurak ra in nanpat una rakrakon bual rop ra i kis utuntudu ina warkurai anun a taro Rom. A munurak ri i wanpat una kilalo ra o Klodius i warkurai. <sup>29</sup> Ra a taro na ususer det kubus pasi sur det in etabor torom a taro na nurnur ra det kis una papor Judia. Det rop taktakai det in etabor nam asau ra i sot sur det in etabor nami, elar nam asau ra det utur ukai i. <sup>30</sup> Det woro tomo tar a mani, ra o Banabas ma o Sol der losi torom a kum mugumugu tagun a taro na lotu sapat o Jerusalem.

## 12

*Di uruk tar o Pita una karabus*

<sup>1</sup> Una kum bungbung ra, a king Erod i tulu a kum tene inaim, sur det in dat pas ara taro tagun a taro na lotu, sur din banlaulau det. <sup>2</sup> I itula sur din tau doko o Jems, a tisin o Jon, namin totok na inaim. <sup>3</sup> I tama i lena a taro Juda, det gas nama minatin o Jems, ra i dat pas o Pita bulung una ra bung epotor tan a kum lamlabino bung na lotu na beret ra kalako is uni. <sup>4</sup> Ra i sa dat pas o Pita, i uruk tari una karabus. Ra a noino ma wonom na tene inaim det tamtamabati. Det ukukeles, a wat det munung numur a wat det bulung i lenkutra. O Erod i nemi sur in ben pirso i sur din warkurai i umatan a taro, numur tana kum lamlabino bung na lotu na

Wanlakai. <sup>5</sup>Ikut ra o Pita i kis una karabus, a taro na lotu rop ka det mana nama niaring torom o God suri.

*A Labino i ulaun pas o Pita gusun a laman o Erod*

<sup>6</sup>Una mirum, numugu tana bung ra o Erod in ben pat o Pita sur a warkurai, o Pita i inep epotor tana ru tene inaim. Det sa ker tari nama ru sen. Ma a ramano kum tene inaim kai, det tur una matansako ma det tamtamabat a karabus. <sup>7</sup>A ensel anun a Labino i wanpat kisin toromi, ma a talapor i utalapor a balano rumu na karabus. I rapus wangun o Pita una paporino, ra i watungi tano lena, “Un katutor lakit!” Ra aru sen der tapalos gusun aru lamano. <sup>8</sup>Ra a ensel i watungi tano lena, “Un emar pas, ma un pas pas anum aru su.” Ra o Pita i pami lenutra. Ma a ensel i watungi tano lena, “Un ubek pas anum a saket, ma un mur iau.” <sup>9</sup>Ra o Pita i mur pirso i gusun a karabus. Ikut i nuki lena a utna ri a ensel i pami, ausur a lingmulusino. I nuki lena i tama a tamtama kut. <sup>10</sup>Der wan sakit ru a mugano tene tamtamabat, ra der wan sakiti bulung a murmurino. Numur der wanpat una matansako na aen, ra di ser pիրpirso uni unago utamon. Der tur tiro iai, ra a matansako i papos oros kut, ma der pirso. Ra der wanpat una nubual ra a kisapi i wan susuaro iai, a ensel i rorom mut gusuni.

<sup>11</sup>Numur a nuknukin o Pita i talapor pat, ra i watungi lena, “A tasman mulusi lena a Labino i tulu ru anun a ensel, ra i sa ulaun pas iau gusun a laman o Erod, ma gusun a kum utna ra a taro Juda det nem na pami un iau.”

<sup>12</sup>Ra i sa tasman lele i lena i sa langolango, i wan sur a rumu anun o Maria, a nan o Jon ra ara risano kai o Mak. A susut na taro det kis tomo tiro iai, ra det wararing. <sup>13</sup>O Pita i pinpidik una matansako, ra ara tultul a toraro, a risano o Roda, i kalabor sur in tonok tiro una matansako. <sup>14</sup>Ra i longoro lele pas in nalngan o Pita, i gas. Ra una nun a gasgas, ke papos mo, i kalabor melet, ma i inanos det lena, “O Pita kuri mukut i tur taru una matansako.” <sup>15</sup>Ra det watungi tano lena, “U lai, u longlong?” Ma i pul det kut lena, “I lingmulus ut, kuri kut i upiso.” Ra det watungi lena, “Kutiro anun a ensel kut mira.” <sup>16</sup>Ikut o Pita i pinpidik liklik kut. Ra det papos saro pasi, det tama i maragom, ra det kisin uni. <sup>17</sup>Ra i turbat det nama lamano, sur det in kis wowowon. Numur i

inanos det una pinapam anun a Labino ra i ben petlan pirso pasi gusun a karabus. Ma i watungi lena, “Mot in inanos o Jems ma det, ra dat tar tistisino una numur, una utna ri.” Ra i wan gusun det sur ara tamon gisen.

<sup>18</sup>Ra una kobot, a kum tene inaim det sisio sur o Pita, ma a nuknukin det i talara lena, “Awai mi uniri?” <sup>19</sup>Ra o Erod i longoro i lena, o Pita ke kis mo una karabus, i itula sur det in sisio suri. Ikut ka det sio pasi. Numur i tikin wakak a taro na inaim ra det tamtamabat una karabus, ma i itula sur din um doko det. Numur o Erod i wan tagitiro una papor Judia utong o Sisaria, sur in kis pas munung tong iai.

*O Erod i mat*

<sup>20</sup>O Erod i kankan torom a taro tagun aru tamon, o Tair ma o Saidon. Ra a taro tagun aru tamon ra, det wan tomo sur det in tama i, ma det in saringi sur a malmal. Uni anundet aru tamon det laun kut nama utna na inangon, tagun a papor anun a king Erod. Det emarom mugu pas nam o Blastus, a labino tene tamtamabat anun a king, ra i warut det sur det in tama a king.

<sup>21</sup>Una bung ra o Erod i kubus tari tandet, i emar pas nama kum malu na king, ma i kis taru una kiskis na king, ra i wasiso torom a taro. <sup>22</sup>A taro det kukukuk nama gasgas lena, “In nalngan ara god kut ri, ausur a musano.” <sup>23</sup>Uniutra, a ensel anun a Labino i umi, uni i madek a taro det watung ulabo pasi, ikut, i ut ke ulabo pas o God. Ra a kum suisui det wan a pinino, ra i mat.

<sup>24</sup>Ikut a wasiso anun o God i lubung, ma i wan sarara una susut na tamon.

<sup>25</sup>O Sol ma o Banabas der urop anunder a pinapam sapat o Jerusalem, ra der milet melet utong o Antiok. Der ben pas o Jon, ara risano kai o Mak, ra detul wan tomo.

## 13

*Di pilok pas o Banabas ma o Sol*

<sup>1</sup>Tiro o Antiok, a kum poropet ma a kum tene ususer kai, kura epotor tan a taro na lotu. Iri a kum risandet: o Banabas, o Simion ara risano kai o Niger, o Lusius a te Sairini, o Sol ma o Manaen, i ra di ugu tomo der nam o Erod, a mugumugu.

<sup>2</sup>Ara bung ra det lotu torom a Labino ma det wewel, a Tokodos na Nion i watungi lena, “Mot in pilok pas o Banabas ma o Sol sur anung, sur a pinapam ra a kabo pas der suri.” <sup>3</sup>Det wararing ma det wewel, ra

numur det ubek a kum lamandet netes un der, ma det tulu ru der.

*A pinapam anun o Banabas ma o Sol tong o Saipras*

<sup>4</sup>A Tokodos na Nion i tulu ru o Banabas ma o Sol, ra der wan utong o Selusia. Numur der kas una sip ma der wan usa una ailan Saipras. <sup>5</sup>Der wanpat tong o Salamis, ra der warawai nama wasiso anun o God, una kum rumu na lotu anun a taro Juda. Detul wan tomo nam o Jon, anunder a tene warut.

<sup>6</sup>Detul wan potora una kudulano ailan ra, tuk tong o Papos. Tiro iai, detul etorom nam ara te Juda, a risano o Barjisas, a tene sangsagor, ma a torotoro na poropet, <sup>7</sup>i ara pasan o Sergius Paulus. Sergius Paulus i a mugumugu tagun a ailan ra, a tene mananos, ra i itula pas o Banabas ma o Sol, uni i nem na longoro a wasiso anun o God. <sup>8</sup>Ikut o Barjisas, ra di watungi kai nam o Elimas, a kukuraino a tene sangsagor, i turbat der. I nemi sur in turbat ru a mugumugu sur gong i nurnur. <sup>9</sup>Ra o Sol ra di watungi kai nam o Pol, i bukus nama Tokodos na Nion, i tama dekdek o Elimas, <sup>10</sup>ma i watungi tano lena, "Ui a nutun o Satan, a ebar anun a kum tokodos na petutna rop. U bukus nama kum ngas na torotoro ma a kum usobor. U pukus liklik a tokodos na kisapi anun a Labino. Nangisin mo un mana gusun anum a petutna ra? <sup>11</sup>Uniutri a warkurai anun a Labino in rakon ui, in matam in pulu suano pasi, ma kon tama a talapor ina suan." Uniutra a gawul ma a dumirum i wanpat toromi, ma i paraso tuptupukus sur taio ra in pam pas a lamano sur in beni. <sup>12</sup>Ra a mugumugu i tama a utna ri i wanpat, i nurnur, uni i kisin una etowo una Labino.

*O Pol ma o Banabas der wasiso puaso una wasiso anun o God tong o Antiok una papor Pisidia*

<sup>13</sup>O Pol tomo nam der ra der wan tomo nami, detul kas una sip tagitiro o Papos, ra detul wan utong o Perga, una papor Pampilia. O Jon i wan pas gusun der tiro iai, ra i milet melet usapat o Jerusalem. <sup>14</sup>O Pol ma o Banabas der katutur melet pas tagitong o Perga ra der wan utong o Antiok una papor Pisidia.\* Ma una Bung na Sabat der ruk una rumu na lotu anun a taro Juda, ra der kis tiro iai. <sup>15</sup>Ra di sa luk

tar a kum wasiso tagun a Buk na Warkurai anun o Moses, ma a kum wasiso anun a kum poropet, a kum mugumugu tagun a rumu na lotu det pitar a wasiso torom der lena, "Aru tistisimet, ra tu wasiso na ururagot kura sur mur in inanos a taro nami, mur in wasiso kut." <sup>16</sup>O Pol i katutur, ra i turbat det nama lamano sur det in kis wowowon, ra i watungi lena,

"Mot a taro Israel, ma mot a taro gisen kai ra mot lotu torom o God, mot in longoro iau. <sup>17</sup>A God anumet a taro Israel i pilok pas a kum tumtubumet ma i uburese tar det ra det kis tong o Ijip. Numur i ben pirso pas det tagitiro nama dekdekino. <sup>18</sup>Una wat na noino kilalo ra det kis una nubual kalako taro uni, ka det longoro i, ikut i tamtamabat det. <sup>19</sup>I um ru tar a wonom mawit na kabotaro ra det kis tong o Kenan, ra i pitar tar a piso Kenan sur anundet a taro Israel. <sup>20</sup>A kum utna rop ri di pami ubalan a wat na mar ma a limo na noino kilalo.

"Numur o God i ubek tar a ramano kum tene warkurai sur det in mugu det, tuk una kilalo ra a poropet Samuel i mugu det. <sup>21</sup>Numur det sasaring sur tu king, ra o God i pitar tar o Sol torom det ra o Sol i mugu det a wat na noino kilalo. O Sol, a nutun o Kis, tagun a kabotaro Benjamin. <sup>22</sup>Ra o God i sa rakon ru tar o Sol, numur i ubek tar o Dewid bulung sur in king anundet. Ma i watungi uni lena, 'A tama o Dewid a nutun o Jesi, i a musano ra i elar nama nuknuking, ra in pam rop a kum utna ra a nemi.'

<sup>23</sup>"Tagun a kabotaro anun o Dewid, o God i pitar a Tene Ulaun, o Iesu, torom a taro Israel, elar nama nun a liliman. <sup>24</sup>Numugu tana inawan pat anun o Iesu, o Jon a Tene Baptaiso i warawai torom a taro Israel rop sur det in nukpukus ma din baptaiso det. <sup>25</sup>Ra milau mo sur anun a pinapam in rop, i watungi lena, 'Mot nuki lena iau osi? Iau ausur o naro ra mot kis langlang suri, awul ikut, a musano ra in mur tang. Ka elar sur an palos aru su gusun aru kikino, uni a natino doko tano.'

<sup>26</sup>"A kum tistising, a kabotaro anun o Abaram, ma mot a taro gisen kai ra mot lotu torom o God, a wasiso una pinapam anun o God ra i ulaun pas a taro, i sa pitar tari torom dat. <sup>27</sup>A taro ra det kis sapat o Jerusalem, tomo nam anundet a kum mugumugu, ka det tama lele o Iesu, lena

\* 13:14: Aru tamon a risander o Antiok. Ara una papor Pisidia ma ara kai una papor Siria.

i a Tene Ulaun, ma ka det tasman a kum wasiso ra a kum poropet det sa tumus tari, ra di ser luki una kum Bungbung na Sabat. Ikut ra det mulaot tar o Iesu sur in mat, det pam sot pas a wasiso anun a kum poropet.<sup>28</sup> Ka det sio pas tu sakino ra o Iesu in iru uni, ikut det saring o Pailat sur in pitar tari sur din um doko i.<sup>29</sup> Ra det sa pam sot rop tar a kum wasiso ra di sa tumus tari uni, det palos upirso ru i gusun in nanai kutus, ma det inep tari una kulam na minat.<sup>30</sup> Ikut o God, i ukatutur melet pasi gusun a minat.<sup>31</sup> Numur a taro ra numugu det ser wan tomo nami tagitong o Galili usapat o Jerusalem, det ser tamtama i una susut na bung. Uniri, det wasiso puaso uni torom a taro Israel.

<sup>32</sup> “Ra met inanos mot una Wakak na Wasiso lenri: A uliliman ra o God i sa pitar tari torom a kum tumtubundat tagun numugu,<sup>33</sup> uniri i sa pam sot pasi torom dat, ra i ukatutur melet pas o Iesu. Elar nami ra di sa tumus tari una manru kekelele tagun a kum Kelekele lena, ‘Ui a Nutunglik, ma uniri iau o Tamam.’ *Buk Song 2:7*

<sup>34</sup> O God i sa ukatutur pas o Iesu gusun a minat, ma ken nan melet mo sur a minat ma ken mereseng. Elar nam o God i sa watungi lena, ‘A wakak na utna ra a liliman taru uni torom o Dewid, an udan mot nami. A utna ri in nanpat mulus ut.’ *Aisaia 55:3*

<sup>35</sup> Ma i sa watung tari una ara Kelekele kai lena, ‘Kon madek tar anum a Tene Tokodos sur in mereseng.’ *Buk Song 16:10*

<sup>36</sup> “O Dewid i pam sot rop pas a nemnem anun o God una nun a kum bungbung na nilaun. Numur i mat, ra di pori tomo nama kum tumtubunu, ma a pinino i mereseng.<sup>37</sup> Ikut, o naro ra o God i ukatutur pasi gusun a minat, ke mereseng.

<sup>38</sup> “Lenra, a kum tistising, a inanos mot sur mot in tasmani lena, un o Iesu, din unus ru anumot a kum sakino petutna. A kum Warkurai anun o Moses ken pet lar pasi sur in unus ru anumot a kum sakino petutna, sur din watung mot nama kum tene tokodos.<sup>39</sup> Ikut, det rop ra det nurnur un o Iesu, din watung det nama kum tene tokodos.<sup>40</sup> Mot in tumarong, sako a kum utna ra a kum poropet det sa wasiso taru uni in sot mo un mot. Det watungi lena,

<sup>41</sup> ‘Tama i, mot a kum tene urongon un o God, mot in kisin ma mot in iru, uni an pam ara utna una numot a kum bungbung na nilaun.

Ra taio in inanos mot una utna ra, ka mot in nurnur ut uni.’” *Habakuk 1:5*

<sup>42</sup> O Pol ma o Banabas der pirso gusun a rumu na lotu, ra a taro det saring der sur der in milet una Bung na Sabat sapat, sur der in wasiso melet torom det una kum utna ri.<sup>43</sup> Ra a taro det wan susuaro gusun a rumu na lotu, a susut na te Juda ma det kai a taro gisen ra det ruk una lotu Juda ma det lotu nama lingmulus, det mur o Pol ma o Banabas. Der wasiso torom det, ma der uragot det, sur det in tur dekdek una marmaris anun o God.

<sup>44</sup> Una Bung na Sabat ra det sa kubus tari, milau sur det rop tagun a tamon ra det wanpat tomo, sur det in longoro a wasiso anun o God.<sup>45</sup> Ra a kum te Juda det tama a kunur na taro, a nuknukindet i laulau torom o Pol ma o Banabas, ma det mang sakosako o Pol ma a kum wasiso ra i wasiso uni.<sup>46</sup> Ikut ka der ngara ra der watungi lena, “A labino utna sur mir in upuaso mugu tar a wasiso anun o God torom mot. Mir sa pam sot pasi. Ikut mot rosumur gusuni, ra i elar nam mot ut mot watungi lena, ‘Ka met tokodos sur met in los a nilaun tukum.’ Mot in tama i, mir in nan mo torom a taro ra ausur a taro Juda.<sup>47</sup> Uni a Labino, i tulu mir lena, ‘A ubek tar ui sur ui a talapor anun a taro ra ausur a taro Juda,

sur un los a wasiso torom a taro una rakrakon bual rop, lena an ulaun pas det.’” *Aisaia 49:6*

<sup>48</sup> A taro ra ausur a taro Juda det longoro a wasiso ri, ra det gas doko, ma det watung ulabo pas a wasiso anun a Labino. Ma det rop ra di sa pilok pas det sur a nilaun tukum, det nurnur.

<sup>49</sup> Ra a wasiso anun a Labino i wan sarara una papor rop.<sup>50</sup> Ikut a kum te Juda, det ukatutur a nuknukin a kum mugumugu na ino ra det ser urur torom o God, ma a nuknukin a kum mugumugu na musano kai tagun a tamon ra, sur det in banlulau o Pol ma o Banabas. Ma det lakro ru der gusun anundet a papor.<sup>51</sup> Ra der tang ru a kubus gusun a kum kikinder sur a ukinalong lena o God i sa rosumur gusun det. Numur der wan utong o Aikoniam.<sup>52</sup> Ma a taro

na ususer tong o Antiok det bukus nama gasgas ma a Tokodos na Nion.

## 14

*O Pol ma o Banabas der wasiso puaso una Wakak na Wasiso tong o Aikoniam*

<sup>1</sup>O Pol ma o Banabas der ruk una rumu na lotu anun a taro Juda tong o Aikoniam ma der wasiso, elar nama ngasino ra der ser pami una kum tamon. Anunder a wasiso i talapor ra a susut na taro det nurnur uni, ara taro Juda ma ara taro kai. <sup>2</sup>Ikut a ramano taro Juda ra ka det nem na nurnur, det usungun balan a ramano taro ra ausur a taro Juda. Det banlaulau a nuknukin det sur det in kankan torom det ra det tar tistisino una nurnur. <sup>3</sup>O Pol ma o Banabas der kis suano der tiro o Aikoniam. Ka der ngara, der dekdek kut nama wasiso una labino marmaris anun a Labino. Ra a Labino i ulingmulus anunder a wasiso nama dekdek ra i pitari tander sur der in pam a kum utna na ukisin ma a kum ukinalong.

<sup>4</sup>A taro tagun a tamon ra det tapagol, ara taro det tur tomo nama taro Juda ra ka det nurnur, ma ara taro det tur tomo nama aru aposel. <sup>5</sup>A ramano taro Juda ma ara taro kai ra ausur a taro Juda tomo nam anundet a kum mugumugu, det epak pas sur det in banlaulau o Pol der, ma det in duku doko der nama watat. <sup>6</sup>Ikut ra der longoro i, der wan gisen utong una papor Likonia, sur aru tamon o Listra ma o Derbe, ma a ramano kum tamon kai ra det kis milau. <sup>7</sup>Ra der warawai nama Wakak na Wasiso torom det tiro iai.

*Tong o Listra o Pol ma o Banabas der ulangolango pas ara musano aru kikino der mat*

<sup>8</sup>Tong o Listra, ara musano kura i kis taru, aru kikino der mat. Di usus pasi ut nami, ma ke pet lar pasi sur in nan. <sup>9</sup>I longoro o Pol i wasiso. Ra o Pol i tamtama tokodos toromi, ma i tama i lena a musano ra i nurnur sur din ulangolango pasi. <sup>10</sup>Ra o Pol i wasiso toromi nam in labino walngano lena, "Un katutur." Ra a musano ra i katutur lakit mut ra i wan.

<sup>11</sup>A susut na taro det tama a utna ri o Pol i sa pam tari, ra det kukukuk nama wasiso Likonia lena, "Aru god der sa wan pirso elar nama ru mulusino torom dat!" <sup>12</sup>Ra det nuki lena o Banabas i a god Sus ma o Pol i

a god Ermes, uni i a tene wasiso tander. <sup>13</sup>A rumu na etabor anun a god Sus kura upiso milau una papor tamon ra. Ra a tene etabor torom a god Sus i ben pat a kum bulumakau utiro una matansako ina tamon, sur det in tuni elar nama etabor torom o Pol der nam o Banabas. Ma i los pasi kai a kum purpur ra di sa suk tari sur det in tabor der nami.

<sup>14</sup>Ikut ra aru aposel der sa tasman pas asau ra a taro det nem na pami, der dat raros anunder a ramano kum malu, uni ka der gas nama sau ra det pami.\* Ra der kalabor potor tana taro, ma der kukukuk lena, <sup>15</sup>"A taro, sur asau ra mot pam a kum utna ri? Mir aru musano kut, mir elar kut kai lar mot! Mir wanpat kut nama Wakak na Wasiso torom mot, ma mir inanos mot sur mot in tupukus gusun a kum utna oros kut ri ra mot lotu torom det, sur mot in mur a God ra i laun. I ra i pam a langit, a rakrakon bual, a du tasi, ma a kum ututna rop ubalandetul. <sup>16</sup>Numugu utmakai, i madek tar a kum kankabo taro sur det in laun elar nama nundet a nemnem. <sup>17</sup>Ikut o God ke dumano mot, i ukis tar a kum utna sur mot in tasmani lena i ut a God. Una nun a marmaris i tabor mot nama bato tagisapat una bakut, ma a kum duwai det wu una kalang indet ut. I tabor mot nama utna na inangon, ma i ubukus mot nama gasgas." <sup>18</sup>Der watung a wasiso ri, ikut a taro det nemi ut sur det in lotu torom der nama etabor ra di tuni. Ra der dekdek nama iturbar, tuk det mana.

<sup>19</sup>Numur a ramano kum te Juda det wanpat tagitong o Antiok ma o Aikoniam, ra det dat pukas pas a nuknukin a susut na taro gusun o Pol der nam o Banabas. Det duku o Pol nama watat, ma det dat pirso ru i gusun a tamon, ra det nuki lena i sa mat. <sup>20</sup>Ikut ra a taro na ususer det tur talilis pasi, i katutur, ra i ruk melet una tamon. Una bung numur, der wan tomo nam o Banabas utong o Derbe.

*O Pol ma o Banabas der wan utong una ru papor Pisidia ma Pampilia*

<sup>21</sup>O Pol ma o Banabas der warawai nama Wakak na Wasiso tong o Derbe ra der ususer a susut na taro ra det wanpat a kum nat na ususer. Numur der milet melet utong o Listra, Aikoniam, ma o Antiok. <sup>22</sup>Ra der uragot a taro na ususer tagun a tulu tamon ra, ma der wasiso na warut torom det, sur

\* 14:14: A taro Israel det ser dat raros anundet a kum malu sur det in ese i lena a utna ra i laulau doko umatandet.

det in tur dekdek una nurnur anundet. Der watungi lena, "A susut na utna in monong mugu tar dat, numur dat in ruk una matanitu anun o God." <sup>23</sup> Der pilok pas a ramano taro sur det a kum mugumugu anun a taro na lotu, una tulu tamon taktakai. Der wararing ma der wewel, ra der pitar tar det torom a Labino, o naro ra det nurnur uni. <sup>24</sup> Ra der sa wan pas una kum tamon una papor Pisidia, numur der wanpat una papor Pampilia. <sup>25</sup> Ra der sa warawai pas tong o Perga, der wan utong o Atalia.

*O Pol ma o Banabas der millet melet utong o Antiok una papor Siria*

<sup>26</sup> Ra der sa pam sot pas anunder a pinapam una kum tamon, der kas una sip tagitong o Atalia utong o Antiok. O Antiok a tamon ra a kum tene nurnur det pitar tar der una marmaris anun o God, ma det tulu der sur a pinapam ri. <sup>27</sup> Ra der wanpat, der kabo tomo pas a taro na lotu, ma der inanos det una kum utna rop ra der pam sot pasi nama dekdekino God. Der inanos det kai lena, o God i sa papos tar a kisapi na nurnur torom a taro ra ausur a taro Juda. <sup>28</sup> Ra der kis suano i tiro o Antiok torom a taro na ususer.

## 15

*A kum mugumugu tagun a taro na lotu det kiwung sapat o Jerusalem*

<sup>1</sup> Ara taro tagisapat una papor Judia det wan utong o Antiok, ma det ususer det ra det tar tistisino una nurnur lena, "Ra ka din tok talilis a pinimot elar nama Warkurai anun o Moses, ka din ulaun mot." <sup>2</sup> Ra o Pol ma o Banabas der engaras tomo nam det. Ra a taro na nurnur det pilok tar o Pol ma o Banabas ma ara taro utkai tagun det, sur det in nan usapat o Jerusalem torom a kum aposel ma a kum mugumugu anun a taro na lotu, sur det in ting det una utna ri.

<sup>3</sup> A taro na lotu det tulu o Pol, o Banabas ma ara taro kai. Det wan potora una a papor Ponisia ma a papor Samaria. Det wasiso puaso nanan torom a kum tene nurnur una kum tamon, una taro ra ausur a taro Juda, lena det sa nukpukus. Ma det ra det tar tistisino una nurnur, det gas doko ra det longoro i. <sup>4</sup> Ra det wanpat sapat o Jerusalem, a taro na lotu ma anundet a kum mugumugu ma a kum aposel det ugagas pas det. Ra der inanos det una kum utna rop ra der pam sot pasi nama dekdekin o God.

<sup>5</sup> A ramano kum Parisi ra det nurnur un o Iesu, det katuttur ra det watungi lena, "I tokodos ut sur din tok talilis a pinin a taro ra ausur a taro Juda ra det nukpukus. Ma din ususer det, sur det in mur a kum Warkurai anun o Moses."

<sup>6</sup> A kum aposel ma a kum mugumugu det kiwung sur det in nuknuk wakak una utna ri. <sup>7</sup> Ra det sa wasiso suano pasi, o Pita i katuttur ma i watungi tandet lena, "A kum tistising, mot tasmani lena numugu, o God i pilok pas iau gusun mot, sur an warawai nama Wakak na Wasiso torom det ra ausur a taro Juda, sur det in longoro i, ma det in nurnur uni. <sup>8</sup> Ma o God, i o naro ra i tasman a nuknukin a taro rop, i pitar a Tokodos na Nion torom a taro ra ausur a taro Juda elar nami ra i pitari torom dat. Una nuna pinapam ra, i ese i torom dat lena i mulaot pas det kai ra ausur a taro Juda. <sup>9</sup> Anun a pinapam torom dat ma torom det ke senene. I ukodos det kai umatano uni det nurnur. <sup>10</sup> Ilai ra mot nem na lar o God? Ra mot watungi lena a taro na ususer det in mur a kum Warkurai anun o Moses, i elar nami ra mot pitar tar a maut torom det. A kum tumtubundat tagun numugu ka det pet lar pasi sur det in muri, ma dat kai uniri awu. <sup>11</sup> Dat nurnur lena din ulaun dat i kibino una marmaris anun anundet a Labino o Iesu, lenkutkan ra torom det."

<sup>12</sup> A taro na kiwung rop det kis wowowon taru kut. Det longoro o Pol ma o Banabas, ra der wasiso una kum ukinalong ma a kum utna na ukisin der pami nama dekdekin o God epotor tan a taro ra ausur a taro Juda. <sup>13</sup> Ra der sa wasiso rop, o Jems i watungi lena, "A kum tistising, mot in longoro iau. <sup>14</sup> O Saimon i sa inanos tar dat una mugano dino ra o God i maris det ra ausur a taro Juda ra i pilok pas ara taro gusun det sur det anun a taro ut. <sup>15</sup> A utna ri o God i pami, i elar nama wasiso anun a kum poropet. Di sa tumus tari lena,

<sup>16</sup> Numur tano, an millet melet,  
ma an pam melet a rumu anun o Dewid, ra i sa terege.

Ma an utur melet pas a rumu ra i toropo,  
ma an pam wakak meleti,

<sup>17-18</sup> sur a taro gisen kai,  
a taro ra ausur a taro Juda,  
det in nukpukus torom a Labino,  
det ra a sa kabo pas det sur anung.

A Labino i sa watung tari lenri,  
i ra i pam a kum utna ri

ra numugu i sa upuaso tari.’ *Amos 9:11-12*

<sup>19</sup> “A nuknuking i lenri, gong dat pitar a mamaut torom a taro ra ausur a taro Juda, ra det tupukus torom o God. <sup>20</sup> Dat in tumtumus torom det, ma dat in inanos det lena det in mur a kum warkurai kut lenri: Gong det wan tu utna ra di sa etabor taru nami torom a kum torotoro na god, uni a ngas na lotu lenri i udur a utna na inangon. Gong det pam a kum petutna na pamuk. Gong det wan tu utna ra ka di gos wakak ru a gap gusuni. Ma gong det wan tu wewegua ra di pos doko i kut ra a gap kura utmakai uni. <sup>21</sup> Uni tagun numugu utmakai una kum tamon rop, di ser luk a kum Warkurai anun o Moses, ma di ser warawai nami una kum rumu na lotu una kum Bungbung na Sabat.”

*Di tumus a pas torom a taro na lotu ra ausur a taro Juda*

<sup>22</sup> A kum aposel, ma a kum mugumugu, ma a taro na lotu rop, det wasiso tomo pas sur det in pilok pas lako ru musano tagun det, sur det in nan tomo nam o Pol ma o Banabas utong o Antiok. Det pilok pas o Judas, ara risano kai o Basabas, ma o Sailas, aru mugumugu tagun det ra det tar tistisino una nurnur. <sup>23</sup> Ra det tumus tar a pas sur det in losi. A pas ra i watungi lenri:

Met a kum aposel ma a kum mugumugu, met a kum tistisimot, met tumtumus torom tomo a kum tene nurnur tagun a taro ra ausur a taro Juda ra mot kis tong o Antiok, ma una ru papor Siria ma o Silisia:

A marmaris torom mot.

<sup>24</sup> Met sa longoro tari lena ara taro tagun met, det ulokolokor mot ra det watungi lena mot in mur a kum Warkurai rop anun o Moses, ma det utalara a nuknukimot nami. Ausur met ra met tulu det. <sup>25</sup> Uniri met sa wasiso tomo pas, ma met rop met mulaot sur met in pilok pas lako ru musano, sur met in tulu der torom mot. Der in nan tomo nama ru paspasamet, o Banabas ma o Pol, <sup>26</sup> aru musano ra ka der maris bat anunder a nilaun una risan anundat a Labino o Iesu Karisito. <sup>27</sup> Uniri met tulu ru o Judas ma o Sailas torom mot, sur der in inanos mot una kum wasiso ri met tumusi una pas. <sup>28</sup> A Tokodos na Nion i kis tomo nam met ma i ese met sur gong met pitar tar tu mamaut

torom mot. Iri i a kum warkurai ra mot in muri.\*

<sup>29</sup> Gong mot wan tu utna ra di sa etabor taru nami torom a kum torotoro na god. Gong mot wan tu utna ra ka di gos wakak a gap gusuni, ma tu wewegua ra di pos doko i kut, ra a gap kura utmakai uni. Ma gong mot pam a kum petutna na pamuk. In wakak torom mot ra ka mot in pam a kum utna ri.

I kut ra ma i rop. A marmaris torom mot.

<sup>30</sup> Numur di tulu det, ra det wan utong o Antiok. Tiro iai det kabo tomo pas a taro na lotu, ra det pitar tar a pas ra tandet. <sup>31</sup> A taro det luki, ra det gas doko una wakak na wasiso na ururagot. <sup>32</sup> O Judas ma o Sailas der pitar a susut na wasiso sur der in uragot a taro ra det tar tistisino una nurnur, ma sur der in udekdek det, uni der aru poropet. <sup>33-34</sup> Ra der sa kis suano pasi tiro iai, det ra det tar tistisino una nurnur, det tulu melet ru der nama malmal, sur der in milet melet usapat o Jerusalem torom det ra det tulu tar der.†

<sup>35</sup> Ikut o Pol ma o Banabas der kis kut tong o Antiok. Der tomo nama susut tagun det, det ususer a taro ma det warawai nama wasiso anun a Labino.

*O Pol ma o Banabas der wan susuaro*

<sup>36</sup> A ramano kum bung numur, o Pol i watungi tan o Banabas lena, “Dar in milet melet sur a kum tamon rop, ra dar sa warawai taru torom det nama wasiso anun a Labino, sur dar in tama a kum tistisindar, ra det pepet lai mo.” <sup>37</sup> Ra o Banabas i nemi sur der in ben melet pas o Jon, ara risano kai o Mak. <sup>38</sup> Ikut o Pol i nuki lena ke wakak sur der in ben melet pasi, uni i wan pas kut gusun der utong o Pampilia, ma ke mur der tuk una pinapam i rop. <sup>39</sup> Der engaras pas, ra numur der wan susuaro. O Banabas i ben pas o Mak, ra der kas una sip utong o Saipras. <sup>40</sup> Ra o Pol i pilok pas o Sailas, sur der in nan tomo. Ma a kum tistisinder una nurnur, det pitar tar der una marmaris anun a Labino. <sup>41</sup> Ra der wan tuptupukus epotor una papor Siria ma una papor Silisia, ma der udekdek a taro na lotu una kum tamon.

\* 15:28: A kukuraina wasiso ri lena a taro ra ausur a taro Juda det langolango gusun a kum Warkurai anun a taro Juda, lenra gong di tok talilis a pinindet. † 15:33-34: A ramano kum tene mananos una Buk Tabu det nuki lena a ramano kum wasiso kai i kis una rino ri. I lenri: *Ikut o Sailas i nemi lena in kis utmakai tiro iai.*

## 16

*O Timoti i wan tomo nam o Pol ma o Sailas*

<sup>1</sup> O Pol ma o Sailas der wanpat tiro o Derbe ra numur utiro o Listra. Tiro o Listra, ara tagun a taro na ususer kura iai, a risano o Timoti. O nano a ino Juda ma a tene nurnur, ma o tamano a te Grik. <sup>2</sup> Det ra det tar tistisino una nurnur tong o Listra ma o Aikoniam, det watungi un o Timoti lena i a wakak na musano. <sup>3</sup> O Pol i nemi sur detul in nan tomo. I ben pasi, ra i tok talilis a pinino, uni a kum te Juda ra kura una kum tamon ra, det tasmani lena o tamano, a te Grik\*. <sup>4</sup> Ra detul wan nanan una kum tamon, detul wasiso un asau ra a kum aposel ma a kum mugumugu det sa wasiso pas uni sapat o Jerusalem, sur a taro det in muri. <sup>5</sup> Ra a taro na lotu una kum tamtamon det lubung una nurnur, ma a nilulukindet i labo nanan kut una kum bungbung.

*A tamtama anun o Pol tong o Troas*

<sup>6</sup> A Tokodos na Nion i turbat detul sur gong munung detul warawai nama Wakak na Wasiso, tong una papor Asia. Ra detul wan tuptupukus kut tong una ru papor, Prigia ma o Galesia. <sup>7</sup> Detul wanpat una tuktuk ina papor Misia, ra detul nemi sur detul in nan utong una papor Bitinia, ikut a Nion o Iesu ke mulaot sur detul in nan utong. <sup>8</sup> Ra detul wan sakit a papor Misia, ma detul wan utong o Troas.

<sup>9</sup> Una mirum, o Pol i tama ara tamtama. I tama ara musano, a te Masedonia i tur taru ma i saringi lena, "Un nan urin o Masedonia, ma un warut met." <sup>10</sup> Ra i sa tama tar a tamtama ra, uniuutra met† waninar pas sur a inawan utong o Masedonia, uni met tasmani lena o God ut ra i kabo met sur met in warawai torom det nama Wakak na Wasiso.

*O Lidia i nukpukus tong o Pilipai*

<sup>11</sup> Ra met wan tagitong o Troas, met kas una sip ma met wan tokodos utong una ailan Samotres. Ra ara bung palu met wan bulung utong o Neapolis. <sup>12</sup> Ra met wan tagitiro o Neapolis utong o Pilipai. A tamon ra i labo sakit tana kum tamon rop gisen tong una papor Masedonia, ra a taro Rom det kis iai. Ra met kis pas a kabano bung tiro una tamon ra. <sup>13</sup> Una Bung na Sabat

met pirso una matansako ina tamon ra, sur a danim, uni met nuki lena a nubual na niaring kura nisan a danim ra. Met kis taru, ma met wasiso nama wardain ra kura det sa kis tomo taru tiro iai.

<sup>14</sup> Ara ino tagun det ra det longoro met, a risano o Lidia, a ino tagitong o Taiataira, a tene siuru merek na malu ma a tene lotu torom o God. Ra a Labino i pukus pas anun a nilaun sur in mur a kum wasiso ra o Pol i watungi. <sup>15</sup> Ra di sa baptaiso tar o Lidia ma det kai ra det kis una nun a rumu, i ben pas met, ra i watungi lena, "Ra mot nuki lena a nurnur una Labino, mot in ruk una nung a rumu, ma mot in kis uni." Ra i ungonong pas met.

*O Pol ma o Sailas der karabus tong o Pilipai*

<sup>16</sup> Ara bung ra met wan sur a nubual na niaring, met etorom pas nam ara tultul na ino ra a laulau na nion kura uni, ma i ser wasiso mugu un asau ra in nanpat numur. Anun a kum mugumugu det ser los a labino mani tagun anun a pinapam. <sup>17</sup> A ino ra i mur met nam o Pol, ma i kukukuk lena, "A kum musano ri, det a kum tultul anun o God a Labino Sakit, det inanos mot una kisapi ra din ulaun mot uni." <sup>18</sup> A susut na bung i pami lenra. Ra a pinin o Pol i sa ngoro nami, i tupukus, ra i watungi tana laulau na nion lena, "Una risan o Iesu Karisito, a watungi tam, un pirso gusun a ino ri." Uniuutra a laulau na nion i pirso gusuni.

<sup>19</sup> A kum mugumugu anun a ino ra, det tasmani lena, ka det in tama melet mo lako mani gusuni. Ra det pam ukai pas o Pol ma o Sailas, ra det dat pas der torom a kum mugumugu una nubual na inawan tomo. <sup>20</sup> Det ben tar der torom a kum tene warkurai ma det watungi lena, "Aru musano ri, aru te Juda, der pam pat a kum purpuruon una nundat a tamon. <sup>21</sup> Der ususer a taro una kum utna ra ke tokodos sur dat a taro Rom dat in tarom uni, ma dat in muri." <sup>22</sup> A kunur na taro kai det kukukuk ma det takun der, ra a kum tene warkurai det itula sur din dat raras ru anunder a kum malu ma din miras der namin kadas. <sup>23</sup> Ra di sa miras dekdek tar der, di uruk tar der una karabus, ma di inanos tar a tene tamtamabat sur in tamtama dekdek taru un der. <sup>24</sup> Ra a tene tamtamabat i sa rakon tar a wasiso ra, i uruk

\* 16:3: O Timoti a te Juda uni o nano a te Juda, ikut, ra i nat miso ka di tok talilis a pinino uni o tamano a te Grik. O Pol i tok talilis sur a taro Juda det in mulaoti ra in nan tomo nam o Pol una pinapam. † 16:10: O Luk i tumus "met", uni i wan tomo nam o Pol.

tar der una kukur rumu kura epotor una karabus, ma i ukai tar a kum kikinder nama palang.

<sup>25</sup>Una labino mirum, o Pol ma o Sailas der wararing, ma der kelekele torom o God. Ma a taro kai ra det kis una karabus, det longoro i. <sup>26</sup>Kura kut, ra a labino guri i wanpat, ra i gunu a kum pos ina rumu. Ra uniutra a kum matansako rop det papos, ma a kum sen det tapalos gusun a kum karabus rop.

<sup>27</sup>A tene tamtamabat i tuangun, ra i tama a kum matansako det sa papos. I dat pirso pas anun in totok na inaim sur in um doko i ut nami, uni i nuki lena a kum karabus det sa kalabor song. <sup>28</sup>Ikut o Pol i kakabo dekdek toromi lena, "Gong u banlaulau ui. Met rop kuri kut met."

<sup>29</sup>A tene tamtamabat i kakabo sur lako kum lam, ra i kalabor ruk lakit torom o Pol ma o Sailas. I ngara ma i neneder, ra i puku pirso taru numugu tander. <sup>30</sup>I ben pirso pas der, ra i ting der lena, "Aru musano, asau ra an pami sur din ulaun iau?" <sup>31</sup>Ra der balu i lena, "Un nurnur una Labino o Iesu, ra o God in ulaun ui tomo nam det ra det kis una num a rumu." <sup>32</sup>Ra der wasiso nama wasiso anun a Labino toromi, ma torom det rop ra det kis una nuna rumu. <sup>33</sup>Una bung na mirum ut ra, a tene tamtamabat i ben pas der, ma i gos a kum kinano lokono kadas ra kura una pininder. Ra uniutra di baptaiso a tene tamtamabat, ma det rop ra det kis una nun a rumu. <sup>34</sup>I ben pas der utiro una nun a rumu, ma i tabor der nama utna na inangon. I gas sakit, ma anun a taro kai det gas, uni det sa nurnur un o God.

<sup>35</sup>Una kobot raut a kum tene warkurai det tulu ru aru polis nama wasiso lena, "Un palos ru aru musano ra." <sup>36</sup>Ra a tene tamtamabat i inanos o Pol lena, "A kum tene warkurai det itula sur din palos ru mur. Uniri mur in pirso, ma mur in nan nama malmal." <sup>37</sup>Ikut o Pol i watungi tana aru polis lena, "Det miras mir mut umatan a taro ma det uruk tar mir una karabus, ikut katutaio utmakai i warkurai tar mir. Mir aru te Rom ut mir. Ra uniri det nem na palos eno ru mir. Ikut awu! I wakak sur det ut det in nan urin ma det in palos ru mir."

<sup>38</sup>Aru polis der millet melet, ma der inanos a kum tene warkurai una kum wasiso ra. Ra det longoro i lena der aru te Rom, det ngara. <sup>39</sup>Ra det wan, det upuaso anundet a niraro torom der, ma det ben pirso pas der gusun a karabus. Ra det sa ben pirso

pas der, det saring der sur der in nan gisen gusun anundet a tamon. <sup>40</sup>Ra der sa pirso gusun a karabus, der wan sur a rumu anun o Lidia. Tiro iai der tama det ra det tar tistisino una nurnur ra der uragot tar det. Numur der wan.

## 17

*A kum Tesalonaika det nem na um o Pol ma o Sailas*

<sup>1</sup>O Pol ma o Sailas der wan utong o Ampipolis ma o Apolonia, ra numur der wanpat tong o Tesalonaika. Tiro o Tesalonaika ara rumu na lotu anun a taro Juda kura iai. <sup>2</sup>O Pol i ruk torom det una rumu na lotu elar nami ra i ser pami. Una tulu Bung na Sabat i wasiso tomo nam det una Buk Tabu. <sup>3</sup>I watung palosi ma i upuaso i lena, i sot ut sur a Karisito in los a ngunungut ma in mat ma in katatur melet gusun a minat. Ma i watungi kai lena, "O Iesu ri a inanos mot nami, i ut a Karisito ra o God i tulu ru i urin." <sup>4</sup>Ara taro Juda ma a susut na te Grik ra det lotu torom o God, ma a susut na mugumugu na ino kai, det nurnur ma det mur o Pol ma o Sailas.

<sup>5</sup>Ikut, a nuknukin a ramano taro Juda i laulau doko un der, uni a susut det mur der. Ra det ben pas a ramano kum tene pet laulau tagun a nubul ra a taro det ser wan tomo iai. Det wan tomo, ra det ukatatur a balan a taro. Det kalabor ruk una rumu anun o Jeson, ma det sisio sur o Pol ma o Sailas sur det in ben pirso pas der torom a taro. <sup>6</sup>Ikut ka det sio pas der. Ra det dat pas o Jeson ma a ramano taro kai ra det tar tistisino una nurnur, torom a kum mugumugu tagun a tamon ra, ma det kukukuk lena, "A taro ri det pam purpuruon una kum tamon una rakrakon bual, ra uniri, det sa wanpat bulung nin nisan dat!" <sup>7</sup>O Jeson i ben pas det utiro una nuna rumu. Det rop ri det lakai a kum warkurai anun a Sisa, a king anun a taro Rom, ra det watungi lena ara musano kai, a risano o Iesu, i a king." <sup>8</sup>A taro ma a kum mugumugu det longoro a wasiso ri, ra det balano sungun. <sup>9</sup>Det ungomos o Jeson ma det kai ra di dat pas det tomo nami, sur det in kul pirso pas det. Numur det los pas a mani gusun det ra det palos ru det.

*O Pol ma o Sailas der warawai tong o Beria*

<sup>10</sup>Una bung na mirum ut ra, det ra det tar tistisino una nurnur det tulu lakit ru o

Pol ma o Sailas utong o Beria. Numur ra der sa wanpat tiro iai, der ruk una rumu na lotu anun a taro Juda. <sup>11</sup> Det ri det wakak tandet tong o Tesalonaika, uni det rakon a wasiso ri nama gasgas, ma det luk wakak a kum wasiso tagun a Buk Tabu una kum bungbung rop, sur det in tama a wasiso anun o Pol, ra i lingmulus o awu. <sup>12</sup> Ra a susut na taro Juda det nurnur, ma a susut na mugumugu na ino Grik, ma a susut na musano kai.

<sup>13</sup> Ikut a taro Juda kurong o Tesalonaika det longoro i lena o Pol i warawai una wasiso anun o God tong o Beria, ra det wan utong ma det usungun balan a taro. <sup>14</sup> Uniutra det ra det tar tistisino una nurnur det tulu ru o Pol unago utasi. Ikut o Sailas der nam o Timoti der kis utmakai tong o Beria. <sup>15</sup> A taro ra det ben pas o Pol, det wan tomo nami utong o Athens. Numur i tulu melet det nama wasiso torom o Sailas ma o Timoti sur der in nan lakit toromi.

#### *Tong o Athens*

<sup>16</sup> Ra o Pol i kis langlang utmakai sur o Sailas ma o Timoti tong o Athens, i tupunuk doko, uni i tama a tamon ra i bukus nama kum torotoro na god ra det ser lotu torom det. <sup>17</sup> I ruk una rumu na lotu anun a taro Juda, ra i wasiso tomo nama ramano taro Juda, ma a taro gisen kai ra det lotu torom o God. Ma una kum bungbung rop i wasiso kai tomo nam det ra i pastorm det una nubual na inawan tomo. <sup>18</sup> A kum tene mananos tagun a etowo anun a taro Epikurian ma a taro Stoik\* det wasiso tomo nami. Ara taro det watungi lena, "Asau ri a tene wasiso oros ri i inanos dat nami?" Ma ara taro kai det watungi lena, "Kutiro, i inanos dat una kum matok na god tagun tu tamon gisen." Det watungi lenri uni i warawai nama Wakak na Wasiso un o Iesu ma a nilaun melet gusun a minat.

<sup>19</sup> Det ben pasi, ra det wan nami usapat una nubual na kiwung di watungi nam o Areopagus, ma det watungi lena, "Met nem na longoro anum a matok na etowo. <sup>20</sup> A utna ra u wasiso uni i senene doko torom met, ra met nemi sur met in mananos una kukuraino." <sup>21</sup> Det watungi lenri, uni a kum te Athens ma a kum usiro kai ra det

kis tiro iai, det ole a kum bungbung nama wasiso tomo una kum matok na etowo, ma a longlongoro suri.

<sup>22</sup> O Pol i katutur epotor tandet una Areopagus ra i watungi lena, "Mot a taro Athens, una kum pinapam ra mot pami, a tama i lena mot a kum tene lotu mot. <sup>23</sup> Uni, ra a wan tuptupukus nin, a tama wakak a kum toktok ra mot lotlotu torom det, ma a sa tama tari kai ara kabulu ra di tuntun etabor uni, a tumtumus uni i lenri, "Torom a god ra ka di tasmani". O naro ra mot lotu toromi, ikut ka mot tasmani, i kut ri, an warawai nami torom mot. <sup>24</sup> O God ut ra i pam a rakrakon bual ma a kum utna ra det kis uni, i a Labino anun a langit, ma a rakrakon bual, ma ke kis un tu rumu na lotu ra a taro det pami. <sup>25</sup> Ma ke sibo sur taio in waruti, uni i ut i tamtabor a taro rop nama nilaun, a wuwu na nilaun, ma a kum utna rop. <sup>26</sup> O God i ukis tar a mugano musano. Ra tagun a musano ra, a kum kabotaro rop det wanpat taguni ma det kis una rakrakon bual rop. Una nuknukino ut i nuki lena det in kis awai, ma nangisin det in nanpat ma nangisin det in rop melet. <sup>27</sup> O God i pam a kum utna ri sur a taro det in sisio suri, ma kutiro det in tamtama tuptupukus suri ma det in sio pasi. Ikut, o God ke kis bakbak gusun dat rop taktakai. <sup>28</sup> Elar nami ra di sa watung tari lena, 'Dat laun, dat wan tuptupukus, ma dat utur ukai a nilaun, i kibino ut tan o God.' Elar nama numot a kum tene pak kelekele ra det watungi lena, 'Dat kai a kum nutnutunu ut.'

<sup>29</sup> "Ra dat a kum nutnutun o God, ke wakak sur dat in nuki lena o God i elar nama toktok na gol, o a siliwa, o a wat, ra a taro det nuk pat pasi ma det pami nama lamandet. <sup>30</sup> Una kum kilalo numugu, o God ke nuknuk una kum petutna anun a taro ra ka det nuk pasi. Ikut uniri, i pitar a warkurai sur a taro rop una rakrakon bual det in nukpukus. <sup>31</sup> Uni i sa kubus tar a bung, sur in warkurai a rakrakon bual nama tokodos na warkurai. Ma i sa pilok tar a musano ra in pam a warkurai ra. I ukatutur melet pas a musano ra gusun a minat. Una nun a pinapam ra, i ulingmulus pas anun a pipilok torom a taro rop."

<sup>32</sup> Ra det longoro a wasiso una nilaun melet gusun a minat, ara taro tagun det, det urongon laulau uni, ikut ara taro kai

\* 17:18: A kum taro Athens det ser mur a susut na etowo anun a kum tene mananos tagun numugu. A taro tagun aru kabotaro Epikurian ma Stoik det mur aru ngas na etowo. A kum etowo kut anun a taro, ma asur i elar nama Buk Tabu.

det watungi lena, “Met nemi sur un wasiso melet torom met una utna ri.” <sup>33</sup> Ra o Pol i piro pas gusun a kiwung. <sup>34</sup> Ma a ramano taro det nurnur, ra det mur o Pol, iri det: O Dionisius, i ara tagun a taro na kiwung Areopagus, ma ara ino, a risano o Damaris, ma a ramano taro kai.

## 18

### *Tong o Korin*

<sup>1</sup> Ra i sa rop a kum utna ri, o Pol i wan tagitong o Atens utong o Korin. <sup>2</sup> Tiro iai der etorom pas nama ara te Juda, a risano o Akuila. I tagitong o Pontus, ma anuna ino, a risano o Prisila. Ke suano i kut ra der wanpat taru tagitong o Itali, uni a Sisa Klaudius i pitar a warkurai sur a taro Juda rop det in nan gusun o Rom, i ra a labino tamon tong o Itali. Ra o Pol i wan torom der. <sup>3</sup> I kis nisan der ma detul papam tomo, uni detul a tulu tene pampam rumu na sel. <sup>4</sup> Una kum Bung na Sabat i wasiso tomo nam det una rumu na lotu anun a taro Juda, sur in ukatutur a nuknukin a taro Juda ma det kai ra asur a taro Juda sur det in nurnur un o Iesu.

<sup>5</sup> Ra o Sailas ma o Timoti der wanpat tagitong una papor Masedonia, o Pol ke mana nama warawai nama wasiso anun o God, ma i upuaso i torom a taro Juda lena o Iesu i a Karisito ra o God i tulu ru i urin. <sup>6</sup> Ikut a taro Juda det wasiso batbat o Pol ma det watung a kum sakino wasiso uni. Ra o Pol i tutupu anun in namalu, a ukinalong lena in rosumur gusun det. Ma i watungi tandet lena, “Ra mot in iru una warkurai anun o God, i kibino un mot ut, ma iau a langolango. Turpasi uniri, an nan mukut torom det ra asur a taro Juda.”

<sup>7</sup> I pirso gusun a rumu na lotu, ra i ruk una rumu anun ara musano, a risano o Titius Jastus, i ara tene lotu torom o God. Anun a rumu i tur milau nisan a rumu na lotu. <sup>8</sup> O Krispus, ara mugumugu tagun a rumu na lotu, ma det rop kai, ra det kis una nun a rumu, det nurnur una Labino. Ma a susut na taro Korin, ra det longoro a warawai anun o Pol, det nurnur, ma di baptaiso det.

<sup>9</sup> Ara bung na mirum a Labino i wasiso torom o Pol una tamtama lena, “Gong u ngara. Ma gong u mana nama wasiso.” <sup>10</sup> Uni an kis tomo nam ui, ma kataio in banlaulau ui, uni anung a susut na taro kuri una tamon ri.” <sup>11</sup> Ra o Pol i kis tiro iai ara kilalo

ma a wonom na kalang, ma i ususer det nama wasiso anun o God.

<sup>12</sup> Una kilalo ra o Galio i mugumugu tagun a gapman tong una papor Akaia, a taro Juda det tur tomo sur det in um o Pol, ma det beni sur in tur una warkurai. <sup>13</sup> Ma det takuni lena, “A musano ri i lari sur in pukus a nuknukin a taro sur det in lotu torom o God nama ngasino ra ke elar nama kum warkurai anumet a taro Juda.” <sup>14</sup> Ra o Pol i ling sur in wasiso, o Galio i watungi torom a taro Juda lena, “Mot a taro Juda, ra a utna ri i pami i laulau, ma ke mur a warkurai anun a gapman, in tokodos sur an longoro mot uni. <sup>15</sup> Ikut ra mot takuni kut una kum wasiso, ma una kum rising, ma una anumot a kum warkurai ut, i wakak sur mot ut mot in warkurai i. Iau kan warkurai i una kum ngas na utna ri.” <sup>16</sup> Ra i lakro ru det gusun a kinkinis na warkurai. <sup>17</sup> Ma det rop det pam ukai pas o Sostenes, a mugumugu tagun a rumu na lotu anun a taro Juda, ra det umi umatan a kinkinis na warkurai. Ikut o Galio ke nuk pas a utna ra.

### *O Pol i milet melet utong o Antiok*

<sup>18</sup> Ra o Pol i sa kis suano pasi tong o Korin, i wan gusun det ra det tar tistisino una nurnur, ma i wan utong o Senkria. Tiro iai, di kumur rop ru a iwu na lorino, sur in ese i lena i sa pam sot pas anun a liliman torom o God. Ra detul nam o Prisila ma o Akuila detul kas una sip utong una papor Siria. <sup>19</sup> Ra detul sot tong o Epeses, o Pol i wan pas gusun der tiro iai, ra i ruk una rumu na lotu, ma det wasiso tomo nama taro Juda. <sup>20</sup> Det saringi sur in kis suano lilik pasi torom det, ikut ke tarom. <sup>21</sup> Ra det wan susuaro, i watungi tandet lena, “Ra a nemnem anun o God, an milet melet torom mot.” Ra i kas una sip ma i wan gusun a tamon Epeses.

<sup>22</sup> Ra i sot tong o Sisaria, i wan usapat o Jerusalem sur in lumu tar a taro na lotu, ra numur i wan utong o Antiok. <sup>23</sup> Ra i sa kis pas a susut na bung tiro iai, i wan melet pas gusun det. Ra i wan tuptupukus una kum tamon una ru papor Galesia ma o Pirigia, ma i udekdek a nurnur anun a taro na ususer rop.

### *O Apolos i kis tong o Epeses*

<sup>24</sup> Ara te Juda tagitong o Aleksanderia, a risano o Apolos, i wanpat tong o Epeses. I ara wakak na tene wasiso, ma i mananos doko una Buk Tabu. <sup>25</sup> Di sa ususer tari una Kisapi anun a Labino, ma i gas doko sur in

warawai. I ususer tokodos det un o Iesu, ikut i tasmami kut a baptais anun o Jon. <sup>26</sup>I ruk una rumu na lotu ra i turpas a wasiso ma ke ngara. Ra o Prisila ma o Akuila der longoro i, der ben pasi, ma der palos wakak a Kisapi anun o God toromi. <sup>27</sup>Ra o Apolos i nem na wan mo utong una papor Akaia, det ra det tar tistisino una nurnur tong o Epeses, det udekdek tari, ma det tumtumus torom a taro na ususer tong o Akaia, sur det in gas pasi. Ra i wanpat tong una papor Akaia, i ara wakak na tene warut torom a kum tene nurnur. Det ra det sa nurnur, kibino una marmaris anun o God. <sup>28</sup>I balu dekdek a wasiso anun a taro Juda umatan a taro, ra i ulingmulusi nama wasiso na Buk Tabu lena, o Iesu ut a Karisito ra o God i tulu ru i urin.

## 19

### *O Pol i kis tong o Epeses*

<sup>1</sup>O Apolos i kis tiro o Korin, ra o Pol i usur a kisapi sa usual ra i wanpat tong o Epeses. Tiro iai i pastorom a ramano taro na ususer. <sup>2</sup>Ra i ting det lena, "Pepetlai, a Tokodos na Nion i kis un mot ra mot nurnur?" Ma det balu i lena, "Awu, ka di inanos met una Tokodos na Nion." <sup>3</sup>Ra i ting det lena, "Di baptaiso mot nam asi na ngas na baptais?" Ma det balu i lena, "Nam a baptais anun o Jon." <sup>4</sup>Ra o Pol i watungi lena, "O Jon i baptaiso nama baptais na nukpukus. Ma i inanos a taro lena det in nurnur un o naro ra in nanpat numur tano. I ra o Iesu." <sup>5</sup>Ra det sa longoro tar a wasiso anun o Pol, di baptaiso det nama risan a Labino o Iesu. <sup>6</sup>Numur o Pol i ubek aru lamano netes un det, ra a Tokodos na Nion i kis mut un det, ma det wasiso nama wur ngas na wasiso, ma det wasiso na poropet. <sup>7</sup>Kutiro a niluluk ina kum musano i elar nama noino ma aru.

<sup>8</sup>O Pol i ser ruk una rumu na lotu, ma i wasiso nama dekdek ma ke ngara. I lari sur in pukus pas a nuknukin det sur a matanitu anun o God. I pami lenra i elar nama tulu kalang. <sup>9</sup>Ikut a balan a ramano taro tagun det i dekdek sakit, ma ka det nem na nurnur, ra det watung laulau a Kisapi anun o Karisito umatana a taro rop. Numur o Pol i wan pas gusun det. I wan sur a rumu na ususer anun o Tiranus, ma a taro na ususer det muri ra det wasiso tomo una kum bungbung una rumu ra. <sup>10</sup>Aru kilalo i pampami lenra. Ra det rop ra det kis una papor Asia, a taro Juda ma a taro ra ausur a

taro Juda kai, det longoro a wasiso anun a Labino.

### *A wonom mawit na nutnutun o Skewa*

<sup>11</sup>O Pol i pam a kum dekdek na utna na ukisin nama dekdekin o God. <sup>12</sup>Ma a taro det los pas anundet a kum du taol, ma a kum du malu kai, ra det ubek pasi una pinin o Pol. Numur det ubeki una kum misait ra det langolango, ma a kum laulau na nion kai det pirso mut gusun det.

<sup>13</sup>A ramano kum te Juda, det ser wan tuptupukus una kum tamon, sur det in lakro ru a kum laulau na nion gusun a taro. Ma det lari sur det in lakro rui kai a kum laulau na nion nama risan o Iesu. Det ser watungi lena, "A lakro ru mot nama risan o Iesu, ra o Pol i ser warawai nami." <sup>14</sup>Ara musano, a risano o Skewa a te Juda, a labino tene etabor torom o God, a wonom mawit na nutnutunu, det kai det lari sur det in lakro ru a kum laulau na nion nama risan o Iesu. <sup>15</sup>Ikut a laulau na nion i balu det lena, "A tasmami ut o Iesu, ma a tasmami utkai o Pol. Ikut mot, osi mot?" <sup>16</sup>Ra a musano ra a laulau na nion kura uni, i sirok bat pas det, ra i um kinkidikin tar det ma i raros ru anundet a kum malu. Ra det kalabor pirso unago upiso nama kum kabo mengmengere mukut.

<sup>17</sup>A wasiso una utna ri, i wanpat torom a taro Juda ma a taro kai ra ausur a taro Juda ra det kis tong o Epeses, ra det ngara rop, ma det urur sakit una risan a Labino o Iesu. <sup>18</sup>A susut tagun det ra det nurnur, det wanpat ma det watung puaso anundet a kum sakino petutna. <sup>19</sup>Ma a susut kai tagun det ra det ser sangsagor, det los tomo pas anundet a kum buk na sangsagor, ra det tun ru det tiro umatan a taro rop. Ra det luk tomo pas a matan a kum buk rop, i elar ut nama limo na noino arip na mani. <sup>20</sup>Ra a wasiso anun a Labino i wan susuaro, ra i lubang ma i dekdek.

### *A purpuruon tong o Epeses*

<sup>21</sup>Ra a kum utna ri i sa rop, o Pol i nuki lena in nan potora una ru papor Masedonia ma o Akaia sur in nan usapat o Jerusalem. Ma i watungi lena, "Ra a sa wan pas sapat o Jerusalem, an nan bulung utong o Rom."

<sup>22</sup>I tulu mugu ru o Timoti ma o Erastus, aru tagun det ra det ser waruti, utong o Masedonia, ma i ut, i kis melet pas ut munung tong una papor Asia.

<sup>23</sup> Una kum bung ra, a labino purpuruon i wanpat, uni a taro ka det nem a Kisapi anun a Labino. <sup>24</sup> Ara musano a risano o Dimitrius, a tene pam utna nama silwa. I pampam a kum natnat na rumu na lotu anun a ino na god anundet, o Artemis, nama silwa. Ma a pinapam ri i pam pat a susut na mani torom o Dimitrius ma anun a taro na pinapam kai. <sup>25</sup> I ben tomo pas anun a taro na pinapam, ma a ramano taro gisen kai ra anundet a pinapam i elar, ma i watungi tandet lena, "A taro, mot tasmani lena dat ser pam pat a susut na mani tagun a pinapam ri. <sup>26</sup> Nin o Epeses, ma una kum tamon rop nin una papor Asia, a musano ra, o Pol, i pukus a nuknukin a susut na taro, ma i ben raro det, ra i inanos det lena a kum god ra dat ser pami nama lamandat, ausur a kum god. <sup>27</sup> Ra a utna ri in nanpat torom dat, ausur in banlaulau a wakak na risan anundat a pinapam kut, det in nuk unatino pasi kai a rumu na lotu anun a ino na god anundat, o Artemis, ma det in unatino pas a risano. Uniri a taro Asia rop ma a rakrakon bual kai det lotu torom anundat a ino na god, o Artemis."

<sup>28</sup> Ra det longoro a wasiso ri, det kankan doko, ma det kukukuk lena, "O Artemis anun a taro Epeses, i labo sakit!" <sup>29</sup> Ma a taro rop tagun a tamon ra det purpuruon. Det kalabor ma det pam ukai pas o Gaius ma o Aristakus, aru te Masedonia ra detul wan tomo nam o Pol, ma det ruk nam der una nundet a labino rumu na kiwung. <sup>30</sup> O Pol i nem na ruk torom a taro, ikut a taro na ususer det turbati. <sup>31</sup> Ma a ramano kum mugumugu tagun a gapman una papor Asia, ra det tar pasano nam o Pol, det pitar ru a wasiso toromi lena gong i ruk una rumu na kiwung.

<sup>32</sup> A kunur na taro det purpuruon. A ramano taro det kukukuk nama ara wasiso ut, ma ara taro det kukukuk nama se wasiso kai. Ma a susut tagun det, ka det tasman asau ra det wanpat suri. <sup>33</sup> A taro Juda det sugut pat tar o Aleksanda usa numugu tan a kunur na taro. Ma det kukukuk nama wasiso sur in watung asau. Ra o Aleksanda i turbat det nama lamano, sur det in kis wowowon, sur in wasiso bat i ut umatana taro. <sup>34</sup> Iikut, ra a taro Epeses det sa tasmani lena, o Aleksanda i a te Juda, det kukukuk tomo una ru aua lena, "Artemis anun a taro Epeses, i labo sakit!"

\* 20:5: O Luk i tumus "met", uni i wan tomo nam o Pol.

<sup>35</sup> Ra a tene tumtumus anun a tamon ra, i turbat a taro sur det in kis wowowon, ra i watungi lena, "Mot a taro Epeses, osi na tamon kuri ra ke tasmani lena, a taro Epeses det tamtamabat a rumu na lotu anun a labino god Artemis, ma a malalar ino kai ra i puku pirso tagisapat una langit? <sup>36</sup> Katutaio in ipul gusun a kum utna ri, i wakak sur mot in mana ma gong mot pam oros tar tu purpuruon. <sup>37</sup> Mot sa ben tar aru musano ri urin, ikut ausur der wolong una rumu na lotu, ma ka der watung laulau anundat a ino na god. <sup>38</sup> A kinkinis na warkurai ma a kum tene warkurai kuri ut det. Ra o Dimitrius ma a kum tene pinapam ra det wan tomo nami, det nem na takun taio un tu utna, det in inanos a kinkinis na warkurai nami. <sup>39</sup> Ra tu wasiso na etakun kura utmakai mot nem na wasiso uni, din ukodosi ut una kiwung na tamon. <sup>40</sup> Sako din takun dat una purpuruon ra i wanpat una bung ri. Ra asau mo ra dat in wasiso bat dat nami? Uni katu kibino." <sup>41</sup> Ra i sa watung tari lenra, i tulu susuaro ru a taro gusun a kiwung.

## 20

### *A inawan anun o Pol utong o Troas*

<sup>1</sup> Ra i sa rop a purpuruon, o Pol i itula pas a taro na ususer, i udekdek tar det, ma i wasiso na itula taru tandet. Numur i wan utong una papor Masedonia. <sup>2</sup> I wan papas una kum tamon ra, ma i udekdek tar det nama susut na wakak na wasiso. Numur i wan utong o Grik. <sup>3</sup> I kis tiro iai a tul in kalang. Numur i waninar sur in kas una sip utong una papor Siria, ikut i tasmani lena a kum te Juda det wasiso tomo pas sur det in um doko i. Ra i pukus a nuknukino ma i nuki lena i wakak sur in nan melet epotor una papor Masedonia. <sup>4</sup> Ma o Sopata, a te Beria, a nutun o Pairas, ma o Aristakus ma o Sekundas, aru te Tesalonaika, ma o Gaius a te Derbe, ma o Tikikus ma o Tropimus, aru te Asia, ma o Timoti, det wan tomo nam o Pol. <sup>5</sup> Det ri det mugu utong, ra det kis langlang met\* tong o Troas. <sup>6</sup> Ra i sa rop a labino bung na lotu na beret ra kalako is uni, met kas una sip tagitong o Pilipai. A limo na bung bat tari, met sot tong o Troas torom det ra det mugu gusun met, ma met kis pas a wonom mawit na bung tiro iai.

### *O Pol i ulaun pas o Iutikus*

<sup>7</sup> Una mugano bung una wik, met kis tomo sur met in nangan tomo. Ra o Pol i wasiso torom a taro, ma i walos doko anun a wasiso, tuk ut una labino mirum, uni i nemi sur in nan kut gusun det una bung numur.

<sup>8</sup> A susut na lam kura una kukur rumu sapat netes ra met kis tomo iai. <sup>9</sup> Ra ara barman, a risano o Iutikus, i kis taru una windo. O Pol i wasiso liklik, ra in matan o Iutikus i sunu doko, ma i inep dumun taru, ra i puku pirso tagisapat netes gusun a mantul na kukur rumu unago upiso. Ra det los pat pasi, i sa mat taru. <sup>10</sup> Ra o Pol i pirso, i inep netes uni, ma i tal pasi, ma i watungi lena, “Gong mot ngara, i sa laun.”

<sup>11</sup> Numur o Pol i ka toto melet, i tibik pas a beret ra i wangon. Ma i wasiso tuk in matanas i wan toto, ra numur i wan pas gusun det. <sup>12</sup> Ra a taro det wan susuaro, det wan tomo nam o Iutikus, i laun kut, ra det gas doko.

*O Pol i wan tagitong o Troas utong o Miletus*

<sup>13</sup> Met mugu, ra met kas una sip utong o Asos sur met in ukas pas o Pol tiro iai. I ut i sa watung tari lenra, uni i nemi lena in usur a kisapi kut. <sup>14</sup> Ra met etorom nami tong o Asos, met ukas pasi ra met wan utong o Mitilini. <sup>15</sup> Una bung numur met wan tagitong ra met wan milau ara ailan, a risano o Kios. I waspi kobot melet, ra met wan paporino Samos, ra una bung numur melet tano, met sot tong o Miletus. <sup>16</sup> O Pol i sa pam tari una nuknukino sur in nan sakiti kut o Epeses, sur gong melet mo i balon tong una papor Asia, uni i nemi sur in nan lakit usapat o Jerusalem sur in kis sapat, una bung na Pentikos.

*A tintinip na wasiso anun o Pol torom a kum mugumugu anun a taro na lotu tong o Epeses*

<sup>17</sup> Met wanpat una tamon Miletus, ra o Pol i itula utong o Epeses sur a kum mugumugu anun a taro na lotu. <sup>18</sup> Ra det wanpat toromi, i watungi tandet lena, “Mot tasmani ut anung a ngas na kinkinis una kum bung ra a kis pas nisamot, turpasi una bung ra a wanpat kibin nin una papor Asia. <sup>19</sup> A taro Juda det wasiso tomo sur det in pam a kum sakino petutna un iau, ma a taramo a mamaut uni. Ikut, a papam ut torom a Labino, ma a unatino pas iau, ma a lurlur na matang i puku. <sup>20</sup> Ra a ser warawai ma a ususer mot, umatan a taro ma una numot a kum rumu utkai, ka ngara ma ka munu tu utna ra in warut mot. <sup>21</sup> A warawai torom

a taro rop, a taro Juda ma det ra ausur a taro Juda kai, sur det in nukpukus torom o God ma det in nurnur una nundat a Labino o Iesu.

<sup>22</sup> “Ra uniri, a Tokodos na Nion i unggongos iau sur an nan ut usapat o Jerusalem, ma ka tasman asau an etoromi sapat. <sup>23</sup> A tasmani kut lenri, una kum tamon rop, a Tokodos na Nion i inanos iau lena a karabus ma a kum mamaut det kis pas iau. <sup>24</sup> Ikut ka nuk labo pas anung a nilaun, ma ka maris bati. Awu! A pitar tar iau kut sur an pam sot rop tar anung a inawan ma a pinapam, ra a Labino o Iesu i pitar tari torom iau, sur an wasiso puaso una Wakak na Wasiso una marmaris anun o God.

<sup>25</sup> “A tasmani lena mot rop, ra a wan tuptupukus torom mot nama warawai una matanitu anun o God, ka mot in tama melet iau mo. <sup>26</sup> Ra uniri, a inanos kapo tar mot lena, ra taio tagun mot in iru una warkurai anun o God, ausur iau a kibino, iau, a sa langolango. <sup>27</sup> Uni ka ngara ma ka munu tu utna una nuknukin o God. A sa watung rop tari torom mot.

<sup>28</sup> “Mot in tamtamabat wakak taru un mot, ma a kum sipsip kai, ra a Tokodos na Nion ut i sa pitar tari torom mot sur mot in tamtamabat det. Mot in tamtamabat a taro na lotu anun o God, ra i sa kul pas det nama gapino ut. <sup>29</sup> A tasmani lena, ra an nan gusun mot, lako taro elar nama kum lomlom na pap ra det ngalngalia, det in ruk torom mot, ma det in banlaulau a kum sipsip. <sup>30</sup> Ma lako taro utkai tagun mot det in tur pat, ma det in pukus a lingmulus ino, sur a taro na ususer det in mur det. <sup>31</sup> Mot in tumarong! Mot in nuk pasi lena a tulu kilalo ka mana gusun mot rop nama wasiso na utamarong, una kum mirum ma a waspi, ma a lurlur na matang i puku uni.

<sup>32</sup> “Uniri a pitar tar mot ulaman o God, ma a pitar tar mot una nun a wasiso ra i upuaso anun a marmaris. A wasiso ra i pet lar pasi sur in udekdek mot, ma in tabor mot nama kum wakak na etabor ra o God i ser tabor anuna taro nami. <sup>33</sup> A nuknuking ke ling sur tu mani anun taio, o tin namalu anun taio. <sup>34</sup> Mot ut, mot tasmani lena a papam ut nama aru lamang sur a kum utna ra in topas iau, ma det kai ra met wan tomo. <sup>35</sup> Iau anumot a larlar una kum dekdek na pinapam rop ra a ser pami sur mot kai mot in pami lenra, ma mot in warut det ra kalako dekdek indet. Ma mot in nuk pas a wasiso anun a Labino o Iesu ra i sa watung

tari lena, 'Det ra det etabor det dan tandet ra det los a kum utna ra di tabor tar det nami.'

<sup>36</sup> Ra i sa watung tar a kum wasiso ri, o Pol tomo nama taro rop det kis butkeke, ma det wararing. <sup>37</sup> Numur det rop det tangis, det tal pas o Pol, ma det gom a papor wano. <sup>38</sup> Ma a taro det tupunuk doko, uni i sa inanos tar det lena ka det in tamtama tomo melet. Ra numur det wan tulu ru i sur in kas una sip.

## 21

### *A inawan anun o Pol usapat o Jerusalem*

<sup>1</sup> Ra met sa wan pas gusun det, met kas una sip ma met wan tokodos utong una ailan Kos. Una bung numur, met wan utong una ailan Rodes, ra tagitiro iai met wan utong o Patara. <sup>2</sup> Tiro iai, met pastorom ara sip, ra in nan utong una papor Ponisia. Met kas uni, ra met wan. <sup>3</sup> Met tama a ailan Saipras una papor na kair i met, ra met wan sakit ru i. Ra met wan utong una papor Siria, ma met sot tong o Tair, sur din usirok a kum utna tiro iai. <sup>4</sup> Ra met etorom pas a taro na ususer, met kis pas tiro iai a wonom mawit na bung. Ma a Tokodos na Nion i unuk tar det nama wasiso sur gong o Pol i wan usapat o Jerusalem. <sup>5</sup> Ikut ra a wonom mawit na bung i sa rop, met wan melet, ra a taro na ususer rop det tulu tar met unago utasi, det tomo nam anundet a kum ino ma a kum nutnutundet. Ra met sa wanpat nago utasi, met kis butkeke una usalin, ma met wararing. <sup>6</sup> Numur met wasiso na itula pas, ra met kas una sip, ra det, det milet melet sur anundet a kum rumu.

<sup>7</sup> Met wan tagitong o Tair ra met sot tong o Potolemis, ra met etorom pas nam det ra det tar tistisino una nurnur, ra met kis pas ara bung tomo nam det. <sup>8</sup> Una bung numur, met wan melet, ra met wanpat tong o Sisaria, ma met kis una rumu anun o Pilip, a tene warawai nama Wakak na Wasiso, ara tagun a wonom mawit det ra a kum aposel det pilok pas det.\* <sup>9</sup> O Pilip a wat na nutnutunu, a wat na toraro, ra det ser wasiso na poropet.

<sup>10</sup> Ra met sa kis tiro o Sisaria a susut na bung, ara poropet, a risano o Agabus, i wanpat. I wan tagisapat una papor Judia.

<sup>11</sup> I wan torom met, ra i rakon pas a let anun o Pol, ra i ker pas aru kikino ma aru lamano

ut nami, ma i watungi lena, "A Tokodos na Nion i watungi lena, 'A taro Juda sapat o Jerusalem det in ker a musano ra anun a let ri, lenutri a pami. Ma det in pitar tari una laman a taro ra ausur a taro Juda.' "

<sup>12</sup> Ra met longoro a wasiso ri, met nama taro tagun a tamon ra, met turbat o Pol sur gong i wan usapat o Jerusalem. <sup>13</sup> Ikut o Pol i balu met lena, "ilai ra mot tangis, ma mot utupunuk iau? A sa pitar tar iau sur det in ker iau ma din um doko iau utkai sapat o Jerusalem, kibino una risan a Labino o Iesu." <sup>14</sup> Ra met lagano turturbat tari, met mana mukut, ma met watungi lena, "I wakak sur din pam sot pas a nemnem anun a Labino."

<sup>15</sup> Ra numur, met waninar pas anu-met a kum ututna, ra met wan usapat o Jerusalem. <sup>16</sup> Met wan tomo nama ramano taro na ususer tagitong o Sisaria. Det tulu tar met torom ara musano, a risano o Manson, a te Saipras, sur met in kis toromi. I ara tagun a kum mugano taro na ususer.

### *O Pol kusapat o Jerusalem*

<sup>17</sup> Met wanpat sapat o Jerusalem, ra det ra met tar tistisino una nurnur det ben pas met nama gasgas. <sup>18</sup> Una bung numur, met nam o Pol, met ruk torom o Jems. Ma a kum mugumugu rop anun a taro na lotu kai kura. <sup>19</sup> O Pol i wasiso na ugasgas pas torom det, ra i inanos wakak det mo nama sau rop ra o God i sa pam tari una pinapam anun o Pol torom det ra ausur a taro Juda.

<sup>20</sup> Ra det longoro i, det watung ulabo pas o God. Ra numur det watungi tano Pol lena, "Tisimet, u tasmani lena a susut na arip tandat a taro Juda, det sa nurnur, ra det rop det dekdek sur det in mur a kum Warkurai anun o Moses. <sup>21</sup> Det sa longoro a wasiso un ui lena, u ser ususer a taro Juda rop ra det kis nisan a taro ra ausur a taro Juda, sur gong det mur a kum Warkurai anun o Moses. Det longoro i lena, u inanos det sur gong det tok talilis a pinin a kum nutnutundet, ma gong det mur a kum petutna anun a taro Juda. <sup>22</sup> Ra asau mo dat in pami, ra det in longoro i lena, u sa wanpat urin? <sup>23</sup> Un pam a utna ri met in watungi tam: A wat na musano tagun met, det sa liliman taru torom o God. <sup>24</sup> Un nan tomo nam det, ma mot in utalapor mot elar nama Warkurai, ma un kul a kum utna na etabor ra det in etabor nami. Ra numur din kumur rop ru a

\* 21:8: Tama Aposel 6:1-6.

iwu na lorindet. Ra un pami lenri, a taro rop det in tasmani lena, a kum wasiso ra det sa longoro tari un ui, ke lingmulus, ma ui kai u ser muri ut a kum Warkurai. <sup>25</sup>Un ra bung dat sa tumus tar a buk torom a kum tene nurnur tagun det ra ausur a taro Juda, lenri: Gong det wan tu utna ra di sa etabor taru nami torom a kum torotoro na god. Gong det wan tu utna ra ka di gos wakak a gap gusun, ma tu wewegua ra di pos doko i kut, ra a gap kura utmakai uni. Ma gong det pam a kum petutna na pamuk.”

<sup>26</sup>Una bung numur, o Pol i wan tomo nama wat na musano, ra i utalapor tomo nam det. Numur i ruk una rumu na etabor, ra i watung puaso tar a bung ra a pinapam na utalapor in rop, ma din tun a etabor anundet taktakai uni.

#### *Di pam ukai pas o Pol una rumu na etabor*

<sup>27</sup>Ra milau a wonom mawit na bung na utalapor in rop, a ramano taro Juda tagitong una papor Asia, det tama pas o Pol una rumu na etabor. Ma det usungun balan a taro sur det in kankan torom o Pol ra det pam ukai pasi. <sup>28</sup>Ma det kukukuk lena, “A taro Israel, mot in warut met. A musano ri, i ususer a taro rop una rakrakon bual sur det in nget dat, ma a kum Warkurai anun o Moses, ma a rumu na etabor. Ma i sa ben ruk pasi kai a taro ra ausur a taro Juda urin una rumu na etabor, ma i sa udur ru a rumu ri anun o God.” <sup>29</sup>Det watungi lenri, uni numugu ut munung, det sa tama tar der nam o Tropimus, a te Epeses, tiro una tamon, ma det nuki lena o Pol i ben ruk pasi una rumu na etabor.

<sup>30</sup>Ma a taro rop det purpuruon ra det kalabor tomo, ma det pam ukai pas o Pol, ra det dat pirso pasi tagun a rumu na etabor. Uniutra det tagar ru i mut a kum matansako. <sup>31</sup>Milau mukut det in um doko o Pol, a wasiso i wan sur a labino mugumugu anun a taro na inaim tagitong o Rom, lena a taro Jerusalem rop det sa purpuruon. <sup>32</sup>Uniutra i ben tomo pas a taro na inaim ma anundet a kum mugumugu kai, ma det kalabor pirso torom det. Ra a taro det tama a labino mugumugu ma a taro na inaim, det mana nama inaim gusun o Pol. <sup>33</sup>A labino mugumugu i wan torom o Pol, ma i dat pasi, ra i itula sur din ker ukai i nama ru sen. Ma i iting lena, “Osi na musano ri? Asau ra i pam raro tari?” <sup>34</sup>A ramano taro tagun a kunur na taro det watung ara wasiso, ma

ara taro kai det watung ara wasiso gisen. Ra a labino mugumugu i itula sur din ben pas o Pol utiro una rumu anun a taro na inaim, uni, ke talapor lar pas una kibin a labino purpuruon ra. <sup>35</sup>Ra o Pol i wanpat nisan a leta ina rumu, a taro na inaim det los pasi, uni a kunur na taro det balano sungun doko. <sup>36</sup>Ma a kunur na taro ra det mur det, ka det mana nama kukukuk lena, “Sak doko i!”

#### *O Pol i wasiso torom a taro*

<sup>37</sup>Ra milau mo det in ruk nam o Pol una rumu anun a taro na inaim, i ting a labino mugumugu lena, “I wakak kut sur an watung tu utna tam?” Ra a labino mugumugu i tingi lena, “Ai, u tasmani ut a wasiso Grik?” <sup>38</sup>A len makai ui a te Ijip, ra numugu i turpas a inaim tomo nama gapman, ra i ben pas a wat na arip na tene pam purpuruon, usapat una nubual kalako taro uni.” <sup>39</sup>Ma o Pol i balu i lena, “Iau a te Juda tagitong o Tasus, una papor Silisia, ausur iau tagitiro un tu tamon oros kut. A saring ui ra un mulaot iau, sur an wasiso torom a taro ri.” <sup>40</sup>Ra a labino mugumugu i mulaot tari, o Pol i tur una leta ina rumu, ra i turbat a taro nama lamano. Ra det sa tur wowon, i wasiso tandet nama wasiso Ibru lena,

## 22

<sup>1</sup>“A kum tistising, ma a kum tamtamang, mot in longoro a wasiso ra an wasiso bat iau nami.”

<sup>2</sup>Ra det longoro i ra i wasiso nama wasiso Ibru torom det, det tur wowon rop. Ra i watungi lena, <sup>3</sup>“Iau a te Juda, di usus iau tong o Tasus una papor Silisia. A barman taru ut nin o Jerusalem, ma iau a nat na ususer ut anun o Gamaliel, ma i ususer wakak iau una kum Warkurai anun a kum tumtubundat tagun numugu, ma a papam dekdek torom o God lenutri mot pami. <sup>4</sup>A banlaulau a taro ra det mur a Kisapi anun a Labino. A um doko a ramano taro, ma ara taro kai a dat pas det, a kum musano ma a wardain utkai, ra a uruk det una karabus. <sup>5</sup>A mugumugu na tene etabor torom o God ma a taro na kiwung rop det talapor una kum utna ri, ma det pet lar pasi sur det in wasiso uni. A los pas a kum pas gusun det ra det tumusi torom a kum tistisindet a kum te Juda tong o Damaskas. Ra a wan utong sur an ker pas a taro ra det mur a Kisapi anun

a Labino, ma an dat det sur din ukadik det nin o Jerusalem.

*O Pol i wasiso talapor una nun a bung na nukpukus*

(Ap 9:1-19; 26:12-18)

<sup>6</sup>“Ra a wan milau nanan o Damaskus, una labino suan, a labino talapor tagisapat una langit i wanpat ukisin ma i talapor talilis pas iau. <sup>7</sup>Ma a puku pirso una piso, ra a longoro in nalngan ara i watungi tang lena, ‘Sol, Sol, sur asau ra u ser banlaulau iau?’ <sup>8</sup>Ma a tingi lena, ‘Labino, osi ui?’ Ma i balu iau lena, ‘Iau o Iesu, a te Nasaret, ra u ser banlaulau iau.’ <sup>9</sup>Ra a taro ra met wan tomo, det tama a talapor, ikut ka det longoro in nalngan ara ra i wasiso torom iau. <sup>10</sup>Ma a tingi lena, ‘Labino, asau ra an pami?’ Ra a Labino i balu iau lena, ‘Un katutur ma un nan utiro una tamon Damaskus, ra din inanos ui nama sau ra un pami.’ <sup>11</sup>Det ra met wan tomo, det pam benben iau mukut utiro o Damaskas, uni a dekdek ina talapor i upulu iau.

<sup>12</sup>“Ara musano, a risano o Ananias, i ara lingmulus na tene lotu ra i ser mur a kum Warkurai, ma a taro Juda rop ra det kis tiro iai, det ser ru i. I wanpat torom iau, <sup>13</sup>ra i tur milau iau, ma i watungi tang lena, ‘Sol, a tisinglik, un tamtama melet.’ Ra una du bung ut ra, arin matang i tapalos ra a tama o Ananias. <sup>14</sup>Ra o Ananias i watungi tang lena, ‘A God anun anundat a kabotaro tagun numugu i sa pilok tar ui, sur un tasman anun a nemmem, ma un tama a Tene Tokodos, ma un longoro anun a wasiso. <sup>15</sup>Ma ui un ser wasiso puaso torom a taro rop una sau ra u sa tama tari, ma u sa longoro tari kai. <sup>16</sup>Ra sau mo ra u kis pasi? Un tur, ma din baptaiso ui, ma una risano, un wararing sur din unus ru anum a kum sakino petutna.’

*A kakabo torom o Pol sur in warawai torom a taro ra ausur a taro Juda*

<sup>17-18</sup>“Ra a milet melet usapat o Jerusalem,

ma a wararing una rumu na etabor, a tama a Labino una tamtama, ra i watungi torom iau lena, ‘Un tur ma un nan lakit taginin o Jerusalem, uni ka det in longoro a wasiso puaso anumi un iau.’ <sup>19</sup>Ma a watungi tano lena, ‘Labino, det tasmani lena a ser ruk una kum rumu na lotu rop ma a ser dat det ra det nurnur un ui, ma a ser miras det. <sup>20</sup>Ra di duku doko o Stiwen, i ra i ser wasiso puaso un ui, iau kai a tur ut tiro iai. A mulaot

tomo nam det, ma a tamtamabat a kum malu anundet ra det duku doko i.’ <sup>21</sup>Ikut a Labino i watungi torom iau lena, ‘Un nan, an tulu bakbak ru ui utong torom a taro ra ausur a taro Juda.’”

<sup>22</sup>A taro det longoro a wasiso anun o Pol tuk ut una wasiso ri. Numur det kukukuk nama labino walngandet lena, “Din um doko ru i! Din lakro ru i gusun a rakrakon bual. Ke sot sur in laun.” <sup>23</sup>Ra det kukukuk, det rakon ru anundet a kum saket, ma det woro sarara a kubus usapat netes. <sup>24</sup>Ma a labino mugumugu i pitar a warkurai lena, din ben o Pol utiro una rumu anun a kum tene inaim, din mirasi ma din tingi sur din tasman asau a kibino ra det kukukuk lenra uni. <sup>25</sup>Ra det ker tari nama kum sen sur det in mirasi, o Pol i watungi torom a mugumugu anun a kum tene inaim ra i tur milau i lena, “Pepetlai, i tokodos kut sur din miras tu te Rom, ra ka di warkurai i utmakai?”

<sup>26</sup>Ra a mugumugu anun a taro na inaim i longoro i, i wan torom anun a mugumugu, ra i watungi tano lena, “Asau ra u nem na pami? A musano ri a te Rom.” <sup>27</sup>Ra a labino mugumugu i wan torom o Pol ra i tingi lena, “Ai, inanos iau. Ui a te Rom?” Ra i balu i lena, “Ma! Iau a te Rom.” <sup>28</sup>Ma a labino mugumugu i watungi lena, “Iau a ikul nama labino mani sur an nanpat a te Rom.” Ra o Pol i balu i lena, “Iau awu. Di usus iau, a te Rom ut.” <sup>29</sup>Ma det, ra det nem na tingi, uniutra det wan susuaro mut gusuni. Ra a labino mugumugu i tasmani lena o Pol a te Rom, i ngara, uni i ker tari nama sen.

*O Pol i tur umatan a taro na kiwung*

<sup>30</sup>Una bung numur, a labino mugumugu i nemi sur in mananos wakak pas una utna ra a taro Juda det takun o Pol nami. Ra i palos ru a kum sen, i itula sur a kum lamlabino tene etabor torom o God, ma a taro na kiwung rop kai, sur det in nan tomo. Ra i ben pirso pas o Pol, ra i utur tari numugu umatandet.

## 23

<sup>1</sup>O Pol i tamtama tokodos torom a taro na kiwung, ra i watungi lena, “A kum tisting, tuk una bung ri, iau, anung a nilaun i talapor umatan o God, ma in balang ke takun iau un tu utna.” <sup>2</sup>Uniutra o Ananias a mugumugu na tene etabor torom o God, i tulu det ra det tur milau o Pol sur det in pasor a wano. <sup>3</sup>Ra o Pol i watungi tano

lena, “O God in pasor ui, ui u elar nama papor rumu ra di pen tari nama kabang, ikut tiro ubalano i laulau rop. U kis sur un warkurai iau elar nama wasiso na Warkurai, ikut ui ut u lakai a Warkurai ra u itula sur din pasor iau.” <sup>4</sup>Det ra det tur milau i det watungi lena, “Pepetlai, u nemi sur un watung laulau a mugumugu na tene etabor torom o God?” <sup>5</sup>Ra o Pol i balu det lena, “A kum tistising, ka tasmani lena, i a mugumugu na tene etabor torom o God, uni di sa tumus tari una Buk Tabu lena, ‘Gong u watung laulau tu mugumugu anun anum a taro.’” *Kisim Bek 22:28*

<sup>6</sup>O Pol i tasmani lena, a ramano taro tagun det, a kum Sadusi, ma ara taro kai a kum Parisi, ra i kakabo una kiwung lena, “A kum tistising, iau a Parisi, ma a nutun a Parisi. Uniri di takun iau uni a nurnur una nilaun melet anundet ra det mat.” <sup>7</sup>Ra i sa watung tari lenra, a kum Parisi ma a kum Sadusi det turpas a wasiso na kankan, ra a taro na kiwung det tapagol. <sup>8</sup>Uni a kum Sadusi det nurnur lena katu nilaun melet gusun a minat, ma kalako ensel, ma kalako nion, ikut a kum Parisi det nurnur un detul rop. <sup>9</sup>Ra a labino purpuruon i turpasi, a ramano kum Parisi, det ra a kum tene ususer tagun a Warkurai, det tur, ma det engaras dekdek, ma det watungi lena, “Ka met sio pas tu sakino utna ra a musano ri i raro uni. Dat in lai mo? Sako ra tu nion, o tu ensel i sa wasiso taru toromi.” <sup>10</sup>Ra i sa labo a wasiso na engaras, ma det sa turpas a inaim, a labino mugumugu anun a kum tene inaim i ngara, sako det in dat ngagos tar o Pol. Ra i tulu ru a taro na inaim, sur det in nan ma det in dat pasi gusun a taro, ma det in ben pasi utiro una rumu anun a taro na inaim.

<sup>11</sup>Una mirum utra, a Labino i wanpat torom o Pol, ra i watungi tano lena, “Gong u ngara, un tur dekdek. U sa wasiso talapor taru un iau nin o Jerusalem, lenkutkai ra un wasiso talapor un iau tong o Rom.”

*Det epak sur det in um doko o Pol*

<sup>12-13</sup>Una bung palu na kobot, a ramano kum te Juda, elar nama wat na noino ma i puku, det wasiso tomo pas ra det liliman lena, ka det in nangan, ma ka det in inum, tuk ut ra det sa um doko tar o Pol. <sup>14</sup>Det wan torom a kum lamlabino tene etabor torom o God, ma a kum mugumugu tagun a lotu, ra det watungi lena, “Met sa liliman taru

sur ka met in nan tu utna tuk ut ra met sa um doko ru tar o Pol. <sup>15</sup>Met nemi sur mot tomo nama taro na kiwung, mot in pitar ru tu wasiso torom a labino mugumugu anun a kum tene inaim ma mot in toro pas o Pol gusuni, sur in tulu ru i torom mot. Mot in watungi lena mot nem na longoro tu wasiso talapor melet tano. Ra met, met in um doko ru i kut una kisapi ra kabaut i wanpat torom mot.”

<sup>16</sup>Ikut a laban o Pol i longoro a wasiso na epak ri, ra i wan utiro una rumu anun a kum tene inaim, ra i inanos o Pol uni. <sup>17</sup>Numur o Pol i kabo pas ara mugumugu anun a kum tene inaim, ma i watungi tano lena, “Un ben a barman ri torom anumot a labino mugumugu, uni i nem na inanos nam ara wasiso.” <sup>18</sup>Ra i ben pati torom a labino mugumugu, ra i watungi lena, “O Pol, o naro ra di ukarabusi, i kabo pas iau toromi, ra i saring iau sur an ben tar a barman ri torom ui, sur in inanos ui nam ara wasiso.” <sup>19</sup>A labino mugumugu i pam pas a laman a barman, ra i ben eno pasi, ra i tingi lena, “Asau ra u nemi sur un watungi tang?” <sup>20</sup>Ra i watungi lena, “A kum taro Juda det sa epak pas sur det in toro pas o Pol gusun ui, sur un tulu ru i markan torom a taro na kiwung, sur det in longoro tu wasiso talapor melet gusuni. <sup>21</sup>Gong u tarom tandet, uni a wat na noino ma i puku na taro det sa parau taru suri. Uni det sa liliman taru lena, ka det in nangan ma ka det in inum, tuk ut ra det sa um doko ru tar o Pol. Ra uniri det kis langlang sur anum tu nimulaot.” <sup>22</sup>Ra a labino mugumugu i turbati lena, “Gong u inanos tar taio lena u sa inanos tar iau una utna ri.” Ra numur i tulu ru i.

*Di ben pas o Pol torom o Peliks*

<sup>23</sup>A labino mugumugu anun a kum tene inaim i kabo pas aru mugumugu toromi ra i watungi lena, “Mur in waninar aru mar na tene inaim, ma a wonom mawit na noino tene inaim ra det kas una kum os, ma aru mar na tene inaim ra det los a kum bele, ma mot in nan una lisu na du bung miri una mirum utong o Sisaria. <sup>24</sup>Mur in ben lako ru os, sur o Pol in nan nami. Mot in tamtamabat wakaki tuk mot in nanpat nami torom o Peliks, a labino mugumugu tagun a gapman.” <sup>25</sup>Ra i tumus a pas lenri toromi:

<sup>26</sup> Iau o Klodius Lisias, a tumtumus torom ui o Peliks a labino mugumugu tagun a gapman.

A marmaris torom ui.

<sup>27</sup> A musano ri, ra a tulu ru i torom ui, a kum taro Juda det pam ukai pasi, ma milau det in um doko i. Iikut met nama kum tene inaim, met wanpat, ma met ulaun pasi, uni a sa tasman tari lena i a te Rom. <sup>28</sup> A nemi sur an tasman asau a kibino ra di takuni, ra a beni torom anundet a taro na kiwung. <sup>29</sup> Uniri a sa talapor lena, di takun orosi kut una nundet a kum warkurai tagun a lotu, ma ke pam tu sakino utna ra in karabus uni, o din um doko i uni. <sup>30</sup> Iikut, ra di inanos iau lena det sa epak sur a musano ri, sur det in um doko i, a tulu lakit ru i torom ui. Ma a taro ra det takuni, a sa inanos tar det lena, det in nan torom ui nama nundet a etakun uni. I kut ra ma i rop.

<sup>31</sup> Ra a taro na inaim det ben pas o Pol una mirum utong o Antipatris, lenutra di sa watung tari tandet. <sup>32</sup> Ra una bung numur, a taro na inaim ra det kas una kum os, det wan saksakit nam o Pol, ma ara taro na inaim kai det milet melet usapat o Jerusalem. <sup>33</sup> Ra det wanpat tiro o Sisaria, det pitar tar a pas torom o Peliks, a labino mugumugu tagun a gapman, ra det pitar tar o Pol toromi. <sup>34</sup> O Peliks i luk tar a pas, ra i ting o Pol lena, "Ui tagun osi na papor?" Ra i sa tasmani lena o Pol a te Silisia, <sup>35</sup> i watung i lena, "Una bung ra a taro ra det takun ui det in nanpat nin, an longoro maragom anum a wasiso." Ra i itula sur din tamtamabat o Pol una rumu anun o Erod.

## 24

*A taro Juda det takun o Pol*

<sup>1</sup> Ra i sa rop a limo na bung, o Ananias, a mugumugu na tene etabor torom o God ma a ramano kum mugumugu tagun a lotu, ma o Tetulas, a tene mananos tagun a kum warkurai, det wanpat tong o Sisaria, ra det inanos o Peliks a labino mugumugu tagun a gapman una nundet a kum etakun un o Pol. <sup>2</sup> Ra di sa kabo pas o Pol, o Tetulas i turpas a wasiso torom o Peliks lena,

"Labino, met kis suano i una molmol ubalan anum a warkurai. Una kum wakak na nuknukim, u ukodosa susut na utna sur

\*

<sup>24:6-8</sup>: A ramano kum tene mananos una Buk Tabu det nuki lena a ramano kum wasiso kai i kis una rino ri. I lena: Ma met nemi sur met in warkurai i elar nama numet a kum Warkurai. Iikut o Lisias a labino mugumugu anun a kum tene inaim i ruk ra i dat gisen pasi gusun a lamamet nama dekdek. Ra i itula sur met ra met takun a musano ri, sur met in nan torom ui ma met in tur umatam ma met in ukapo ui.

anumet a kinkinis in wakak una nundet a papor. <sup>3</sup> Met nama taro tagun a kum tamon rop, met gas doko nama num a kum warkurai ma met watung wakak sakit torom ui. <sup>4</sup> Iikut kan wasiso suano i, sako a pinim in ngoro. A saring ui sur un maris met ma un longoro anumet tu nat na wasiso.

<sup>5</sup> Met tama i lena a musano ri a tene pam purpuruon, i ser turpas a kum purpuruon epotor torom a taro Juda una rakrakon bual rop. Ma i a mugumugu tagun ara torotoro na lotu di watungi nama lotu Nasaret. <sup>6-8</sup> Ma i nemi lena in ban udur a rumu na etabor sur in durdur umatan o God. Iikut met pam ukai pasi. Ui ut un ting o Pol, sur un tasmani a lingmulusino tano, una kum utna ri met takuni uni."\* <sup>9</sup> Numur a ramano taro Juda kai det warut una etakun, det watungi lena, a kum wasiso ri i lingmulus ut.

*O Pol i wasiso talapor umatan o Peliks*

<sup>10</sup> O Peliks, a labino mugumugu tagun a gapman, i pikmato torom o Pol sur in wasiso, ra o Pol i watungi lena, "A gas sur an wasiso batbat iau, uni a tasmani lena u sa tene warkurai a susut na kilalo torom met a taro Juda. <sup>11</sup> Ra un ting a taro, un tasmani lena, a noino ma aru bung bat tari kut, ra a wanpat sapat o Jerusalem, sur an lotu. <sup>12</sup> Ma det ra det takun iau, ka det tama tar iau ra mir in engaras nam taio una rumu na etabor, ma ka det tama tar iau kai ra an upurpuruon a kunur na taro una kum rumu na lotu, o una balano tamon. <sup>13</sup> Ma ka det in ulingmulus lar pas anundet a kum etakun una kum utna ri ra det takun iau nami.

<sup>14</sup> "Iikut uniri an inanos talapor ui lena, a ser mur a Kisapi anun o Karisito, ra det watungi nama torotoro na lotu. Una kisapi ri, a lotu ut torom a God anun a kum tumtubumet tagun numugu, ma a nurnur una kum utna rop ra di sa tumus tari una kum Warkurai ma una kum buk anun a kum poropet. <sup>15</sup> Anung a nurnur un o God i elar nama taro ri. Iau kai a kis langlang nama nurnur lena o God in ukatutur melet pas a wakak na taro ma a laulau na taro gusun a minat. <sup>16</sup> Lenkutkai ra, a dekdek doko sur anung a nilaun in tokodos umatan o God, ma umatan a taro kai.

<sup>17</sup> “A kabano kilalo, a kis gisen gusun o Jerusalem, ra numur a milet melet usapat sur an los tar a mani na etabor torom anung a taro ra det sibo, ma sur an pitari kai a kum wewegua sur din tun det elar nama etabor torom o God. <sup>18</sup> Numugu ra ka ruk utmakai una rumu na etabor, a sa pam rop tar a kum warkurai sur an talapor umatan o God. Ra a ruk sur an pam a pinapam na etabor, ka det pastorom iau nam lako susut na taro, ma ka pam tu purpuruon kai. <sup>19</sup> Ikut a ramano taro Juda tagitong una papor Asia, det kis una rumu na etabor una bung ra di pam ukai pas iau. Ra tu utna din takun iau uni, in wakak sur det ut det in nan urin ma det in takun iau umatam. <sup>20</sup> Ma i wakak sur det ra kuri det, det in watung tu sakino ra det sa sio pasi un iau, ra a tur umatan a taro na kiwung sapat o Jerusalem. <sup>21</sup> Kutiro, det takun iau una nung ara wasiso kut. Ra a tur umatandet, a kakabo lena, ‘A tur una warkurai umatamot uniri, uni a nurnur una nilaun melet gusun a minat.’”

<sup>22</sup> O Peliks i talapor wakak ut una lotu ri di watungi nama Kisapi anun o Karisito, ra i umana tar a warkurai munung, ma i watungi lena, “Ra o Lisias, a labino mugumugu anun a taro na inaim in nanpat, an ubek maragom tu warkurai una etakun ri.”

<sup>23</sup> Ra i inanos a mugumugu anun a kum tene inaim lena, “O Pol in kis na karabus una num a warkurai. Un tamtamabati nama marmaris, ma gong u turbat a kum paspasano sur det in waruti.”

#### *O Pol i wasiso torom o Peliks ma o Darusila*

<sup>24</sup> A kabano bung bat tari, o Peliks i wanpat melet, der nama nun a ino o Darusila, a ino Juda. O Peliks i itula sur o Pol, ra i longoro anuna wasiso una nurnur un o Karisito Iesu. <sup>25</sup> O Pol i wasiso una tokodos na petutna, ma una petutna ra taio in tamtamabat wakak anun a nilaun, ma una bung na warkurai kai anun o God ra numur in nanpat, ra o Peliks i ngara, ra i watungi lena, “Pol, un nan munung. Un tu bung ra an langolango, an itula melet sur ui.” <sup>26</sup> Ra i ititula liklik suri, ra der waswasiso tomo, uni i nemi utkai lena o Pol in ukodosi nam tu mani, sur in palos ru i.

<sup>27</sup> Ra aru kilalo i sa rop, o Posius Pestus i keles ru o Peliks. Ikut o Peliks ke palos ru o Pol, uni i nemi sur in ugasgas a taro Juda.

## 25

### *O Pol i tur umatan o Pestus*

<sup>1</sup> Ra o Pestus i sa wanpat tiro o Sisaria una papor ra in warkurai iai, i kis pas kut a tulu bung, ra numur i wan usapat o Jerusalem.

<sup>2</sup> A kum lamlabino tene etabor torom o God ma a kum mugumugu anun a taro Juda sapat o Jerusalem, det inanos nama etakun un o Pol. <sup>3</sup> Ra det saring o Pestus sur in tarom torom det, ma det watungi lena, “Un maris met, ma un tulu ru o Pol urin o Jerusalem.” Uni det sa epak pas sur det in um doko i kut epotor una nun a inawan. <sup>4</sup> Ikut o Pestus i balu det lena, “O Pol kurong ut i kis tong o Sisaria, ma iau kai milau sur an milet melet utong. <sup>5</sup> I wakak sur lako kum mugumugu tagun mot, det in nan tomo nam iau utong, ma ra tu utna a musano ra in raro uni, det in takuni nami tong.”

<sup>6</sup> Ra o Pestus i sa kis tomo pas nam det a tiwal na bung, o a noino bung, i milet melet utong o Sisaria. Una bung numur, i turpasi sur in pam a warkurai, ra i itula sur din ben o Pol toromi. <sup>7</sup> Ra o Pol i sa wanpat, a taro Juda tagisapat o Jerusalem det tur talilis pasi, ma det takuni nama susut na maut na etakun, ikut ka det watung tu utna sur in ulingmulus anundet a kum etakun uni. <sup>8</sup> Ra o Pol i wasiso batbat i ut lena, “Ka pam tu niraro una kum Warkurai anun a taro Juda, o una rumu na etabor, o torom a Sisa, a king anun a gapman Rom.”

<sup>9</sup> O Pestus i nemi sur in ugasgas a taro Juda, ra i ting o Pol lena, “Pepetlai, un mulaot kut sur un nan usapat o Jerusalem, ma un tur una warkurai una kum etakun ri un ui sapat?” <sup>10</sup> Ra o Pol i balu i lena, “Uniri a tur una warkurai anun a Sisa, i tokodos ut sur din warkurai iau nin. Ka pam tu niraro torom a taro Juda, ui kai u sa tasman tari. <sup>11</sup> Ra a sa pam tar a sakino ra i tokodos sur an iru uni, i wakak kut sur an iru. Ikut ra a kum utna ri det takun iau nami ke lingmulus, ke tokodos sur din pitar tar iau tandet. A sasaring sur a Sisa ut in longoro a warkurai anung.” <sup>12</sup> Ra o Pestus i sa wasiso pas nam anuna kum tene mananos, i inanos o Pol lena, “Uniri u sasaring sur un nan torom a Sisa, ra an tulu ru ui utong o Rom torom a Sisa.”

*O Agripa ma o Benaisi der nem na longoro o Pol*

<sup>13</sup>Ra i sa rop a kabano bung, a King Agripa der nama bunu ano, o Benaisi, der wanpat tong o Sisaria, ra der wasiso na ugargas pas o Pestus una nun a kinkinis na mugumugu. <sup>14</sup>Ra der kis a susut na bung tiro iai, o Pestus i inanos a king nama wasiso un o Pol lena, "O Peliks i sa mana gusun anun a pinapam, ikut i madek tar ara musano una karabus, ra kuri utmakai i una karabus. <sup>15</sup>Ra a kis sapat o Jerusalem, a kum lamlabino tene etabor torom o God ma a kum mugumugu anun a taro Juda det inanos iau nama kum etakun uni, ra det saring iau sur an warkurai i sur din um doko i. <sup>16</sup>A inanos det lena, 'Ausur a ngasino anun a taro Rom, sur din pitar tar tu musano sur din warkurai i sur in mat, ra kabaut i tur tomo nam det ra det takuni, sur in wasiso bat i ut gusun a kum etakun.'

<sup>17</sup>"Ra det wanpat tomo nin, ka balbalon nama warkurai. Ara bung kut numur, a kis una kiskis na warkurai, ra a itula sur din ben pas a musano ra. <sup>18</sup>A taro na etakun det tur sur det in wasiso, ikut ausur det takuni nam tu sakino utna, elar nama sau ra a nuki. <sup>19</sup>Det takuni kut una kum utna tagun anundet a ngas na lotu, ma una ara musano, a risano o Iesu ra i mat, ra o Pol i watungi lena i sa laun melet. <sup>20</sup>Ka talapor ma ka tasmani ra an iting pepetlai una kum utna ri. Ra a tingi sur in nan usapat o Jerusalem ma din warkurai i una kum etakun ra, sapat. <sup>21</sup>Ikut, o Pol i sasaring sur a Sisa in warkurai i, ra a itula sur in kis munung nin una karabus, tuk una bung ra an tulu ru i utong o Rom torom a Sisa." <sup>22</sup>Ma o Agripa i watungi tan o Pestus lena, "Iau kai, a nem na longoro a musano ri." Ra o Pestus i watungi lena, "Markan un longoro i."

<sup>23</sup>Una bung numur, o Agripa ma o Benaisi der wanpat. Di mar der nama ngas na ememar anun a kum lamlabino. Det ruk tomo nama kum mugumugu anun a taro na inaim, ma a kum mugumugu tagun a tamon ra. Numur o Pestus i itula sur o Pol, ma di ben pasi. <sup>24</sup>Ma o Pestus i watungi lena, "King Agripa, ma mot kai a taro ra dat kis tomo nin, mot tama a musano ri. A taro Juda rop tagisapat o Jerusalem ma nin kai det saring iau sur an warkurai i, ra det kukukuk lena ka det nemi sur in laun melet mo. <sup>25</sup>Ikut ka pastorum tu utna ra din um doko i uni. Ikut i sasaring sur a Sisa in warkurai i, ra a nuki lena an tulu i utong o

Rom torom a Sisa. <sup>26</sup>Ka tasman mulus tu utna ra an tumus ukai i uni, torom a Sisa. Uniri a ben pati torom mot rop, ma torom ui, King Agripa, sur dat in ting tari sur an tasman asau ra an tumusi. <sup>27</sup>Uni a nuki lena ke tokodos sur an tulu tu karabus torom a Sisa, ma ka di tumus ukai asau ra di takuni nami."

## 26

### *O Pol i wasiso talapor umatan a King Agripa*

<sup>1</sup>O Agripa i watungi tan o Pol lena, "A mulaot ui sur un wasiso talapor una kum etakun un ui." Ra o Pol i kodos a lamano ra i turpasi sur in wasiso bat i ut lena, <sup>2</sup>"King Agripa, a gas doko sur an tur umatam ra an wasiso bat iau una kum utna rop ra a taro Juda det takun iau nami. <sup>3</sup>Uni ui a tene tagun a kum ngasino anun a taro Juda ma tagun a kum utna kai ra det ser wasiso to i. Ra iri a saring ui sur un kis wowowon ma un longoro iau.

<sup>4</sup>"A taro Juda rop det tasman anung a ngas na nilaun, turpasi utmakai ra a natlik, ra a kis una nung a tamon, ma sapat utkai o Jerusalem. <sup>5</sup>Det tasman iau tagun numugu, ma ra det nemi, det ut det in wasiso talapor un iau lena a muri ut a ngasino anun a kum Parisi. Met ara kabotaro tagun a taro Juda ra met mur sot rop pas a kum Warkurai tagun anumet a lotu. <sup>6</sup>Ra uniri a tur una warkurai, uni a kis langlang nam a nurnur sur a liliman ra o God i pam tari torom a kum tumtubumet tagun numugu. <sup>7</sup>Anumet a noino ma aru kabotaro, det kis langlang nama nurnur sur din pam sot pas a liliman ra torom det, ra det lotlotu torom o God una kum mirum ma a waspi rop. A King, a taro Juda det takun iau, uni a nurnur ut una liliman ra. <sup>8</sup>Sur asau ra mot ri mot nuki lena o God ken pet lar pasi sur in ukatatur melet a kum minat?

<sup>9</sup>"Iau kai numugu, a nuki ut lena i wakak sur an lar rop a kum kisapi sur an turbat a risan o Iesu, a te Nasaret. <sup>10</sup>A pam a pinapam ri sapat o Jerusalem. A wan nama warkurai anun a kum lamlabino tene etabor torom o God, ma a uruk a susut na tene nurnur una karabus. Ra din um doko det, iau kai, a mulaot sur det in mat. <sup>11</sup>A susut na dino a ruk una kum rumu na lotu sur an ukadik det, ma a ser ungongos det sur det in wasiso laulau un o Iesu. A ser kankan dekdek torom det, ra a ser wan una

ramano kum tamon gisen, sur an sio pas det ma an ukadik det.

*O Pol i wasiso talapor una nun a bung na nukpukus*

(Ap 9:1-19; 22:6-16)

<sup>12</sup> “Una nung ara du inawan melet una nung a pinapam ra, a wan utong o Damaskas, nama warkurai anun a kum lamlabino tene etabor torom o God nama nimulaot anundeti. <sup>13</sup> A King, una labino suan, ra a wan una a kisapi, a tama a tarai na talapor tagisapat una langit. I sio doko tana talapor ina in nusuan, ma i sio talilis pas iau tomo nam det ra met wan tomo. <sup>14</sup> Ra met rop met sa puku pirso una piso, a longoro in nalngan ara i wasiso torom iau nama wasiso Ibru lena, ‘Sol, Sol, sur asau ra u ser banlaulau iau? Ui ut u um pas ui nama kum ukukadik ra u pami un iau.’ <sup>15</sup> Ra a tingi lena, ‘Labino, osi ui?’ Ma i balu iau lena, ‘Iau o Iesu, ra u ser banlaulau iau. <sup>16</sup> Un katutur ma un tur. A wanpat torom ui, uni a sa pilok pas ui, sur un pam anung a pinapam ma un wasiso talapor una kum utna ra u sa tama tari un iau, ma una kum utna kai ra an ese i tam. <sup>17</sup> Ma an ulau ui gusun a kabotaro anum, ma gusun a taro kai ra ausur a taro Juda, ra an tulu ui torom det. <sup>18</sup> Un utamtama det sur det in tupukus gusun a dumirum sur a talapor, ma gusun a dekdekin o Satan sur o God, sur din unus ru anundet a kum sakino petutna. Det in nurnur un iau, ma una nundet a nurnur, det in kis tomo nam det ra o God i sa pilok pas det sur anun a taro.’

*O Pol i wasiso talapor una nun a pinapam*

<sup>19</sup> “King Agripa, a mulaot kut una tamtama ri tagisapat una langit. <sup>20</sup> A warawai mugu torom a taro tong o Damaskas ma numur sapat o Jerusalem ma una kum tamon una papor Judia rop, ra numur torom det kai ra ausur a taro Juda. A warawai lena det in nukpukus, ma det in tupukus torom o God, ma det in pam a kum pinapam, sur in ese i lena det sa nukpukus. <sup>21</sup> Iri a kibino ra a taro Juda det pam ukai pas iau una rumu na etabor, ma det nemi sur det in um doko iau. <sup>22</sup> Iku, tuk uniri, o God i warut iau, ra a tur nin umatam ra a wasiso talapor torom a taro oros kut, ma a kum lamlabino kai. Ka watung tu matok na utna, a wasiso kut una utna ra o Moses ma a kum poropet det sa watung tari ra in nanpat. <sup>23</sup> Det sa watung

tari lena o Karisito in mat, ma i a mugano musano ra in laun melet gusun a minat, ma in wasiso puaso una talapor torom a taro Juda ma torom a taro gisen kai.”

<sup>24</sup> Ra kura utmakai i wasiso batbati, o Pestus i kukuk dekdek toromi lena, “Pol, u sa longlong. Anum a labino etowo i sa ban longlong pas ui.” <sup>25</sup> O Pol i watungi lena, “Pestus, ui a labino, ka longlong. Anung a wasiso i lingmulus ma i pitar a kukuraino. <sup>26</sup> A king i tasmani ut a kum utna ri, ra a langolango sur an wasiso uni. Uni a tasmani lena katu utna i parau umatano ma una nun a longlongoro, uni ausur di pam eno i. <sup>27</sup> A King Agripa, pepetlai, u nurnur una wasiso anun a kum poropet? A tasmani lena u nurnur.” <sup>28</sup> Ra o Agripa i ting o Pol lena, “Pepetlai, u nuki lena un tu kukur du bung kut, un pukus pas iau, sur an nanpat a te Karisito?” <sup>29</sup> O Pol i balu i lena, “Ra tu kukur du bung o tu walos na du bung, an wararing torom o God un ui. Ausur un ui kut, un mot rop kai ra mot longoro iau uniri, sur mot in nanpat a kum te Karisito elar nam iau, ikut gong di ker mot nama sen.”

<sup>30</sup> Ra a king i tur, o Pestus ma o Benaisi, ma det kai ra det kis tomo. <sup>31</sup> Det pirso, ra det wasiso etalai lena, “A musano ri ke pam tu sakino utna ra din um doko i uni, o in karabus uni.” <sup>32</sup> Ma o Agripa i watungi tan o Pestus lena, “Ra gunuk a musano ri ken sasaring sur a Sisa in warkurai i, i wakak kut sur din palos ru i.”

## 27

*O Pol i kas una sip utong o Rom*

<sup>1</sup> Ra di sa warkurai tari sur met\* in kas una sip utong o Itali, di pitar tar o Pol, ma a ramano kum karabus kai, tan ara mugumugu a risano o Julias, ara tagun a taro na inaim anun a Sisa. <sup>2</sup> Met kas una ara sip tagisa Adramitiam, ra in nan sur in sot nanan una kum tamon nagokorot una papor Asia. Ra met kas, a sip i wan. Met wan tomo nam o Aristakus tagitong o Tesalonaika una papor Masedonia.

<sup>3</sup> Una bung numur, met sot pas tiro o Saidon. O Julias i maris o Pol, ra i mulaot ru i sur in nan pas torom a kum paspasano, sur det in tabori nama sau ra i sibo suri. <sup>4</sup> Tagitiro iai, a sip i wan melet, ra met

\* 27:1: O Luk i tumus “met”, uni i wan tomo nam o Pol.

kalabor rait una ailan Saipras, uni a wuwu i um met tagisa numugu. <sup>5</sup> Numur, met wan kutus sa utasipi tan aru papor Silisia ma o Pampilia, ra met sot tong o Maira, una papor Lisia. <sup>6</sup> Tiro iai, ara sip tagitong o Aleksanderia, in nan utong o Itali. O Julias i sio pasi ra i ukas tar met uni. <sup>7</sup> A susut na bung met kalabor wowowon kut, uni i dekdek doko a inawan utong o Nidas. Met kalabor rait una ailan Krit milau o Salmoni, uni a wuwu i dekdek, ra ka met pet lar pasi sur met in kalabor tokodos. <sup>8</sup> I dekdek utmakai anumet a inawan, ra met kalabor rararot murmur a usalin, ra met wanpat un ara nubual, a risano A Wakak na Mulmulukun, i milau a tamon Lasia.

<sup>9</sup> Met sa kis ru a susut na bung, ra uniri a inawan sa utasi i sa laulau doko, uni a Bung na Winewel i sa rop ma i sa milau a kum kalang na wuwu.† Ra o Pol i utumarong det lena, <sup>10</sup> “A taro, gong dat wan taru. A tama i lena, ra dat in nan kut, a sip in iru tomo nama kum utna, ma dat kai dat in iru.” <sup>11</sup> Ikut o Julias ke longoro pas a wasiso anun o Pol, ra i muri kut a wasiso anun a kipten ma o naro ra anun a sip. <sup>12</sup> A mulmulukun ra, ausur i wakak sur det in kis ru a kum kalang na wuwu tiro iai. Ra a susut tagun det, det nuki lena, i wakak sur det in kalabor utong o Poniks, sur det in kis langlang ru a wuwu tiro iai. O Poniks, a wakak na mulmulukun sur din bakit uni. I tantama sur a nubual ra in matanas i ser sup iai.

#### *A labino wuwu i wanpat*

<sup>13</sup> A wakak na du wuwu tagun a papor tobar i wanpat, ra det nuki lena a inawan anundet in wakak kut. Det dat pas a ega, ra det rarot nanan murmur a usalin una ailan Krit. <sup>14</sup> Ke suano i kut, a labino dekdek na wuwu i wanpat, di watungi nama Kabokup. I waim pirso tagisa una ailan ra. <sup>15</sup> A wuwu i tan kis una sip, ra ke pet lar pasi sur in nan. Ra met pukus ru a sip sur in muri mukut a wuwu. <sup>16</sup> Ra met kalabor rait una ara ailan lik, a risano o Kauda, i dekdek doko torom met sur met in dat toto a digi. <sup>17</sup> Ikut det dekdek ut ra det dat toto pasi usapat netes. Ma det rau dekdek a sip nama kum rop. Det ngara sako det in nan taru una mamaso na woio ino Sirtis milau o Afrika, ra det dat pirso ru a sel, ma a sip i salir oros mukut, ra a wuwu i wup nanan det. <sup>18</sup> Una bung numur, a sip milau in terege tana labino

wuwu, ra det turpasi sur det in woro losop ru a kum utna. <sup>19</sup> Ra i tulu bung bat met, a kum boskuru det woro losop a kum utna na sip. <sup>20</sup> Ma a susut na bung, in matanas ma a kum nangnang ka det sisio, ma a dekdek na wuwu ke mana lar pas, ka met nuki melet mo lena met in laun.

<sup>21</sup> A susut na bung ka det wangon. Numur o Pol i tur umatandet ma i watungi tandet lena, “A taro! Ra gunuk mot in longoro iau ut, ma gong dat wan taru tagitong o Krit, katu utna lenri in monong dat, ra a sip tomo nama ututna ken laulau. <sup>22</sup> Ikut uniri, a watungi tamot lena, gong mot ngara, uni katutaio tagun mot in iru, ma a sip kut in iru. <sup>23</sup> Iau anun o God, a ser muri. Nanganong una mirum, ara ensel anunu i wanpat torom iau. <sup>24</sup> I watungi tang lena, ‘Pol, gong u ngara, un tur ut una warkurai umatan a Sisa. Ma det kai ra mot tomo una sip, o God i sa pitar tar det tam, sur mot in laun rop.’ <sup>25</sup> A taro, gong mot ngara, uni a nurnur un o God lena in pam sot pas a utna ra i inanos tar iau uni. <sup>26</sup> Ikut a sip in kis ut un tu mamaso na woio milau un tu ailan.”

<sup>27</sup> Una noino ma a wat na mirum nami, a wuwu i wup nanan met utmakai una du tasi, di watungi nama Tasi Adria. Una labino mirum, a kum boskuru det nuki lena met sa salir milau tu nubual. <sup>28</sup> Ra det lar a lamano ina tasi, ra i ru noino sinanga. Numur lilik, det lar meleti, ra i noino ma aru sinanga mukut. <sup>29</sup> Ra det ngara sako met in salir taru un tu lur na mat, ra det woro losop ru a wat na ega nago numur na sip, ma det wararing sur in waspi lakit. <sup>30</sup> A kum boskuru det nem na kalabor eno gusun a sip nama digi. Det palos pirso pasi utiro utasi, ra det toro lena det in ubek lako kum ega sa numugu una sip. <sup>31</sup> O Pol i watungi tan o Julias tomo nama un a taro na inaim lena, “Ra det ri det sa kalabor eno pas gusun a sip, ka mot in laun.” <sup>32</sup> Ra a kum tene inaim det tau kutus ru a kum rop gusun a digi, ra i salir gisen mut.

<sup>33</sup> Ra a lar i dati, o Pol i watungi tandet rop lena, “Mot in nangon, uni uniri i sa noino ma a wat na bung ra mot sa kis nama nginara, ma ka mot wan tu utna. <sup>34</sup> Ra a saring pas mot sur mot in nangon, sur mot in laun. Ma katutaio tagun mot in los tu iniru.” <sup>35</sup> Ra o Pol i sa watung tari lenri, i los

† 27:9: A kum kalang numur tana Bung na Winewel i ser wuwu tong.

pas a beret, i watung wakak pas uni torom o God umatandet rop, i tibiki, ra i wangon.  
<sup>36</sup>Ra det tama i, det rop det gas, ma det kai det wangon. <sup>37</sup>Met rop una sip, met elar nama ru mar ma a wonom mawit na noino ma wonom met. <sup>38</sup>Ra det sa masur, det woro losop ru a kum bek na wit utiro utasi, sur a sip in walowalo.

*A sip i iru ma a taro det laun*

<sup>39</sup>Ra i sa waspi, det sa tama a bual, ikut ka det tama lele i. Det tama pas ara mulmulukun lik, ra nago una usalin i woio, ra det nuki lena i wakak ra det in lari sur det in ukalabor umamaso a sip tiro iai un in nowoio. <sup>40</sup>Numur det tau kutus ru a kum ega, ma det wan gusun det sa utasi, ma det palos ru i kai a kum rop gusun aru woso na sitia, ma det dat palos a mugano sel sa numugu una sip sur a wuwu in wup pirso det unago una usalin. <sup>41</sup>Ikut a sip i kis mut una mamaso na woio. A masarin a sip i kis netes taru tiro iai, ke pet lar pasi mo sur in nan. Numur a kum lamlabino toptop det pasor pagol pas a ngon a sip ra i terege mut. <sup>42</sup>Ra a kum tene inaim det nem na um doko a kum karabus, sako lako taro tagun det, det in was pirso, ma det in kalabor song. <sup>43</sup>Ikut o Julias, a mugumugu anun a kum tene inaim i nemi sur in ulaun o Pol, ra i turbat det. Ra i pitar a warkurai sur det ra det tasman a was, det in sirok losop, ma det in was mugu unago una usalin. <sup>44</sup>Ma det ra ka det tasman a was, det in was murmur nama kum palang, o lako kum utna tagun a sip. Det pami lenra, ra det rop det was pirso unago una usalin ma det laun.

28

*Tong o Malta*

<sup>1</sup>Ra met sa saur rop taru, met tasmani maragom a ailan ra, a risano o Malta. <sup>2</sup>A taro tagitiro iai det maris doko met, ra det tagol tar a sungun ma det ben pas met rop, uni i bato ma i kotokoto doko. <sup>3</sup>Ra o Pol i los pas a kabo duwai, sur in ukarangop a sungun nami, ra teken laulau na sui i kawar pat gusun a kabo duwai ra, uni a sungun i mararong, ra i kakarot dekdek taru una lamano. <sup>4</sup>A taro tagitiro iai una ailan, det tama i lena in nusui i kete taru una laman o Pol, ra det wasiso etetalai torom det lena, "Kutiro, a musano ri, a tene um doko a taro. I sa laun sikot tagisa utasi, ikut a god na minabalu ke mulaot sur in laun." <sup>5</sup>Ikut o Pol

i lakro ru in nusui gusun a lamano usapat una sungun, ma ke banlaulau i. <sup>6</sup>Det nuki lena a lamano in surung, o in puku pirso ra in mat. Ikut, det kis walango i ma i sa suano i, ma katu laulau na utna i wanpat uni, ra det pukus a nuknukindet, ra det nuki lena o Pol ara god.

<sup>7</sup>Ara mugumugu tagitiro una ailan ri, a risano o Publius, anun a du pisopi kura iai. I ben pas met utiro una nun a rumu, ma i ugargas met. Ra met kis pas a tulu bung tiro una nun a rumu. <sup>8</sup>Ma o taman o Publius i inep, i misait nama mararong, ma in balano i kalabor. Ra o Pol i ruk toromi, ra i wararing, ma i ubek aru lamano sapat netes uni, ra i ulangolango pasi. <sup>9</sup>Ra i sa pam tari lenri, a kum misait rop tagun a ailan, det wanpat ma di ulangolango det. <sup>10</sup>Ma det pam a susut na wakak na pinapam torom met sur det in ese anundet a urur. Ma numur, ra met waninar sur met in kas una sip, det tabor met nama kum utna rop ra met sibo suri.

*Tagitong o Malta utong o Rom*

<sup>11</sup>Ra i sa rop a tulu kalang, met kas una ara sip ra i kis ru a kum kalang na wuwu una ailan ra. A sip ra, tagitong o Aleksandaria ma sa numugu uni di sa tok tar a malalar ina aru kasango, aru nutun a god Sus. <sup>12</sup>Met sot pas tiro o Sirakus, ra met kis pas a tulu bung tiro iai. <sup>13</sup>Met kalabor tagitiro iai ma met sot tong o Regium. Ra una bung numur, a tobar i wanpat. Ma ara bung melet numur tano, met sot tiro o Puteoli. <sup>14</sup>Tiro iai met pastorum pas a kum tistisimet una nurnur, ra det saring met sur met in kis pas lako wonom mawit na bung nisan det. Numur met wan mo utong o Rom. <sup>15</sup>Det ra det tar tistisino una nurnur tagitiro o Rom, det longoro a wasiso un met, ra det wan barato met tong una nubual na siuru a risano o Apius, ma tong una nubual di watungi nama A tulu Rumu na Usiro. Ra o Pol i tama pas det, i watung wakak torom o God. Ma a kum pinapam ra, i udekdek anun a nilaun.

*O Pol i kis tong o Rom*

<sup>16</sup>Ra met sa wanpat tong o Rom, di mulaot tar o Pol sur i kut in kis un tu rumu, ma tu tene inaim in tamtabati.

<sup>17</sup>Ra a tulu bung i sa rop, o Pol i kabo tomo pas a kum mugumugu anun a taro Juda. Ra det wanpat tomo, i watungi tandet lena,

“A kum tistising, ka banlaulau anundat a taro, o lako kum petutna kai anun a kum tumtubundat tagun numugu. Ikut det pam ukai pas iau sapat o Jerusalem, ma det pitar tar iau torom a taro Rom. <sup>18</sup> Ra a taro Rom det sa longoro tar anung a wasiso ra a wasiso bat iau nami, det nemi sur det in palos ru iau, uni ka det sio pas tu utna ra din um doko iau uni. <sup>19</sup> Ra a taro Juda ka det mulaot, ka sio pas tu kisapi sur an langolango uni, ra a sasaring sur a Sisa in warkurai iau. Ikut katu sakino utna ra an takun anung a taro uni. <sup>20</sup> A itula sur mot, sur dat in kis tomo ma an wasiso talapor una kibino ra di sen ukai tar iau. Di sen ukai tar iau uni a kis langlang nama nurnur sur o naro ra a taro Israel kai det kis langlang suri.”

<sup>21</sup> Ra det watungi tano lena, “Katu pas tagisa o Judia i wanpat torom met un ui, ma katu tisimet kai i wanpat nam tu wasiso tagisa un ui, o tu wasiso un tu sakino utna ra u pam tari. <sup>22</sup> Met nemi sur met in longoro a nuknukim, uni met sa tasmani lena, una kum tamtamon rop di watung laulau a matok na lotu ri.”

<sup>23</sup> Det nam o Pol det kubus pas ara bung sur det in wasiso. A susut na taro det wanpat toromi, una rumu ra i kis uni. I turpas a wasiso una kobot ma i tuk una lirop. I papalos torom det una matanitu anun o God. Ma i papalos utkai una kum Warkurai anun o Moses ma a kum tumtumus anun a kum poropet, sur in ukatutur a nuknukindet sur det in nurnur un o Iesu.

<sup>24</sup> A ramano taro tagun det, det nurnur un asau ra o Pol i watungi, ikut ara taro kai, ka det nurnur. <sup>25</sup> Det engaras epotor tandet ra det katutur na inawan. Ikut numugu ra ka det wan utmakai, o Pol i watung a tintinip na wasiso tandet lena, “A lingmulus ut ra a Tokodos na Nion i wasiso una wan a poropet Aisaia, torom a tumtubumot tagun numugu lena, <sup>26</sup> Un nan torom a taro ri ma un inanos det lena,

Mot in longlongoro, ikut ka mot in longoro lele i,  
mot in tamtama, ikut ka mot in tama lele i.

<sup>27</sup> Uni a balan a taro ri i dekdek,  
ma a taltalngandet i kutkut,  
ma a matmatandet i pulu.

Ra gunuk det in tamtama lele nama matandet,  
ma det in longoro lele nama talngandet,  
ma det in tastasman una nuknukindet,  
ma det in tupukus, iau ut an ulaun pas det.” *Aisaia 6:9-10*

<sup>28-29</sup> Ra o Pol i watungi tandet lena, “Mot in tasmani lena, a pinapam anun o God ra i ulaun pas a taro, i sa wan torom det ra ausur a taro Juda. Ra det, det na rakoni!”\*

<sup>30</sup> Aru kudulano kilalo, o Pol i kis una rumu ra i ut i ser tokomi, ma i gas pas a taro rop ra det wanan pat toromi. <sup>31</sup> Ra i ser warawai una matanitu anun o God, ma i ser ususer a taro una Labino o Iesu Karisito, ma ke ngara, ma kataio kai i turbati.

\* 28:28-29: A ramano kum tene mananos una Buk Tabu det nuki lena a ramano kum wasiso kai i kis una dino ri. I lenri: *Numur tana nun a wasiso, a taro Juda det wan susuaro, ma det engaras dekdek epotor tandet.*

## A Mugano Pas anun o Pol torom a taro Korin

### *A wasiso talapor mugu*

Ra o Pol i kis tong o Epeses, i tumus a pas ri torom a taro na lotu tong o Korin.

O Korin i a labino tamon ra i kis nago utasi, una papor Akaia. A tamon anun a taro Grik, ikut a susut na taro Juda kai det kis tiro iai.

O Pol i wan utong o Korin una nun a manru na inawan, ra i warawai nama Wakak na Wasiso torom det. I kis ara kilalo ma ara kukur tong, ma i ususer det (tama Ap 18:1-17). Numur, o Apolos i wan torom det (tama Ap 18:27).

O Pol i tumus a pas ri uni i longoro a wasiso una nundet a kum petutna ra i ukis susuaro det (tama 1Kor 1:10).

O Pol i tumtumus kai sur in balu anundet a pas ra det sa tumus tari toromi (tama 1Kor 7:1 ma 8:1).

A inawan ina Mugano Buk Korin:

A turturkibin ina buk ri (1:1-9)

A kinkinis susuaro anun a taro na lotu (1:10-4:21)

A kum sakino petutna ra ara taro na nurnur det pami (5:1-6:20)

A ususer una kinkinis na nolin (7:1-40)

Gong dat lotu torom a Labino ma torom a kum laulau na nion kai (8:1-11:1)

A kum warkurai na lotu, ma a kum etabor anun a Tokodos na Nion (11:2-14:40)

A katkatatur melet anun o Iesu, ma a taro na nurnur kai (15:1-58)

A etabor torom a taro na nurnur sa o Judia (16:1-4)

A tintinip na wasiso anun o Pol torom det (16:5-24)

<sup>1</sup> Iau o Pol, ra o God i kabo pas iau, elar ut nam anun a nemnem sur an aposel anun o Karisito Iesu. Mir nam o Sostenes a tisindat, mir tumtumus <sup>2</sup>torom mot a taro na lotu anun o God ra mot kis tiro o Korin. Mot ra o Karisito Iesu i utalapor pas mot, ma i kabo pas mot sur mot a taro anun o God. Mot a taro anun o God tomo nama taro rop una kum tamon rop ra det lotu una risan anundat a Labino o Iesu Karisito, i ra a Labino anundet ma anundat kai.

<sup>3</sup> A marmaris ma a malmal tan o God a Tamandat ma a Labino o Iesu Karisito, in kis torom mot.

*O Pol i watung wakak torom o God una taro Korin*

<sup>4</sup> A ser watung wakak torom o God un mot, kibino una nun a marmaris ra i pitar tari torom mot un o Karisito Iesu. <sup>5</sup> Uni una numot a kinkinis tomo nama Karisito, o God i udan mot nama kum utna rop. Mot dan uni i warut mot sur mot in wasiso puaso uni, ma i pitar tar a mananos torom mot. <sup>6</sup> I pami lenra uni a wasiso talapor una Karisito, ra met sa inanos tar mot uni, i sa wanpat talapor una numot a nilaun. <sup>7</sup> Ra i lenra, ka mot in sibo sur tu etabor anun a Tokodos na Nion torom mot, ra mot kiskis langlang nama gasgas sur anundat a Labino o Iesu Karisito ra in nanpat talapor. <sup>8</sup> I ut in udekdek mot tuk una tintinip na bung, sur katu utna ra din takun mot uni una bung anun anundat a Labino o Iesu Karisito. <sup>9</sup> Ma a utna ri ra o God i watungi in pami ut. Ra i kabo pas mot sur mot in lason tomo nama Nutunu o Iesu Karisito anundat a Labino.

### *A taro na lotu det taptapagol*

<sup>10</sup> A kum tistising, a saring mot nama risan anundat a Labino o Iesu Karisito, sur mot rop mot in tur tomo, ma gong mot wan sarara. Ma in takai kut a nuknukimot, ma anumot a nemnem kai. <sup>11</sup> A kum tistising, ara taro ra det kis una rumu anun o Kloe, det inanos iau lena mot ser engaras etetalai. <sup>12</sup> An palos a kukurain a wasiso ri lena: Ara taro tagun mot det watungi lena, "A mur o Pol," ara taro det watungi lena, "A mur o Apolos," ara taro det watungi lena, "A mur o Pita," ma ara taro kai det watungi lena, "A mur o Karisito."

<sup>13</sup> Pepetlai, o Karisito i sa taptapagol? Pepetlai, di sak wat o Pol un in nanai kutus un mot? Pepetlai, di baptaiso mot nama risan o Pol? <sup>14</sup> A watung wakak torom o God uni ka baptaiso tar taio tagun mot. O Krispus kut ma o Gaius ra a baptaiso der. <sup>15</sup> I lenra, katutaio tagun mot in pet lar pasi sur in watungi lena, di baptaiso i nama risang. <sup>16</sup> A lingmulus, a baptaiso det kai ra det kis una rumu anun o Stepanas, ma ka tasmani ra a sa baptaiso tar taio kai o awu. <sup>17</sup> Uni o Karisito ke tulu iau sur an baptaiso, awu. I tulu iau sur an warawai nama Wakak na Wasiso. Ma ausur an warawai nama wasiso na mananos anun a taro, surko in lakro ru a

dekdekin in nanai kutus anun o Karisito ra in utna oros kut.

*O Karisito i a dekdekin o God ma a mananos anun o God*

<sup>18</sup>Uni a wasiso un in nanai kutus, a longlong na wasiso kut torom det ra det wan sur a iniru. Ikut, torom dat ra o God i ulaun dat, a wasiso un in nanai kutus, i a dekdekin o God. <sup>19</sup>Uni o God i sa watung tari una Buk Tabu lenri,

“An kamar ru a mananos anun a kum tene mananos, ma an upuku ru a wakak na nuknuk anundet ra det tastasman.” *Aisaia 29:14*

<sup>20</sup>Asau dat in watungi un tu tene mananos? Asau dat in watungi un tu tene mananos una kum Warkurai anun o Moses? Asau dat in watungi un tu tene mananos ra in balu rop pas a kum iting? O God i ese i lena, a mananos tagun a rakrakon bual i a longlong na mananos kut. <sup>21</sup>Uni, una mananos anun o God, i pami sur a taro una rakrakon bual ka det in pet lari sur det in tasman o God una mananos anundeti ut. A wasiso ra met warawai nami, a taro det nuki lena a longlong na wasiso, ikut, una wasiso ra, o God i gas sur in ulaun det ra det nurnur.

<sup>22</sup>A lingmulus, a taro Juda det nem na tama lako kum ukinalong, ma a taro Grik det sisio sur tu mananos. <sup>23</sup>Ikut met, met warawai kut un o Karisito, i ra di sak wati un in nanai kutus. A warawai ri, a taro Juda det ngeti, ma torom det, i elar nama wat ra det puku taru uni, ma i elar kut nama longlong na wasiso torom a taro ra ausur a taro Juda. <sup>24</sup>Ikut, o Karisito a dekdekin o God, ma a mananos anun o God, torom a taro ra o God i kabo pas det. A taro ra, tagun a taro Juda ma tagun a taro Grik. <sup>25</sup>A mananos anun o God ra a taro det nuki lena a longlong na mananos kut, i ra i labo taun a mananos anun a taro. A dekdekin o God ra a taro det nuki lena ke dekdek, i ra i dekdek sakit taun a dekdekin a taro.

<sup>26</sup>A kum tistising, mot in nuki lena mot asi na ngas na taro ra o God i kabo pas mot. Ausur a susut tagun mot a kum tene mananos umatana taro. Ausur a susut tagun mot, mot utur ukai a dekdek sur mot in mugu a taro. Ma ausur kai a susut tagun mot tagun a kum kabotaro ra det labo umatana taro. <sup>27</sup>Ikut o God i pilok pas a utna ra a taro det nuki lena a longlong

na utna sur in ban umaimai a kum tene mananos. Ma o God i pilok pasi kai a kum utna ra a taro det nuki lena ke dekdek sur in ban umaimai det ra det dekdek. <sup>28</sup>O God i pilok pas a kum utna ra a taro tagun a rakrakon bual det unatino pasi, ma a kum utna ra det ngeti, ma a kum utna ra det nuki lena a kum utna oros kut, sur a kum utna ra i labo torom det in utna oros mukut. <sup>29</sup>I pami lenra sur gong taio i warango pasi ut umatana o God.

<sup>30</sup>O God ut i sa pam tar a kisapi sur mot in laun tomo nama Karisito Iesu, ma i pitar tari sur i a kimkibin anundat a mananos. Un o Karisito, o God i watung dat lena dat tokodos umatana, ma dat anun a taro. Ma una pinapam anun o Karisito, o God i kul ulangolango pas dat gusun anundat a kum sakino petutna. <sup>31</sup>Dat in pami elar nami ra di sa tumus tari una Buk Tabu lena, “Osi ra i nemi sur in warango pasi, i wakak sur in warango pas a utna ra a Labino i sa pam tari.” *Jer 9:24*

## 2

<sup>1</sup>A kum tistising, ra a wanpat torom mot nama wasiso talapor un o God, ka wasiso nam a ngas na wasiso ra a uman labo pas iau nami, ma ka wasiso nam a ngas na wasiso ra a kum tene mananos det ser wasiso nami. <sup>2</sup>Ra a kis tomo nam mot, ka nem na nuknuk un tu utna gisen, awu. A nuknuking i kis kut un o Iesu Karisito ma una nun a minat un in nanai kutus. <sup>3</sup>Ra a wanpat torom mot, katu dekdeking, a ngara ma a neneder doko. <sup>4</sup>Ra a wasiso ma a warawai, ka wasiso nama wasiso na mananos anun a taro, ma ka wasiso nama ngas na wasiso ra in dat a nuknukin a taro, awu. A dekdekin a Tokodos na Nion i ulingmulus anung a wasiso, <sup>5</sup>sur anumot a nurnur un o Karisito ken kibino pas una mananos anun a taro, awu, una dekdekin o God ut.

*A Nion o God i pitar a mananos torom dat*

<sup>6</sup>Ikut, met wasiso na mananos ut epotor nisan a taro ra det tur dekdek una nurnur. A mananos ri, ausur taginin a rakrakon bual, ma ausur tan a kum mugumugu taginin upiso, ra anundet a warkurai in rop kut. <sup>7</sup>A mananos ri met wasiso nami, i a mananos anun o God, a wasiso na pidik, ra numugu i bakit utmakai. Una nun a mananos, i waninar tar a kisapi sur in pitar a minamar torom dat. I sa waninar tari numnumugu utmakai ra ke ukis utmakai a

rakrakon bual. <sup>8</sup> Katu mugumugu taginin una rakrakon bual i tasman a mananos ri. Ra gunuk det sa tasman tari, ka det in sak wat a Labino tagun a minamar un in nanai kutus. <sup>9</sup> Ikut, i elar nam a wasiso ra di sa tumus tari una Buk Tabu lenri, "A kum utna ra kataio i tama i, ma kataio i longoro i, ma ke wanpat gusun a nuknukin taio, a kum utna ra, o God i sa waninar tari sur det ra det nem doko i." *Aisaia 64:4*

<sup>10</sup> Ikut a Nion o God i upuaso a kum utna ri torom met. Uni a Tokodos na Nion i tasman a kum utna rop. Lingmulus, i tasmani ut a kum ninunuk na pidik anun o God. <sup>11</sup> Osi ra i tasman a nuknukin taio? A nion a musano sot kut, ra i kis uni, i tasmani. Lenkutkai ra, kataio i tasman a nuknukin o God. A Nion o God sot kut i tasmani. <sup>12</sup> Ma met, ka met utur ukai a nion taginin una rakrakon bual, awu. O God i tabor met nama Tokodos na Nion, sur met in tasman lele a kum etabor rop ra i tabor oros tar met kut nami. <sup>13</sup> Met wasiso una kum etabor ri, ikut ka met wasiso nama kum wasiso na mananos anun a taro, awu. Met wasiso nama kum wasiso ra a Tokodos na Nion ut i ususer met nami. Met watung palos a kum etowo na nion torom a taro ra a Tokodos na Nion i kis un det.

<sup>14</sup> Ikut, osi ra a Tokodos na Nion ke kis uni, ken utur ukai a kum etowo, ra i wanpat gusun a Nion o God. Uni a kum etowo ra, a kum longlong na utna kut toromi. Ma ken tasman lele a kum etowo, uni a Tokodos na Nion ke kis uni sur in utalapor toromi. <sup>15</sup> Osi ra a Tokodos na Nion kura uni, in tasman lele a kum utna rop ra i wakak o ke wakak. Ikut, kataio in pet lar pasi sur in lar a musano ra Tokodos na Nion kura uni. <sup>16</sup> Elar nama Buk Tabu i watungi lena, "Osi ra i tasman a nuknukin a Labino, sur in towo pasi?" *Aisaia 40:13*  
Ikut dat, dat sa utur ukai a nuknukin o Karisito.

### 3

#### *Papam tomo una pinapam anun o God*

<sup>1</sup> A kum tistising, numugu ka wasiso lar pas torom mot lenlar a taro ra a Tokodos na Nion i kis un det. A wasiso torom mot elar kut nami ra torom a taro taginin una rakrakon bual, ra mot a kum nat liklik utmakai una kinkinis tomo nam o Karisito. <sup>2</sup> A tabor mot kut nama polo na sus, asur nama dekdek na utna na inangon, uni ka mot dekdek utmakai suri. Lingmulus, tuk

uniri, ka mot dekdek utmakai. <sup>3</sup> Mot murmur utmakai a kum petutna taginin una rakrakon bual. I talapor lena mot laun utmakai elar nama taro taginin una rakrakon bual, uni mot ser nuknuk laulau ma mot ser wasiso na kankan etetalai. Mot laun elar nam det ra ka det nurnur. <sup>4</sup> Ra taio i watungi lena, "A mur o Pol," ma taio kai i watungi lena, "A mur o Apolos," mot wasiso kut elar nama taro taginin una rakrakon bual.

<sup>5</sup> Osi ra o Apolos? Ma osi kai o Pol? Mir aru tultul kut anun o God, ra mot nurnur un o Karisito i kibino una numir a pinapam. Mir taktakai mir pam a pinapam ra a Labino i pitar tari torom mir. <sup>6</sup> A marut a wino, o Apolos i pukpuki nama danim, ikut o God ut i ulubung pasi. <sup>7</sup> Lenra o naro ra i marmarut ma o naro kai ra i pukpuki ka der labo. O God kut i labo, i ra i ulubungi. <sup>8</sup> O naro ra i marmarut ma o naro ra i pukpuki, a nuknukinder i takai kut. Ma der in los anunder a ikul elar ut nama nunder arara pinapam. <sup>9</sup> Uni mir aru tene pinapam tomo anun o God. Ma mot, mot elar nama kinobot anun o God, ma mot elar kai nama rumu anun o God ra i papam nanan uni.

<sup>10</sup> Kibino una marmaris anun o God ra i sa pitar tari tang, a papam elar nama tene pam rumu ra i mananos. A sa utur tar a kibin a rumu, ra ara taro bulung det papam netes uni. Det rop taktakai ra det papam netes uni, det in tumarong det una si na ngas na pinapam ra det in pami. <sup>11</sup> Uni o God i sa ukis tar o Iesu Karisito, i a kibin a rumu, ma ka din pam melet lar pas tu kibino gisen. <sup>12</sup> Ra taio in papam netes una kibin a rumu ri nam a gol, o a silwa, o a kum wat ra a matandet i ka, o a duwai, o a re, o a kum luluano wit <sup>13</sup> din upuaso anun a ngas na pinapam una bung na warkurai. Din upuaso i nama sungun, ma a sungun ra in lar a ngas na pinapam anun arara taktakai. <sup>14</sup> Ra a pinapam anun taio in winim pas a sungun, in los pasi ut anun a ikul uni. <sup>15</sup> Ikut ra a sungun in tun rop ru anun a pinapam, anun a pinapam in utna oros mukut. O God in ulaun pas a tene pinapam ra, ikut in elar mukut nama musano ra di ulaun pasi gusun a sungun.

<sup>16</sup> Pepetlai, ka mot tasmani lena mot a rumu anun o God, ma a Nion o God kura un mot? <sup>17</sup> Ra taio in banlaulau a rumu anun o God, o God in banlaulau a musano ra. Uni a rumu anun o God i talapor, ma mot ut a rumu ra.

<sup>18</sup> Gong mot toro mot ut melet. Ra taio tagun mot i nuki lena i mananos nama ngas na mananos taginin una rakrakon bual, i wakak sur in longlong umatan a taro, sur in mananos mulus umatan o God. <sup>19</sup> Uni a mananos tagun a rakrakon bual ri, i a longlong na utna kut umatan o God. Elar nami ra di sa tumus tari una Buk Tabu lena, “I ser kun ukai pas a kum tene mananos nama nundet a mananos ut.” *Jop 5:13*

<sup>20</sup> Ma di sa tumus tari kai una Buk Tabu lena, “A Labino i tasmani lena a nuknukin a kum tene mananos, katu utna i gas uni.” *Buk Song 94:11*

<sup>21</sup> Lenra, gong taio i ulabo pas tu musano. Uni a kum utna rop anumot ut: <sup>22</sup> O Pol, o Apolos, o Pita, a rakrakon bual, a nilaun, a minat, a kum utna tagun uniri, ma a kum utna ra in nanpat numur, anumot rop kut. <sup>23</sup> Ma mot anun o Karisito, ma o Karisito anun o God.

## 4

*A kum aposel anun o Karisito*

<sup>1</sup> I wakak sur mot in nuknuk un met lar met, a kum tultul anun o Karisito, ra o God i pitar tar anun a kum wasiso na pidik torom sur met in upuaso i torom a taro. <sup>2</sup> Det ra di sa pitar tar lako kum pinapam tandet, det in lingmulus uni. <sup>3</sup> Ka nuk bing pasi ra mot in kuro iau, o an tur umatan a warkurai sur a taro kai det in kuro iau. Lingmulus, iau kai ka kuro iau. <sup>4</sup> Uni ka nuk pas tu utna ra a raro uni, ikut a nuknuking ri ken ulangolango ru iau. A Labino ut in kuro iau. <sup>5</sup> Gong mot warkurai taio numugu tana bung na warkurai. Mot in kis langlang tuk ra a Labino in nanpat. Ra i ut in utalapor a kum utna ra i parau una dummer, ra in upuaso a nuknukin a taro. Ma una bung ra, o God in watung ulabo pas a taro, elar ut nama nundet a kum pinapam taktakai.

<sup>6</sup> A kum tistising, a sa watung tar a kum wasiso ri un mir nam o Apolos sur in warut mot ma in ususer mot, sur mot in talapor una kukurai na wasiso ri: “Mot in muri kut a wasiso na Buk Tabu, ma gong mot ubek tar tu du wasiso kai.” Ra mot in muri lenra, katutaio tagun mot in ulabo pas ara, ma in unatino pas ara kai. <sup>7</sup> Osi ra i watungi lena ui u wakak tan tu pasandet? Asau ra anumi ra o God ke pitar tari tam? Ra o God i sa pitar tar a kum utna tam, i lai ra u ulabo pas ui nami?

<sup>8</sup> Kutiro mot sa utur ukai a kum utna rop ra mot nemi? Kutiro mot sa tene gongon? Mot nuki lena mot kis elar nama kum king, ma met awu. A nemi lena mot in kis na king mulus, sur met kai met in kis na king tomo nam mot. Ikut awu. <sup>9</sup> Uni a nuki lena o God i ubek tar met a kum aposel, sur met in musano oros kut. Met elar nama kum karabus ra di sa kuro tar det sur det in mat ma din urongon un det. A taro ma a kum ensel kai det in tama det.

<sup>10</sup> A taro det nuki lena met a kum longlong uni met ser mur o Karisito. Ikut mot, mot nuki lena mot sa mananos rop una numot a nilaun un o Karisito. Met, ka met dekdek, ikut mot, mot nuki lena mot dekdek. Mot, di ulabo pas mot, ikut met, ka di ulabo pas met. <sup>11</sup> Tuk uniri met murak, ma met muruk, met pipis a kum tartararos na malu, di um laulau met, ma ka tu rumu anumet. <sup>12</sup> Met papam dekdek nama kum lamamet ut. Ra det watung laulau met, met watung udan det. Ra det ukadik met, ka met balu det. <sup>13</sup> Ra det mang laulau met, met balu det kut nama kum wasiso na marmaris. Tuk uniri met elar nama beren tagun a rakrakon bual, ma elar nama utna ra i mereseng ra di woro ru i.

*O Pol i saring a taro Korin sur det in mur anun a petutna*

<sup>14</sup> Ka tumus a kum wasiso ri sur an ban umaimai mot nami. A tumusi sur an ukodos mot, uni mot elar nama kum nutnutung ra a nem doko mot. <sup>15</sup> Kutiro ra anumot noino arip na tene tamtamabat, ra det tamtamabat anumot a nilaun un o Karisito, ikut kalako susut na tamtamamot. Un o Karisito Iesu, iau a tamamot, uni a los a Wakak na Wasiso torom mot. <sup>16</sup> Ra a udekdek pas mot sur mot in mur anung a petutna. <sup>17</sup> Iri i a kibino ra a tulu ru o Timoti torom mot. I a nutung ra a nem doko i, ma i ser lingmulus una pinapam anun a Labino. In unuk tar mot melet una nung a kum petutna, ra i kibino pas tagun anung a kinkinis tomo nam o Karisito Iesu. Anung a petutna i elar nam anung a etowo torom a taro na lotu una kum tamtamamot rop.

<sup>18</sup> Ara taro tagun mot det ulabo pas det ut, uni det nuki lena kan milet melet mo torom mot. <sup>19</sup> Ikut, milau mo an milet melet torom mot, ra ut ra a Labino i nemi. Ra an nanpat, kan mananos kut una wasiso anun a taro ra det ulabo pas det ut, awu. An mananos utkai una dekdek ra det papam nami. <sup>20</sup> Uni

a matanitu anun o God ausur a wasiso, a dekdekino ut ra. <sup>21</sup> Asau ra mot nemi? An nanpat torom mot nam in kadas, o nam a marmaris ma a wowowon na petutna?

## 5

*Din rakon ru ara tene lotu ra i pam a pamuk na petutna*

<sup>1</sup> A longoro i lena a pamuk na petutna kura i kis epotor torom mot. Ara tagun mot i pam a sakino tomo nam a ino anun o tamano. A taro ra ka det nurnur, ka det ser pam a sakino petutna lenra. <sup>2</sup> Ikut mot, mot ulabo pas mot uni! Ilai ra ka mot tangis na maimai uni? Ma ilai ra ka mot rakon ru a musano ra gusun mot? <sup>3</sup> A lingmulus, una pining a kis gisen gusun mot, ikut una niong a kis tomo ut nam mot. Ma a sa pitar tar a warkurai un o naro ra i pam tar a sakino petutna ra, elar nami ra a kis tomo ut nam mot. <sup>4</sup> Ra mot in nanpat tomo a risan anundat a Labino o Iesu, ma an kis tomo ut nam mot una niong, ma a dekdek ina Labino o Iesu kai in kis tomo nam mot, <sup>5</sup> mot in pitar tar a musano ra ulaman o Satan, sur din banlaulau a pinino, ma o God in ulaun pas a niono una bung ra a Labino in nanpat melet.

<sup>6</sup> Ke wakak ra mot ulabo pas mot ut. Pepetlai, ka mot tasmani lena ra lakalik nat na is kut, in ulabo rop pas a palawa? <sup>7</sup> Mot in rakon ru a is ra i sa turai, sur mot in elar nama matok na palawa ra kalako is uni. A lingmulus ut, kalako is un mot. Uni di sa pitar tar o Karisito sur anundat a etabor torom o God, elar nama sipsip ra di etabor nami una labino bung na lotu na Wanlakai. \* <sup>8</sup> I wakak sur anundat a nilaun in elar nama taro ra det pam a labino bung na lotu na Wanlakai. Gong dat pami nama is ra i sa turai. I ra a sakino petutna ma a dur na petutna. Dat in pami ut nama beret ra kalako is uni. I ra a tokodos na petutna ma i lingmulus.

<sup>9</sup> Una ara pas munung ra a sa tumus tari torom mot, a sa inanos tar mot lena, gong mot lason tomo nama taro ra det pam a kum pamuk na petutna. <sup>10</sup> Ausur a kukuraino lena, gong mot lason tomo nama taro tagun a rakrakon bual, ra det ser pam a kum pamuk na petutna, o a kum muk, o

a kum tene wolong, o det ra det ser lotu torom a kum torotoro na god, awu. Uni ka dat in nan gisen lar pas gusun det, uni dat lalaun tomo ut nin una rakrakon bual. <sup>11</sup> Ikut a tumtumus torom mot, sur gong mot lason tomo nam det ra det watungi lena det a kum tistisindat una nurnur, ikut det ser pam a kum sakino petutna lenri: Det ser pam a kum pamuk na petutna, det ser nemnem sur a kum utna ra det in tene gongon nami, det ser lotu torom a kum torotoro na god, det ser mang laulau a taro, det a kum tene ininun ma a kum tene wolong. Ma gong kai mot watungon tomo nam a ngas na taro lenra.

<sup>12-13</sup> Sur asau ra an warkurai a taro, ra ausur det tagun dat a taro na lotu? O God ut in warkurai det. Ikut in wakak sur mot in warkurai det ut ra tagun dat a taro na lotu. Mot in pami elar nami ra di sa tumus tari una Buk Tabu lenri, "Mot in lakro ru a sakino musano gusun mot." *Lo 17:7*

## 6

*Gong a taro na nurnur det ubek det melet ut una warkurai*

<sup>1</sup> Ra ara tagun mot, anunu tu maut torom tu pasano una nurnur, sur asau ra in losi torom det ra ka det nurnur, sur det in warkurai i, ma ausur torom a taro anun o God? <sup>2</sup> Pepetlai, ka mot tasmani lena a taro anun o God det in warkurai a rakrakon bual? Ma ra mot in warkurai a rakrakon bual, ilai ra ka mot pet lar pasi sur mot in ukodos a kum natnat na mamaut? <sup>3</sup> Pepetlai, ka mot tasmani lena numur dat in warkurai a kum ensel? Ra in lenra, ilai ra ka dat pet lar pasi sur dat in ukodos a kum utna tagun a nilaun uniri? <sup>4</sup> Ra anumot lako kum mamaut tagun a nilaun uniri, sur asau ra mot losi torom det ra a taro na lotu ka det ru pas det, sur det in warkurai i? <sup>5</sup> A watungi lenri torom mot sur mot in maimai uni. Pepetlai, kataio tagun mot i mananos sur in pam a warkurai una kum mamaut epotor tan a kum tene nurnur? <sup>6</sup> Ilai ra tu tene nurnur in ben melet tar ara tene nurnur torom det ra ka det nurnur, sur det in warkurai i?

<sup>7</sup> A ngasino ri mot murmuri ra mot ubek mot melet ut una warkurai, i upuaso i lena

\* <sup>5:7</sup>: Ra a taro Juda det waninar sur a labino bung na lotu na Wanlakai, det rakon rop ru a is gusun a kum rumu anundet, ma una wonom mawit na bung det wan a beret ra kalako is uni. A tumtumus anun o Pol una petutna ra a taro Juda det ser muri, i a wasiso elelar sur a taro na lotu tiro Korin det in rakon rop ru a kum sakino petutna anundet.

mot sa puku. Ilai ra ka mot madek ru det ra det pam a sakino torom mot? I lai ra ka mot madek ru det ra det wolong mot? <sup>8</sup>Ikut, mot a taro na nurun, mot ut mot pam a sakino torom mot, ma mot wolong etetalai mot.

<sup>9</sup>Pepetlai, ka mot tasmani lena det ra det pam a sakino ka det in rakon a matanitu anun o God? Gong mot toro mot ut. Uni det ra det pam a kum pamuk na petutna, ma det ra det lotu torom a kum torotoro na god, ma det ra ka det ru a kinkinis na nolin, ma det ra a kum pamuk na musano ra det siuru a pinpinindet, ma a kum musano ra det nolin melet nam a kum musano, <sup>10</sup>ma a kum tene wolong, ma a kum muk, ma a kum tene ininum, ma det ra det emang, ma det ra det ras pas a ututna ra ausur anundet, det rop ra, ka det in rakon a matanitu anun o God.

<sup>11</sup>Ara taro tagun mot, numugu mot ser pam a kum ngasino ri. Ikut, una risan a Labino o Iesu Karisito, ma una Niono God anundat, o God i sa gos talapor pas mot gusun anumot a kum sakino petutna, sur mot anun a taro, ma i sa utokodos tar mot sur in watung mot lena mot sa tokodos.

*Dat in ulabo pas o God nama pinindat*

<sup>12</sup>Sako taio in watungi lenri, "A kum utna rop i wakak kut sur an pami." Ikut ausur a kum utna rop in waruti. A kum utna rop i wakak kut sur an pami, ikut kan madek pas tu utna sur in mugu iau. <sup>13</sup>Sako taio in watungi kai lenri, "A utna na inangon sur a balandat, ma a balandat sur a utna na inangon." Ikut o God in kamar rop ru der. A pinindat ausur sur din pam a kum pamuk na petutna, awu, sur a Labino ut, ma a Labino sur a pinindat. <sup>14</sup>Una dekdekin o God ut, i ukatutur melet pas a Labino gusun a minat, ma dat kai in ukatutur melet pas dat. <sup>15</sup>Pepetlai, ka mot tasmani lena a kum du pinimot det a kum du pinin o Karisito ut? Pepetlai, an upitapo pas lako kum du pinin o Karisito tomo nama pamuk na ino sur der in takai mukut? Awu, ken elar mulus! <sup>16</sup>Pepetlai, ka mot tasmani lena asi ra i upitapo i nama pamuk na ino, der ara pininder mukut nama pamuk na ino? Uni a Buk Tabu i watungi lenri, "Aru der in takai mukut."

*Stat 2:24*

<sup>17</sup>Ikut, asi ra i upitapo i una Labino, der ara nionder kut nama Labino.

<sup>18</sup>Mot in nan gisen gusun a kum pamuk na petutna. A kum sakino petutna gisen ra taio i pami, ka det kis una pinino. Ikut,

ra taio in pam a kum pamuk na petutna, i pam a sakino una pinino ut. <sup>19</sup>Pepetlai, ka mot tasmani lena a pinimot i a rumu anun a Tokodos na Nion? A Tokodos na Nion ra i kis un mot, o God i sa tabor tar mot nami. Mot ut ausur anumot, <sup>20</sup>uni o God i sa kul pas mot nama labino kunukul doko. I mo ra mot in ulabo pas o God nama pinimot.

7

*A kum etowo una kinkinis na nolin*

<sup>1</sup>Uniri an balu a kum utna ra mot tum-tumus suri torom iau: In wakak torom a musano ra ke nolin. <sup>2</sup>Ikut, kibino una kum pamuk na petutna ra kura, i wakak sur arara musano in nolin nam anun a ino ut, ma arara ino kai in nolin nama nun a musano ut. <sup>3</sup>Gong a musano i putut bat a pinino gusun anun a ino, ma lenkutkai ra, gong a ino i putut bat a pinino gusun anun a musano. <sup>4</sup>A ino ra i nolin, ke warkurai sur a pinino, awu. Anun a musano i warkurai suri. Ma lenkutkai ra, a musano ra i nolin, ke warkurai sur a pinino, awu. Anun a ino i warkurai suri. <sup>5</sup>Gong der putut bat a pininder gusun der etalai. Ikut, i wakak kut ra der rop der in mulaot sur der in utabu i munung a pininder gusun der etalai, sur der in wararing. Ikut, numur der in madek melet a pininder torom der etalai, sur gong o Satan i ulam tar der, ma der in puku, uni ka der warkurai kodos a nemnem in a pininder. <sup>6</sup>A watung a wasiso ri torom mot sur in warut mot, ausur sur in elar nama warkurai torom mot. <sup>7</sup>A nemi lena a taro rop det in elar nam iau ra ka nolin. Ikut o God i pitar tar a kum etabor torom a taro rop taktakai. Ara i los ara ngas na etabor, ma ara kai i los a se etabor.

<sup>8</sup>Ma a watungi tandet ra ka det nolin ma torom a kum ula lena, i wakak sur det in kis ut lenra, elar nam iau. <sup>9</sup>Ikut ra ka det pet lar pasi sur det in warkurai kodos a nemnem in a pinindet, i wakak kut sur det in nolin. Uni i wakak ra det in nolin, sur gong a nemnem in a pinindet i ukatutur a balandet.

<sup>10</sup>Torom det kai ra det nolin, a pitar a warkurai ri. Ma ausur iau, a Labino ut i pitari. Gong tu ino i wan pas gusun anun a musano. <sup>11</sup>Ikut, ra in nan pas gusuni, gong i nolin melet. Ma ra i nemi sur in nolin melet, in millet melet torom anun a musano ma der in ukodos anunder a kinkinis na nolin. Ma gong kai tu musano i lu ru anun a ino.

<sup>12</sup> A watungi torom a ramano taro kai. Ausur a Labino i watungi, iau ut a watungi lenri: Ra tu tisindat una nurnur, anun a ino ausur a tene nurnur, ma a ino ra i nemi sur der in kis tomo, gong a tisindat ra i lu ru i.

<sup>13</sup> Ra tu ino, a tene nurnur, ra anun a musano ausur a tene nurnur, ma a musano ra i nemi sur der in kis tomo, gong a ino ra i wan pas gusuni. <sup>14</sup> Uni a musano ra ausur a tene nurnur, i anun o God, kibino un anun a ino ra i nurnur, ma a ino ra ausur a tene nurnur, i anun o God, kibino un anun a musano ra i nurnur.\* Ra awu, a kum nutnutumot det in dur. Ikut, det sa talapor, det a taro anun o God.

<sup>15</sup> Ikut, ra aru suano ra tu pasander ra ke nurnur i nem na wan gusun ara pasander, maked ru i in nan. Ra in nan, anun a musano o anun a ino, ra i tene nurnur, in langolango gusun anunder a kinkinis na nolin. Uni o God i sa kabo pas dat sur dat in kis na malmal. <sup>16</sup> Ui a ino, ko tasmani ra un warut anum a musano sur in tene nurnur o awu. Ma ui kai a musano, ko tasmani ra un warut anum a ino sur in tene nurnur o awu.

*Dat in laun elar nama ngas na kinkinis ra kuri tandat*

<sup>17</sup> A rara in laun ut elar nama nilaun ra a Labino i pitar tari tano, ma elar nama ngas na kinkinis ra kura tano, ra o God i kabo pasi. A pitar a warkurai ri torom a taro na lotu una kum tamtamon rop. <sup>18</sup> Ra o God i sa kabo pas taio ra di sa tok talilis tar a pinino, maked ru i in lenutra. Ma ra o God i sa kabo pas taio ra ka di tok talilis a pinino, gong mo di tok talilisi. <sup>19</sup> A petutna ra di tok talilis a pinin taio, ma ra ka di tok talilis a pinino, i ra a utna oros kut. Ikut a petutna ra taio i mur a kum warkurai anun o God, i ra i labo sakit. <sup>20</sup> A rara in laun ut elar nama ngas na kinkinis ra kura tano, ra o God i kabo pasi. <sup>21</sup> Ra ui a musano ra i papam na karabus, ra o God i kabo pas ui, gong u nuknuk una num a kinkinis na karabus. Ikut, ra tu kisapi sur un langolango uni, i wakak un muri. <sup>22</sup> Uni i ra a musano ra i papam na karabus, ra a Labino i sa kabo pasi, i a langolango na musano anun a Labino. Lenkutkai ra, i ra a langolango na musano ra a Labino i sa kabo pasi, i a musano ra i papam na karabus mo anun o Karisito. <sup>23</sup> O God i sa kul pas mot nama ikul ra i labo sakit. Gong mot pitar tar mot sur mot a kum musano ra det papam na

karabus anun a taro. <sup>24</sup> A kum tistising, una numot a nilaun tomo nam o God, i wakak ra mot taktakai mot in laun ut elar nama ngas na kinkinis ra kura tano, ra o God i sa kabo pas mot.

*A kum etowo torom det ra ka det nolin*

<sup>25</sup> A Labino ke pitar tu warkurai torom iau un det ra ka det nolin. Ikut an inanos mot una nuknuking. Iau a ngas na musano ra a taro det nurnur un iau, uni a Labino i maris doko iau. <sup>26</sup> A nuki lena i wakak ra osi ra ke nolin, gong i nolin, uni a kum maut uniri i wanpat. <sup>27</sup> Pepetlai, u sa nolin? Gong u lu ru anum a ino. Pepetlai, ko nolin? Gong u sisio sur tu ino. <sup>28</sup> Ikut, ra un nolin, ausur u pam a sakino petutna. Ma ra tu toraro in nolin, ausur i pam a sakino petutna. Ikut, det ra det nolin det in taramo a susut na mamaut una nundet a nilaun, ra ka nemi sur mot in etorom a kum mamaut ri.

<sup>29</sup> A kum tistising, a watungi lenri, a du bung i sa milau. Turpasi uniri, a kum musano ra det sa nolin, det in laun elar nam det ra ka det nolin. <sup>30</sup> Ma det ra det tangis, det in laun elar nam det ra ka det tangis. Ma det ra det gas, det in laun elar nam det ra ka det gas. Ma det ra det kukul, det in laun elar nam det ra kalako utna anundet. <sup>31</sup> Ma det ra det papam nama kum utna ra kuri upiso, det in laun elar nam det ra ka det nuknuk bing una kum utna ra. Uni a rakrakon bual ri dat laun uni, milau mo in rop.

<sup>32</sup> A nemi sur mot in langolango gusun a kum nginara taginin upiso. A musano ra ke nolin, i balon una pinapam anun a Labino sur in ugasgas a Labino. <sup>33</sup> Ikut a musano ra i sa nolin, i balon una pinapam taginin una rakrakon bual, sur in ugasgas anun a ino. <sup>34</sup> A nuknukino ke takai, uni i nemi sur in ugasgas anun a ino ma a Labino kai. A ino ra ke nolin ma a toraro, i balon una pinapam anun a Labino. Anun a nemnem sur in pitar rop tar a pinino ma a niono torom a Labino. Ikut, a ino ra i sa nolin, i balon una pinapam taginin una rakrakon bual, sur in ugasgas anun a musano. <sup>35</sup> A watung a kum utna ri sur in uwakak anumot a kinkinis, ausur a turbat mot. A nemi lena mot in mur a tokodos na petutna, ma mot in pitar rop tar anumot a nilaun torom a Labino, ma gong a nuknukimot i wan gisen.

\* 7:14: Ausur i lenri det sa los pas a nilaun tukum, awu. Ra det ut det in nukpukus, det in los pas a nilaun tukum.

<sup>36</sup> Ra tu musano i nuki lena ke tokodos anun a petutna torom a ino ra di sa ubek bat tari toromi, ma ra a kum kilalo anun a ino i sa wan tito, ma a musano ra i nemi lena der in nolin, i wakak in nolin kut nami. Ke pam a sakino petutna. Der in nolin kut. <sup>37</sup> Ikut, ra tu musano i tur dekdek una nuknukino sur gong i nolin, ma katu utna i ungonos tari sur in nolin, ma i ut i tamtamabat anun a nemnem, i kai i pam a wakak ino. <sup>38</sup> Lenra, a musano ra i nolin i pam a wakak ino, ikut i ra ke nolin, i ra i pam a wakak na petutna sakit tander.

<sup>39</sup> A ino ra i sa nolin, a warkurai i kis toromi ra i ker tomo der nam anun a musano, ra anun a musano i laun utmakai. Ikut, ra anun a musano in mat, a ino ra in langolango sur in nolin melet nam taio ra i nemi, ikut in nolin ut nam taio ra i anun a Labino. <sup>40</sup> Ikut a ino ra, in gas doko ra in kis kut lenra, ma ken nolin melet. Iri a nuknuking, ma a nuki lena a Nion o God i kis un iau kai, ra i pitar tar a nuknuk ri tang.

## 8

*A kum utna ra di sa etabor taru nami torom a kum torotoro na god*

<sup>1</sup> An inanos mot una petutna ra a taro det pami ra det wan a kum utna ra di sa etabor taru nami torom a kum torotoro na god.

Dat tasmani lena, dat rop dat sa mananos. A mananos i ser pam pat a petutna sur taio in ulabo pasi, ikut a marmaris i ser pam pat a petutna sur taio in udekdek a taro. <sup>2</sup> Ra taio i nuki lena i sa mananos doko un tu utna, anun a mananos ke sot utmakai. <sup>3</sup> Ikut, ra taio i nem o God, o God i sa tasman o naro ra.

<sup>4</sup> An inanos mot una ngasino ra a taro det ser pami ra det wan a kum utna, ra di sa etabor taru nami torom a kum torotoro na god. Dat tasmani lena a toktok i a utna oros kut tagun a rakrakon bual, ausur a lalaun ino. Dat tasmani lena ara God sot kut, ma kataio melet. <sup>5</sup> A lingmulus ra a susut na utna sapat una langit ma nin una rakrakon bual, di watung det nam a kum god, ma a kum lamlabino. <sup>6</sup> Ikut, dat tasmani lena ara God kut, a Tamandat, i ra a kibin a kum utna rop, ma i ra dat laun suri. Ma dat tasmani lena ara Labino kut, i o Iesu Karisito, i ra i ukis a kum utna rop, ma i pitar tar a nilaun torom dat.

<sup>7</sup> Ikut, ausur a taro rop det tasman a utna ri. A ramano kum tene nurnur, numugu ra ka det nurnur utmakai, det ser mur a

petutna ra det etabor torom a kum torotoro na god. Ma tuk uniri, ra det wan a utna ra taio i sa etabor taru nami torom a kum torotoro na god, det nuki lena det ut det lotu torom a kum torotoro na god. Det taramo i lena a nuknukindet i takun det lena det pam a sakino. <sup>8</sup> Ikut, a utna na inangon ke warut dat sur dat in tokodos umatan o God. Ra ka dat wangon, ka dat in laulau umatan o God, ma ra dat in nangon kai, ken warut dat sur dat in wakak umatan o God.

<sup>9</sup> Mot langolango sur mot in nan a utna ra taio i sa etabor taru nami torom a kum torotoro na god. Ikut mot in tumarong mot, sur gong anumot a petutna ra, in ben tar det ra anundet a nurnur ke dekdek, sur det in puku. <sup>10</sup> Ui, u sa mananos sur un nangon una rumu na lotu anun a toktok ma a nuknukim ausur in takun ui uni. Ikut ra un nangon tiro iai, ma o naro ra anun a nurnur ke dekdek in tama ui, un ben tari, sur i kai, in nan a utna ra di sa etabor taru nami torom a kum torotoro na god, ra in taramo i lena, a nuknukino i takuni lena, i pam a sakino. <sup>11</sup> Anum a mananos in banlaulau a musano ra anun a nurnur ke dekdek. A musano ra, a tisindat ra o Karisito i mat uni. <sup>12</sup> Ra mot pam a sakino lenra torom tu tisindat, sur in pam a utna ra a nuknukino in takuni uni, mot pam a sakino torom o Karisito. <sup>13</sup> Ra a utna ra a wani, i a kibino ra a tising in pam a sakino, kan nan melet mo tu du wewegua, sur gong iau a kibino ra a tising in puku una sakino petutna.

## 9

*I tokodos sur din kul a kum aposel*

<sup>1</sup> A sa langolango. Iau a aposel. A tama tari ut o Iesu anundat a Labino. Anumot a nilaun tomo nam a Labino, i a wino tagun anung a pinapam. <sup>2</sup> Sako ara taro det nuki lena ausur iau a aposel, ikut torom mot, i lingmulus lena iau a aposel. Uni anumot a nilaun tomo nama Labino i ulingmulusi.

<sup>3</sup> Ra a taro det takun iau una nung a pinapam, a balu det lenri: <sup>4</sup> Ra mir nam o Banabas mir papam epotor tamot, i tokodos ut sur mot in tabor mir sur mir in nangon ma mir in inum. <sup>5</sup> A kum aposel, ma a kum tistisin a Labino, ma o Pita det ser ben tuptupukus anundet a kum ino ra det nurnur. I tokodos ut sur mir nam o Banabas kai mir in pami lenra. <sup>6</sup> Ke tokodos sur mir

kut, mir in papam nama lamamir sur a mani ra mir in laun nami.

<sup>7</sup> Osi na tene inaim ra i ut in kul pas a kum utna ra i sibo suri? Osi ra in marut a kinobot na wain ma ken nan pas lako wino gusuni? Osi ra in tamtamabat a kum sipsip ma ken inum pas lako polo na sus tagun det? <sup>8</sup> A wasiso ri a watungi, ausur tagun a nuknukin a taro, awu. A kum Warkurai anun o Moses kai i watungi lenri, <sup>9</sup>“Gong u ker bat a wan a karabau ra i pas rumrum a wit, i kai in nangan ut.” *Lo 25:4*

Pepetlai, o God i ngara kut sur a kum karabau? <sup>10</sup> Awu. O God i watungi lenri sur dat. A lingmulus sakit, a wasiso ri di sa tumus tari sur dat ut, uni i tokodos ra osi ra i marmarut, ma osi ra i lakro susuaro a pinino wit gusun a wit mulus, der in kis langlang nama nurnur sur lako wino. <sup>11</sup> Met sa marut tar a wasiso na nion epotor tamot. I tokodos sur mot in tabor met nam lako utna sur met in laun nami. <sup>12</sup> I tokodos sur a taro gisen det in los pas a warut ri gusun mot, ma i tokodos sakit sur met kai met in losi gusun mot.

Ikut ka met ungonos pas mot sur anu-mot tu warut. Met taramo a susut na maut, ikut ka met saring mot sur tu warut, sur gong met turbat a Wakak na Wasiso anun o Karisito. <sup>13</sup> Mot tasmani lena det ra det papam una rumu na etabor, det nangan tagun a rumu na etabor. Ma det kai ra det tuntun a kum etabor una lu na tuntun etabor, det wangon ut tagun a utna ra det tuni. <sup>14</sup> Lenkutkai ra, a Labino i warkurai tari lena, det ra det warawai nama Wakak na Wasiso, det in los a ikul gusun a Wakak na Wasiso sur det in laun nami.

*O Pol ke nem tu ikul una nun a pinapam na warawai*

<sup>15</sup> Ikut, iau ut ka los pas tu utna tagun a kum utna ri, ma ka tumtumus sur an los tu utna, awu. A gas doko ra a warawai torom mot ma ka los tu ikul uni. A minat a utna oros kut torom iau, ikut anung a gasgas ri i labo doko torom iau, ma ka nemi sur taio in rakon ru i gusun iau. <sup>16</sup> Ra a warawai nama Wakak na Wasiso, ka ulabo pas iau nami, awu. Uni o God i sa pitar tar a pinapam na warawai tang, ma kan pet lar pasi sur an mana gusuni. Ma in laulau doko torom iau ra kan warawai nama Wakak na Wasiso. <sup>17</sup> Ra iau ut a nemi sur an warawai, an losi ut anung tu ikul. Ikut, ra ausur anung tu

nemnem suri, an pami kut a pinapam ra o God i sa pitar tari tang. <sup>18</sup> Asau ra anung a ikul? Anung a ikul i lenri: An gas sur an warawai nama Wakak na Wasiso, ma kataio in kul iau. A pami lenra sur gong a saring mot sur anumot tu warut ra i tokodos sur mot in pami torom iau.

*O Pol i dekdek sur in ben pukus pas a taro rop torom o Karisito*

<sup>19</sup> A lingmulus a sa langolango, ma ka papam na karabus torom taio. Ikut a pitar tar iau kut sur an papam na karabus torom a taro rop, sur an ben lako susut torom o Karisito. <sup>20</sup> Ra a kis tomo nama taro Juda, a muri ut a ngas na nilaun anun a taro Juda, sur an ben pukus pas det torom o Karisito. Ka kis utuntudu ina kum Warkurai anun o Moses. Ikut, ra a kis tomo nama taro ra det kis utuntudu ina kum Warkurai anun o Moses, a pitar tar iau sur an kis utuntudu ina kum Warkurai ra, sur an ben pukus pas det torom o Karisito. <sup>21</sup> Ra a kis tomo nama taro ra ka det kis utuntudu ina kum Warkurai anun o Moses, iau kai ka kis utuntudu ina kum Warkurai ra, sur an ben pukus pas det torom o Karisito. Ikut, ausur a rosumur una Warkurai anun o God, awu. A kis utuntudu ina Warkurai anun o Karisito. <sup>22</sup> Ra a kis tomo nama taro ra ka det dekdek, iau kai ka dekdek, sur an ben pukus pas det torom o Karisito. A elaro iau sur an elar nama kum ngas na taro rop, ma a mur a kum ngas na kisapi rop sur an ulaun lako taro. <sup>23</sup> A kum utna ri a pami sur a Wakak na Wasiso in lubung, sur in udan iau tomo nam det.

*A kinalabor sur a ikul*

<sup>24</sup> Pepetlai, ka mot tasmani lena, det rop ra det ililu una kinalabor det kalabor, ikut ara kut tagun det in los a ikul? Mot kai mot in dekdek una kinalabor sur mot in los a ikul. <sup>25</sup> A taro rop ra det wap una kum wapap, det ulason dekdek a pinindet. Det pami sur det in los pas a ikul ra in rop kut. Ikut dat, dat ulason dat sur dat in los pas a ikul ra ken rop. <sup>26</sup> I mo ra, ka kalabor tuptupukus, awu, a kalabor tokodos sur a tuktukino. Ka itubul elar nama musano ra i tubuli kut a maino. <sup>27</sup> A tumtubul a pining sur in mur wakak anung a nemnem. A pami lenri, uni a ngara, sako a sa warawai taru nama Wakak na Wasiso torom a taro gisen, ikut iau ut, o God in ipul ru iau kut, ma kan los tu ikul.

## 10

*A petutna anun a taro Israel i elar nama utumarong torom dat*

<sup>1</sup> A kum tistising, a nemi sur mot in nuk pas a kum tumtubundat, ra det wan tagitong o ljiip. Det rop det wan utuntudu ina du bakut, ra det rop det wan kutus a Merek na Tasi. <sup>2</sup> I elar nami ra di baptaiso det una du bakut ma a tasi, ma i upuaso i lena det a taro anun o Moses. <sup>3</sup> Det rop det wangon tagun ara utna na Nion kut, <sup>4</sup> ma det inum tagun ara danim na Nion kut, uni det inum tagun a wat na Nion, ra i wan tomo nam det. Ma a wat na Nion ra, i o Karisito. <sup>5</sup> I kut a susut doko tagun det, o God ke gas nam det. Ra det mat nanan ma a kum minatin det det inep ororos kut una nubual kalako taro uni.

<sup>6</sup> Ma a kum utna ri i wanpat sur in utumarong dat, sur gong a balandat i nemnem sur a kum sakino petutna, elar nama balandat i nemnem suri. <sup>7</sup> Gong mot lotu torom a kum torotoro na god elar nama ramano taro tagun det. Elar nami ra di sa tumus tari una Buk Tabu lenri,

“A taro det kis sur det in nangon ma det in inum,

ma det tur melet sur det in wap oros mukut nama pinindet.” *Kisim Bek 32:6*

<sup>8</sup> Gong dat pam a kum petutna na pamuk, elar nama ramano taro tagun det, det pami. Ra, un ara bung kut, aru noino ma tulu arip na taro tagun det, det mat. <sup>9</sup> Gong dat lar a Labino, elar nam ara taro tagun det, det pami, ma a kum sui det karot doko det. <sup>10</sup> Gong mot ururai, elar nam ara taro tagun det, det ururai, ma a ensel ra i ser um doko a taro i um doko rop ru det.

<sup>11</sup> A kum utna ra, i wanpat un det, sur in utumarong dat. Ma di sa tumus tari sur a etow torom dat, ra dat laun una kum tintinip na bung ri. <sup>12</sup> Ra taio i nuki lena i tur dekdek, in tumarong, sako in puku taru una sakino petutna. <sup>13</sup> A kum ululam ra mot sa etorom tari, ausur mot kut mot etoromi, awu, a susut na taro kai det etoromi. Ra o God ken madek ru mot sur tu ululam in nanpat torom mot, ra in labo taun a dekdekimot. Ra tu ululam in nanpat, o God ut in waninar pas tu kisapi, sur mot in nan gisen gusuni ma mot in winim pasi. Ma asau ra o God i len in pam soti ut.

*Gong dat lotu torom a Labino ma torom a kum laulau na nion kai*

<sup>14</sup> I mo ra a kum wakak na paspasang, gong mot lotu torom a kum torotoro na god. <sup>15</sup> A wasiso torom mot elar nami ra a wasiso torom a taro ra det sa mananos. Ma mot ut mot in warkurai wakak anung a wasiso ri. <sup>16</sup> Ra dat inum tagun a kap ra di sa watung wakak pas uni torom o God, dat takai tomo nam o Karisito, una gapino. Ma ra dat wangon tagun a beret ra dat tibiki, dat takai tomo nam o Karisito, una pinino. <sup>17</sup> Dat susut, ikut, dat ara pinindat uni dat wangon tagun in teken beret kut.

<sup>18</sup> Dat in tama a taro Israel. Ra det wan a wewegua ra di sa etabor taru nami torom o God una kabulu na tuntun etabor, i dat tomo det nam o God. <sup>19</sup> Asau a kukurainanung a wasiso? A utna ra di etabor taru nami torom a toktok katu utna i gas uni, ma a toktok ra di etabor toromi, i kai katu utna i gas uni. <sup>20</sup> A watungi tamot lena a kum utna ra a taro ra ka det nurnur det etabor nami, det etabor nami torom a kum laulau na nion, ma ausur torom o God. Ma ka nemi sur mot in lason tomo nama kum laulau na nion. <sup>21</sup> Ka mot in pet lar pasi sur mot in inum tagun a kap anun a Labino, ma tagun a kap kai anun a kum laulau na nion. Ma ka mot in pet lar pasi sur mot in nangon tagun a kabulu na inangon anun a Labino, ma tagun a kabulu na inangon kai anun a kum laulau na nion. <sup>22</sup> Pepetlai, dat nemi lena dat in unangos a Labino, sur a nuknukino in laulau torom dat? Pepetlai, dat nuki lena a dekdekindat i labo tana dekdekino?

*Dat in ulabo pas o God nama kum utna rop ra dat pami*

<sup>23</sup> Sako taio in watungi lena, “A kum utna rop i wakak kut sur dat in pami,” ikut, ausur a kum utna rop in warut dat. “A kum utna rop i wakak kut sur dat in pami,” ikut, ausur a kum utna rop in udekdek dat. <sup>24</sup> Gong taio i nuk pasi ut, in nuk pas a taro gisen.

<sup>25</sup> A kum wewegua ra di siuru i una rumu na siuru, mot in nani. Ma gong mot iting ra di sa etabor taru nami torom a toktok o awu, sur gong a nuknukimot in takun mot lena mot pam a sakino. <sup>26</sup> Uni a Buk Tabu i watungi lenri, “A rakrakon bual ma a kum utna rop ra det kis uni, anun a Labino.” *Buk Song 24:1*

<sup>27</sup> Ra taio tagun det ra ka det nurnur i saring mot, sur mot in nangon tomo nami,

ma mot nemi ut, mot in nan kut. Ma a kum utna rop ra di tabor mot nami, mot in nani kut, ma gong mot iting uni, sur gong a nuknukimot in takun mot. <sup>28</sup> Ikut, ra taio in watungi tamot lena, "A utna ri di sa etabor taru nami torom a kum torotoro na god," gong mot wani, sur gong mot banlaulau a nuknukin o naro ra i inanos mot nami. <sup>29</sup> Ausur a wasiso una nuknukimot, awu. A wasiso un o naro ra i inanos mot ma i nuki lena mot pam a sakino.

A sa langolango. Sur asau ra a nuknukin taio in warkurai iau? <sup>30</sup> Ra a watung wakak pas torom o God una nga utna na inangon, sur asau ra taio in takun iau una utna ra a wani ra a sa watung wakak pas uni? <sup>31</sup> Lenra, ra mot wangon, o mot inum, o tu ngas na utna kai mot pami, mot in pami sur mot in ulabo pas o God nami. <sup>32</sup> Gong mot pam tu utna ra in upuku taio tagun a taro Juda, o tagun a taro ra ausur a taro Juda, o tagun a taro na lotu anun o God. <sup>33</sup> A nemi lena an ugasgas a taro rop una kum utna rop ra a ser pami. Ka pam tu utna sur in uwakak iau, awu, a pam a kum utna sur in uwakak lako susut, sur o God in ulaun pas det.

## 11

<sup>1</sup> Mot in mur a magirang, elar nami ra a mur a magiran o Karisito.

*A kum warkurai na lotu*

<sup>2</sup> A watung ulabo pas mot, uni mot ser nuk pas iau, ma mot mur a kum etowo ra a sa ususer tar mot nami. <sup>3</sup> Ikut, a nemi mot in tasmani lena, o Karisito in lorin a kum musano rop, ma a musano in lorin a ino, ma o God in lorin o Karisito. <sup>4</sup> Ra tu musano in wararing o in wasiso na poropet, ma i sa rakup bat pas in lorino, i ban umaimai in lorino. <sup>5</sup> Ra tu ino in wararing o in wasiso na poropet, ma ke rakup bat in lorino, i ban umaimai in lorino. I elar nami ra di sa kas rop ru a iwu na lorino. <sup>6</sup> Ra tu ino ke rakup bat in lorino, i wakak ra din kumur ru a iwu na lorino. Ikut, ra di kumur ru a iwu na lorino i ra a utna na maimai. I wakak ra in rakup bat in lorino sur gong di kumur ru a iwu na lorino ma gong di kas rop ru i. <sup>7</sup> Ke tokodos ra tu musano in rakup bat in lorino, uni i a malalar in o God ma i ese a minamar ino God. Ikut a ino i ese a minamar in a musano. <sup>8</sup> Uni o God ke pam a musano tagun a ino, awu, i pam a ino tagun a musano. <sup>9</sup> Ma o God ke pam a musano sur a ino, awu, i pam a ino sur a musano. <sup>10</sup> Iri i a kibino

ra a ino in rakup bat in lorino, sur in ese i torom a taro ma torom a kum ensel kai lena i pam ukai a nimulaot sur in wararing ma in wasiso na poropet.

<sup>11</sup> Ikut, i lingmulus, ka di ukis gisen a ino gusun a musano, o a musano gusun a ino, awu. Der in warut etetalai der, una nunder a kinkinis na nilaun torom a Labino. <sup>12</sup> Uni a ino i wanpat tagun a musano, ma lenkutkai ra, a ino i usus a musano. Ikut o God ut a kibin a kum utna rop. <sup>13</sup> Mot ut mot in nuknuk una kum wasiso ri. Pepetlai, i tokodos sur a ino in wararing torom o God, ra ke rakup bat in lorino? Awu. <sup>14</sup> Anundat a nilaun ut i ese dat lena, tu musano ra a iwu na lorino i walos, i ra a utna na maimai toromi. <sup>15</sup> Ikut, tu ino ra a iwu na lorino i walos, i ra anun a minamar. Uni o God i pitar tar a walalos na iwu na lorino toromi, sur in rakup bat in lorino nami. <sup>16</sup> Ra taio in pukus a wasiso ri, anung a minabalu i lenri: Ka met mur tu ngasino gisen, ma a taro rop anun o God una kum tamtamon kai awu.

*A inangon anun a Labino*

*(Mt 26:26-29; Mk 14:22-25; Lk 22:14-20)*

<sup>17</sup> Uniri an inanos mot nama kum petutna ra mot in muri. Una kum petutna ra an inanos mot nami, kan watung ulabo pas mot. Uni, ra mot ser wan tomo, ausur mot uwakak mot, awu, mot banlaulau mot kut. <sup>18</sup> A mugano utna: A sa longoro tari lena, ra mot ser wan tomo sur a lotu, mot ser tapagol sarara kut, ma a tasman liliki kai lena i lingmulus. <sup>19</sup> Uni a taro na lotu det in taptapagol ut, sur din tama lele det ra det tokodos ma det kai ra det raro. <sup>20</sup> Ra mot wan tomo, ma mot wangon tomo, mot nuki lena mot wan a inangon anun a Labino, ikut, awu. <sup>21</sup> Uni, ra mot wangon, arara i ngara pas ut nami, sur in nangon mugu, ma ken kis pas ara taro kai. Iri i a kibino ra ara taro det murak, ma ara taro det sipak. <sup>22</sup> Pepetlai, kalako kum rumu anumot sur mot in nangon ma mot in inum iai? Pepetlai, ka mot nuk labo pas a taro na lotu anun o God, ma mot ban umaimai det ra det sibo? Asau ra an watungi torom mot? Pepetlai, an watung ulabo pas mot una petutna ri? Awu!

<sup>23</sup> Uni a etowo ri a los pasi gusun a Labino ma a sa pitar tari torom mot i lenri: Una bung na mirum ra di usobor tar a Labino o Iesu, i los pas a beret. <sup>24</sup> Ra i sa watung wakak pas uni, i tibiki, ma i watungi lenri, "Iri a pining, a pitari sur mot. Mot in

pampami lenri, sur mot in ser nuk melet pas iau.”<sup>25</sup> Lenkutkai, ra i sa rop a inangon, i los pas a kap ma i watungi lena, “A kap ri, a matok na kunubus tagun a gaping, ra i dat tomo tar a taro nam o God. Mot in pami lenri, sur mot in ser nuk melet pas iau ra mot inumi.”<sup>26</sup> Uni, una kum bungbung ra mot wan a beret ri, ma mot inum tagun a kap ri, mot wasiso talapor ut una minat anun a Labino, tuk ra in milet.

<sup>27</sup> Osi ra in nan a beret anun a Labino, ma in inum tagun anun a kap, ma ke pami nama urur, i pam a sakino una pinin a Labino ma a gapino, ma din warkurai i uni. <sup>28</sup> I wakak ra taio in tama mugu tar anun a nilaun, ra numur in nan a beret ma in inum tagun a kap. <sup>29</sup> Ra taio i wangon ma i inum, ma ke tama lele pas a pinin a Labino, i sa wangon pas ma i sa inum pas ana warkurai na minabalu. <sup>30</sup> Iri i a kibino ra a susut epotor tamot det misait ma kalako dekdekindet, ma ara taro kai det sa mat. <sup>31</sup> Ra gunuk dat ut, dat in tama mugu tar anundat a nilaun ra numur dat in nangon ma dat in inum, o God ken pitar a warkurai na minabalu torom dat. <sup>32</sup> Ikut, ra a Labino i warkurai dat, i ukodos dat, sur gong dat iru una warkurai na minabalu tomo nama rakrakon bual.

<sup>33</sup> A kum tistising, ra mot wan tomo sur a inangon, mot in kis langlang sur ara taro kai tagun mot. <sup>34</sup> Ra lako taro tagun mot det murak, i wakak ra det in nangon mugu pas ut una nundet a kum rumu, sur gong a warkurai na minabalu anun o God in los mot, ra mot wan tomo.

Ra an nanpat, an pitar melet lako kum wasiso na warkurai torom mot.

## 12

### *A kum etabor anun a Tokodos na Nion*

<sup>1</sup> A kum tistising, uniri an inanos mot nama kum etabor anun a Tokodos na Nion, uni a nemi lena mot in talapor uni. <sup>2</sup> Mot tasmani lena, ra ka mot nurnur utmakai, di ben raro pas mot torom a kum torotoro na god ra ka det ser wasiso, ma mot lotu torom det. <sup>3</sup> Iri an watungi tamot lenri, katutaio ra a Nion o God in mugu i, in watung lar pasi lena, “O Iesu in iru tukum.” Ma katutaio ra a Tokodos na Nion ke mugu i in watung lar pasi lena, “O Iesu a Labino.”

<sup>4</sup> A wur ngas na etabor anun a Tokodos na Nion, ikut ara Nion o God kut, ra i tabor dat nama kum etabor. <sup>5</sup> A wur ngas na kisapi na

pinapam, ikut ara Labino kut, ra dat papam toromi. <sup>6</sup> A wur ngas na pinapam, ikut ara God kut, ra i pam a kum pinapam ra, una nilaun anun a taro rop.

<sup>7</sup> A Tokodos na Nion i ese i ut una nilaun anun arara, sur in warut a taro rop. <sup>8</sup> A Tokodos na Nion i tabor ara nama mananos sur in wasiso nami, ma a Nion ut ra, i tabor ara kai nama wakak na nuknuk sur in wasiso nami. <sup>9</sup> Ma a Nion ut ra, i tabor ara kai nama nurnur, ma a Nion ut ra, i tabor ara kai nama etabor sur in ulangolango a kum misait. <sup>10</sup> Ma i tabor ara kai nama dekdek sur in pam a kum utna na ukisin, ma ara kai nama wasiso na poropet. Ma i tabor ara kai nama mananos sur in tasman lele a Tokodos na Nion ma a kum nion gisen kai, ma ara kai nama mananos sur in wasiso nama wur ngas na wasiso, ma ara kai nama mananos sur in palos a kukurai na wur ngas na wasiso. <sup>11</sup> Ara Nion sot kut ra i pam a kum pinapam rop ri. Ma una nun a nemnem ut, i tabor arara taktakai.

### *Ara pinindat kut, ikut a susut na du pinindat*

<sup>12</sup> A musano i ara kut, ikut a susut na du pinino. A kum du pinino det susut, ikut di tugus tomo pas det sur ara kudulano musano. A pinin o Karisito i lenkutkai ra. <sup>13</sup> Uni ara Nion kut i baptaiso dat rop, sur dat ara pinin o Karisito mukut, dat a taro Juda, ma dat ra asur a taro Juda, dat a kum tene ititula ma dat ra ka dat tene ititula. Ma o God i pitar ara Nion kut torom dat rop sur dat in inum taguni.

<sup>14</sup> A kudulano musano asur ara du pinino kut, awu, a susut na du pinino ut. <sup>15</sup> Ra a kikino in watungi lena, “Iau asur a du pinino, uni asur iau a lamano,” i lingmulus lena, i asur a lamano, ikut, a du pinino ut. <sup>16</sup> Ra in talngano in watungi lena, “Iau asur a du pinino, uni asur iau in matano,” i lingmulus lena, i asur in matano, ikut a du pinino ut. <sup>17</sup> Ra kudulano pinino in matano rop kut, in longoro mo pepetlai? Ra kudulano pinino in talngano rop kut, in sasangop mo pepetlai? <sup>18</sup> Ikut o God i sa tugus tomo tar a kum du pinindat rop taktakai, elar ut nama nun a nemnem. <sup>19</sup> Ra a kum du pinindat rop det elar kut, in kudulano mo pepetlai? <sup>20</sup> Ikut i lenutra, a susut na du pinindat, ikut ara pinindat.

<sup>21</sup> In matano ken watung lar pasi tan a lamano lenri, “Ka sibo sur uil,” ma in lorino kai, ken watung lar pasi tan aru kikino lena,

“Ka sibo sur mur!” <sup>22</sup> Awu! A kum du pinindat ra dat nuki lena ka det dekdek, anundat a pinapam kura ut. <sup>23</sup> Ma a kum du pinindat ra dat nuki lena ka det wakak, dat mar wakak det. Ma a kum du pinindat ra dat maimai nam det, dat pipis bat det. <sup>24</sup> Ikut, a kum du pinindat ra det tamtama wakak, ka det sibo sur tu utna. O God i sa tugus tomo tar a kum du pinindat, ma a kum du pinindat ra dat nuki lena ka det wakak det wakak ut. <sup>25</sup> I pami lenra sur gong a pinindat i tukutus gisgisen. A kum du pinindat det in ngara etetalai sur det, ma a nginara ra, in elar torom det rop. <sup>26</sup> Ra tu du pinindat i ngungut, a kum du pinindat rop det in taramo i. Ma ra di watung ulabo pas tu du pinindat, a kum du pinindat rop det in gas tomo nami.

<sup>27</sup> Mot ut a pinin o Karisito, ma mot rop taktakai a kum du pinino. <sup>28</sup> O God i sa pilok pas a taro ri epotor tan a taro na lotu: a mugano ut a kum aposel, a manru a kum poropet, a mantul a kum tene ususer, ma det kai ra det pam a kum utna na ukisin, ma det ra o God i pitar a etabor torom det sur det in ulangolango pas a kum misait, ma det ra det warut a taro, ma det ra det ser mugu a taro una kum pinapam, ma det ra det wasiso nama wur ngas na wasiso. <sup>29</sup> Pepetlai, det rop a kum aposel rop kut? Awu. Det rop a kum poropet rop kut? Awu. Det rop a kum tene ususer rop kut? Awu. Det rop det pam a kum utna na ukisin? Awu. <sup>30</sup> Det rop o God i pitar a etabor torom det sur det in ulangolango pas a kum misait? Awu. Det rop det wasiso nama wur ngas na wasiso? Awu. Det rop det ser palos a kukurai na wur ngas na wasiso? Awu. <sup>31</sup> Ikut, mot in nemnem sur a kum etabor ra det wakak doko.

Uniri an ese mot una kisapi ra i wakak doko taun det rop.

## 13

### *A marmaris i lenri*

<sup>1</sup> Ra an wasiso nama wur ngas na wasiso anun a taro ma anun a kum ensel kai, ikut ra ka lason una marmaris, a elar kut nama garamut o a kudu ra i tangtangis oros kut. <sup>2</sup> Ra an utur ukai a etabor sur an wasiso na poropet, ma ra an tasman a kum utna na pidik rop ma a kum mananos rop, ma ra an utur ukai a nurnur sur an ukarai a kum tangai nami, ikut ra ka lason una marmaris, iau a utna oros kut. <sup>3</sup> Ra an pitar ru anung

a kum utna rop torom a kum sibo na taro, ma an pitar iau kai sur din tun iau, ikut ra ka lason una marmaris, ken warut iau.

<sup>4</sup> Osi ra i lason una marmaris ke ser pinino ngoro lakit torom taio, ma i ser pam a wakak ino torom a taro. Ke ser nuknuk laulau sur a utna anun taio, ke ser uman labino, ma ke ser ulabo pasi. <sup>5</sup> Ke laulau a magirano, ke nuk pasi ut, ke ser kankan lakit, ke ser nuk ukai a sakino ra di pami toromi. <sup>6</sup> Ke gas una petutna ra ke tokodos, i gas kut una lingmulusino. <sup>7</sup> Osi ra i lason una marmaris i ser los a kum mamaut anun a taro, i ser nurnur, ma i kis langlang nama nurnur sur a kum utna rop ra o God in pami, ma i ser tur dekdek ra a kum mamaut i wanpat.

<sup>8</sup> A marmaris ken rop lar pas. Ikut a kum wasiso na poropet det in rop kut, a wur ngas na wasiso det in rop kut, ma a mananos kai in rop kut. <sup>9</sup> Uni anundat a mananos ke kudulano, ma anundat a wasiso na poropet kai ke kudulano. <sup>10</sup> Ikut numur, ra a kum utna ra i kudulano in nanpat, a kum utna ra ke kudulano in rop. <sup>11</sup> Ra a natlik utmakai, a wasiso elar nama natlik, a nuknuk elar nama natlik, ma a mananos kai elar nama natlik. Ra a sa labo, a umana ru a magiran a natlik. <sup>12</sup> Uniri anundat a tamtama un o God ke talapor, i elar nami ra dat tama a niondat una galas, ra i gawul kut. Ikut numur, dat in tama o God nama matmatandat. Uniri anung a mananos ke kudulano, ikut numur an mananos wakak, elar nam o God i tasman wakak iau.

<sup>13</sup> A tulu utna ri detul kis tukum: a nurnur, a kinkinis langlang nama nurnur sur asau ra o God in pami, ma a marmaris. Ikut a marmaris i labo sakit taun der rop.

## 14

*A wasiso na poropet i wakak taun a wasiso nama wur ngas na wasiso*

<sup>1</sup> Mot in dekdek una marmaris. Mot in nemnem sur a kum etabor anun a Tokodos na Nion. Ma a etabor ra i wakak doko sur mot in nemi, mot in wasiso na poropet. <sup>2</sup> Uni taio ra in wasiso nama wur ngas na wasiso, ke wasiso torom a taro, awu, i wasiso torom o God. A taro ka det tasman a kukuraino. I watung a kum utna na pidik nama dekdek ina Tokodos na Nion. <sup>3</sup> Ikut, taio ra i wasiso na poropet, i wasiso torom a taro sur in udekdek det, in warut det ma in umarom det. <sup>4</sup> Taio ra i wasiso nama wur ngas na wasiso i udekdek pasi ut. Ikut,

taio ra i wasiso na poropet i udekdek a taro na lotu rop. <sup>5</sup> A nemi lena mot rop mot in wasiso nama wur ngas na wasiso, ikut a nem doko i sur mot in wasiso na poropet. O naro ra i wasiso na poropet i wakak doko taun o naro ra i wasiso nama wur ngas na wasiso. Ikut ra taio in papalos una kukurain a wur ngas na wasiso sur in udekdek a taro na lotu in wakak ut.

<sup>6</sup> A kum tistising, ra an nanpat torom mot ma an wasiso nama wur ngas na wasiso, an warut petlan mot? Ikut, ra a nemi sur an warut mot, an wasiso torom mot nama wasiso ra o God i sa upuaso tari tang, o an wasiso nama mananos, o a wasiso na poropet, o a etowo torom mot. <sup>7</sup> Lenkutkai ra a kum utna ra ka det laun, elar nam in tulal ma a gita. Det ser tangis ut, ikut ra a tinangis indet i wan senene kut, dat in tasman petlan a kekelele ra? <sup>8</sup> Ra in tuwuru ken tangis talapor, asi na tene inaim in waninar sur a inaim? <sup>9</sup> Lenkutkai ra torom mot. Ra ka mot watung talapor a kum wasiso, din tasman petlan a wasiso ra mot watungi? Anumot a wasiso in nan kut una maino. <sup>10</sup> A lingmulus ut, a wur ngas na wasiso kuri una rakrakon bual, ikut katu wasiso ra katu kukuraino. <sup>11</sup> Ra ka tasman a kukurain a wasiso ra taio i wasiso nami torom iau, a elar kut nama usiro toromi, ma o naro kai ra i wasiso, i elar kut nama usiro torom iau. <sup>12</sup> Lenkutkai ra torom mot. Mot ser dekdek sur a kum etabor anun a Tokodos na Nion. I wakak sur mot in dekdek sur a kum etabor ra in udekdek a taro na lotu rop.

<sup>13</sup> Ra in lenra, i wakak sur osi ra i wasiso nama wur ngas na wasiso, in wararing sur in pet lar pasi sur in palos a kukuraina anun a wasiso. <sup>14</sup> Ra a wararing nama wur ngas na wasiso, a niong i wararing, ikut a nuknuking ke nuk tu utna. <sup>15</sup> Asau an pami? An wararing nama niong, ma an wararing kai nama nuknuking. An kekelele nama niong, ma an kekelele kai nama nuknuking. <sup>16</sup> Ra u watung wakak torom o God una niom nama wur ngas na wasiso, taio ra ke talapor una kukuraina num a wasiso, in watung "Amen" pepetlai? Uni ke tasman asau ra u watungi. <sup>17</sup> I lingmulus, anum a niaring na watung wakak torom o God i wakak, ikut ke udekdek a taro.

<sup>18</sup> A watung wakak torom o God, uni a lason doko una wasiso nama wur ngas na wasiso taun mot rop. <sup>19</sup> Ikut ra a kis tomo

nama taro una lotu ma an watungi kut lako limo na du wasiso ra a kukuraino in talapor torom det sur an ususer det nami, i ra i wakak doko taun a noino arip na du wasiso una wasiso gisen, ra ka det in longoro lele i.

<sup>20</sup> A kum tistising, gong a nuknukimot i elar nama kum nat liklik. Una sakino petutna i wakak sur mot in elar nama kum natmiso. Ikut, una nuknukimot, mot in elar nama kum lamlabino. <sup>21</sup> A Labino i sa watung tari una Buk Tabu lenri, "An wasiso torom anung a taro, nama walngan ara taro gisen, ra det wasiso nama wasiso gisen, ikut anung a taro ka det in longoro iau." *Aisaia 28:11-12*

<sup>22</sup> A wur ngas na wasiso, i a ukinalong torom det ra ka det nurnur, asur torom det ra a kum tene nurnur. Ikut a wasiso na poropet, i a wasiso sur a kum tene nurnur, asur a wasiso sur det ra ka det nurnur. <sup>23</sup> Ra mot a taro na lotu rop mot in kis tomo, ma mot rop mot wasiso nama wur ngas na wasiso, ma lako taro oros kut, o lako taro ra ka det nurnur det in ruk, det in watungi lena mot longlong. <sup>24</sup> Ikut ra mot rop mot wasiso na poropet, ma taio ra asur a tene nurnur, o tu musano oros kut in ruk torom mot, anumot a kum wasiso rop ra i longoro i in so in balano ma in takuni lena i a tene sakino. <sup>25</sup> Ma a kum utna ra i kis eno in in balano, in nanpat pupuaso. Ra in puku a matano unago upiso ra in lotu torom o God, ma in wasiso talapor lena, "A lingmulus ut, o God i kis epotor tamot."

#### *A wakak na inawan ina lotu*

<sup>26</sup> A kum tistising, asau an watungi? Ra mot kis tomo una lotu, a ra taro det in kekelele, a ra taro det in ususer a taro, ara taro det in wasiso puaso un tu utna ra o God i sa ese tari tandet, ara taro det in wasiso nama wur ngas na wasiso, ma ara taro kai det in palos a kukuraino. A kum utna rop ri din pami sur in udekdek a taro na lotu. <sup>27</sup> Ra lako taro det in wasiso nama wur ngas na wasiso, lako ru o lako tul kut ma gong det susut. Ara munung in wasiso, ma taio in palos a kukuraino. Detul rop detul in pami lenra. <sup>28</sup> Ra katutaio kura sur in palos a kukuraino, i wakak ra o naro ra i wasiso nama wur ngas na wasiso, gong i wasiso una lotu. In wasiso kut toromi ut ma o God.

<sup>29</sup> Lako ru o lako tul, detul in wasiso na poropet, ra a taro det in longoro wakak anundetul a wasiso ra i lingmulus o awu.

<sup>30</sup> Ra taio kura i kis una lotu, i rakon tu wasiso tan o God una du bung utra, o naro ra kura i wasiso in mana. <sup>31</sup> Ra mot rop mot nem na wasiso na poropet, i wakak sur ara munung in wasiso, na numur ara bulung, tuk mot rop mot in wasiso. Mot in pami lenra, sur in ususer mot, ma in udekdek mot rop. <sup>32</sup> A wasiso na poropet i kis utuntudu ina warkurai anun a poropet ut. <sup>33-34</sup> Uni o God, a God na malmal, ma ke nem a utna ra i lokolokor.

I wakak ra a wardain det in kis wowowon kut una lotu, elar nama taro anun o God det ser pami una kum tamtamon rop. Ka di mulaot tar det sur det in wasiso. Det in unatino pas det, elar nama Warkurai anun a taro Juda i watungi. <sup>35</sup> Ra det nem na iting un tu utna, i wakak sur det in ting anundet a kum musano uni tiro una nundet a kum rumu. Uni a utna na maimai ra a ino in wasiso una lotu.

<sup>36</sup> Pepetlai, mot a kibin a wasiso anun o God? Awu. Pepetlai, i wanpat kut torom mot? Awu. <sup>37</sup> Ra taio i nuki lena i ut a poropet, o i nuki lena i utur ukai a etabor tan a Tokodos na Nion, i wakak sur in tasmani lena asau ra a tumusi torom mot, a warkurai ut anun a Labino. <sup>38</sup> Ra taio ke mur a wasiso ri, gong kai dat longoro anuna wasiso.

<sup>39</sup> A kum tistising, mot in dekdek sur mot in wasiso na poropet, ma gong mot turbat taio ra i wasiso nama wur ngas na wasiso. <sup>40</sup> Ikut mot in mur a kum inawan ina lotu nama urur, ma gong i lokolokor.

## 15

*O Pol i warawai una minatin o Karisito ma anuna katkatutur melet*

<sup>1</sup> A kum tistising, a nemi sur an inanos melet mot una Wakak na Wasiso, ra numugu a sa warawai taru nami torom mot, ma mot sa los pasi, ma mot sa tur dekdek uni. <sup>2</sup> Ra mot pam ukai dekdek a wasiso ra a sa warawai taru nami torom mot, o God in ulaun pas mot nama Wakak na Wasiso ri. Ra awu, mot nurnur oros kut.

<sup>3</sup> Uni a wasiso ra i labo doko, ra a sa los pasi, a sa pitar tari tamot. A wasiso ra i lenri: O Karisito i mat una nundat a kum sakino petutna, elar nami ra di sa tumus tari una Buk Tabu. <sup>4</sup> Di uruk tari una kulam na minat, ma tulu bung bat tari o God i ukatutur melet pasi gusun a minat, elar nami ra di sa tumus tari una Buk Tabu. <sup>5</sup> Ra i wanpat torom o Pita, ma numur torom

a noino ma aru aposel. <sup>6</sup> Numur i wanpat torom a kum tistising una nurnur. A nilulukindet i elar nama limo na mar ma i puku, ra det kis tomo una du bung ra. Ma a susut sakit tagun det, det laun utmakai, ikut, a ramano det sa mat. <sup>7</sup> Ra numur i wanpat torom o Jems, ma numur torom a kum aposel rop.

<sup>8</sup> Ma numur sakit tandet, i wanpat torom iau utkai, ra a elar nama nat ra o nano i usus lakit tari, ra anun a kalang ke sot utmakai.

<sup>9</sup> Uni iau, a natino sakit tana kum aposel rop, ma ka wakak sur din watung iau ara aposel, uni a ser banlaulau a taro na lotu anun o God. <sup>10</sup> Ikut, o God i pitar tar a nilaun ri a laun nami, kibino ut una nun a marmaris. Ma ke urop oros tari kut anun a marmaris un iau, awu. A papam dekdek doko taun det rop. Ikut, ausur iau ut a papam, a marmaris anun o God i papam tomo nam iau. <sup>11</sup> Ra a warawai, o a kum aposel kai det warawai, met rop met warawai nama wasiso ri un o Karisito, ma mot sa nurnur uni.

### *A katutur melet gusun a minat*

<sup>12</sup> Ra di warawai un o Karisito ra o God i ukatutur melet pasi gusun a minat, sur asau ra ara taro kura epotor tamot det watungi lena kalako katkatutur melet gusun a minat? <sup>13</sup> Ra gunuk katu katkatutur melet gusun a minat, o God ken ukatutur melet pasi kai o Karisito gusun a minat. <sup>14</sup> Gunuk ra o God ken ukatutur melet pas o Karisito gusun a minat, anumet a warawai in utna oros kut, ma anumot a nurnur kai in utna oros kut. <sup>15</sup> Ma ara utna kai, din tama i lena anumet a wasiso un o God, a torotoro kut, uni met wasiso talapor un o God lena i ukatutur melet pas o Karisito gusun a minat. Ikut, ra kalako katkatutur melet gusun a minat, o God ken ukatutur melet pas o Karisito gusun a minat. <sup>16</sup> Ra o God ken ukatutur melet pas a kum minat, lenkutkai ra ken ukatutur melet pas o Karisito gusun a minat. <sup>17</sup> Gunuk ra o God ke ukatutur melet pas o Karisito gusun a minat, anumot a nurnur i utna oros kut, ma mot kis utmakai una numot a kum sakino petutna. <sup>18</sup> Ma a kum tene nurnur kai un o Karisito ra det sa mat, det mat tukum. <sup>19</sup> Ra dat kis langlang nama nurnur un o Karisito sur a kum utna ra in pami una nilaun kut nin upiso, dat in pot na marmaris sakit taun a taro rop.

<sup>20</sup> Ikut i lingmulus, o God i sa ukatutur melet o Karisito gusun a minat. I a mugano musano ra i katutur melet gusun a minat, ma i ese i lena nurur a kum minat kai det in katutur melet. <sup>21</sup> A minat i wanpat i kibino un ara musano kut, o Adam. Lenkutkai ra a katkatutur melet gusun a minat i wanpat i kibino un ara musano, o Karisito. <sup>22</sup> Uni a taro rop anun o Adam det in mat, lenkutkai ra a taro rop anun o Karisito det in utur ukai a nilaun. <sup>23</sup> Ikut a inawan ina katkatutur melet i lenri: O Karisito a mugano musano ra i katutur melet gusun a minat, ma nurur ra in nanpat melet, det ra anunu, det kai det in katutur melet gusun a minat. <sup>24</sup> Numur, a tintinip ina rakrakon bual in nanpat, ra o Karisito in kamar ru a kum sakino nion rop lenri, det ra a kum mugumugu, det ra det utur ukai a warkurai ma det ra det tur nama dekdek. Ma in pitar tar a matanitu torom o God o Tamano. <sup>25</sup> Uni o Karisito in kis na king tuk ra in winim pas anun a kum ebar rop sur det in kis utuntuduino. <sup>26</sup> A tintinip na ebar ra in kamari, a minat. <sup>27</sup> Uni di sa tumus tari una Buk Tabu lenri, "O God i sa ubek tar a kum utna rop utuntudu ino." *Buk Song 8:6*

Ikut, ra a Buk Tabu i watungi lena "a kum utna rop", i talapor lena ke wasiso un o God, uni o God ke kis utuntudu in o Karisito, awu. O God ut i sa ubek tar a kum utna rop utuntudu in o Karisito. <sup>28</sup> Ra a kum utna rop i sa kis utuntudu in o Karisito a Nutun o God, o Karisito kai in ubek tari ut utuntudu in o God a Tamano, i ra i ubek tar a kum utna rop utuntudu in o Karisito. O Karisito in pami lenra sur o God in mugumugu una kum utna rop.

<sup>29</sup> Ra katu katkatutur melet gusun a minat, det ra di baptaiso det sur a kum minat, asau ra det in pami? Ra i lingmulus lena a kum minat ka det in katutur melet gusun a minat, sur asau ra di baptaiso a taro sur a kum minat? <sup>30</sup> Met kai, ra katu katkatutur melet gusun a minat, sur asau ra met pam a pinapam ra met barato a kum mamaut uni, una kum bungbung rop? <sup>31</sup> A kum tistising, una kum bungbung rop a barato a kum mamaut ma a taramo i lena a sa mat. A wasiso ri i lingmulus elar nami ra anung a gasgas un mot i lingmulus. A gas nam mot uni dat kis tomo nam o Karisito Iesu anundat a Labino. <sup>32</sup> Ra a waim nama kum kuabor na taro nin o Epeses sur an pam sot pas anung a nemnem kut, i warut petlan

iau? Ra a kum minat ka det in katutur melet gusun a minat, dat in mur a wasiso anundet ra det ser watungi lenri,

"Dat in nangun ma dat in inum,

uni markan dat in mat." *Aisaia 22:13*

<sup>33</sup> Gong di ben raro mot, uni "A kinkinis tomo nama sakino taro, in banlaulau a wakak na petutna." <sup>34</sup> Mot in tuangun, mot in mur a tokodos na petutna, ma mot in mana gusun a kum sakino petutna. Uni ara taro tagun mot ka det tasman o God. A watungi lenri sur mot in maimai.

*O God in pukus pas a pinindat*

<sup>35</sup> Sako taio in iting lena, "Di ukatutur melet pas a kum minat pepetlai? Asi na ngas na pinindet ra det in katutur melet nami?" <sup>36</sup> Ui a longlong! Ra u marut a pitino duwai, ra ken mat pas, ken laun. <sup>37</sup> Ma ra u marut a pitino wit o tin pitino duwai gisen kai, kon marut in nanai ino, awu, un maruti ut in pitino. <sup>38</sup> Ra in lubang, in nanpat ut in ngas na duwai elar nama nemnem anun o God. Tekteken ngas na pitino duwai in lubang pat in nanai ino ut, asur in lubang pat tin ngas na duwai gisen.

<sup>39</sup> A pinin a kum utna rop ra det laun, ka det elar. A taro a pinindet ut, ma a kum wewegua a pinindet i senene, ma a pinin a kum piko i senene, ma a pinin a kum kiripo kai i senene ut. <sup>40</sup> A kum utna sapat una maino, a kum pinindet ut, ma a kum utna taginin upiso, a kum pinindet utkai. A minamar ina kum utna sapat una maino i senene ut, ma a minamar ina kum utna taginin upiso i senene utkai. <sup>41</sup> In matanas a minamarino ut, ma a kalang a minamarino i senene ut, ma a minamar ina kum nangngang i senene ut, ma a minamar ina kum nangngang taktakai i senene utkai.

<sup>42</sup> I lenkutkai ra una katkatutur melet anun a kum minat. A pinindet ra di por det nami in mereseng kut, ikut ra in katutur melet, ken mereseng mo. <sup>43</sup> A pinin a minat ra di pori nami ke tamtama wakak, ikut ra in katutur melet in katutur nama labino minamar. Ra di pori ke dekdek, ikut ra in katutur melet in katutur nama labino dekdek. <sup>44</sup> A pinino ra di pori nami, i taginin ut upiso, ikut ra in katutur melet, in katutur nama pinino ra i nion, tagisapat una langit.

A lingmulus lena ara pinindat taginin upiso, ma ara pinindat kai ra i nion. <sup>45</sup> Uni di sa tumus tari una Buk Tabu lenri, "A

mugano musano, o Adam, o God i pitar tar a nilaun toromi.”

*Stat 2:7*

Ikut a tintinip na Adam, i a Nion ra i tabor a taro nama nilaun. <sup>46</sup> A pinindat ra i nion ke wanpat mugu, awu. A pinindat ra taginin upiso i wanpat mugu, ra numur a pinindat ra i nion. <sup>47</sup> A mugano Adam i taginin upiso, ma o God i pami nama piso. A manru na Adam tagisapat una langit. <sup>48</sup> A taro ra taginin upiso det elar nama musano ra o God i pami nama piso. Ma det ra tagun a langit, det elar nama musano tagisapat una langit. <sup>49</sup> Dat a malalar ina musano ra o God i pami nama piso, ma lenkutkai ra, dat in los a malalar ina musano tagisapat una langit.

<sup>50</sup> A kum tistising, a watungi tamot lena, a pinindat taginin upiso ken ruk una matanitu anun o God. A pinindat ra i ser mereseng kut, ken ruk una matanitu anun o God, uni a matanitu anun o God ken mereseng. <sup>51</sup> Mot longoro, an inanos mot una utna na pidik lenri: Ausur dat rop dat in mat, ikut o God in pukus senene pas dat rop. <sup>52</sup> Ra a tintinip na tuwuru in tangis, o God in pukus senene lakit pas dat un ara pulumisis kut. Uni in tuwuru in tangis, a kum minat det in katatur melet ma ka det in mat mo, ma o God in pukus senene pas dat. <sup>53</sup> Uni a pinindat taginin upiso ra i ser mereseng kut, in tupukus sur a pinindat ra ken mereseng mo. A pinindat taginin upiso ra i ser mat kut, in tupukus sur a pinindat ra ken mat mo. <sup>54</sup> Ma ra a pinindat ra i ser mereseng kut, in tupukus sur a pinindat ra ken mereseng mo, ma ra a pinindat ra i ser mat kut in tupukus sur a pinindat ra ken mat mo, a tumtumus una Buk Tabu in sot maragom, lenri, “O God i sa winim pas a minat, ma i kamar rop ru i.” *Aisaia 25:8*

<sup>55</sup> “A minat, awai mi a dekdekim?”

A minat, awai mi anum a bele ra u banlaulau a taro nami?” *Os 13:14*

<sup>56</sup> A sakino petutna, i a bele anun a minat ra i banlaulau a taro nami. A sakino petutna i los pas a dekdekino gusun a kum Warkurai anun o Moses. <sup>57</sup> Ikut, dat in watung wakak torom o God, uni i tabor dat nama dekdek sur dat in winim pas a sakino petutna nami, una pinapam ra o Iesu Karisito anundat a Labino i sa pam tari.

<sup>58</sup> Lenra, a kum tistising, mot in tur dekdek, ma gong i tugunu anumot a nurnur una katkatatur gusun a minat. Mot in pitar rop tar anumot a nilaun una pinapam

anun a Labino, uni mot tasmani lena a kum pinapam rop mot pami torom a Labino ausur a utna oros kut.

## 16

*Anundet a etabor torom a taro na nurnur sapat o Jerusalem*

<sup>1</sup> An inanos mot un asau ra mot in pami nama mani ra mot woro tomo i sur a taro anun o God ra det kis sapat o Jerusalem. Mot in pami elar nami ra a sa inanos tar a taro na lotu una kum tamtamon tong una papor Galesia sur det in pami. <sup>2</sup> Una kum mugano bung una rara wik, mot rop taktakai mot in ubek gisen ru tu mani tagun anumot a mani. Det ra det pam pat a labino mani det in pitar a labino, ma det ra det pam pat a natino det in pitar a natino. Gong sur a wanpat, ra mot woro tomo maragom a mani. <sup>3</sup> Mot in pilok pas lako taro ra mot nurnur un det sur det in los anumot a etabor. Ma ra an nanpat tiro, an pitar tar a kum pas na wasiso talapor torom det sur det in losi tomo nam anumot a etabor, ma an tulu ru det nami usapat o Jerusalem. <sup>4</sup> Ra mot nuki lena i wakak sur iau kai an nan, met in nan tomo.

*O Pol i inanos talapor det una nun a inawan*

<sup>5</sup> An nan utong una kum tamon una papor Masedonia. Ma numur an nan kai utiro torom mot. <sup>6</sup> Kutiro an kis lilik pas ut tomo nam mot tiro iai, o kutiro an kis tuk ra a kum kalang na kotokoto ma a labino wuwu in rop, ra numur mot in warut iau una nung a inawan sur a kum tamon gisen bulung ra an nan iai. <sup>7</sup> Ka nemi sur an nan torom mot uniri, ra an tur pas kut nisamot una nung a inawan. Ra a Labino in mulaot iau, a nemi lena an kis suano pasi ut nisamot. <sup>8</sup> An kis nin o Epeses tuk una Bung na Pentikos, <sup>9</sup> uni a kisapi i sa papos sur anung a pinapam in lubung ma in wu, ma a susut na taro kai det nem na turbati.

<sup>10</sup> Ra o Timoti in nanpat torom mot, mot in tamtamabati sur gong i ngara ra i kis nisamot, uni i pam a pinapam anun a Labino, elar nam iau kai a pami. <sup>11</sup> Gong mot tama pisopiso i. Ra in millet urin torom iau, mot in tulu ru i nama malmal. Ma iau an kis langlang pasi, ra in nanpat tomo nama kum tistisindat.

<sup>12</sup> A nemi sur an inanos mot una tisindat o Apolos. A saring dekdeki lena in nan tomo nama kum tistisindat torom mot, ikut ke

nem na wan utmakai. Numur ra tu kisapi in papos toromi, in nan ut.

*A kum tintinip na wasiso anun o Pol*

<sup>13</sup>Mot in tumarong, ma mot in tur dekdek una nurnur. Mot in elar nama kum dekdek na musano, ra ka det ngara. <sup>14</sup>Mot in pam a kum utna rop nama marmaris.

<sup>15</sup>Mot sa tasmani lena a taro ra det kis una rumu anun o Stepanas, det a mugano taro ra det nukpukus tiro una papor Akaia, ma det sa pitar tar det sur det in warut a taro anun o God. A saring mot, a kum tistising, <sup>16</sup>sur mot in unatino pas mot torom a ngas na taro lenra, ma torom det ra det papam tomo nam det, ma det dekdek una pinapam ra. <sup>17</sup>A gas una inawan pat urin anun o Stepanas, o Potunatus ma o Akaikas, uni detul warut iau ra ka mot kis tomo nam iau. <sup>18</sup>Detul ugassas pas iau, ma detul ugassas pas mot kai. I wakak ra mot in tama lele a ngas na taro lenra, ma mot in pitar a urur torom det.

<sup>19</sup>A taro na lotu una kum tamon nin una papor Asia det pitar anundet a marmaris torom mot. O Akuila ma o Pirisila ma a taro na lotu kai ra det ser wan tomo una nunder a rumu, det pitar anundet a labino marmaris torom mot una risan a Labino. <sup>20</sup>A kum tistisindat rop det pitar anundet a marmaris torom mot. Ra mot etorom, mot in nem etetalai mot nama egom na marmaris, ma mot in pami elar nama tokodos na petutna.

<sup>21</sup>Anung a nat na wasiso na marmaris ri, iau ut, o Pol, a tumusi torom mot nama lamang. <sup>22</sup>Osi ra ke nem a Labino, in iru tukum. Wan urin a Labino!

<sup>23</sup>A marmaris anun a Labino o Iesu in kis tomo nam mot. <sup>24</sup>Anung a marmaris torom mot rop una Karisito Iesu. Amen.

## A Pas anun o Pol torom a taro Pilipai

### *A wasiso talapor mugu*

Ra o Pol i kis una karabus tong o Rom, i tumus a wat na pas: Ara torom a taro Epeses, ara torom a taro Pilipai, ara torom a taro Kolosi ma ara kai torom o Pilimon.

A pas ri i tumusi torom a taro kurong o Pilipai, ra i watung wakak torom det una mani ra det pitar tari tano. Det pitar tari tan o Epaproditus, ra i wan nami torom o Pol.

O Pilipai i ara labino tamon kurong una papor Masedonia. O Pol i wan utong una nun a manru na inawan. Ra o Pol i wan utong, ka det longoro i utmakai a Wakak na Wasiso. Det ra det nukpukus una warawai anun o Pol, det a mugano taro na lotu tong o Pilipai (tama Ap 16:12-40).

A taro na lotu tong o Pilipai ausur a kum tene gongon. Ikut det gasgas sur det in etabor nama mani torom a taro na lotu kusa o Judia ra det sibo doko, ma torom o Pol kai.

O Pol i kis una karabus, ikut i gas ma i nemi lena, a taro Pilipai kai det in gas ra det etorom a kum mamaut. O Pol i watungi torom det lena, det in tur dekdek ma det in tumarong det gusun a kum tene ususer torotoro ra det ususer a taro lena, det in tok talilis a pinindet. I watungi kai lena, det in mur a petutna anun o Iesu ra i unatino pasi.

Una buk ri, dat tama i lena, o Pol i nem doko a taro na lotu tong o Pilipai.

A inawan ina buk Pilipai:

A turturkibin ina buk ri (1:1-11)

O Pol i inanos det una nun a kinkinis una karabus (1:12-26)

A petutna ra a kum tene nurnur det in muri (1:27-2:18)

O Pol i nem na tulu ru o Timoti ma o Epaproditus (2:19-30)

Det in tur dekdek (3:1-4:9)

O Pol i gas una nundet a etabor (4:10-20)

A ururop na wasiso anun o Pol torom det (4:21-23)

<sup>1</sup> Iau o Pol, mir nam o Timoti, aru tultul anun o Karisito Iesu, mir tumtumus torom mot, a taro rop anun o God, tiro una tamon Pilipai. Torom mot ra mot laun un o Karisito Iesu, ma mot kai a kum mugumugu

tagun a lotu ma a kum tene warut. <sup>2</sup> A marmaris ma a malmal tan o God a Tamandat ma a Labino o Iesu Karisito in kis tomo nam mot.

### *A niaring anun o Pol sur a taro Pilipai*

<sup>3</sup> A watung wakak torom anung o God una kum du bung rop ra a nuk pas mot. <sup>4</sup> Ma una nung a kum niaring rop sur mot rop, a ser wararing nama gasgas, <sup>5</sup> uni mot tur tomo nam iau una Wakak na Wasiso, turpasi ut una mugano bung ra mot longoro i tuk uniri. <sup>6</sup> A tasman mulusi lena, o God ra i turpas a wakak na pinapam un mot, in pam nanani, tuk ra in uropi, una bung ra o Karisito Iesu in nan pirso melet.

<sup>7</sup> I tokodos sur an nuknuk lenri un mot rop, uni mot kis mulus una nuknuking. Dat rop dat tur tomo una pinapam ra o God i pitar tari tang una nun a marmaris. Dat tur tomo ra a kis una karabus, ra a wasiso balu det ra det watung laulau a Wakak na Wasiso, ra a upuaso i torom a taro. <sup>8</sup> O God i tasmani lena, a nem doko i sur an tama mot rop, uni a nem doko mot nama marmaris anun o Karisito Iesu.

<sup>9</sup> A wararing sur anumot a marmaris in labo ma in labo bing, ma a mananos ma a tastasman in lubung una numot a nilaun. <sup>10</sup> Ra in lenra, mot in pet lari sur mot in tasman lele asau ra i wakak o ke wakak, sur a magiramot in tokodos umatan o God, ma katu etakun kura un mot tuk una bung ra Karisito in nanpat. <sup>11</sup> Mot in bukus nama tokodos ino, ra o Iesu Karisito in pam pati una numot a nilaun, sur a taro det in watung ulabo pas o God ma det in rakon lekeleke pasi.

### *A kinkinis anun o Pol una karabus i ulubung a Wakak na Wasiso*

<sup>12</sup> A kum tistising, a nemi sur mot in tasmani lena, a kum mamaut ra a taramo i, i ulubung a Wakak na Wasiso sur in nan sarara. <sup>13</sup> Uni ra, i talapor torom a kum tene inaim rop ra det tamtamabat a rumu anun a king, ma torom a taro rop kai lena, a kis una karabus uni iau anun o Karisito. <sup>14</sup> Anung a kinkinis na karabus i sa udekdek a susut na taro ra met nisnisino una Labino, ma ka det ngara sur det in wasiso puaso nama wasiso anun o God nama dekdek.

<sup>15</sup> A lingmulus, ara taro det warawai una Karisito uni det nuknuk laulau un iau. Ma ara taro kai, det warawai uni det nem na

turbat iau gusun anung a kinkinis na mugu-mugu. Ikut, ara taro det warawai nama wakak na nuknukindet. <sup>16</sup>Det warawai uni a marmaris i kis un det. Det tasmani lena, a kis una karabus sur an wasiso balu a taro ra det watung laulau a Wakak na Wasiso. <sup>17</sup>Ikut ara taro det warawai una Karisito uni det nem na ulabo pas det ut, ma ke lingmulus a nuknukindet. Det nem na wot meleti kut anung a kum mamaut, ra a kis una karabus. <sup>18</sup>Ikut katu utna ra det warawai nama sakino nuknuk o a wakak na nuknuk. Det rop ri det warawai kut una Karisito. Iri a kibino ra a gas.

A lingmulus, an gas bolbolos, <sup>19</sup>uni a tasmani lena, una numot a kum niaring, ma a warut anun a Nion o Iesu Karisito, asau ra i wanpat un iau din pukusi sur an langolango. <sup>20</sup>A nurmur lena, kan pam tu utna ra an maimai uni. An tur dekdek ma kan ngara, sur an ulabo pas o Karisito una nung a kum petutna rop elar nami ra numugu a ser pami. Sako an laun o an mat, an ulabo pasi ut. <sup>21</sup>Uni a nuknuking i lenri: Ra a laun, a laun sur o Karisito. Ra an mat, an rakon pas a labino utna sakit. <sup>22</sup>Ra a laun, anung a pinapam in wu a wakak na wino. Ka tasmani asi na pasander mo ra an pilok pasi, a nilaun, o a minat. <sup>23</sup>Aru nuknuking. Ara, a nem doko i, sur an nan ma an kis tomo nama Karisito, i ra i wakak sakit tan ara pasander. <sup>24</sup>Ikut i wakak sakit sur an laun, ra an warut mot. <sup>25</sup>A tasman mulusi lena, an laun ma an kis tomo nam mot, sur mot in lubang, ma mot in gas una nurmur. <sup>26</sup>Ra dat in tamtama tomo melet, anumot a gasgas una Karisito Iesu in bukus ma in tiltilingis, kibino un iau.

<sup>27</sup>Asau ra in nanpat, mot in lari sur anumot a nilaun in mur sot pas a Wakak na Wasiso anun o Karisito. Ra an nan sur an tama mot, o ra an kis bakbak ma an longoro i kut a wasiso un mot, an tasmani lena, mot tur dekdek un ara nuknuk sot kut, ra mot papam tomo nam ara nuknukimot kut sur a taro det in nurmur una Wakak na Wasiso, <sup>28</sup>ma ka mot in ngaran a kum ebar. Iri a ukinalong torom anumot a kum ebar ra det in iru, ikut torom mot, o God in ulaun mot. O God ut in pam a kum utna ra. <sup>29</sup>Uni o God i udan mot. Ausur i udan mot nama numot a nurmur kut una Karisito, awu, i udan mot nama mamaut kai, ra mot taramo i una Karisito. <sup>30</sup>Mot taramo a mamaut uni mot sa tur tomo nam iau una inaim. A

inaim ra numugu mot tama i ra a pami, ma uniri mot longoro i lena, a pami utmakai.

## 2

*Dat in unatino dat elar nam o Karisito*

<sup>1</sup>A nilaun anumot una Karisito i udekdek mot, anun a marmaris i umanatang a nuknukimot, mot laun tomo nama Tokodos na Nion, mot nem etetalai mot, ma mot pam a wakak ino torom mot etetalai. <sup>2</sup>Ra a nemi sur in takai kut a nuknukimot, mot in marom torom mot etetalai, ma mot in tur tomo una numot a kum pinapam, ma in takai kut a balamot. Ra mot in pami lenra, in ubukus anung a gasgas. <sup>3</sup>Gong mot pam tu utna sur in warut mot ut, ikut ken warut ara taro kai. Gong mot pam tu utna sur mot in ulabo pas mot nami. Mot in unatino pas mot ma mot in nuk ulabo pas ara taro gisen. <sup>4</sup>Gong mot nuknuk kut sur asau ra in uwakak mot. Mot taktakai mot in nuknuk kai sur a utna ra in uwakak a taro gisen.

<sup>5</sup>A nuknukimot in elar nama nuknukin o Karisito Iesu.

<sup>6</sup>I elar mulus nam o God,

ikut ke nuki sur in pam sikot anun a labino kinkinis ra i elar nam o God, awu.

<sup>7</sup>I wan gusun anun a labino kinkinis ra, i rakon pas a magiran ara tultul, di ususi, i wanpat a musano.

<sup>8</sup>Ma a taro det tama i lena, i a musano mulus.

I unatino pasi, ma i tarom ra i pitar tari ut, sur in mat, a lingmulus, i mat un in nanai kutus.

<sup>9</sup>Ra o God i ulabo pas o Karisito una kinkinis i labo sakit,

ma i pitar tar a rising tano ra i labo taun a kum rising rop,

<sup>10</sup>sur a kum ukukis rop sapat netes una langit ma una rakrakon bual ma utuntudu ina rakrakon bual, det in kis butkeke una risan o Iesu,

<sup>11</sup>ma det rop det in watung puaso i lena, o Iesu Karisito i a Labino, sur det in ulabo pas o God a Tamandat.

*Dat in talapor elar nama kum nangnang*

<sup>12</sup>A kum wakak na paspasang, mot ser tarom una kum bungbung ra a kis tomo nam mot. Ra uniri, ra ka kis tomo nam mot, i wakak sur mot in dekdek una tinorom, sur mot in ser ese i una numot a nilaun lena, o God i sa ulaun pas mot. Mot in dekdek ma mot in neder ma mot in ngara sur mot in

ese i lena o God i sa ulaun pas mot. <sup>13</sup> Uni o God ut i papam un mot sur mot in nem asau ra i elar nama nuna nemnem, ma i pitar a dekdek torom mot sur mot in pami lenra.

<sup>14</sup> A utna rop ra mot pami gong mot ururai, ma gong mot wasiso na engaras uni, <sup>15-16</sup> sur mot in langolango gusun a kum etakun ma mot in tokodos, a kum nutnutun o God, ma ka tu niraro un mot, epotor tan a taro ra ka det tokodos ma a magirandet i laulau sakit. Ra mot etabor nama wasiso na nilaun, mot in talapor epotor tandet elar nama kum nangnang ra det talapor una rakrakon bual. Ra mot in pami lenra, an warango mot una bung anun o Karisito, uni in talapor lena, ka kalabor oros kut, ma anung a pinapam ke utna oros kut. <sup>17</sup> Anumot a pinapam ra anumot a nurnur i pam pati, i elar nama etabor torom o God. Ra kanapi an mat, a gaping in elar nama etabor ra di lingisi netes una numot a etabor.\* Ra an gas ma an gas tomo nam mot rop. <sup>18</sup> Lenra, mot kai mot in gas, ma mot in gas tomo nam iau.

*O Pol i nem na tulu o Timoti ma o Epaproditus*

<sup>19</sup> A nurnur una Labino o Iesu, ra milau mo an tulu ru o Timoti torom mot, sur an longoro tu wasiso un mot ra an gas. <sup>20</sup> Katutaio i elar nam o Timoti, ra i nuknuk doko un mot. <sup>21</sup> Uni, a taro rop det nuk pas det ut ma anundet a kum pinapam, ma ka det nuk pas o Iesu Karisito ma anun a pinapam. <sup>22</sup> Ikut mot sa tasman a magiran o Timoti, ra i papam tomo nam iau una warawai nama Wakak na Wasiso elar nama nat ra i papam tomo nam o tamano. <sup>23</sup> Ra ut an tasman asau ra din pami un iau, a nuki lena, an tulu ru i maragom torom mot. <sup>24</sup> Ma a nurnur una Labino lena, milau mo, iau ut an nanpat torom mot.

<sup>25</sup> A nuki lena, in wakak ra an tulu melet o Epaproditus, a tisindat torom mot. Mir papam tomo ma i ser tur warut iau una inaim sur a Wakak na Wasiso, ma i a tultul anumot ra mot tulu ru i sur in warut iau, nama kum utna ra a sibo suri. <sup>26</sup> I nem doko i sur in tama mot rop melet, ra i tupunuk uni mot longoro i lena i misait. <sup>27</sup> A lingmulus ut ra i misait, milau in mat. Ikut o God i marisi, ma ausur i maris o Epaproditus kut, i maris iau utkai, sur gong a tupunuk melet. <sup>28</sup> Ra

uniri a nem doko i sur an tulu ru i torom mot, sur mot in tamtama tomo melet ma mot in gas, sur kan nuknuk melet. <sup>29</sup> Mot in gas pasi una risan a Labino nama labino gasgas, ma mot in urur torom a ngas na taro lenra, <sup>30</sup> uni i pitar taro anun a nilaun una pinapam anun o Karisito, ra milau mo sur in mat. Ke nuk pas anun a nilaun, i pitar tari sur in warut iau, uni mot ut, ka mot pet lar pasi.

### 3

*Dat ra dat nurnur una Karisito dat a kum tene tokodos mulus*

<sup>1</sup> A kum tistising, a ururop na wasiso ri, a tumusi torom mot: Mot in gasgas uni mot anun a Labino. A gas sur an tumus melet a kum utna ra a sa tumus tari munung torom mot, sur in warut mot.

<sup>2</sup> Mot in tumarong mot gusun a kum ngalngalia na pap, a taro ra det pampam a sakino, ma det tok laulau a pipinin a taro, ma det ususer det lena, ra ka di tok talilis a pinindet, ka din ulaun det.\* <sup>3</sup> Dat ra dat lotu torom o God nama dekdek ina Niono, dat kut ra, a taro mulus anun o God, i elar nami ra di sa tok talilis tar a pinindat. Ka dat nurnur una pinapam ra a taro det pami, awu. Dat gas kut una pinapam ra o Karisito Iesu i sa pam tari un dat. <sup>4</sup> Ra gunuk a pinapam anun a taro i ulaun dat, iau ut an pet lar pasi sur an nurnur uni. A kum pinapam ra det nurnur uni, iau a wakak doko taun det. <sup>5</sup> Iau a te Israel, tagun a kabotaro Benjamin, a te Ibru ma a mur anundet a kum petutna. Ra i sa tiwal na bung bat iau, di tok talilis a pining. Iau a Parisi ma a ser mur wakak a kum Warkurai anun o Moses. <sup>6</sup> A dekdek doko sur an mur kodos pas a pinapam anun o God, ma una nung a pinapam ra, a banlaulau a kum tene lotu anun o Karisito. Ra gunuk taio in tokodos uni i mur rop a kum Warkurai, katu etakun in los iau.

<sup>7</sup> Ikut a kum utna rop ri, ra numugu i labo torom iau, uniri i utna oros mukut torom iau, i kibino un o Karisito. <sup>8</sup> Lingmulus, a kum utna rop ri, det a kum utna oros mukut torom iau. Ara utna kut ra i labo i lenri: an tasman o Karisito Iesu anung a Labino. Kibino un o Karisito, a sa ubek ru

\* 2:17: Ra di tun a wewegua sur a etabor torom o God, a ramano kum dino kai di lingis a wain netes una etabor sur din etabor kai nami. \* 3:2: A tinotok talilis i a ukinalong di pami sur in ese i lena a musano i ara tagun a taro anun o God ra det mur a kum Warkurai anun a taro Juda.

a kum utna rop ri. Det elar mukut nama beren umatang, sur an los pasi mukut o Karisito una nung a nilaun, <sup>9</sup>ma an patop tomo nami. Ma ausur iau a tene tokodos uni a mur a kum Warkurai, awu, kibino kut uni a nurnur una Karisito. O God i watung dat a kum tene tokodos uni dat nurnur una Karisito. <sup>10</sup>A nemi sur an tasman o Karisito ma a dekdek ina nun a katkatatur melet gusun a minat, ra a nemi lena, an tur tomo nami una nun a kum ngunungut, ma an elar ut nami una nun a minat. <sup>11</sup>I lenkutra, a nurnur lena, iau kai an katatur melet gusun a minat.

#### *A kinalabor sur a ikul*

<sup>12</sup>Ausur a nuki lena, a sa utur ukai a kum utna rop ra, ma ka tokodos mulus utmakai. Ikut a dekdek utmakai sur an utur ukai a utna ra o Karisito Iesu i kabo pas iau suri. <sup>13</sup>A kum tistising, ka nuki lena, a sa utur ukai i. Ikut ara utna ra a pami, ka nuknuk melet sur asau ra tagun numugu, a dekdek mukut sur asau ra kuri numugu tang. <sup>14</sup>A kalabor usa numugu sur a ururopino sur an los pas anung a ikul. A ikul, i a kakabo anun o God torom iau sur a nilaun sapat una langit, kibino una Karisito Iesu.

<sup>15</sup>I wakak sur dat, ra dat tur dekdek, a nuknukindat in lenra. Ikut ra a nuknukimot in senene un tu utna, o God ut in utalaporu torom mot. <sup>16</sup>Ikut dat in mur a wakak na nilaun ra dat sa utur ukai pasi.

<sup>17</sup>A kum tistising, mot in mur anung a kum ngas na petutna, ra a sa pam larlar tari torom mot, ra i wakak sur mot in tamtama murmur det ra det muri. <sup>18</sup>Uni a susut na dino a sa inanos tar mot lena, a susut det laun elar nama kum ebar anun in nanai kutus anun o Karisito. Ra uniri a inanos melet mot, ma a lurlur na matang i puku. <sup>19</sup>Det wan mukut sur a iniru, a nemnem na pinindet i anundet a god. Det uaman nama kum petutna ra din maimai uni. A nuknukindet i kis kut una kum utna taginin upiso. <sup>20</sup>Ikut dat, a taro tagisapat una langit. Ra dat kis langlang nama labino nemnem sur a Tene Ulaun, ra in nan pirso tagisapat netes, a Labino o Iesu Karisito. <sup>21</sup>In pukus pas a pinindat ra ke dekdek, sur in elar nama pinino ra i bukus nama minamar. In pukusi nama dekdekino. A dekdekino ra i papam nami sur in ubek tar a kum utna rop utuntudu ina nun a warkurai.

## 4

<sup>1</sup>A kum tistising, mot in tur dekdek una Labino, lenutra a sa inanos tar mot nami. A nem doko mot, ma a nem doko i sur an tama mot, uni mot anung a gasgas ma mot elar nama ikul una nung a pinapam.

*A kum wasiso ra in udekdek a taro na nurnur*

<sup>2</sup>A saring mur o Ewodia ma o Sintike sur in takai kut a nuknukimur, uni mur anun a Labino. <sup>3</sup>Ma ui kai ara lingmulus na tene pinapam tomo nam iau, a saring ui sur un warut aru ino ri, uni der papam dekdek tomo nam iau sur a Wakak na Wasiso in nan sarara. Met papam tomo nam o Klemen, ma ara taro kai ra a kum risandet i sa kis una buk na nilaun.

<sup>4</sup>Mot in ser gas una Labino una kum bungbung rop. Ma an watung meleti lena, mot in gasgas. <sup>5</sup>Mot in ese puaso anumot a wowowon na petutna torom a taro rop. Milau mukut a Labino in nanpat. <sup>6</sup>Gong mot nuknuk mongmongoro sur tu utna. Una kum utna rop, mot in wararing nama niaring na watung wakak torom o God. Ma mot in inanosi una numot a kum nemnem. <sup>7</sup>Ra a malmal anun o God ra i labo sakit tana mananos rop anun a taro, in tamtamabat a balamot ma a nuknukimot, uni mot anun o Karisito Iesu.

<sup>8</sup>A kum tistising, a ururop na wasiso ri a tumusi torom mot: A nuknukimot in kis una kum utna ri: asau ra i lingmulus, asau ra di urur uni, asau ra i tokodos, asau ra katu dur uni, asau ra i tamtama wakak ma asau ra a taro det watungi lena i wakak. Ra tu utna in wakak sakit, o ra tu utna di watung ulabo pasi, a nuknukimot in kis uni. <sup>9</sup>Asau ra mot sa ususer pasi gusun iau, o mot sa rakon pasi, o mot sa longoro tari gusun iau, o mot sa tama tari un iau, mot in muri. Ra o God a tene malmal in kis tomo nam mot.

*O Pol i gas nama etabor anun a taro na lotu tiro o Pilipai*

<sup>10</sup>A gas doko una Labino, uni uniri, mot sa nuk melet iau. I sa suano i ra ka mot warut iau, ikut, a lingmulus, ka mot dumano iau, ikut katu kisapi sur mot in warut iau. <sup>11</sup>Ka watungi lenri, uni a sibo, awu. Uni a sa ulason pas iau una balano molmol, una kum sau ra an etoromi. <sup>12</sup>A sa tasman a kinkinis na sibo, ma a sa tasmani utkai a kinkinis nama susut na utna. A sa lason sur an balano molmol una a kum ngas na kinkinis

ra an etoromi: ra an masur, o an murak, ra a utna in susut tang, o an sibo. <sup>13</sup> A pet lar pas a kum utna rop kibino una Karisito ra i udekdek iau.

<sup>14</sup> Ikut i wakak ra mot tur tomo nam iau una kum mamaut ra a taramo i. <sup>15</sup> Mot a taro Pilipai, mot tasmani ut ra a warawai nama Wakak na Wasiso tiro una papor Masedonia ra mot nukpukus. Numur a wan tagitiro o Masedonia, ma kalako taro na lotu det tur tomo nam iau sur det in warut iau nam tu etabor, awu, mot sot kut. <sup>16</sup> Ra a kis tong o Tesalonaika, ausur mot tabor iau ara dino kut, a susut na dino ut mot tabor iau ra a sibo. <sup>17</sup> Ausur anumot a etabor ra a ling suri. A nemi kut sur mot in los a ikul kura numur una numot a wakak na pinapam ra. <sup>18</sup> A sa los pas a kum utna rop ra mot tula i. I labo sakit, ma i labo taun anung a sibo. Ka sibo mo sur tu utna, uni a kum utna ra mot tula i, a sa los pasi tan o Epaproditus. I elar nama etabor torom o God, ra i sangnain wakak, ra o God i gas nami, ma i tokodos toromi. <sup>19</sup> A God anungi in pam sot a kum utna rop ra mot sibo suri, tagun anun a kum wakak na ululeng ra anundati, kibino una Karisito Iesu. <sup>20</sup> Dat in ulabo pas anundat a God a Tamandat, ken rop ma ken rop. Amen.

*A kum wasiso na marmaris*

<sup>21</sup> Mot in pitar anung a marmaris torom a taro rop anun o Karisito Iesu. A kum tistising una nurnur ra det kis tomo nam iau, det pitar anundet a marmaris torom mot. <sup>22</sup> A taro anun o God, det rop, det pitar anundet a marmaris torom mot, ma a taro kai anun o God, ra det kis una rumu anun a Sisa, det pitar anundet a marmaris torom mot.

<sup>23</sup> A marmaris anun a Labino o Iesu Karisito in kis una niomot. Amen.

## A Mugano Pas anun o Pol torom a taro Tesalonaika

### *A wasiso talapor mugu*

Ra o Pol i kis tong o Korin i tumus a pas ri, a mugano pas torom a taro na lotu tong o Tesalonaika.

O Tesalonaika a labino tamon una papor Masedonia. Una mantul na inawan anun o Pol i wanpat tong o Tesalonaika ra i warawai torom det (tama Ap 17:1-14). Ara taro ra det nukpukus, det tagun a taro Juda, ma a susut tandet tagun a kum kabotaro gisen. A kum mugumugu anun a taro Juda tong o Tesalonaika det kankan uni a ramano taro tagun det, det sa nurnur un o Iesu. Ra det lu ru o Pol gusun anundet a tamon, ma i wan utong o Beria. Numur i tulu ru o Timoti torom det, ra o Timoti i inanos o Pol un det.

Una pas ri o Pol i watung wakak torom o God uni a taro Tesalonaika det tur dekdek una nurnur ra det etorom a kum mamaut, ma det nem o Pol. Una pas ri, o Pol i nem na udekdek anundet a nurnur, ma i balu i kai anundet a kum iting una minat.

A inawan ina Mugano Buk Tesalonaika:

A turturkibin ina buk ri (1:1)

O Pol i gas nam det (1:2-10)

A pinapam anun o Pol tong o Tesalonaika (2:1-3:13)

A ngas na nilaun ra i ugagas o God (4:1-12)

A inawan pat melet anun a Labino (4:13-5:11)

A tintinip na wasiso anun o Pol torom det (5:12-28)

<sup>1</sup>Iau o Pol, o Sailas, ma o Timoti, metul tumtumus torom mot a taro na lotu tong o Tesalonaika, mot ra mot laun un o God a Tamandat ma a Labino o Iesu Karisito. A marmaris ma a malmal torom mot.

*A nilaun ma a nurnur anun a taro Tesalonaika*

<sup>2</sup>Metul ser watung wakak torom o God un mot rop, ma metul ser pitar tar mot torom o God una numetel a kum niaring. <sup>3</sup>Ra metul wararing torom anundat a God a Tamandat, metul nuk pas anumot a kum pinapam i kibino una numot a nurnur, ma metul nuk

pas a kum pinapam i kibino una numot a marmaris, ma metul nuk pasi kai, anumot a tuntunur dekdek, i kibino una numot a kinkinis langlang nama nurnur una Labino o Iesu Karisito.

<sup>4</sup>A kum tistisimetul, mot ra o God i maris mot, metul tasmani lena i sa pilok pas mot, <sup>5</sup>uni a Wakak na Wasiso ra metul upuaso i, ausur i wanpat torom mot elar nama wasiso kut, awu. I wanpat tomo nam a dekdek ma a Tokodos na Nion, ma mot longoro lele i ra mot pam ukai i una balamot. Ra metul laun nisamot, mot tasman wakak a magirametul, ra metul ser upuaso i sur in pet wakak mot. <sup>6</sup>Mot sa mur pas a magirametul ma a magiran a Labino. A taro det banlaulau mot, ikut mot pam ukai a wasiso nam a gasgas, ra a Tokodos na Nion i pitar tari tamot. <sup>7</sup>Mot wanpat a wakak na larlar torom a taro na nurnur rop tiro una aru papor, o Masedonia ma o Akaia. <sup>8</sup>A wasiso anun a Labino ra mot upuaso i, i sa wan sarara, elar nam a tinangis ina garamut, ra i wan bakbak. Ausur tiro kut o Masedonia ma o Akaia, awu. A kum tamon rop det sa tasman anumot a nurnur un o God. Asau melet mo ra metul in watungi? <sup>9</sup>Uni det ut det wasiso talapor una numot a wakak na petutna ra mot gas pas metul. Ma det wasiso talapor kai un mot, lena mot sa tupukus torom o God, ma ka mot lotu mo torom a kum torotoro na god. Mot papam mo torom o God, i ra a lingmulus ino ma a lalaun ino. <sup>10</sup>Ra mot kis langlang sur a Nutunu, ra in nan pirso tagisapat una langit, i ra o God i sa ukatutur melet pasi gusun a minat. O naro ra o Iesu, ra i ulaun pas dat gusun a kankan anun o God, ra in nanpat.

## 2

*A pinapam anun o Pol detul tong o Tesalonaika*

<sup>1</sup>A kum tistisimetul, mot ut mot tasmani lena, anumetel a inawan pat torom mot ke utna oros, awu, i wu ut a wino. <sup>2</sup>Mot tasmani lena numugu tana numetel a inawan pat torom mot, a taro det banlaulau metul ma det ban umaimai metul tong o Pilipai. Ikut anundat a God i warut metul, ra metul dekdek ut sur metul in wasiso puaso una nuna Wakak na Wasiso torom mot, ma ka metul ngaran det ra det lari sur det in sabbat metul. <sup>3</sup>Ra metul saring mot sur mot in nukpukus, ausur anumetul

a wasiso i raro, ausur kai metul wasiso nam tu sakino nuknuk, ma ausur metul toro pas mot. <sup>4</sup>Awu! Metul wasiso puaso nam a Wakak na Wasiso, uni o God i sa lar tar metul, ma i nurnur un metul lena metul in pami. Ka metul wasiso puaso sur metul in ugargas a taro nami, awu, sur o God ut in gas uni, i ra i sa lar tar metul. <sup>5</sup>Mot sa tasmani lena ka metul ugargas mot nam tu wasiso na umarom, ma ka metul nemnem eno sur tu mani gusun mot. O God i tama i ma i tasman metul. <sup>6</sup>Ka metul nemi sur mot o taio gisen kai in watung ulabo pas metul.

<sup>7</sup>I tokodos sur metul in saring mot sur tu ikul, uni metul a tulu aposel anun o Karisito. Ikut ka metul pami lenra. Metul upuaso a balano wakak epotor tamot, elar nam a ino ra i tamamabat a kum nutnutunu. <sup>8</sup>Metul nem doko mot, ra metul gas doko sur metul in inanos mot una Wakak na Wasiso anun o God. Ausur i kut ra, awu, metul gas utkai sur metul in pitar anumetul a nilaun kai torom mot, uni mot labo doko umatametul.

<sup>9</sup>A kum tistisimetul, mot sa tasman anumetul a dekdek na pinapam. Una kum mirum ma a waspi, metul papam nama lamametul sur u warut metul una numetul a kinkinis. Metul pami lenri, sur metul in warawai torom mot nama Wakak na Wasiso anun o God ma gong metul pitar a mamaut torom mot sur mot in kul metul. <sup>10</sup>Mot ut, ma o God kai, mot tama a magirametul ra metul kis epotor tamot, a kum tene nurnur. A magirametul i talapor ma i tokodos, ma katu etakun i los metul un tu utna. <sup>11</sup>Mot tasmani lena anumetul a petutna torom mot rop taktakai, i elar nam a petutna ra ara musano i pami torom a kum nutnutunu. <sup>12</sup>Metul udekdek mot, metul wasiso na emarom torom mot, ma metul inanos mot sur mot in laun nam a ngas na nilaun ra i ugargas o God, i ra i kabo pas mot sur anun a matanitu ma anun a minamar.

<sup>13</sup>Ara kibino kai ra metul ser watung wakak torom o God i lenri: Ra mot rakon ukai a wasiso anun o God, ra mot longoro i gusun metul, mot mulaot pasi. Ausur mot mulaot pasi elar nam a wasiso kut anun a taro, awu, mot mulaot pasi uni a wasiso ra, i a wasiso ut anun o God. A wasiso ra, kura i papam una nilaun anumot ra mot sa nurnur. <sup>14</sup>A kum tistisimetul, mot elar nama taro na lotu anun o God una Karisito o Iesu, ra det kis tong una papor Judia. Uni, mot kai, mot taramo a ngunungut tan a

taro tagun anumot a tamon ut, i elar nama taro na lotu tong o Judia det taramo i tan anundet a taro ut, a taro Juda, <sup>15</sup>det ra det um doko a Labino o Iesu ma a kum poropet, ma det lu ru metul kai. O God ke gas nam det, ma det kis na ebar nama taro rop, <sup>16</sup>uni det lari sur det in turbat metul, sur gong metul warawai torom a taro ra ausur a taro Juda sur gong o God i ulaun pas det. Ma una nundet a petutna ra, det pam tomotomo i kut anundet a kum sakino petutna. Ikut a kankan anun o God i sa wanpat maragom torom det.

*Detul nem na tama melet a taro Tesalonaika*

<sup>17</sup>A kum tistisimetul, ra a taro Juda det ukis sarara ru metul gusun mot, anundat a kinkinis sarara ke suano i. Dat kis sarara kut una pinindat, ikut una nuknukimetul metul nuk mot ut. Metul nem doko i sur metul in tama mot, ra metul dekdek sur metul in pam sot pasi. <sup>18</sup>Metul nem doko i sur metul in milet melet torom mot. Iau, o Pol, a lari a susut na dino sur an nan torom mot, ikut o Satan i turbat metul. <sup>19</sup>Metul nem doko i sur metul in tama mot melet, uni metul nurnur un mot lena mot sa tur dekdek, ma mot, mot kibino una numetul a gasgas, ma mot kibino una numetul a kunukul tagun anumetul a pinapam, una bung ra anundat a Labino o Iesu in nanpat, ma dat in tur umatano. <sup>20</sup>I lingmulus sakit ra mot ut anumetul a minamar ma anumetul a gasgas.

### 3

<sup>1</sup>Una numetul a nuknuk na nginara un mot, ka metul nem na kis liklik mo. Metul nuki lena i wakak sur mir kut nam o Sailas, mir in kis nin o Athens. <sup>2</sup>Ra mir sa tulu ru o Timoti a tisindat, ma a tene pinapam anun o God tomo nam mir, ra metul ser wasiso talapor nam a Wakak na Wasiso una Karisito. Mir sa tulu ru i torom mot, sur in udekdek mot, ma in warut mot una numot a nurnur, <sup>3</sup>sur gong taio tagun mot a nuknukino i talara kibino una kum mamaut ra i monong mot. Uni mot tasmani ut lena a kum mamaut in monong dat. <sup>4</sup>Ra dat kis tomo utmakai, metul ser inanos mot lena din banlaulau dat. Ma mot sa tasmani lena, a kum mamaut ra, i sa wanpat ut. <sup>5</sup>I mo ra a tulu ru o Timoti torom mot. A tulu ru i torom mot sur an mananos una numot a nurnur, uni a ngara doko un mot ma ka nem na kis liklik mo. A ngara, sako

a Tene Ululam i sa ulam pas mot, ma sako anumetul a pinapam torom mot in utna oros kut.

*A wakak na wasiso talapor una taro Tesalonaika*

<sup>6</sup>Uniri o Timoti i sa milet melet gusun mot tagitiro urin sur mir. I los a wakak na wasiso talapor un mot torom mir, una numot a nurnur ma anumot a marmaris. I inanos mir lena, mot ser gas ra mot ser nuk melet pas anundat a kum kinkinis tomo numugu, ma mot nem doko i sur mot in tama metul, elar nam metul kai metul nem doko i sur metul in tama mot. <sup>7</sup>A kum tistisimetul, anumot a nurnur i udekdek metul una numetul a kinkinis ubalan a kum mamaut, ma a kum petutna ra a taro det banlaulau metul nami. <sup>8</sup>Uniri anumetul a nilaun i wakak doko, uni mot tur dekdek una Labino. <sup>9</sup>Metul gas doko nam mot umatan anundat a God, ma metul watung wakak toromi. Metul in watung wakak pepetlai toromi? Uni anumetul a gasgas i labo doko. <sup>10</sup>Una kum mirum ma a waspi, metul pitar rop tar anumetul a nilaun una niaring sur mot. Metul wararing sur metul in tama melet mot, ma metul in ususer mot un lako kum utna ra mot sibo utmakai suri una numot a nurnur.

<sup>11</sup>Metul wararing lena, o God ut a Tamandat ma anundat a Labino o Iesu, in papos anumetul a kisapi sur metul in nan torom mot. <sup>12</sup>Ma metul wararing kai sur a Labino in ulabo anumot a marmaris ma in bukus ma in tilingis epotor tamot ma torom a taro gisen kai, elar nama numetul a marmaris kai torom mot. <sup>13</sup>Ma metul wararing kai sur in udekdek mot sur mot in tokodos, ma katu etakun in los mot, ra mot in tur umatan o God a Tamandat, una bung ra anundat a Labino o Iesu in nanpat, tomo nam anun a tokodos na taro rop.

#### 4

*A ngas na nilaun ra in ugasgas o God*

<sup>1</sup>A kum tistisimetul, metul sa ususer tar mot una ngas na nilaun ra mot in laun nami sur in ugasgas o God, lar ut ra mot sa muri. Ra uniri metul saring mot, ma metul udekdek mot una risan a Labino o Iesu, sur anumot a nilaun in lubang dekdek lenutra. <sup>2</sup>Uni mot sa tasman a kum etowo ra metul sa ususer tar mot nami. A kum etowo ra, det wanpat ut tana Labino o Iesu.

<sup>3</sup>O God i nemi lena, anumot a nilaun gong i dur umatano, ra mot in nan gisen gusun a kum pamuk na petutna. <sup>4</sup>Ara ra tagun mot in dekdek sur in turbat a nemnem na pinino, sur a petutna na urur in kis una nun a nilaun ma gong i dur. <sup>5</sup>Ma gong mot mur a dekdek na nemnem ina pamuk na petutna, elar nam det ra ka det tasman o God. <sup>6</sup>Gong tu pasamot i pam a sakino una ino anun tu tisino ra i nurnur. Ra in pami lenra i usobor o tisino. Metul sa watung tari, ma metul sa utumarong tar mot lena, a Labino in pitar a warkurai na minabalu torom det, ra det ser pam a kum petutna lenri. <sup>7</sup>Uni, o God ke kabo pas dat sur a dur na petutna, i kabo pas dat sur dat in mur a tokodos na nilaun. <sup>8</sup>Osi ra i rosumur gusun a etowo ri, ausur i rosumur gusun a taro, awu. I rosumur ut gusun o God, i ra i tabor dat nam a Niono, a Tokodos na Nion.

<sup>9</sup>Ka metul in tumtumus melet mo torom mot una numot a marmaris torom a kum tistisimot, uni, o God i sa ususer tar mot sur mot in nem etetalai mot. <sup>10</sup>A lingmulus ut, mot nem a kum tistisimot rop tiro una papor Masedonia rop. Ikut, metul saring mot sur anumot a marmaris in lubang dekdek ut.

<sup>11</sup>Mot in dekdek sur anumot a nilaun in lenri: Mot in kis na malmal, ma gong mot uruk lorimot sur tu utna anun taio. Mot in papam nama lamamot sur a utna na inangon, elar nami ra metul sa watung tari tamot. <sup>12</sup>Ra mot in pami lenra, a taro ra ka det nurnur det in ru mot, ma ka mot in nura taio sur in tabor mot.

*A inawan pat melet anun a Labino*

<sup>13</sup>A kum tistisimetul, metul nemi lena mot in mananos un det ra det sa mat, ma gong mot tupunuk dekdek elar nam a taro ra ka det nurnur una katkatatur melet gusun a minat. <sup>14</sup>Dat nurnur lena o Iesu i mat, ma i laun melet. I mo ra dat nurnur lena, det ra det nurnur un o Iesu, ma det sa mat, o God in ukatatur det ma det in nan tomo nam o Iesu, ra in milet melet.

<sup>15</sup>A wasiso ri ra metul watungi tamot, a wasiso ut anun a Labino. I lenri: Dat ra dat sa laun tuk una bung ra a Labino in nanpat melet, ka dat in mugu tandet ra det sa mat. <sup>16</sup>Uni a Labino ut in nan pirso tagisapat una langit, in nalngan ara in kakabo, a mugumugu anun a kum ensel in wasiso, in tuwuru anun o God in tangis, ra det ra det sa mat nama nurnur un o

Karisito, det in katutur mugu. <sup>17</sup>Numur dat ra dat laun utmakai, din los tomo pas dat nam det usapat una kum du bakut sur dat in etorom nama Labino una maino. Ra dat in kis tukum tomo nama Labino. <sup>18</sup>Mot in udekdek etetalai mot nama kum wasiso ri.

## 5

*Dat in kis na waninar sur a inawan pat anun a Labino*

<sup>1</sup>A kum tistisimetul, ka metul in tumtumus torom mot una du bung ma a bung ra a Labino in nanpat uni. <sup>2</sup>Uni mot sa tasman wakaki lena, a bung anun a Labino in nanpat kisin, elar nama tene wolong una mirum. <sup>3</sup>Ra a taro det in watungi lenri, "Ai, ka dat taramo tu maut. A wakak na nilaun kut ri dat taramo i," a iniru in nanpat kisin torom det, elar nama ngunungut ra a ino i taramo i ra i milau sur in usus. Ka det in kalabor eno pas gusun a iniru.

<sup>4</sup>Ikut mot, a kum tistisimetul, a bung ra ken ukisin mot, elar nama tene wolong, uni ausur mot kis una dumirum. <sup>5</sup>Mot rop a kum nutnutun a talapor ma a kum nutnutun a waspi. Ausur dat tagun a mirum o tagun a dumirum. <sup>6</sup>Ra gong dat elar nam ara taro ra det inep dumun. Dat in koikoi ma dat in tamtamabat wakak anundat a nilaun. <sup>7</sup>Uni det ra det inep dumun, det ser inep una mirum, ma det ra det ininum, det ser inum una mirum.

<sup>8</sup>Ikut dat tagun a waspi, i wakak sur dat in warkurai wakak anundat a nilaun. Dat in emar nama nurnur ma a marmaris sur in tamtamabat dat, elar nama tene inaim ra i ubek bat a romrobono nama du aen. Ma dat in emar kai nama kinkinis langlang nama nurnur sur o God in ulaun dat, elar nama tene inaim i ubek bat in lorino nama kukup tagun a inaim. <sup>9</sup>Uni o God ke pilok pas dat sur dat in taramo a ngunungut ubalan anun a kankan, awu. I pilok pas dat sur anundat a Labino o Iesu Karisito in ulaun pas dat. <sup>10</sup>I mat un dat sur dat in laun tomo nami, ra in nanpat melet. Dat rop, det ra det laun utmakai ma det ra det sa mat. <sup>11</sup>I mo ra, mot in wasiso na warut torom mot etetalai, ma mot in udekdek mot, lenutra mot ser pami.

*A kum tintinip na etowo*

<sup>12</sup>A kum tistisimetul, metul saring mot sur mot in pitar a urur torom anumot a kum mugumugu, ra det papam dekdek epotor tamot, ma det tamtamabat mot una kisapi anun a Labino, ma det ususer mot. <sup>13</sup>Mot in

ese a labino urur ma a marmaris torom det, kibino una nundet a pinapam. Ma mot in kis na malmal etetalai.

<sup>14</sup>A kum tistisimetul, metul saring mot sur mot in tumarong a kum tubunu wok na taro, mot in udekdek det ra det ser ngara, mot in warut det ra ka det dekdek una nurnur, ma mot in ese a wowowon na petutna torom a taro rop. <sup>15</sup>Gong mot balu a sakino nama sakino. Mot in dekdek sur mot in pam a wakak ino etetalai torom mot, ma torom a taro rop kai.

<sup>16</sup>Mot in ser gasgas. <sup>17</sup>Gong mot mana nama niaring. <sup>18</sup>Mot in watung wakak torom o God un asau rop ra i wanpat torom mot, uni iri a nemnem ut anun o God torom mot, a taro anun o Karisito Iesu.

<sup>19</sup>Gong mot turbat a pinapam anun a Tokodos na Nion. <sup>20</sup>Gong mot nuk penpen una kum wasiso na poropet. <sup>21</sup>Mot in lar rop a kum wasiso ma a kum petutna, ra mot in utur ukai a wakak ino. <sup>22</sup>Ma mot in nan gisen gusun a kum sakino rop.

<sup>23</sup>Metul wararing sur o God ut, a God na malmal, in uwakak pas anumot a nilaun, sur mot in tokodos rop umatano. Metul wararing kai sur o God in tamtamabat a niomot, a nuknukimot ma a pinimot, sur gong tu etakun in los mot una bung ra anundat a Labino o Iesu Karisito in milet uni. <sup>24</sup>O naro ra i kabo pas mot in pami lenutra, uni i lingmulus.

<sup>25</sup>A kum tistisimetul, mot in wararing sur metul. <sup>26</sup>Mot in nem a kum tistisimot nama egom na marmaris, ma mot in pami elar nama tokodos na petutna. <sup>27</sup>A saring mot nama risan a Labino sur mot in luk a pas ri torom a kum tistisindat rop.

<sup>28</sup>A marmaris anun anundat a Labino o Iesu Karisito in kis tomo nam mot.

## A Manru na Pas anun o Pol torom a taro Tesalonaika

*A wasiso talapor mugu*

Ra o Pol i kis tong o Korin i tumus a pas ri, a manru na pas torom a taro Tesalonaika.

I longoro i lena, ara taro det wur nuknuk una inawan pat melet anun o Iesu. Ara taro det watungi lena, o Iesu i sa wanpat. Una pas ri, o Pol i ususer det una inawan pat anun o Iesu. I inanos det lena a sakino musano in nanpat mugu ma in toro a susut na taro. Numur o Iesu in nanpat melet ra in kuro a kum tene sakino. O Pol i inanos det kai lena, gong det tubunu wok, det in dekdek sur det in pam a wakak na petutna. A inawan ina Manru na Buk Tesalonaika:

A turturkibin ina buk ri (1:1-2)

O God in warkurai a taro (1:3-12)

A inawan pat anun a sakino musano ma numur o Iesu in nanpat (2:1-17)

Det in pam a wakak na pinapam ma gong det tubunu wok (3:1-15)

A tintinip na wasiso anun o Pol torom det (3:16-18)

<sup>1</sup> Iau o Pol, o Sailas ma o Timoti, metul tumtumus torom mot a taro na lotu tong o Tesalonaika, mot ra mot laun un o God a Tamandat ma a Labino o Iesu Karisito.

<sup>2</sup> A marmaris ma a malmal torom mot tan o God a Tamandat ma a Labino o Iesu Karisito.

*O God in pitar a warkurai na minabalu torom a taro*

<sup>3</sup> A kum tistisimetul, i wakak sur metul in ser watung wakak torom o God un mot. I tokodos lenra, uni anumot a nurnur i lubang dekdek, ma a marmaris torom mot etetalai kai i lubang nanan. <sup>4</sup> I mo ra, metul ut metul ser watung ulabo pas mot torom a taro na lotu anun o God una kum tamon. Metul ser watung ulabo pas mot una numot a tuntunur dekdek ma anumot a nurnur, ubalan a kum maut ra mot taramo i ma a kum ngunungut ra a taro det banlaulau mot nami.

<sup>5</sup> A kum utna rop ri, i upuaso i lena, a warkurai anun o God i tokodos. Mot taramo a ngunungut, uni mot ulabo anun a matanitu. Uni ra, o God in watung mot lena, mot tokodos sur anun a matanitu.

<sup>6</sup> O God i tokodos, ma in ukadik det ra det ukadik mot, <sup>7</sup> ma in pitar a mana torom mot ra mot taramo a ngunungut, ma lenkutkai ra torom metul. O God in pami lenra, una bung ra a Labino o Iesu in nanpat tagisapat una langit nama kunabor na sungun ma anun a kum dekdek na ensel. <sup>8</sup> In ukadik det ra ka det tasman o God, ma ka det longoro a Wakak na Wasiso anun anundat a Labino o Iesu. <sup>9</sup> Det in taramo a warkurai na minabalu ra ken rop, i a iniru tukum, ma det in kis gisen gusun a Labino ma a minamar ina dekdekino. <sup>10</sup> A warkurai ri in nanpat una bung ra a Labino in nanpat sur din ulabo pasi kibino una nun a tokodos na taro, ma det rop ra det nurnur uni det in ru i. Mot kai tomo nam det, uni mot nurnur una numetul a wasiso talapor torom mot.

<sup>11</sup> I mo ra metul ser wararing sur mot torom anundat a God, sur in watung mot lena mot tokodos sur a ngas na nilaun ra i kabo pas mot suri. Ma una dekdekino in warut mot, sur mot in pam sot pas a kum wakak na pinapam ra mot nem na pami, ma a kum petutna rop ra anumot a nurnur i pam pati. <sup>12</sup> Metul wararing lenra, sur din ulabo pas a risan anundat a Labino o Iesu kibino un mot, ma o God kai in pitar a minamar torom mot. A kum utna rop ri, in nanpat kibino una marmaris anun anundat a God, ma a Labino o Iesu Karisito.

## 2

*A inawan pat anun a tene lakai warkurai*

<sup>1</sup> A kum tistisimetul, metul nem na inanos mot una inawan pat melet anun anundat a Labino o Iesu Karisito, ma una nundat a inawan tomo toromi. Metul inanos mot, <sup>2</sup> gong a nuknukimot i talara lakit ma i lokolokor ra mot longoro i lena, a bung anun a Labino i sa wanpat. Ra tu wasiso na poropet, o tu inarang, o tu pas in wasiso lenra, ma din watungi kai lena taginin tametul, gong mot nurnur uni. <sup>3</sup> Gong mot madek tar taio sur in toro mot nam tu wasiso o tu kisapi sur mot in muri. Uni a bung ra, ken nanpat utmakai, tuk ut ra, lako susut na taro det in rosumur gusun o God, ma a tene lakai warkurai in nanpat pupuaso, i ra, numur in iru. <sup>4</sup> In ebar torom a kum utna rop ra a taro det watung det a kum god ma det lotlotu torom det, ma in ulabo pasi ut, sur in kis una rumu na etabor anun o God, ma in watung puaso i lena, i ut o God.

<sup>5</sup> Ra a kis tomo nam mot, a ser inanos mot nama kum utna ri. Pepetlai, ka mot nuk melet pasi mo? <sup>6</sup> Mot sa tasman asau ra i turbat a tene lakai warkurai, sur in nanpat puaso una du bung ra in sot. <sup>7</sup> A dekdek ina lakai warkurai kuri i sa papam eno nanan una rakrakon bual. Ikut, i ra i turbat tari, in turbati utmakai, tuk una bung ra din rakon ru i. <sup>8</sup> Numur a tene lakai warkurai in nanpat puaso, ma a Labino o Iesu in kamar ru i nam a wuwu na wano, ma in banlaulau i nam a minamar ina nun a inawan pat. <sup>9</sup> A tene lakai warkurai in nanpat nama dekdek ino Satan, ma in ese a kum ngas na torotoro na dekdek, ma a kum torotoro na ukinalong ma a kum torotoro na utna na ukisin. <sup>10</sup> Una kum ngas na sakino rop ra in pami, in toro a taro ra det wanan sur a iniru. Det in iru uni, ka det mulaot sur det in nem a lingmulus ino, sur o God in ulaun det. <sup>11</sup> Iri i, a kibino ra o God i ulokolokor a nuknukindet sur det in nurnur mukut una torotoro. <sup>12</sup> I mo ra, det ra ka det nurnur una lingmulus ino, ma det gas kut una sakino, det rop det in iru una warkurai anun o God.

#### *Dat in tur dekdek*

<sup>13</sup> A kum tistisimetul, mot ra a Labino i maris mot, i wakak sur metul in ser watung wakak torom o God un mot, uni o God i sa pilok pas mot tagun a turturkibino sur in ulaun mot. I ulaun pas mot una nirurus talapor ra a Tokodos na Nion i pami un mot, ma una numot a nurnur una lingmulus ino. <sup>14</sup> Una Wakak na Wasiso ra metul warawai nami, o God i kabo pas mot sur in ulaun mot, sur mot in los a tinibo kai tagun a minamar anun anundat a Labino o Iesu Karisito. <sup>15</sup> I mo ra, a kum tistisimetul, mot in tur dekdek, ma mot in utur ukai a kum etowo ra metul sa ususer tar mot nami. A kum etowo ra metul sa watung tari ma metul sa tumus tari kai, torom mot.

<sup>16</sup> O God a Tamandat, i maris dat, ma una nun a marmaris i tabor dat nama wasiso na umarom ra ken rop, ma i warut dat sur dat in kis langlang nama nurnur sur a wakak ino ra in pami. Ra metul wararing sur anundat a Labino o Iesu Karisito ma o God a Tamandat <sup>17</sup> in ukarik mot ma in udekdek mot una numot a kum wakak na pinapam ma a kum wakak na wasiso kai.

### 3

*O Pol detul, detul saring det sur det in wararing un detul*

<sup>1</sup> A kum tistisimetul, iri i a tintinip na wasiso anumetul, mot in wararing un metul, sur a wasiso anun a Labino in nan sarara lakit ma a taro det in ru i elar nam mot, mot ru i. <sup>2</sup> Ma mot in wararing un metul sur o God in ulaun metul gusun a sakino taro, uni ausur a taro rop a kum tene nurnur.

<sup>3</sup> Ikut a Labino i lingmulus, ma in udekdek mot ma in tamtamabat mot kai gusun o Satan. <sup>4</sup> Metul nurnur una Labino lena kura ut mot mur a kum wasiso ra metul sa inanos tar mot uni, ma mot in ser muri lenutra.

<sup>5</sup> Metul wararing sur a Labino in mugu a nuknukimot sur mot in tasman mulus a marmaris anun o God, ma mot in tasmani kai a tuntunur dekdek una kum mamaut ra o Karisito i sa ese tari torom dat.

*A utumarong torom a kum tubunu wok na taro*

<sup>6</sup> A kum tistisimetul, metul saring dekdek mot nama risan a Labino o Iesu Karisito lena, mot in nan gisen gusun a kum tubunu wok na tistisindat ra ka det ser mur a kum etowo ra metul inanos tar mot nami. <sup>7</sup> Mot ut mot sa tasmani lena, i wakak ra mot in mur a ngasino ra metul sa pam tari umata-mot. Ra metul kis tomo nam mot, ausur metul kis oros kut. <sup>8</sup> Ka metul wan oros pas tu utna na inangon tan taio ra ka metul kuli, awu. Una kum mirum ma a waspi, metul papam dekdek nama lamametul sur u warut metul una anumetul a kinkinis, sur gong metul pitar a maut torom tu pasamot sur in kul metul. <sup>9</sup> I tokodos sur metul in saring mot sur mot in warut metul, ikut ka metul nemi. Metul pam a pinapam sur metul in ese a ngasino ra i wakak sur mot in muri. <sup>10</sup> Ra metul kis nisamot, metul pitar a warkurai ri torom mot: Ra taio ke nemi sur in papam, gong kai i wangon.

<sup>11</sup> Metul longoro i lena, a ramano taro tagun mot, a kum tubunu wok na taro. Ka det papam, det balon kut una uruk lorindet una utna ra ausur anundeti. <sup>12</sup> Una risan a Labino o Iesu Karisito metul turbat a ngas na taro ra, ma metul saring det, sur det in kis wowowon ma det in papam sur andet lako utna na inangon ra det in laun nami. <sup>13</sup> Ma torom mot, a kum tistisimetul, gong mot pino ngoro nama pam a kum tokodos na petutna.

<sup>14</sup> Ra taio ke mur anumetul a wasiso una pas ri, mot in nuk ukai i. Gong mot lason tomo nami, sur in maimai una magirano.

<sup>15</sup> Ikut gong mot tama i elar nam anumot a

ebar, mot in utumarong pasi kut elar nam a tisimot.

*A tintinip na wasiso na marmaris*

<sup>16</sup> Metul wararing sur a Labino ra i pitar a malmal, i ut in tabor mot nama malmal una kum du bung rop ma una kum ngas na kinkinis na nilaun rop. A Labino in kis tomo nam mot rop.

<sup>17</sup> Anung a wasiso na marmaris ri, iau ut o Pol, a tumusi torom mot, nama lamang. Iri i, a ukinalong ina nung a kum pas rop. A ser tumtumus ut lenri.

<sup>18</sup> A marmaris anun anundat a Labino o Iesu Karisito in kis tomo nam mot rop.

## A Mugano Pas anun o Pol torom o Timoti

### *A wasiso talapor mugu*

A buk ri, a mugano pas anun o Pol torom o Timoti. O Timoti, i tagitong una papor Asia. O nano a ino Juda ma o tamano a te Grik. Una manru inawan anun o Pol, i pilok pas o Timoti sur der in nan tomo, ma der in papam tomo (tama Ap 16:1-3). Numur o Pol i ubek tar o Timoti sur in tene tamtamabat anun a taro na lotu tong o Epeses.

Una buk ri, o Pol i inanos o Timoti lena in tamtamabat a taro na lotu gusun a kum torotoro na tene ususer, sako det in banlaulau a nurnur anun a taro. I inanos i kai una wakak na etowo, ma un osi na ngas na taro ra det in pilok pas det sur det a kum tene pinapam tagun a lotu, ma una wakak na petutna ra in muri.

A inawan ina Mugano Buk Timoti:

A turturkibin ina buk ri (1:1-2)

O Timoti in turbat a kum torotoro na etowo (1:3-20)

A kisapi na lotu (2:1-15)

A kum mugumugu na lotu (3:1-16)

O Timoti in tamtamabat i ut, sur in nanopat a wakak na tene pinapam (4:1-16)

A etowo torom o Timoti una nun a pinapam (5:1-6:21)

<sup>1</sup> Iau o Pol, a aposel anun o Karisito Iesu, una itula anun o God, anundat a Tene Ulaun, ma o Karisito Iesu, o naro ra dat kis langlang suri nama nurnur. <sup>2</sup> A tumus a pas ri torom ui Timoti, a nutunglik mulus una nurnur. A marmaris ma a wakak na petutna ma a balano molmol, tan o God a Tamandat ma o Karisito Iesu anundat a Labino in kis torom ui.

*O Pol i inanos o Timoti sur in turbat a kum torotoro na etowo*

<sup>3</sup> Uniri a udekdek ui melet sur un kis ut tiro iai o Epeses, elar nami ra a sa watung tari tam ra a wan utong o Masedonia. Un kis sur un turbat det ra det ususer a taro un lako kum torotoro na etowo. <sup>4</sup> Ma gong det balon una kum etowo ororos kut, nama saksakutna na kabotaro, ra katu tintinipino. I ulabo i kut a wasiso na engaras, ma ke warut a pinapam anun o God. A pinapam anun o God i lubung kut una nurnur. <sup>5</sup> A

watungi lenra, sur a marmaris in lubung epotor tandat etetalai. A marmaris ra i wan tagun a tokodos na balandat, ma a wakak na nuknukindat ma a lingmulus na nurnur. <sup>6</sup> A ramano taro det sa wan gisen gusun a kum wakak na petutna ri, ma det mur a kum wasiso ororos mukut. <sup>7</sup> Det nemi sur det in ususer a taro una kum Warkurai anun o God, ra det nuki lena det tasman wakaki, ikut ka det tasman mulus asau ra det wasiso uni.

<sup>8</sup> Dat tasmani lena a kum Warkurai det wakak, ra din papam wakak nami. <sup>9</sup> Dat tasmani lena a kum Warkurai asur di pitari sur a kum tene tokodos, awu. Di pitari kut sur a ngas na taro lenri: det ra det lakai a kum warkurai, a kum tene rosumur, det ra ka det lotu torom o God, a kum tene sakino, det ra ka det mur a nemnem anun o God, det ra ka det ser ru o God, det ra det um doko a taro, det ra det um doko a kum tamtamandot o a kum nanandot, <sup>10</sup> det ra det pam a kum petutna na pamuk, a kum musano ra det nolin melet kut nama kum musano, det ra det pam sikot pas a taro sur det in siuru det, a kum tene torotoro, det ra det liliman torotoro, ma det rop ra det pam a kum utna ra ke elar nama tokodos na etowo anun o God. <sup>11</sup> A tokodos na etowo i kis una Wakak na Wasiso, ra o God i pitar tari tang sur an wasiso talapor nami. A Wakak na Wasiso ri i wan tagisapat tan o God, a God na minamar ra i dan tukum.

*O Pol i watung labo a marmaris anun o God*

<sup>12</sup> A watung wakak torom o Karisito Iesu anundat a Labino, ra i pitar tar a dekdek tang. A watung wakak toromi uni i nurnur un iau, ma i ubek tar iau sur an papam toromi. <sup>13</sup> Numugu a ser watung laulau o Iesu, a banlaulau a taro na nurnur ma a ukadik det. Ikut o God i maris iau, uni ka tasman asau ra a pami, ma ka nurnur utmakai. <sup>14</sup> Anundat a Labino i ese anun a labino marmaris torom iau, ra i pitar tar a nurnur ma a wakak na petutna torom iau. A etabor ri, i kibino una Karisito Iesu.

<sup>15</sup> I wan pirso urin una rakrakon bual sur in ulaun a kum tene sakino. A wasiso ri i lingmulus sakit, ma dat in nurnur uni. Ma iau, a laulau sakit tan a kum tene sakino rop. <sup>16</sup> Ikut o God i maris iau, sur o Karisito Iesu in ese anun a wowowon na petutna torom iau, ra a laulau sakit tan a kum tene sakino rop. I ulaun iau ma i unus ru anung a kum sakino petutna. Lenra, a wanpat a wakak na larlar, sur a taro det in tama

asau ra o Iesu i pami un iau, ma det in nurnur un o Iesu, ma det in rakon a nilaun tukum. <sup>17</sup>Dat in pitar a wariru ma a wasiso na ululabo torom a King ra i laun tukum, ma ken mat, i ra ka dat tama i, ra i sot kut a God. A wasiso na ululabo toromi ken rop ma ken rop. Amen.

<sup>18</sup>Timoti a nutunglik, a kum etowo ri ra a pitari tam, i elar nama wasiso na poropet ra di sa watung tari un ui ra det wararing un ui. Ra un mur a kum etowo ri, ui ara wakak na tene inaim nama Wakak na Wasiso. <sup>19</sup>Un tur dekdek una num a nurnur, ma un mur a wakak na nuknuk. A ramano taro ka det pami lenri, ra anundet a nurnur i puku elar nama sip ra a top i rapus rege ru i. <sup>20</sup>O Emineus ma o Aleksanda aru tagun det, ma a sa pitar tar der una laman o Satan, sur der in tasmani lena gong melet mo der watung laulau o God.

## 2

### *A etowo una kisapi na lotu*

<sup>1</sup>A mugano utna, a nemi lena a taro na nurnur det in wararing, nama niaring sur a utna det sibo suri, a niaring una taro, ma a niaring na watung wakak torom o God. Mot in wararing lenra una taro rop, <sup>2</sup>ma una kum king ma a kum mugumugu rop, sur dat in kis wowowon nama malmal, ma dat in mur a petutna ra o God i nemi ma dat in urur torom o God. <sup>3</sup>Ra mot in pami lenri, in wakak sakit ra o God, anundat a Tene Ulaun, in gas nami. <sup>4</sup>I nemi sur in ulaun a taro rop, ma det in tasman a lingmulus ino. <sup>5</sup>Uni ara God sot kut, ma ara sot kut kai ra i dat tomo o God ma a taro, a musano ri o Karisito Iesu, <sup>6</sup>i ra i pitar tar anun a nilaun sur in kul ulangolango pas a taro rop. Una du bung ra o God i sa kubus tari, o Iesu i ulingmulus a nemnem anun o God lena i nem na ulaun a taro rop. <sup>7</sup>Iri a kibino ra o God i pilok pas iau sur an aposel ma an warawai nama Wakak na Wasiso, ma an ususer a taro ra ausur a taro Juda nama nurnur mulus. A watung a lingmulus, ausur a torotoro.

<sup>8</sup>A nemi sur a kum musano una kum tamon det in wararing ma det in tulsu a kum lamandet usapat netes, det in pitar tar det torom o God, ma gong det kankan ma gong det engaras.

<sup>9</sup>A nemi kai sur a wardain det in emar nama malu ra i sot nama ememar anun a wardain. Det in emar nama ememar i

upuaso a urur ma a wakak na ninunuk. Gong det iris a lorindet, gong det emar nama kum kamkabaran ra di pami nama gol o a kum wat ra a matandet i ka, ma gong kai det emar nama kum malu na ememar ra a matandet i ka. <sup>10</sup>A wardain ra det watungi lena det lotu torom o God, det in emar nama kum wakak na pinapam.

<sup>11</sup>Ra a wardain det in los a etowo tagun a Buk Tabu, i wakak sur det in kis wowowon ma det in unatino pas det. <sup>12</sup>Ka madek tar tu ino sur in ususer tu musano, ma ka madek tari kai sur tu ino in mugu tu musano. I wakak sur in kis wowowon kut. <sup>13</sup>Uni o God i ukis mugu o Adam ra numur o Iwa. <sup>14</sup>Ausur o Adam ra o Satan i toro pasi. Awul! O Iwa kut ra o Satan i toro i ra i puku, ra i pam a sakino. <sup>15</sup>Din ulaun a wardain kibino una usus. Din ulaun det ra det ser tur dekdek una nurnur, ma una marmaris. Det ra det ser mur a petutna ra o God i nemi, ma a petutna ra i sot sur a wardain det in muri.

## 3

### *A kum mugumugu na lotu*

<sup>1</sup>A wasiso ri i lingmulus sakit, lenri: Ra taio i nemi sur in mugumugu na lotu, i nem a wakak na pinapam sakit. <sup>2</sup>A magiran a mugumugu na lotu in lenri: gong tu etakun i kis uni, in nolin kut nam ara ino, in tumarong a magirano, in warkurai wakak anun a nilaun, i a ngas na musano ra a taro det urur uni, in ser gas pas a taro una nun a rumu, ma i a wakak na tene ususer. <sup>3</sup>Ma gong i tene ininum, gong i tene inaim, in tene malmal, ma gong i tene wasiso na kankan, ma gong i nem doko a mani. <sup>4</sup>I wakak sur in mugu wakak det tamtamano, ma in ususer a kum nutnutunu sur det in tarom toromi nama urur. <sup>5</sup>A musano ra ke lason sur in mugu wakak det tamtamano, ken pet lar pasi kai sur in tamtamabat a taro na lotu anun o God. <sup>6</sup>Gong taio i mugumugu na lotu ra i nukpukus matok taru kut, sako in umuman labino, ra in puku, ma din warkurai i elar nam o Satan. <sup>7</sup>I wakak sur a mugumugu i a ngas na musano ra a taro kai ra ka det ser lotlotu, det ser ru i. Ra awu, det in watung suri, ma in iru un in nukun anun o Satan.

### *A kum tene warut una lotu*

<sup>8</sup>Lenkutkai ra torom a kum tene warut una lotu, i wakak sur det a kum ngas na musano ra a taro det ser urur un det, det

in lingmulus una nundet a wasiso, gong det tene ininum ma gong det nemnem sur a labino mani. <sup>9</sup> Det in utur ukai a nurnur mulus ma a tokodos na ninunuk. <sup>10</sup> Din lar mugu tar det, ra numur, ra kataio in takun det un tu utna, din utur det maragom una pinapam na tene warut una lotu.

<sup>11</sup> Torom anundet a wardain kai in lenra, det a kum ngas na wardain ra a taro det ser ru det. Gong det wasiso eno, det in tumarong a magirandet, ma det in lingmulus una kum pinapam rop.

<sup>12</sup> A tene warut una lotu in nolin kut nam ara ino, ma in mugu wakak a kum nutnutunu, ma det rop una nun a rumu.

<sup>13</sup> Det ra det papam wakak una pinapam na tene warut una lotu, a risandet in wakak, ma ka det in ngara sur det in wasiso puaso una nundet a nurnur una Karisito Iesu.

*A kibin anundat a nurnur*

<sup>14</sup> A nem na wanpat lakit torom ui, ikut a nuki lena in wakak ra an tumtumus mugu torom ui. <sup>15</sup> Ra kan nanpat lakit, u sa tasman a kum ngas na petutna ra a taro anum o God det in pami epotor tandet. A taro na lotu anum o God, ra i laun, det elar nama kum pos ma a kibin a rumu ra det udekdek a lingmulus. <sup>16</sup> A lingmulus, o God i upuaso mulusi lena, a etowo ra dat nurnur uni i labo sakit. I lenri:

O Karisito i wanpat a musano,  
a Tokodos na Nion i upuaso i lena o Karisito  
i tokodos umatan o God,  
a kum ensel det tama i,  
a wasiso puaso uni i wan sarara torom a  
kum kankabo taro rop,  
ma a susut una rakrakon bual det nurnur  
uni,  
i wan usapat ma i kis una minamar.

4

*A kum torotoro na tene ususer*

<sup>1</sup> A Tokodos na Nion i watung puaso i lena, una kum tintinip na bung, lako taro det in nan gisen gusun a lingmulus na nurnur, ma det in mur a kum nion ra det ser torotoro, ma det in mur a kum etowo anum a kum laulau na nion. <sup>2</sup> A kum etowo ri i wan tagitiro tan a kum tene torotoro, a taro ra ka det tama lele i mo a tokodos na petutna, uni a tokodos na ninunuk una nuknukindet i sa mat. <sup>3</sup> A ngas na taro ri, det turbat a nolin ma det turbat a taro sur gong det wan lako kum ngas na utna in inangon. A kum utna na inangon ra, o God i

ukis tari sur din nani, ra a taro na nurnur ra det tasman a lingmulus ino, det in watung wakak torom o God uni ma det in nani. <sup>4</sup> Uni a kum utna rop ra o God i ukis tar det, det wakak, ra gong dat ngaran ru det. Dat in watung wakak torom o God uni, ra dat in nani. <sup>5</sup> Uni a wasiso anum o God ma a niaring der uwakak a utna na inangon sur in wakak umatan o God.

*A wakak na tultul anum o Karisito Iesu*

<sup>6</sup> Ra un ususer a kum tistisim nama kum etowo ri, ui a wakak na tultul anum o Karisito Iesu. Una pinapam ri in talapor lena u labo pat una nurnur mulus, ma a wakak na etowo ra u muri. <sup>7</sup> Un nan gisen gusun a kum saksakutna ororos, ma a wasiso ra ke warut ui una nilaun torom o God. Un ulason ui sur a magiram in wakak umatan o God. <sup>8</sup> Ra dat ulason a pinindat una wap, i warut a pinindat. Ikut ra dat ulason dat sur a magirandat in wakak umatan o God, i warut dat una kum utna rop. Ausur una nilaun kut ri, i warut kai una nilaun kura numur. <sup>9</sup> A wasiso ri a watungi, i lingmulus sakit, i wakak sur dat in nurnur uni ma dat in muri. <sup>10</sup> I mo ri dat papam dekdek, uni dat kis langlang nama nurnur sur o God, ra i laun, ma a Tene Ulaun anum a taro rop, ra det nurnur uni.

<sup>11</sup> Un inanos det ma un ususer det una kum utna ri. <sup>12</sup> Gong u madek tar taio sur in pas tataun tar ui, uni u barman utmakai. Una num a wasiso, anum a petutna, anum a marmaris, anum a nurnur ma anum a tokodos na nilaun, un elar nama wakak na malalar, sur a kum tene nurnur det in pam murmuri. <sup>13</sup> Un dekdek nama luk a Buk Tabu torom a kum tene nurnur, ma nama warawai ma a etowo torom det, tuk an nanpat. <sup>14</sup> Gong u madek ru a etabor na Nion, ra di pitar tari tam, una du bung ra a kum poropet det wasiso na poropet, ma a kum mugumugu det ubek tar a kum lamandet sapat netes un ui.

<sup>15</sup> Un ulason ui una kum pinapam ri. Un pitar tar anum a nilaun uni, sur a taro rop det in tama ui lena u lubung una num a nilaun torom o God. <sup>16</sup> Un tumarong anum a nilaun ma anum a etowo. Un tur dekdek un der, uni, ra un pami lenra, un ulaun pas ui ut, ma det kai ra det longoro ui.

5

*A warut torom a kum ula*

<sup>1</sup> Ra un ukodos tu musano ra a mugano tam, gong u wasiso na kankan, un wasiso wowon kut elar nami ra u pami torom o tamam. Un pam a wakak na petutna torom a kum barman elar nami ra u pami torom a kum tistisim. <sup>2</sup> Un papam torom a kum ino ra a kum mugano tam, elar nami ra u pami torom o nam, ma un papam torom a kum toraro, nama tokodos na petutna, elar nami ra u pami torom a kum tistisim a kum ino.

<sup>3</sup> Un warut a kum ula ra kataio i tamtamabat det ma det sibo. <sup>4</sup> Ikut, ra tu ula a kum nutnutunu o a kum tumtubunu kura, i wakak ra det in upuaso mugu anundet a nurnur nama warut torom a kum kukundet, sur det in balu a marmaris anun a tamandet ma a nandet ma a kum tumtubundet. Ra det in pami lenra, o God in gas. <sup>5</sup> A ula, ra kataio i tamtamabati ma i sibo mulus, i nurnur kut un o God ma i kis langlang sur in waruti. Una kum mirum ma a waspi, i ser wararing sur o God in waruti. <sup>6</sup> Ikut, a ula, ra i nemi lena in gasgas oros kut, i laun, ikut a niono i sa mat. <sup>7</sup> Un ususer a taro nama kum etowo ri, sur gong tu etakun i los det. <sup>8</sup> Ra taio ke warut a kum kukunu, ma det kai ra tagun anun a rumu, i sa wan gisen gusun a nurnur. I ra i laulau sakit tan a taro ra ka det nurnur.

<sup>9</sup> Un tumus ukai kut a risan a kum ula ra a wonom na noino kilalo anundet, ma usapat, sur a taro na lotu det in warut det. Det in warut a ngas na ino ra i nolin pas kut nam ara musano, <sup>10</sup> ra a taro rop det tasman anun a kum wakak na pinapam lenri: i ugu wakak a kum nat, i ser gas pas a taro una nun a rumu, i ser gis ru a kubus gusun a kikin a taro anun o God,\* i ser warut a taro ra a kum mamaut i los det, ma i pitar taro anun a nilaun sur a kum wakak na pinapam rop.

<sup>11</sup> Ikut a kum ula ra ke wonom na noino kilalo utmakai, gong u tumus ukai a kum risandet. Uni, ra anundet a nemnem na nolin in katuttur melet, det in nan gisen gusun o Karisito. <sup>12</sup> Ra a warkurai anun o God in los det, uni det sa kutus anundet a mugano liliman torom o Karisito. <sup>13</sup> Det in ukio anundet a kum du bung nama inawan tuptupukus una kum rumu. Ma det in wasiso eno, det in wasiso una utna ra ausur anundet, ma det in watung a kum wasiso ra ke wakak sur det in watungi. <sup>14</sup> A nemi lena, a kum ula, ra det dekdek utmakai, det

in nolin melet, det in usus melet, ma det in tamtamabat anundet a kum rumu, sur gong det pam tu utna ra anundet a kum ebar det in watung laulau dat uni. <sup>15</sup> A ramano kum ula, det sa wan gisen ma det mur mukut o Satan. <sup>16</sup> Ra tu ino a tene nurnur, ma tu ula kura una nuna kabotaro, i wakak sur in tamtamabati, sur gong a taro na lotu det balon uni. A taro na lotu det in balon kut una kum ula ra kataio sur in tamtamabat det ma det sibo mulus.

*A wasiso una kum mugumugu*

<sup>17</sup> I wakak sur din pitar a urur ma a wakak na ikul torom a kum mugumugu na lotu ra det pam wakak a pinapam. Din pami lenra torom det ra det papam dekdek una warawai ma a etowo. <sup>18</sup> Uni a Buk Tabu i watungi lena, “Gong u ker bat a wan a karabau ra i pas rumrum a wit, i kai in nangon ut.” *Lo 25:4*

Ma i watungi kai lena, “I wakak sur a tene pinapam in los ut anun a ikul.” *Lk 10:7*

<sup>19</sup> Gong u longoro tu etakun un tu mugumugu ra ara kut i takuni. Ra lako ru o lako tul detul in takuni, un longoro a etakun ra.

<sup>20</sup> Ra tu mugumugu in pam a sakino petutna, un ukodosi umatana taro na lotu rop, sur in utumarong lako taro kai tagun det. <sup>21</sup> A wasiso dekdek torom ui umatan o God ma o Karisito Iesu ma a kum ensel ra o God i pilok pas det, sur un mur a kum itula ri, ma un pam a takano petutna kut torom a taro rop, ma gong u tur takano papor. <sup>22</sup> Gong u ubek lakit aru lamam netes un taio ma u wasiso udani sur a pinapam anun a Labino. Ma gong u mur a taro una sakino petutna. Un tumarong anum a nilaun sur in tokodos.

<sup>23</sup> Gong u inum a danim kut, un inumi kai lakalik wain sur in warut ui una misait ra kura un in balam, uni u misait liklik nami.

<sup>24</sup> A sakino petutna anun a ramano taro din tama lele i, ra ka det in nanpat utmakai una kinkinis na warkurai. Ikut a sakino petutna anun ara taro kai kataio in tama lele lakiti, numur ut in nanpat talapor.

<sup>25</sup> Lenkutkai ra, una kum wakak na pinapam. A kum wakak na pinapam anun a ramano taro i sa wanpat talapor. Ikut, anun ara taro kai, ka din tama lele i uniri, numur ut in nanpat talapor.

## 6

*A etowo torom a kum tene ititula*

\* 5:10: A petutna anun a taro Juda i lenri: ra tu usiro in ruk una rumu, ma a kikin o kubus, a tultul in gisi.

<sup>1</sup> Det ra a kum tene ititula, det in urur torom anundet a kum mugumugu, sur gong taio i watung laulau a risan o God ma anundat a etowo. <sup>2</sup> Ma det ra anundet a mugumugu a tene nurnur, gong det rosumur toromi, uni det tasmani lena det tar tisisino una nurnur. Det in ser tarom wakak toromi, uni anundet a pinapam in warut a tene nurnur, ra det ser nemi. Timoti, un ususer det ma un udekdek det nama kum etowo ri.

*A nemnem sur a mani*

<sup>3</sup> Ra taio in ususer a taro nam tu etowo gisen, ra ke elar nama etowo mulus anun anundat a Labino o Iesu Karisito, ma ke elar nama kum etowo ra i warut det, sur a magirandet in wakak umatan o God, <sup>4</sup> a ngas na musano ra, i ulabo pasi ut, ma ke tasman tu utna. Anun a laulau na nemnem sur a wasiso na engaras, ma a inaim na wasiso, i elar nama misait toromi. Anun a petutna ra, i pam pat a kum ngasino lenri: a nuknuk laulau sur a utna anun taio, a engaras, a emang, a nuknuk laulau torom a taro. <sup>5</sup> A ngas na taro ri, det ser pam pat a purpuruon, a nuknukindet ke tokodos, ma det rosumur gusun a lingmulus ino. Det nuki lena anundet a kinkinis una lotu in pam pat a mani sur det in tene ululeng.

<sup>6</sup> Ikut ra dat mur a petutna anun o God, tomo nama gasgas una sau ra o God i etabor nami, i ra a ululeng mulus. <sup>7</sup> Ra dat wanpat nin una rakrakon bual ka dat los tu utna, ma ra dat in milet, ka dat in los tu utna kai taginin. <sup>8</sup> Ra andat a utna na inangon ma anundat a malu kai kuri i kis, asano ra dat in nuknuk melet suri? A nuknukindat in mana. <sup>9</sup> Ma det ra det nem a labino mani, det in puku una ululam, ma det in iru un in nukun, ma a kum nemnem ororos kut, ma a nemnem sur a utna ra, in banlaulau det. Ra in woro pirso a susut na taro una minat ma a iniru tukum. <sup>10</sup> Uni a nemnem sur a mani, i a kimkibina wur matano sakino petutna. Ma a ramano taro ra det ngara suri, det sa wan gisen gusun a nurnur, ma det banlaulau anundet a nilaun nama susut na mamaut.

*O Pol i udekdek o Timoti una pinapam na lotu*

<sup>11</sup> Ikut ui, Timoti, ui a musano anun o God, un nan gisen gusun a kum utna ri. Un dekdek sur un mur a tokodos na petutna, ma a petutna ra i wakak umatan o God,

a nurnur mulus, a marmaris, a tuntunur dekdek, ma a wowowon na petutna. <sup>12</sup> Un tur dekdek una nurnur elar nama wakak na tene inaim. Ma un pam ukai a nilaun tukum. A nilaun ra o God i kabo pas ui suri, ra u wasiso talapor uni umatan a susut na taro. <sup>13</sup> A inanos ui umatan o God, i ra i pitar a nilaun torom a kum utna rop, ma umatan o Karisito Iesu i ra i wasiso talapor un i ut umatan o Pontias Pailat. A inanos ui lenri: <sup>14</sup> Un tarom mulus una kum itula, ma gong u pam tu utna ra taio in takun ui uni, tuk una bung ra anundat a Labino o Iesu Karisito in nanpat melet. <sup>15</sup> Ra a bung in sot, o God ut in tulu ru i sur in nanpat melet. O God ara sot kut, a labino Tene Warkurai ma i dan tukum, a King anun a kum king, ma a Labino anun a kum lamlabino. <sup>16</sup> I sot kut i laun tukum, ra i kis una labino talapor ra kataio in nan milau nisano. Kataio utmakai i tama tari ma ka din tama lar pasi. Din pitar tar a labino urur toromi, ma i utur ukai a labino dekdek ra ken rop ma ken rop. Amen.

<sup>17</sup> Un utumarong det ra det ululeng nin una rakrakon bual sur gong det ulabo pas det ut, ma gong det nurnur una mani ra i ser rop kut. Det in nurnur kut un o God, ra i ser tabor dat nama kum wakak na utna rop sur dat in gas nami. <sup>18</sup> Un inanos det sur det in pam a wakak ino, ma det in bukus nama kum wakak na pinapam, det in etetabor, ma det in ser isuaro a utna kai torom lako taro. <sup>19</sup> Ra det in pami lenri, det in utur ukai a ululeng mulus. I ra a wakak na kibina nundet a nilaun numur, sur det in los a nilaun ra a nilaun mulus.

<sup>20</sup> Timoti, un tamtamabat wakak a pinapam ra o God i pitar tari tam. Un nan gisen gusun a kum wasiso ororos kut, ra ke elar nama nemnem anun o God, ma gusun a wasiso na engaras una utna di watungi nama “mananos”, ikut asur a mananos mulus. <sup>21</sup> A ramano taro det watungi lena det tasmani ut a mananos ra, ra det sa wan gisen pas gusun a nurnur un o Iesu.

A marmaris anun o God torom mot.

## A Manru na Pas anun o Pol torom o Timoti

### *A wasiso talapor mugu*

A buk ri a manru na pas anun o Pol torom o Timoti. O Pol i tumusi ra i kis una karabus tong o Rom. O Timoti i a tene pinapam tomo nam o Pol ma numur i wanpat ara mugumugu na lotu tong o Epeses.

O Pol i tasmani lena milau mo in mat, ra i tumus a pas ri. I nemi lena in udekdek a nurnur anun o Timoti. I inanosi kai lena gong i mana gusun a warawai nama Wakak na Wasiso.

A inawan ina Manru na Buk Timoti:

A turturkibin ina pas ri (1:1-2)

O Pol i gas un o Timoti ma i nemi lena in dekdek una pinapam (1:3-2:13)

A magiran a lingmulus na tene pinapam (2:14-26)

A magiran a taro una kum tintinip na bung (3:1-9)

O Pol i udekdek o Timoti (3:10-4:5)

O Pol i wasiso un i ut (4:6-18)

A tintinip na wasiso anun o Pol torom o Timoti (4:19-22)

<sup>1</sup> Iau o Pol, a aposel anun o Karisito Iesu una nemnem anun o God, sur an wasiso talapor una nilaun ra i sa uliliman tari torom dat una Karisito Iesu. <sup>2</sup> A tumus a pas ri torom ui Timoti, a wakak na nutunglik una nurnur. A marmaris ma a wakak na petutna ma a malmal, anun o God a Tamandat ma o Karisito Iesu anundat a Labino, in kis torom ui.

### *O Pol i udekdek a nurnur anun o Timoti*

<sup>3</sup> Una kum mirum ma a waspi, a ser wararing un ui, ma a ser watung wakak torom o God. I ra a papam toromi nama tokodos na ninunuk, elar nama kum tumtubung tagun numugu. <sup>4</sup> A nuk melet pasi ra u tangis iau, ma a nem doko i lena an tama ui sur an bukus nama gasgas. <sup>5</sup> A nuk pas anum a lingmulus na nurnur, ra i elar nama nurnur anun aru ino ri, o tubum o Lois ma o nam o Unis. A tasmani lena a ngas na nurnur ra, kura kai un ui. <sup>6</sup> I mo ra a inanos ui melet sur un ukatutur melet anum a etabor, elar nama sungun ra di wupi ra i kunabor. A etabor ra, o God i tabor ui nami una bung ra a ubek aru lamang netes un

ui. <sup>7</sup> Uni o God ke tabor dat nama nion na nginara, awu. I tabor dat nama Tokodos na Nion ra i pitar a dekdek torom dat, ma a marmaris ma a petutna ra ara taktakai in warkurai wakak anun a nilaun.

<sup>8</sup> Gong u maimai sur un wasiso talapor una nundat a Labino, ma gong u maimai un iau, ra uniri a kis una karabus una risano. Ikut, un waninar sur ui kai, un taramo a ngunungut una Wakak na Wasiso tomo nam iau. Ra un taramo a ngunungut, o God ut in pitar a dekdek torom ui. <sup>9</sup> I ut i sa ulaun pas dat, ma i kabo pas dat sur a tokodos na nilaun. Ausur i kibino una nundat a kum wakak na pinapam, awu. I kibino ut una nun a nemnem, ma anun a marmaris, ra i pitar tari torom dat una Karisito Iesu. Unarap utmakai ra ke ukis utmakai a rakrakon bual i maris mugu dat. <sup>10</sup> Ra uniri, dat sa tama a marmaris anun o God torom dat, una inawan pat anun anundat a Tene Ulaun, o Karisito Iesu, i ra i urop ru a minat. Ma una Wakak na Wasiso, i upuaso a nilaun tukum sur in nanpat taltalapor.

<sup>11</sup> O God i sa pilok pas iau sur an tene warawai nama Wakak na Wasiso, an aposel ma an tene ususer kai uni. <sup>12</sup> Iri i a kibino ra a taramo a ngunungut lenri. Ikut, ka maimai, uni a tasman o naro ra a nurnur uni, ma a tasman mulusi lena, in pet lar pasi sur in tantamabat a pinapam, ra i sa pitar tari tang, tuk una bung na warkurai.

<sup>13</sup> A tokodos na etowo ra a sa ususer tar ui nami, i elar nama wakak na malalar sur un muri. Un muri tomo nama nurnur ma a marmaris. A nurnur ma a marmaris anundat, ra kura dat una Karisito Iesu. <sup>14</sup> Una dekdek ina Tokodos na Nion ra i kis un dat, un tantamabat wakak a Wakak na Wasiso ra o God i sa pitar tari tam.

<sup>15</sup> U tasmani lena a taro rop, ra det kis una papor Asia, det sa wan pas gusun iau. O Pigelus ma o Emogenes aru tagun det. <sup>16</sup> A wararing sur o God in maris o Onesiporus det tantamano, uni i ser ugasgas iau, ma ke maimai un iau ra a kis una karabus. <sup>17</sup> Ra i wanpat tong o Rom i sisio nanan ut sur iau, tuk i sio pas iau. <sup>18</sup> A wararing sur a Labino in maris o Onesiporus una bung na warkurai. U sa tasman wakak a kum pinapam na warut ra i sa pam tari torom iau tiro o Epeses.

## 2

*A wakak na tene inaim anun o Karisito Iesu un*

<sup>1</sup> Timoti, a nutunglik una nurnur, un tur dekdek una marmaris anun o God torom dat, ra kura dat una Karisito Iesu. <sup>2</sup> A kum etowo ra u sa longoro pasi gusun iau umatan a susut na taro, un ususer lako taro nami. A taro ra u nurnur un det lena det in pet lar pasi sur det in ususer lako taro kai nami. <sup>3</sup> Un tur tomo nam met una kum mamaut, elar nama wakak na tene inaim anun o Karisito Iesu. <sup>4</sup> A wakak na tene inaim ken balon una kum pinapam anun a taro oros kut, awu. In pami ut anun a pinapam sur in ugaggas anun a mugumugu. <sup>5</sup> Lenkutkai ra, a tene kinalabor ra i kalabor una ililu, ken los tu ikul ra ke mur a kum warkurai ina ililu. <sup>6</sup> A tene minarut ra i papam dekdek, i ut in pasong mugu a wina ana kinobot ra in taka. <sup>7</sup> Un ser nuk ukai a kum wasiso ri a tumusi torom ui, uni a Labino ut in utalapor a kukuraino torom ui.

<sup>8</sup> Un nuk pas o Iesu Karisito, i ra tagun a kabotaro anun o Dewid, ra i katutur melet gusun a minat. Iri a Wakak na Wasiso ra a warawai nami. <sup>9</sup> A taramo a ngunungut, ma di ker iau elar nama tene sakino, uni a warawai nama Wakak na Wasiso. Ikut, a wasiso anun o God ka din turbat lar pasi. <sup>10</sup> Kuri a taramo a kum ngunungut, ikut a tur dekdek ut, sur det ra o God i sa pilok pas det, det kai det in nurnur un o Karisito Iesu ma in ulaun pas det, ma det in los a minamar tukum. <sup>11</sup> A wasiso ri an watungi tam, i lingmulus sakit:

Ra dat in mat tomo nama Karisito Iesu,  
dat in laun tomo kai nami.

<sup>12</sup> Ra dat in taramo a ngunungut tomo nami,  
dat in warkurai tomo utkai nami una  
nun a matanitu.

Ra dat in ipul ru i,  
i kai in ipul ru dat kut.

<sup>13</sup> Ra ka dat in pam sot pas anundat a liliman  
sur dat in mur o Karisito Iesu,  
i ut in tur dekdek una nun a liliman,  
uni ken pet lari sur in kutus anun a  
liliman.

*A lingmulus na tene pinapam*

<sup>14</sup> Gong u mana nama wasiso torom anum a taro nama kum etowo ri. Un utumarong det umatan o God lena, gong det engaras una kum wasiso, uni ke gas un tu utna, ma in banlaulau det ra det longoro i.

<sup>15</sup> Un pitar tar ui ut torom o God ma un dekdek sur ui a lingmulus na tene pinapam, ra o God in gas nami. A tena pinapam ra ke ser maimai una nun a pinapam, ma i

palos kodos a lingmulus na wasiso. <sup>16</sup> Un nan gisen gusun a kum wasiso ra ke sot nama nemngas anun o God, uni a taro ra det balon nama ngas na wasiso lenra, det in nan bakbak ma det in bakbak doko gusun o God. <sup>17</sup> Anundet a etowo in nan sarara elar nama laulau na inangon ra i tangangos nanan. O Emeneus ma o Piletus aru tagun det, <sup>18</sup> ra der sa wan raro gusun a lingmulus. Der watungi lena, dat sa katutur melet gusun a minat. A wasiso ri anunder, i banlaulau a nurnur anun a ramano taro.

<sup>19</sup> Ikut, o God i sa ubek tar a kibina nurnur ra ken tugunu, ma di sa tumus tar a wasiso uni lena, "A Labino i tasman det ra anunu." *Namba 16:5*

Ma di sa tumus tari kai lena, "I ra i watungi lena i anun a Labino, in nan gisen gusun a sakino petutna."

<sup>20</sup> Un ara labino rumu, a kum ngas na dis kura det kis. A ramano di pam det nama silwa ma nama gol, ma a ramano kai di pam det nama duwai ma nama piopap. A ramano kum dis sur a kum lamlabino bung kut ma a ramano kai sur a kum durdur na utna kut. <sup>21</sup> Ra taio in utalapor pas anun a nilaun gusun a kum durdur na petutna, in elar nama dis tagun a kum lamlabino bung. Uni, i, anun a Labino, ra a Labino in papam una nun a nilaun sur in pam a pinapam anuna Labino, ma i sa kis waninar sur in pam a kum wakak na pinapam.

<sup>22</sup> Un nan gisen gusun a kum nuknuk na barman, ma un mur a tokodos na petutna, ma a nurnur, ma a marmaris ma a malmal, tomo nam det ra det ser wararing torom a Labino nama tokodos na nuknukindet. <sup>23</sup> Un nan gisen gusun a kum wasiso ororos ra katu kukuraino, uni det in ukatutur a kum wasiso na engaras. <sup>24</sup> A tultul anun a Labino gong i ser engaras, ikut in wakak na tene ususer, in pam a wakak ino torom a taro rop, ma in ese anun a wowowon na petutna torom a taro ra i ukodos det. <sup>25</sup> Det ra ka det nem anun a etowo, in ukodos wowowon det, sako o God in mulaot pas det sur det in nukpukus, ma det in tasman a lingmulus ino. <sup>26</sup> Numur det in nuknuk wakak, ra det in pirso gusun in nukun anun o Satan, ra det sa iru taru uni, ma det ser muri.

3

*A magiran a taro una kum tintinip na bung*

<sup>1</sup>Un nuk ukai a kum wasiso ri: Una kum tintinip na bung, a kum dekdek na mamaut in nanpat. <sup>2</sup>A taro det in nuk pas det ut, ma det in nemnem sur a mani, ma det in umuman labino, ma det in watung ulabo pas det ut, ma det in emang, ma det in pitarngat torom a kum tamtamandet ma a kum nanandet, ma ka det in lason sur det in watung wakak torom o God ma torom a taro kai, ma ka det in mur a nemnem anun o God. <sup>3</sup>Ma ka det in marmaris, ma ka det in nuk dumano a sakino anun ara, ma det in banlaulau a risan ara, ma ka det in warkurai wakak anundet a nilaun, ma det in waim ma det in banlaulau a taro, ma ka det in nem a wakak ino. <sup>4</sup>Det in usobor a kum paspasandet, det in pam a kum tuptup na petutna, det in ulabo pas det ut, det in nem doko a gasgas tagun a rakrakon bual, ma ka det in nem o God. <sup>5</sup>Det in mur a petutna anun o God una pinindet kut, ikut ka det in nem a dekdekino. Un nan gisen gusun a ngas na taro ra.

<sup>6</sup>A kum ngas na musano lenra, det in ruk oros kut una kum rumu, ma det in ungonos oros pas a wardain sur det in mur det. A wardain ra, katu wakak na nuknukindet, ra det pot na marmaris una nundet a kum sakino petutna, ma anundet a kum sakino nemnem i ben raro det. <sup>7</sup>A wardain ri det ser los a etowo a bungbung rop, ikut ka det tasman lar pas a lingmulus ino.

<sup>8</sup>A kum ngas na musano lenra, det turbat a lingmulus na etowo, elar nam o Janes ma o Jambres der turbat o Moses. A nuknukindet i laulau doko ma anundet a nurnur ausur i lingmulus. <sup>9</sup>Ikut anundet a pinapam ken lubung, uni anundet a tuptup na petutna in talapor umatan a taro rop, elar nami ra a taro numugu, det tama lele pas a tuptup na petutna anun o Janes ma o Jambres.

*O Pol i udekdek o Timoti una nun a nurnur ma anun a pinapam*

<sup>10</sup>Ui Timoti, u sa tasman rop anung a kum etowo, a magirang, a kum utna ra a ngara suri, anung a nurnur, anung a kinkinis wowowon, anung a marmaris, anung a tun-tunur dekdek una kum ngunungut, <sup>11</sup>anung a kum mamaut, ma a kum ngunungut a taramo i. U tasman rop a kum lamlabino ngunungut ra a taramo i tong una tulu tamon ri: o Antiok, Aikoniam ma o Listra. Ikut a Labino ut i ulaun pas iau gusun a kum

utna ri. <sup>12</sup>Ma i lingmulus, det rop ra det laun una Karisito Iesu ma det nem na mur a nilaun elar nama nemnem anun o God, a taro det in banlaulau det ut. <sup>13</sup>A sakino taro ma a kum tene torotoro det in laulau, ma det in laulau sakit. Det in toro a taro, ma det in toro pas det utkai.

<sup>14</sup>Ikut ui, Timoti, un tur dekdek una etowo ra di sa ususer tar ui uni, ma u sa nurnur dekdek uni, uni u tasman wakak anum a kum tene ususer, <sup>15</sup>ma u tasman a Buk Tabu turpasi ra u natlik utmakai. A Buk Tabu i utalapor a nuknukim, sur un nurnur una Karisito Iesu, ra o God in ulaun pas ui. <sup>16</sup>A kum du wasiso rop una Buk Tabu i kimkibino ut tan o God, ma i wakak sur in towo a taro, ma sur in upuaso a sakino anun taio toromi ut, ma in ukodos a kum niraro, ma in ususer a taro una tokodos na petutna. <sup>17</sup>A Buk Tabu i waninar a taro anun o God sur det in pam a kum ngas na wakak na pinapam rop.

#### 4

<sup>1</sup>O Karisito Iesu in nanpat urin nama nun a matanitu, ra in warkurai elar nama king. In warkurai det ra det laun, ma det ra det sa mat. Lenra, a saring ui umatan o God ma o Karisito Iesu lena: <sup>2</sup>Un warawai nama Wakak na Wasiso. Un dekdek uni, una kum bung ra a taro det nem na longoro ui, ma a kum bung ra ka det nemi. Un ukodos wakak a taro, un upuaso anundet a kum niraro torom det ma un udekdek det. Un pam a kum utna ri nama wowowon na petutna torom det ma un ususer wakak det. <sup>3</sup>Uni, a bung in nanpat, ra a taro ka det in nem mo a tokodos na etowo. Ma una nundet a kum nemnem, det in ben tomo a susut na tene ususer torom det, sur det in ususer det una sau ra det nem na longoro i. <sup>4</sup>Ka det in longoro a lingmulus ino mo, det in longoro mukut a kum wasiso ororos kut. <sup>5</sup>Un nuknuk wakak una kum bungbung rop. Ra un taramo a kum mamaut, un tur dekdek ut. Un dekdek nama warawai una Wakak na Wasiso, ma un pam sot pas anum a kum pinapam rop, ra o God i sa pitar tari tam.

<sup>6</sup>Uni i sa milau mo sur an mat ma a gaping in tilingis. In elar nama wain ra di lingisi una utna ra di tuni sur a etabor torom o God. <sup>7</sup>A sa pam sot pas anung a wakak na inaim ma anung a kinalabor una ililu, ma a sa mur sot pas a lingmulus na nurnur. <sup>8</sup>O God i sa ubek tar anung a kunukul, uni anung a nilaun i tokodos

umatano. A Labino, a tokodos na Tene Warkurai in pitari tang una bung na warkurai. Ma ausur torom iau kut, in pitari kai torom det rop ra det kis langlang nama labino nemnem sur anun a inawan pat melet.

<sup>22</sup> A Labino in kis una niom. A marmaris anun o God in kis torom mot.

*O Pol i itula sur o Timoti ra i wasiso una nuna nilaun*

<sup>9</sup> Un dekdek sur un nan lakit urin torom iau, <sup>10</sup> uni o Demas i sa wan pas gusun iau, uni i nem a kum utna tagun a rakrakon bual, ra i sa wan utong o Tesalonaika. O Kresens i wan utong una papor Galesia ma o Taitus i wan utong una papor Dalmatia. <sup>11</sup> O Luk mukut kuri nisang. Un ben pas o Mak ra mur in nan urin, uni in warut iau una nung a pinapam. <sup>12</sup> A sa tulu ru o Tikikus utiro o Epeses. <sup>13</sup> Ra un nan urin, un los anung a saket, kura a wan gusun tari nisan o Karpus tong o Troas. Un losi utkai anung a kum buk, ma gong u dumano a ramano ra di pami nama pinin a wewegua. <sup>14</sup> O Aleksanda, a tene pam ututna nama aen, i pam a susut na sakino petutna torom iau. A Labino ut in balu i toromi. <sup>15</sup> Un tumarong ui gusuni, uni i turbat dekdek anundat a etowo.

<sup>16</sup> A mugano du bung ra a tur una warkurai ma a wasiso bat iau, kataio i tur warut iau, det wan rop pas kut gusun iau. A wararing lena o God gong i balu anundet a petutna. <sup>17</sup> Ikut a Labino i warut iau, ma i udekdek iau sur an pam sot pas a warawai nama Wakak na Wasiso, ma a taro rop ra ausur a taro Juda det in longoro i. Det nem na um doko iau, ikut a Labino i ulaun pas iau. <sup>18</sup> A Labino in ulaun iau gusun a kum sakino utna rop ra det nem na pami un iau, ma in ukis iau una nun a matanitu sapat una langit. Dat in watung ulabo pasi, ken rop ma ken rop. Amen.

*A tintinip na wasiso na marmaris*

<sup>19</sup> Un pitar anung a marmaris torom o Pirisila ma o Akuila, ma det ra kura det kis tomo una rumu anun o Onesiporus. <sup>20</sup> O Erastus munung i kis sikot tong o Korin, ra a wan pas bulung gusun o Tropimus tong o Miletus, uni i misait. <sup>21</sup> Un dekdek sur un nan urin ra ken kalang na kotokoto utmakai.

O Iubulus, o Pudens, o Linus, o Kaludia ma a kum tistisindat rop una nurnur, det pitar anundet a marmaris torom ui.

## A Pas anun o Pol torom o Taitus

*A wasiso talapor mugu*

A buk ri o Pol i tumusi torom o Taitus. O Taitus ausur i a te Juda. I longoro a warawai anun o Pol, ra i nukpukus, ma i nurnur un o Iesu Karisito. O Taitus i wan tomo nam o Pol usapat o Jerusalem, ma a kum aposel rop det kis tomo (tama Ap 15:2). O Pol i tulu ru o Taitus utong o Korin aru dino (tama 2 Kor 7:6-7 ma a 8:17). Numur o Pol i pilok pas o Taitus sur in tene tamtamabat una lotu tong una ailan Krit (tama o Taitus 1:5).

Una buk ri o Pol i inanos o Taitus un asi na ngas na taro din pilok pas det, sur det a kum tene pinapam tagun a lotu. Ma i inanosi lena in tamtamabat a lotu gusun a kum torotoro na tene ususer, ma in ususer wakak a kum taro na lotu nama wakak na petutna.

A inawan ina buk Taitus:

A turturkibin ina buk ri (1:1-4)

A kum mugumugu tagun a lotu (1:5-16)

A etowo torom a taro na lotu (2:1-15)

A wakak na petutna sur dat in muri (3:1-11)

A tintinip na wasiso anun o Pol torom o Taitus (3:12-15)

<sup>1</sup>Iau o Pol, a tultul anun o God ma a aposel anun o Iesu Karisito, sur an warut a nurnur anun a taro na pipilok anun o God, ma an ususer det sur det in tasman a lingmulus ino. A lingmulus ino ra in ben det sur det in mur a petutna anun o God. <sup>2</sup>A nurnur ra, ma a tastasman ra, i wanpat tagun a kinkinis langlang nama nurnur sur a nilaun tukum. A nilaun tukum ra o God i uliliman taru nami, ra ke ukisi utmakai a rakrakon bual. Ma o God ke ser torotoro. <sup>3</sup>Ra a du bung i sa sot, i upuaso anun a wasiso ra met warawai nami. O God a Tene Ulaun anundat i pitar tar a pinapam na warawai tang elar ut nama nun a itula.

<sup>4</sup>A tumtumus torom ui Taitus, a nutunglik ra anundat a nurnur i elar. A marmaris ma a malmal anun o God a Tamandat, ma o Karisito Iesu anundat a Tene Ulaun, in kis tomo nam ui.

*A kum mugumugu tagun a lotu*

<sup>5</sup>A wan gusun ui tiro una ailan Krit, sur ui mo un urop a kum pinapam ra ke

rop utmakai, ma un pilok pas lako kum mugumugu tagun a lotu, una kum tamon rop, elar nami ra a sa watung tari tam. <sup>6</sup>Ra un pipilok, un pilok pas taio ra katu etakun kura uni, i nolin kut nam ara ino, ma a kum nutnutunu det a kum tene nurnur, ma katu wasiso i los det un tu petutna, ma ka det ser pitarngat. <sup>7</sup>I wakak ra a mugumugu tagun a lotu, i a ngas na musano ra katu etakun kura uni, uni i ut a tene tamtamabat una kum pinapam anun o God. Gong i ulabo pasi, gong i ser kankan lakit, gong i tene ininum, gong i tene inaim, ma gong i nemnem sur a susut na mani. <sup>8</sup>In ser gas pas a taro una nun a rumu, ma in nemnem sur a wakak na petutna, in warkurai wakak anun a nilaun, in tene tokodos, in tokodos umatan o God, ma in tamtamabat wakak anun a nilaun. <sup>9</sup>In pam ukai a lingmulus na wasiso ra di sa ususer tari nami, sur in udekdek a taro una tokodos na etowo, ma in watung puaso a niraro anundet ra det turbat a Wakak na Wasiso.

*A wasiso na warut torom o Taitus una nun a pinapam*

<sup>10</sup>Un pilok pas lako kum mugumugu tagun a lotu, uni a susut na taro a kum tene pitarngat. Det waswasiso una kum utna oros kut, ma det ben raro a nuknukin a taro. Ara taro tandet ra an utumarong ui un det, det ra det watungi lena, din tok talilis a pinin a taro ra ausur a taro Juda. <sup>11</sup>Un turbat anundet a kum wasiso, uni det ser upurpuruon a nurnur anun a susut na kamkabo tamano nam a kum etowo, ra ke wakak sur din ususer det nami. Det ser ususer det kut lenri sur det in toro pas a mani gusun det. <sup>12</sup>Ara poropet tagun a taro Krit ut, i watungi lenri, "A taro Krit, a kum tene torotoro mulus, a kum laulau na kuabor, a kum tubunu wok ra tagun a inangon kut." <sup>13</sup>A wasiso ri un det i lingmulus ut. Un wasiso dekdek torom det una nundet a kum niraro, sur det in pam ukai a tokodos na nurnur, <sup>14</sup>ma gong mo det mur a kum etowo oros kut anun a taro Juda, ma a kum warkurai anun a taro ra ka det nem a lingmulus ino. <sup>15</sup>A kum utna rop i tokodos torom det ra det tokodos, ikut torom det ra ka det tokodos ma ka det nurnur, a kum utna rop kai ken tokodos. A balandet i laulau doko, ma katu tokodos ino tiro una nuknukindet. <sup>16</sup>Det watungi lena, det tasman o God, ikut anundet a kum pinapam ut i upuaso i lena, ka det

tasmani. Det a kum sakino taro doko, a kum tene pitarngat, ma ka det in pam lar pas tu wakak na pinapam.

## 2

### *A tokodos na etowo*

<sup>1</sup>Ikut ui, un ususer det nam asau ra i mur wakak a tokodos na etowo. <sup>2</sup>Un ususer a kum musano ra a kum mugano tam, sur det in tumarong a magirandet, det in los a ngas na nilaun ra a taro det in ru det uni, det in warkurai wakak anundet a nilaun, det in lingmulus una nundet a nurnur, anundet a marmaris ma anundet a tuntunur dekdek ra det etorom a mamaut.

<sup>3</sup>Lenkutkai ra, un ususer a kum wardain ra a kum mugano tam, sur det in lason una kisapi na urur una nundet a nilaun, gong det emang, gong det tene ininum, ikut det in ususer a taro nam asau ra i wakak. <sup>4</sup>Det in pami lenra sur det in ususer a kum wardain numur tandet, sur det in nem anundet a kum musano ma a kum nutnutundet, <sup>5</sup>det in tamtamabat wakak anundet a nilaun, det in mur a tokodos na petutna, det in lason una pam a kum pinapam tiro una rumu, det in lason sur det in pam a wakak ino torom a taro, ma det in ru anundet a kum musano, sur gong taio i watung laulau a wasiso anun o God.

<sup>6</sup>Lenkutkai ra, un udekdek a kum barman, sur det in tamtamabat wakak anundet a nilaun. <sup>7</sup>Una kum utna rop ra u pami, un pam a wakak ino, sur a wakak na larlar torom det. Ra u ususer det, un papam nama lingmulus, ma a urur. <sup>8</sup>Un watung a tokodos na wasiso ra kataio in pukus ui uni, sur det ra det turbat ui det in maimai, uni ka dat pam tu sakino sur det in watung laulau dat uni.

<sup>9</sup>Un inanos a kum tene ititula sur det in taromlu anundet a kum mugumugu una kum utna rop, ma det in ugasgas det nama kum pinapam rop ra det in pami, ma gong det balu wasiso. <sup>10</sup>Gong det wolong anundet a kum mugumugu. Det in upuaso anundet a wakak na petutna, sur anundet a kum mugumugu det in nurnur un det, sur in upuaso i lena, a etowo un o God a Tene Ulaun anundat i wakak.

<sup>11</sup>Uni a marmaris anun o God i sa wanpat taltalapor. Una marmaris ra, o God i papos a kisapi sur in ulaun pas a taro rop. <sup>12</sup>A marmaris ri i ususer dat, sur dat in nan gisen gusun a kum petutna ra ke sot nama

nuknukin o God, ma gusun a kum nemnem sur a kum utna tagun a rakrakon bual, ma dat in tamtamabat wakak anundat a nilaun, dat in tokodos, ma dat in laun murmur a nuknukin o God una nilaun ri, <sup>13</sup>ra dat kis langlang nama nurnur sur a bung na gasgas ra in nanpat. A bung ra anundat a Labino o God, o Iesu Karisito, a Tene Ulaun anundat in nanpat nama nun a minamar. <sup>14</sup>I pitar tar anun a nilaun un dat, sur in kul ulangolango pas dat gusun anundat a kum sakino petutna rop, ma in utalapor pas dat, sur dat anun a taro mulus ut, ra dat nem doko i sur dat in pam a kum wakak na pinapam.

<sup>15</sup>Un ususer det nama kum wasiso ri. Un udekdek a taro, ma un watung puaso anundet a niraro umatandet. Un pami nama dekdek ra kura torom ui. Ma gong u madek tar taio sur in nuki lena ui a musano oros kut.

## 3

### *A ngas na nilaun, ra a te Karisito in muri*

<sup>1</sup>Un inanos melet anum a taro sur det in urur torom a kum mugumugu tagun a gapman, ma torom det rop ra a warkurai kura un det. Det in tarom, ma det in kis na waninar sur det in pam a kum wakak na pinapam. <sup>2</sup>Gong det emang, det in balano molmol, det in pam a wakak ino torom a taro, ma det in unatino pas det torom a taro rop.

<sup>3</sup>Uni dat kai numugu, ka dat mananos, dat a kum tene pitarngat, dat wan raro, dat karabus una nundat a kum laulau na nemnem, ma a wur ngas na utna rop ra dat gas suri. Una nundat a kinkinis na nilaun dat pam a kum sakino, ma dat nuknuk laulau sur a utna anun taio, ma dat nget etetalai dat.

<sup>4</sup>Ikut, ra a wakak na petutna ma a marmaris anun o God, a Tene Ulaun anundat i wanpat, <sup>5</sup>i ulaun dat. Ausur un lako kum tokodos na pinapam ra dat sa pam tari, awu. I ulaun dat uni i maris dat. I ulaun dat ma i rus talapor dat. A utalapor ra, a Tokodos na Nion i pami una nundat a nilaun, ra i usus matok dat, ma anundat a nilaun i wanpat matok uni. <sup>6</sup>O God i tabor dat nama Tokodos na Nion, ra i lingis orosi kut sapat netes un dat, kibino una pinapam anun o Iesu Karisito, anundat a Tene Ulaun. <sup>7</sup>I ulaun dat, sur dat in rakon a nilaun tukum, ra dat kis langlang suri nama nurnur. Ra

i ulaun dat, i watung dat lena dat tokodos umatano, kibino una nun a marmaris. <sup>8</sup> A kum wasiso ri i lingmulus sakit. Ma a nemi sur un papam dekdek nami, sur a taro ra det nurnur un o God, det in pitar mulus tar det una wakak na pinapam una nundet a kum bung na nilaun. A kum wasiso ri i wakak ma i warut a taro rop.

<sup>9</sup> Un nan gisen gusun a kum tuptup na wasiso, ma a kum saksakutna na kabotaro, ma a engaras, ma a inaim na wasiso una kum Warkurai anun o Moses, uni ka det gas un tu utna, ra ken warut ui. <sup>10</sup> Ra taio in ser pagol a taro na nurnur, un wasiso na utumarong toromi sur in mana. Ra ken longoro ui, un wasiso na utumarong melet toromi. Ra ken longoro mo, un nan gisen gusuni. <sup>11</sup> Ra taio i pami lenra, un tasmani kut lena, i sa raro, ma i sa bukus nama sakino petutna. Anun a sakino petutna ut ra, i beni utiro una iniru tukum.

*A sasaring anun o Pol torom o Taitus*

<sup>12</sup> Ra an tulu ru o Artemas o, o Tikikus torom ui, un dekdek sur un nan torom iau tong o Nikopolis, uni an kis ru a kum kalang na kotokoto tong. <sup>13</sup> Un tulu ru o Apolos ma o Senas, i ra a tene mananos tagun a kum warkurai, ma un warut der sur gong der sibo sur tu utna. <sup>14</sup> Anundat a taro, det in lason sur det in pitar mulus tar det una wakak na pinapam, sur det in wu a wakak na windet una anundet a nilaun, ma det in warut a sibo na taro.

<sup>15</sup> Det rop ra det kis tomo nam iau, det pitar anundet a marmaris torom ui. Un pitar anumet a marmaris torom a kum paspasamet una nurnur.

A marmaris anun o God in kis torom mot rop.

## A Pas anun o Pol torom o Pilimon

### *A wasiso talapor mugu*

O Pol i tumus a buk ri torom o Pilimon. O Pilimon i ara labino musano tagun a tamon Kolosi, ma a tene nurnur kai. Anuna ara tene pinapam, a tene ititula, a risano o Onesimus, i kalabor pas gusuni. Numur di ukarabusi, ra i etorom pas o Pol una karabus. O Pol i warawai toromi ra i nukpukus. Ra di palos ru o Onesimus, o Pol i nemi sur in milet melet torom anun a mugumugu o Pilimon, ra, i tumus a pas ri torom o Pilimon sur o Onesimus in losi. I inanosi lena, gong i kankan torom o Onesimus, in gas pasi kut, uni, i sa nukpukus, ma i nurnur un o Iesu elar nam o Pilimon.

A inawan ina buk Pilimon:

A turturkibin ina buk ri (1-3)

A wakak na petutna anun o Pilimon (4-7)

O Pol i nemi sur o Pilimon in gas pas o Onesimus (8-22)

A tintinip na wasiso anun o Pol torom o Pilimon (23-25)

<sup>1</sup>Iau, o Pol, a karabus, uni a nurnur un o Karisito Iesu. Mir nam o Timoti a tisindat, mir tumus a pas ri torom ui Pilimon, a wakak na pasamet una pinapam,<sup>2</sup> ma torom o Apia a ino a tisindat, ma torom o Arkipus a pasandat una inaim nama Wakak na Wasiso, ma torom a taro na lotu ra mot ser wan tomo una num a rumu. <sup>3</sup>A marmaris ma a malmal anun o God a Tamandat, ma a Labino o Iesu Karisito in kis torom ui.

### *A marmaris ma a nurnur anun o Pilimon*

<sup>4</sup>Ra a wararing, a ser nuk pas ui, ma a watung wakak torom o God un ui. <sup>5</sup>Uni a longoro i lena, u nem a taro rop anun o God, ma u nurnur una Labino o Iesu. <sup>6</sup>A wararing lena, un upuaso anum a nurnur una Karisito torom a taro ma un ususer det uni. Ra un pami lenri, in warut ui sur un mananos una kum wakak na utna rop anun-dat ra i kis una Karisito. <sup>7</sup>Tisinglik, anum a marmaris torom a taro anun o God i sa pitar tar a labino gasgas tang, ma i udekdek iau, uni u ugasgas a nilaun anundet.

<sup>8</sup>Ara utna a nem doko i sur un pami. I topas iau sur an wasiso dekdek torom ui uni, uni dar tar tasino una Karisito. <sup>9</sup>Ikut, a saring wakak ui, uni a nem ui. Iau, o Pol, a sa takano, ma uniri a kis na karabus, uni a nurnur una Karisito Iesu, <sup>10</sup>a saring pas anum a nimulaot un o Onesimus, a nutunglik una nurnur. I wanpat torom iau ra a kis una karabus, ma i nukpukus. Ra iri i elar nama nutunglik mulus ut una nurnur. <sup>11</sup>Numugu ke gas matano sur in papam torom ui, ikut uniri, i a wakak na tene pinapam mo, torom ui ma iau.\*

<sup>12</sup>Uniri a tulu ru i milet mo torom ui. Ra i wan gusun iau, i elar nam ara kukur tagun anung a nilaun i wan tomo nami. <sup>13</sup>A nemi sur in kis mukut tomo nam iau, sur in keles ui Pilimon, ma in warut iau, ra a kis una karabus uni a warawai nama Wakak na Wasiso. <sup>14</sup>Ikut ka nemi sur an ungonos pas ui sur un warut iau, ui ut un pami elar nama num a gasgas. Kan pam tu utna, tuk ui ut un mulaot. <sup>15</sup>Kutiro o Onesimus i kis gisen lilik pas kut gusun ui, sur i mo ri, in kis tukum tomo nam ui. <sup>16</sup>Uniri ken elar melet mo nama tene ititula, in elar nam a tisimlik mulus una nurnur. A marisi, ikut a tasmani lena, anum a marmaris toromi i labo taun a marmaris ra a marisi nami, uni, i anum a tene pinapam ma a tisimlik kai una Labino.

<sup>17</sup>Ra u nuki lena dar pasano, un gas melet pas o Onesimus, elar nami ra un gas pas iau ut. <sup>18</sup>Ra i sa pam tar tu sakino torom ui, o i sa los pas anum tu utna, iau mukut an balu i. <sup>19</sup>Iau o Pol, iau ut a tumus a wasiso ri nama lamang: an balu asau ra torom ui. Kan watung tu utna tam, ui ut u sa tasman tari lena, a matok na nilaun ra u sa los pasi, i kibino ut un iau, ma i elar nama dinau torom ui. <sup>20</sup>A lingmulus, tisinglik, una risan a Labino, a nemi sur un gas melet pas o Onesimus. Ui a tisinglik una Karisito, un ugasgas anung a nilaun. <sup>21</sup>Ra a tumus a pas ri, a tasman mulusi lena, un tarom ut una nung a sasaring torom ui, ma a tasmani kai lena un pam a utna in labo taun asau ra a saring ui suri.

<sup>22</sup>Ara utna kai: A saring ui sur un waninar tu kukur rumu sur iau, uni a nurnur lena, o God in upirso ru iau gusun a karabus sur an milet melet torom mot. Iri i a win anumot a kum niaring.

*O Pol i saring o Pilimon sur o Onesimus*

*A tintinip na wasiso na marmaris*

\* 1:11: A rising Onesimus a kukuraino lena, "i topas a pinapam ut."

<sup>23</sup> O Epapras, i ra i karabus tomo nam iau, uni i nurnur una Karisito Iesu, i pitar ru anun a marmaris torom ui. <sup>24</sup> Ma det kai ri, o Mak, o Aristakus, o Demas ma o Luk. Met paspasano tomo una pinapam.

<sup>25</sup> A marmaris anun a Labino o Iesu Karisito in kis una niomot.

## A Pas anun o Jems

*A wasiso talapor mugu*

O Jems i tumus a buk ri. A susut na tene mananos det nuki lena o Jems ri, a tisin o Iesu (tama Mt 13:55). O Jems i ara labino mugumugu anun a taro na lotu sapat o Jerusalem (tama Ap 15:13, 21:18).

I tumus a pas ri torom a kum tene nurnur, ra det etorom a susut na maut tan a taro ra ka det nurnur. Det lu ru a kum tene nurnur. Ra numur det kis na usiro una kum tamon.

Una pas ri, i wasiso una wakak na petutna ra a kum tene nurnur det in muri. I inanos dat kai lena, anundat a wakak na petutna i ulingmulus anundat a nurnur.

A inawan ina buk Jems:

A turturkibin ina buk ri (1:1)

A nurnur ma a mananos (1:2-8)

A sibo na taro ma a kum tene gongon (1:9-11)

Ra a kum ululam in nanpat, dat in tur dekdek (1:12-18)

A tinorom (1:19-27)

Dat in ru a taro rop (2:1-13)

A wakak na pinapam in nan tomo nam a nurnur (2:14-26)

In karmendat (3:1-18)

A utumarong torom det ra det nem a petutna tagun a rakrakon bual (4:1-5:6)

Dat in tur dekdek una nurnur (5:7-20)

<sup>1</sup> Iau o Jems a tultul anun o God ma anun a Labino o Iesu Karisito, a tumus a pas ri torom mot a noino ma aru kabotaro Israel. Mot kis sarara una kum tamon una rakrakon bual, uni det nem na um doko mot. A marmaris torom mot.

*A nurnur ma a mananos*

<sup>2</sup> A kum tistising, ra lako kum ngas na maut in nanpat torom mot, mot in gas, <sup>3</sup> uni mot tasmani lena, a kum maut, ra di lar anumot a nurnur nami, i ra, in ulabo anumot a tuntunur dekdek. <sup>4</sup> Ra mot in tur dekdek, mot in tokodos sakit una numot a nilaun rop, ma ka mot in sibo sur tu wakak na petutna.

<sup>5</sup> Ra taio tagun mot i sibo sur a mananos, in saring o God suri. Ra o God in tabori nami, uni i ser tabor dat rop, ma ke ser bitan tu utna. Ma ke ser kankan torom taio ra i

sasaring. <sup>6</sup> Ikut ra in wararing, in wararing nam a nurnur, ma gong i wur nuknuk. Uni osi ra i wur nuknuk, i elar kut nama top, ra a wuwu i wup tuptupukusi. <sup>7</sup> A musano ra i wur nuknuk, gong i nuki lena, in rakon tu utna tan a Labino. <sup>8</sup> Uni aru nuknukino, ra ken tur dekdek una nun a kum pinapam rop.

*A sibo na musano ma a tene gongon*

<sup>9</sup> Ra tu tisindat una nurnur i sibo, i wakak ra in gas kut, uni o God ut i sa ulabo pasi. <sup>10</sup> Ra taio a tene gongon, in gas kut ra o God in unatino i. Uni, anun a nilaun i elar kut nam a puspupus na duwai, in rop oros kut. <sup>11</sup> Uni in matanas in pusu pat nama labino mararong ino, ra in rang in nanai, ma a puspupus ino in puku, ra a wakak na tamtama ino in rop. Lenkutkai lar a tene gongon in rop tomo nam anun a kum ululeng.

*A kum ululam*

<sup>12</sup> O naro ra i tur dekdek una kum larlar, i dan. Uni o naro ra i winim pas a kum larlar ra di lar anun a nurnur nami, in rakon a kukup na nilaun tukum, ra o God i sa liliman taru sur in pitari tandet ra det nemi.

<sup>13</sup> Ra a ululam in nanpat torom taio, gong i watungi lena o God i pitari. Uni a sakino ken ulam lar pas o God, ma o God ut ken ulam taio. <sup>14</sup> A taro rop, taktakai, anundet a kum laulau na nemnem ut i ulam pas det, ma i dat pas det, sur det in pam a sakino. <sup>15</sup> Numur, ra anundet a laulau na nemnem in labo, in usus pat pas a sakino petutna. Ra a sakino petutna in labo, in usus pat pas a minat.

<sup>16</sup> A kum wakak na tistising, gong mot madek tar taio sur in toro pas mot. <sup>17</sup> A kum wakak na etabor rop, ra det tokodos sakit, det wan pirso tagisapat una langit. Det wanpat tan o Tita, i ra i ukis in matanas, a kalang ma a kum nangnang. Ikut o Tita ke ukukeles, ma ke pukpukus anun a ngasino elar nam in matanas, ra in sisio pas una waspi ma una mirum awu. <sup>18</sup> Una nun a nemnem ut, o God i usus matok dat nam anun a lingmulus na wasiso. I pilok pas dat gusun a kum utna na ukukis rop, sur dat elar nam a kum mugano wino duwai ra di ser etabor nami torom o God.

*Dat in longoro ma dat in muri*

<sup>19</sup> A kum wakak na tistising, mot in tasman a utna ri: I wakak ra mot rop, mot in longoro lakit, ikut gong mot wasiso lakit, ma gong mot kankan lakit. <sup>20</sup> Uni a kankan

anun taio ken waruti, sur in pam a tokodos na petutna ra o God i nemi. <sup>21</sup> Mot in mana gusun a kum dur na petutna, ma a kum sakino, ra kuri i bukusa na rakrakon bual. Ra mot in unatino pas mot, ma mot in mur a wasiso ra di sa marut tari una balamot, a wasiso anun o God ra in ulaun mot.

<sup>22</sup> Mot in mur a wasiso anun o God, ra gong mot longoro oros tari kut, sako mot in toro pas mot melet ut. <sup>23</sup> Osi ra i longoro oros tari kut a wasiso anun o God, ma ke muri, i elar kut nam a musano ra i tama in masarino una galas. <sup>24</sup> Ra in nan gisen, uniutra in dumano ru in masarino ra i tamtama pepetlai. <sup>25</sup> Ikut, ra taio in longoro wakak a tokodos na warkurai anun o God, a warkurai ra i ser ulangolango a taro, ma in ser muri, ma ke dumano i, a musano ra, in dan una nun a kum pinapam.

<sup>26</sup> Ra taio in nuki lena, i sa lingmulus na tene lotu, ikut, ra ke tumarong in karmene, i toro pasi ut, ma anun a lotu in utna oros kut. <sup>27</sup> Ikut, ra dat warut a kum nat na soi, ma a kum ula, ra det pot na marmaris, ma dat tumarong dat kai gusun a kum dur na petutna tagun a rakrakon bual, iri a lingmulus na lotu, ra i tokodos, ma katu utna i raro uni umatan o God a Tamandat.

## 2

### *Dat in ru a taro rop*

<sup>1</sup> A kum tistising, mot ra mot nurnur una nundat a Labino o Iesu Karisito, ra i bukusa nama minamar, gong mot ru ara taro kut, ma ara taro awu. <sup>2</sup> Ra lako ru musano der in ruk una numot a kiwung na lotu, ra ara pasander i ubek a ring na gol, ma i emar nama kum wakak namalu, ma ara kai, a sibo na musano i emar kut nam in turai na malu. <sup>3</sup> Ikut, ra mot urur kut torom i ra i emar nam a wakak na malu ma mot watungi tano lena, “Un kis nin una wakak na kiskis,” ma mot watungi kut torom a sibo na musano lena, “Un tur ut tiro iai,” o “Un kis kut nin upiso nisan aru kiking,” <sup>4</sup> ke takai anumot a ngasino torom a taro rop, ma mot warkurai kut nam a sakino nuknukimot.

<sup>5</sup> A kum wakak na tistising, mot in longoro iau: Pepetlai, ka mot tasmani lena, o God i pilok pas a kum sibo na taro nin upiso, sur det in tene gongon una nurnur? Det in rakon pas a matanitu ra o God i sa liliman tari, sur in pitari tandet ra det nemi. <sup>6</sup> Ikut mot, mot ban umaimai i kut a kum sibo na taro. A kum tene gongon, det ser ukis

laulau mot nam a dekdek ra det utur ukai i, niko? Ra det dat pas mot sur mot in tur una warkurai. <sup>7</sup> O God i pitar tar a wakak na rising anun o Karisito torom mot. Ma osi ra i ser watung laulau a rising ri? A kum tene gongon kut.

<sup>8</sup> Mot in pam sot pas a warkurai ra i labo sakit una Buk Tabu. I lenri,

“Un nem a pasam elar nami ra u nem ui ut.”

*Wok Pris 19:18*

Ra mot pami lenra, mot pam a tokodos na petutna. <sup>9</sup> Ikut, ra mot ru ara taro kut, ma ara taro awu, mot pam a sakino petutna. Ra a kum Warkurai anun o God i takun sot pas mot lena, mot a kum tene lakai warkurai. <sup>10</sup> Uni osi ra i mur a kum Warkurai rop, ikut i kutus ara tagun a kum Warkurai, din warkurai i elar nam o naro ra i lakai a kum Warkurai rop. <sup>11</sup> O God i watungi lena, “Gong u pam a sakino un tu ino,” ma i watungi kai lenri, “Gong u um doko taio.” Ra ko pam a sakino un tu ino, ikut u um doko taio, ui a tene lakai warkurai.

<sup>12</sup> Mot in wasiso ma mot in papam elar nam det ra o God in kuro det nam a warkurai ra i ser ulangolango pas a taro nami. <sup>13</sup> Uni, osi ra ke lason una marmaris, o God kai ken marisi una bung na warkurai. Ikut, o naro ra i lason una marmaris, o God in marisi una bung na warkurai.

*A nurnur ra i wan tomo nam a wakak na pinapam*

<sup>14</sup> A kum tistising, in wakak pepetlai ra taio in watungi lena i nurnur, ikut ke pam tu wakak na pinapam? Pepetlai, a ngas na nurnur ra, in ulauni o awu? <sup>15</sup> Ra taio tagun a kum tistisindat, tu ino o tu musano, ka tin namalu anunu, ma kalako utna na inangon, <sup>16</sup> ra taio tagun mot in watungi tano lena, “Un nan nam a malmal, un emar ma un masur,” ikut, ra ken tabori nam tu utna ra i sibo suri, anun a wasiso ra in warut petlan o naro ra i sibo? <sup>17</sup> Lenkutkai lar a nurnur, ra ke wan tomo nam tu wakak na pinapam, a nurnur ra, a minat ino.

<sup>18</sup> Ra taio kai in watungi lena, “Ui u nurnur, ma iau, a pam a kum wakak na pinapam.” Un upuaso anum a nurnur torom iau, ra ke wan tomo nam a wakak na pinapam. Ra iau, an upuaso anum a nurnur tam, nam anum kum wakak na pinapam. <sup>19</sup> U nurnur lena o God i ara kut. I wakak. A kum laulau na nion kai det nurnur lenra, ma det ngara suri, ra det neneder.

<sup>20</sup>Ui a longlong uil! A nurnur ra katu wakak na pinapam tomo nami, i utna oros kut. Pepetlai, u nemi sur an upuaso a wasiso ra tam? <sup>21</sup>A tamandat o Abaram i pitar tar a nutunulik, o Aisak, elar nam a etabor torom o God netes una kabulu na tuntun etabor, ra i pami nama kum watat. Una nuna pinapam ra, di watungi lena, i a tene tokodos umatano o God. <sup>22</sup>Un tama i, anun a nurnur i wan tomo nam anun a kum wakak na pinapam. Anun a nurnur ra i wan tomo nam a pinapam, i pam sot pas anuna nurnur, sur in kudulano. <sup>23</sup>Ra di pam sot pas a wasiso una Buk Tabu ra i watungi lenri, "O Abaram i nurnur un o God, ma o God i watungi lena, i a tene tokodos umatano."

*Stat 15:6*

Ra o God i watungi kai lena der pasano. <sup>24</sup>Mot tama i, o God i watung a musano lena i a tene tokodos, kibino una nun a kum wakak na pinapam, ra ausur una nun a nurnur kut.

<sup>25</sup>Ra lenkutkai lar o Reap, a pamuk na ino. O God i watungi lena i tokodos umatano, kibino una nun a wakak na pinapam ra i tamtamabat aru tene tamtama eno anun a taro Israel, ra i tulu eno ru der melet una ara kisapi gisen.

<sup>26</sup>Taio ra a niono i wan gusuni, i a minat ino. Lenkutkai lar a nurnur, ra ke wan tomo nam lako wakak na pinapam, a nurnur ra, a minat ino kut.

### 3

#### *A karmendat*

<sup>1</sup>A kum tistising, gong lako susut tagun mot det wanpat a kum tene ususer tagun a lotu, uni mot tasmani lena, a warkurai anun o God torom met, a kum tene ususer, in dekdek sakit tan a warkurai torom a taro gisen. <sup>2</sup>Dat rop dat raro una susut na utna. Iikut, ra taio ke raro un tu utna una nun a wasiso, i ra i tokodos sakit, ma in pet lar pasi sur in ukodos pas anun a nilaun rop.

<sup>3</sup>Ra dat in ubek a nat na du aen una wan a os sur in tarom tandat, dat in pet lari sur dat in dat pukus pas a kudulano os nami.

<sup>4</sup>Mot in tama i kai a sip sel. I labo doko, ma a kum dekdek na wuwu det ukalabori, ikut din ukodosi kut nam a nat na stia ino, sur in mur a nemnem anun a kipten.

<sup>5</sup>Lenkutkai lar in karmendat, i ara nat na dino kut tagun a pinindat, ikut i ulabo pasi nam a kum lamlabino utna ra i ser pami. Mot tama i, tin na nat na lakit ina sungun kut in pet lari sur in tun rop ru tu labino

lokori. <sup>6</sup>In karmendat i elar nam a sungun. I ara dino tagun a pinindat, ra i bukus nam a laulau ino, ra i udur a kudulano pinindat rop. I ungangan anundat a kudulano nilaun nam a sungun tagun a labino sungun, ra ke ser mat. <sup>7</sup>A taro det sa umarom pas a kum wewegua, a kum piko, ma a kum utna ra det kaukawar una piso, ma a kum utna ra det laun sa utasi. <sup>8</sup>Iikut in karmendat, kataio in ulason lar pasi, ma katutaio kai in ukodos lar pasi. I laulau sakit, ma i bukus nam a sangsagor.

<sup>9</sup>Dat watung ulabo pas a Labino a Tamandat nam a karmendat, ma dat watung laulau i kai a taro nami, det ra o God i ukis tar det elar nam a malalar ino. <sup>10</sup>A wasiso na watung ulabo a Labino, ma a wasiso ra i banlaulau taio, der rop, der ser pirso kut gusun a wandat. A kum tistising, ke tokodos lenra. <sup>11</sup>A danim ra i mapak, ma a danim ra i wakak, der in sal tomo pepetlai gusun in teken matmatano danim kut? <sup>12</sup>A kum tistising, in nanai na fig ken wu in wino oliwi, ma in nanai na wain kai ken wu a wino fig. Lenkutkai lar a wakak na danim ken nanpat tagun a mapak na danim.

#### *A mananos tagisapat una langit*

<sup>13</sup>Osi na pasamot i mananos, ma i tastasman? I wakak ra in upuaso i una nun a wakak na nilaun, una nuna kum wakak na pinapam, tomo nam a ngasino ra i unatino pasi ut. A ngasino ra i unatino pasi ut, i wanpat tagun a mananos mulus. <sup>14</sup>Iikut, ra mot nuknuk laulau sur a utna anun taio, ma mot nuknuk sur tu kisapi sur mot in ulabo pas mot nami, gong mot watung ulabo pas mot uni, ma gong mot toro bat pas a lingmulus ino. <sup>15</sup>A mananos ra, ausur tagisapat netes una langit, a mananos kut taginin upiso. I wanpat kut tan o Satan, ma ausur tagun a Tokodos na Nion. <sup>16</sup>Uni, osi ra i nuknuk laulau sur a utna anun taio, ma i nuknuk sur tu kisapi sur in ulabo pasi nami, anun a nilaun in lokolokor ma i bukus nama wur sakino petutna.

<sup>17</sup>Iikut osi ra i utur ukai a mananos tagisapat una langit, a mugano utna in tokodos, ma in tene malmal, ma in ser nuk pas a taro gisen, ma in lason una tinorom, in bukus nam a marmaris, ma in wu a wakak na wino una nun a nilaun, ma a petutna ra in pami in elar torom a taro rop, ma katu torotoro tiro una nun a nilaun. <sup>18</sup>A tene malmal ra i ser papam nam a malmal, i elar nam a tene

minarut. Ma a utna ra in pasong pasi, i a tokodos na petutna.

## 4

*Det ra det nem a ngasino tagun a rakrakon bual det ebar nam o God*

<sup>1</sup> Asau a kibino ra mot waim ma mot engaras etetalai? I kibino una numot a kum laulau na nemnem ra det waim una numot a nilaun. <sup>2</sup> Mot nem a kum utna, ikut ka mot utur ukai i. Mot um doko a taro, ma mot nuknuk laulau sur a utna anundet, ikut ka mot pam ukai a utna ra mot nemi. Mot engaras ma mot waim. Ka mot pam ukai a kum utna ra mot nemi, uni ka mot saring o God suri. <sup>3</sup> Ra mot wararing, ka mot utur ukai a utna ra mot sasaring suri, uni a nuknukimot ke tokodos. Mot sasaring kut sur a utna ra in ugargas mot ut.

<sup>4</sup> Mot sa wan gusun o God, elar nam a ino ra i wan pas gusun anun a musano, ra i nolin tomo nama ara musano bulung. Ka mot tasmani lena, ra mot nem a petutna tagun a rakrakon bual, mot a kum ebar anun o God? Osi ra i pilok pas a rakrakon bual sur der pasano, i a ebar anun o God. <sup>5</sup> Mot nuki lena a Buk Tabu i wasiso oros kut? I watungi lena, "A Nion o God, ra o God i pitar tari tandat, i nem dat sur dat anunu ut." <sup>6</sup> Ra a marmaris ra o God i pitar tari tandat i labo sakit. A Buk Tabu i watungi lenri, "O God i unatino pas det ra det ser ulabo pas det,

ikut i maris det ra det ser unatino pas det." *Gutpela Sindaun 3:34*

<sup>7</sup> Mot in unatino pas mot, ma mot in mur o God. Mot in turbat ru o Satan, sur in nan gusun mot. <sup>8</sup> Mot in nan milau torom o God, ra o God in nan milau torom mot. Ma mot a kum tene sakino, mot in gos a kum lamamot, ma mot ra aru nuknukimot, mot in utalapor a balbalamot. <sup>9</sup> Mot in tupunuk, mot in domos, ma mot in tangis una numot a kum sakino petutna. Mot in pukus anumot a ninongon sur a tinangis, ra mot in pukus anumot a gasgas sur a tupunuk. <sup>10</sup> Mot in unatino pas mot umatan a Labino, ra i ut in ulabo pas mot.

*Gong u mang a pasam*

<sup>11</sup> A kum tistingis, gong mot mang etalai mot. Osi ra i mang tu tisino, o i kuro i, i watung laulau a kum Warkurai anun o God ma i kuro a kum Warkurai ra. Ma ra un kuro a kum Warkurai, ausur u muri, u nuki kut

lena ui ut u labo tano. <sup>12</sup> O God kut i pitar a Warkurai, ma i sot kut a Tene Warkurai. O God kut i warkurai a taro sur a nilaun, o sur a iniru. Ra ui osi, sur un warkurai a pasam?

*A utumarong torom a taro ra det ulabo pas det*

<sup>13</sup> Mot longoro, mot ra mot ser watungi lena, "Uniri o markan met in nan sur tu tamon, ma met in kis iai ara kilalo. Met in kukul ma met in siuru sur met in pam pat lako mani." <sup>14</sup> Ikut ka mot tasman asau ra in nanpat torom mot markan. Anumot a nilaun i elar nam asau? Mot elar kut nam in nawal, ra i wanpat pas kut, ra i rorom melet. <sup>15</sup> Ikut, i wakak sur mot in watungi lenri, "Ra a Labino i nemi, met in laun ma met in pami lenri o lenra." <sup>16</sup> Ikut uniri, mot sa ulabo pas mot melet nam anumot a kum wasiso. A ngasino lenra ke wakak. <sup>17</sup> O naro ra i tasman a wakak ino sur in pami, ikut ke pami, i pam a sakino petutna.

## 5

*A utumarong torom a kum tene gongon*

<sup>1</sup> Mot a kum tene gongon, mot in longoro: Mot in tangtangis, ma mot in kukukuk, uni a kum ngunungut in nanpat torom mot. <sup>2</sup> Anumot a kum ululeng det sa moroto, ma a koropos i sa banlaulau ru anumot a kum malu. <sup>3</sup> Anumot a gol ma a silwa der sa ros, ma a ros inder in takun mot, ma in nan a pinimot elar nam a sungun. Una kum tintinip na bung ri, mot sa ubek tomo pas anumot a kum ululeng. <sup>4</sup> Tama i, ka mot tokom tar a taro ra det papam una amot a kum kinobot, ra a ikul anundet i takun mot. Ra o God a Dekdek na Labino i sa longoro tar a tinangis anundet ra det pasong.

<sup>5</sup> Una numot a nilaun nin una rakrakon bual, mot ukio a labino mani, una kum lukaro un mot ut, ma un asau ra i ugargas mot. Mot tabor butbut a pinimot, ra milau mo mot in iru, elar nama kum wewegua, ra di tabor butbut det sur din un doko det. <sup>6</sup> Mot ben tar a kum tene tokodos una warkurai, ra mot um doko det, ikut ka det balu mot.

*Dat in tur dekdek una nurnur ma gong dat pino ngoro*

<sup>7</sup> A kum tistingis, gong mot pino ngoro lakit, ra mot kis langlang sur a inawan pat melet anun a Labino. Mot tama a tene marut, ke pino ngoro lakit, ra i kiskis langlang sur a bato in puk a piso, ma sur a

wakak na makus tagun ana kinobot. <sup>8</sup> Mot kai, gong mot pino ngoro lakit, mot in tur dekdek una nurnur, uni a inawan pat melet anun a Labino i sa milau. <sup>9</sup> A kum tistising, gong mot ururai etetalai, surko o God in warkurai mot. Tama i, a Tene Warkurai i sa tur nisan a matansako.

<sup>10</sup> A kum tistising, mot in nuk pas a kum poropet tagun numugu, ra det waswasiso nama risan a Labino. Det etorom a kum ngunungut, ikut ka det pino ngoro, det tur dekdek una nurnur. Ra anundet a nilaun, i a wakak na lalar torom mot, sur mot in muri. <sup>11</sup> Tama i, ara taro tagun numugu det etorom a kum mamaut, ikut det tur dekdek una nurnur. Dat watung det lena det dan. Mot tasman a nilaun anun o Jop, i etorom a kum mamaut, ikut i tur dekdek una nurnur. Ra numur, a Labino i udan meleti. A Labino i bukus nama marmaris ma i a tene warut.

*A wasiso kapo una uliliman*

<sup>12</sup> A kum tistising, iri i a utna ra i labo sakit, gong mot udekdek anumot a kum uliliman nam tu ngas na wasiso kai. Gong mot liliman nam a langit, o a rakrakon bual, o tu utna gisen kai. Ra mot mulaot, mot in lena "ma". Ra mot ipul mot in lena "awu," i kut ra, sur gong mot iru una warkurai anun o God.

*Dat in wararing nam a nurnur*

<sup>13</sup> Ra taio tagun mot i taramo a maut, i wakak sur in wararing. Ra taio i gasgas, i wakak sur in kele a kum kelekele na ulabo torom o God. <sup>14</sup> Ra taio tagun mot i misait, in itula sur a kum mugumugu na lotu, sur det in wararing uni, ma det in talusi nam a wel, nama risan a Labino. <sup>15</sup> A niaring ra i wan tomo nam a nurnur, in ulangolango i ra i misait, ma a Labino ut, in ulangolango melet pasi. Ma ra i sa pam tar a sakino petutna, a Labino in unus ru i gusuni. <sup>16</sup> Mot in wasiso puaso etetalai torom mot una numot a kum sakino petutna, ra mot in wararing un mot etalai, sur a Labino in ulangolango pas mot. A niaring anun a tene tokodos i dekdek sakit, ma i wu pat a wino.

<sup>17</sup> O Elaija, a poropet, i a musano i elar kut nam dat. I wararing sur gong i bato, ra a tulu kilalo ma wonom na kalang ke bato.

<sup>18</sup> Numur i wararing melet sur in bato, ra in nabato i puku, ma a kum utna i lubung melet, ma det wu.

<sup>19</sup> A kum tistising, ra taio tagun mot in nan raro gusun a lingmulus ino, mot in ben pukus melet pasi. <sup>20</sup> A watungi tamot, ra taio in ben pukus pas a tene sakino gusun anun a kum niraro, i sa ulaun pas a nion a musano ra gusun a minat, ra a Labino in unus ru a susut na sakino petutna.

## A Mugano Pas anun o Jon

### *A wasiso talapor mugu*

A pas ri, o Jon i tumusi. O Jon i ara tagun a noino ma aru nat na ususer anun o Iesu. I tumus a pas ri ra i sa takano, ra i kis tong o Epeses. I tumusi torom a taro na lotu una papor Asia.

O Jon i inanos det lena det in tur dekdek una nurmur un o God a Tamano ma a Nutunu o Iesu Karisito. Ra det nem o God, det in nemi kai a kum paspasandet. A marmaris, i a labino utna.

Ra i utumarong det gusun a kum torotoro na tene ususer. A kum tene torotoro ri det watungi lena, o Iesu ke wanpat a mulusino elar nam dat, uni det nuki lena a pinindat i a laulau na utna.

A kum tene torotoro det watungi kai lena, a mananos i a labino utna, ikut a marmaris ma a wakak na petutna der utna oros kut. A taro ra det watungi lenri, det a kum ebar anun o Karisito, ra o Jon i nemi lena dat in tama lele det.

A inawan ina Mugano Pas anun o Jon:

O Iesu i a Wasiso na Nilaun (1:1-4)

A talapor ma a dumirum (1:5-2:29)

A kum nutnutun o God ma a kum nutnutun o Satan (3:1-4:6)

A marmaris (4:7-21)

A nurmur in winim pas a rakrakon bual (5:1-21)

### *A Wasiso na Nilaun*

<sup>1</sup> Met wasiso talapor uno naro ra i a Wasiso na Nilaun, i laun tagun numugu ut ra kabaut di ukis a rakrakon bual. Met sa longoro tari, met sa tama tari nama matamatamet, ma met sa pam tari ut a pinino.

<sup>2</sup> A Nilaun i sa wanpat puaso, ra met sa tama tari. Ma uniri met wasiso talapor torom mot uni lena, i ra a nilaun tukum. Numugu i kis tomo nam o Tamano, ra uniri i wanpat puaso torom dat. <sup>3</sup> Met inanos mot un o naro ra met sa tama tari ma met sa longoro tari, sur dat in lason tomo, elar nam met, met lason tomo nam a Tamandat, ma a Nutunu o Iesu Karisito. <sup>4</sup> Ra met tumus a kum utna ri, sur anundat a gasgas in kudul.

\* 1:10: O God i watungi lena dat rop dat pam a sakino petutna. Tama Rom 3:23. Ra dat watungi lena ka dat pam a sakino petutna, dat nuki lena o God a tene torotoro.

### *O God i a Talapor*

<sup>5</sup> A wasiso ri, met longoro i gusun o Iesu Karisito, ma met upuaso i torom mot lena, o God i a talapor mulus, ma kalako dumirum tiro uni. <sup>6</sup> Ra dat watungi lena, dat lason tomo nam o God, ikut dat kis kut una dumirum, dat a kum tene torotoro, ma a lingmulus ino ke kis un dat. <sup>7</sup> Ra dat laun una talapor, elar nam o God i kis una talapor, dat lason etetalai torom dat, ma a gap ino Iesu, a Nutunu, i rus talapor dat gusun a kum sakino petutna rop.

<sup>8</sup> Ra dat watungi lena, ka dat pam tar tu sakino petutna, dat toro melet pas dat ut, ma a lingmulus ino ke kis un dat. <sup>9</sup> Ra dat watung puaso anundat a kum sakino petutna, o God ut i tokodos, ma in pam sot pas anun a liliman, ma in unus ru anundat a kum sakino petutna, ma in utalapor dat gusun a kum petutna ra ke tokodos.

<sup>10</sup> Ra dat watungi lena, ka dat pam tar tu sakino petutna, dat watungi lena o God a tene torotoro\*, ma anun a wasiso ke kis ubalandat.

## 2

### *O Karisito anundat a tene warut*

<sup>1</sup> A kum nutnutung liklik, a tumus a kum utna ri torom mot sur gong mot pam a sakino. Ikut ra taio in pam a sakino, anundat a tene warut, o Iesu Karisito a Tene Tokodos, in wasiso anun o naro ra, torom o Tamano. <sup>2</sup> I ut i mat sur in kul ulangolango pas dat gusun anundat a kum sakino petutna, ma ausur anundat kut, a sakino petutna anun a taro rop, una rakrakon bual.

<sup>3</sup> Ra dat mur anun a kum warkurai, dat talapor lena dat tasmani ut o God. <sup>4</sup> Ra taio i watungi lena, "Iau a tasman o God," ikut, ke mur anun a kum warkurai, i a tene torotoro, ma a lingmulus ino ke kis uni. <sup>5</sup> Ra taio i mur a wasiso anun o God, a marmaris anun o God in kis mulus uni. A ukinalong ra dat tasmani lena dat anun o God i lenri: <sup>6</sup> Osi ra i watungi uni lena, i anun o God, in laun elar nam a nilaun anun o Iesu.

### *A matok na warkurai*

<sup>7</sup> A kum wakak na paspasang, ausur a matok na warkurai ri a tumusi torom mot, a turaino, a warkurai kut ra mot sa longoro tari tagun numugu utmakai. <sup>8</sup> Ikut a

warkurai ra, tuk uniri i matok utmakai. A lingmulus ina warkurai ri, di tama i un o Karisito, ma di tama i kai un mot, uni a dumirum i rop nanan, ma a talapor mulus i sa wanpat.

<sup>9</sup> Osi ra i watungi lena i kis una talapor, ikut i nget o tisinu, i kis utmakai una dumirum. <sup>10</sup> Ikut osi ra i nem o tisinu, i kis una talapor, ma katu utna una nun a nilaun in ban lingi sur in puku. <sup>11</sup> Ikut osi ra i nget o tisinu, i kis utmakai una dumirum, ma i wanan utmakai una dumirum, ma ke tasmani lena i wanan urai, uni a dumirum i sa upulu pas in matano.

<sup>12</sup> A tumtumus torom mot a kum nat, uni di sa unus ru anumot a kum sakino petutna una minatin o Karisito.

<sup>13</sup> A tumtumus torom mot a kum lamlabino, uni mot sa tasman o naro ra i laun tagun numnumugu utmakai.

A tumtumus torom mot a kum barman, uni mot sa winim pas o Satan.

A tumtumus torom mot a kum nat, uni mot sa tasman a Tamandat.

<sup>14</sup> A tumtumus torom mot a kum lamlabino, uni mot sa tasman o naro ra i laun tagun numnumugu utmakai.

A tumtumus torom mot a kum barman, uni mot sa dekdek, ma a wasiso anun o God i sa kis una balamot, ma mot sa winim pas o Satan.

<sup>15</sup> Gong mot nem a rakrakon bual, ma a kum ututna kai ra det kis uni. Ra taio i nem a rakrakon bual, ke nem a Tamandat.

<sup>16</sup> A kum utna ra kuri una rakrakon bual i lenri: a kum laulau na nemnem tagun a balandat, a kum laulau na nemnem tagun a matandat, ma a umuman labino nama kum utna anundat ma a kum pinapam ra dat pami. A kum utna ri ausur tagisapat tana Tamandat, taginin ut una rakrakon bual. <sup>17</sup> A rakrakon bual ma a kum laulau na nemnem ra det wanpat taguni, det in rop kut, ikut osi ra i mur a nemnem anun o God, in laun tukum.

#### *A kum ebar anun o Karisito*

<sup>18</sup> A kum nutnutung, uniri dat kis una kum tintinip na bung. Mot sa longoro tari lena a ebar anun o Karisito in nanpat, ma uniri a susut na ebar ra, det sa wanpat. Iri dat sa tasmani lena a tintinip na bung i sa milau. <sup>19</sup> A kum ebar anun o Karisito, numugu det kis tomo nam dat, ikut det sa pirso pas gusun dat, uni ausur det mulus tagun dat. Ra gunuk det mulus ut tagun

dat, det in kis tukum nisan dat. Ikut, ra det sa wan gusun dat, i ese i lena, det ausur tagun dat.

<sup>20</sup> Ikut mot, o Karisito i pitar tar a Tokodos na Nion torom mot. Ma mot rop, mot sa tasman a lingmulus ino, uni a Tokodos na Nion i sa towo tar mot nami. <sup>21</sup> Ausur a tumtumus torom mot uni ka mot tasman a lingmulus ino. Awu, a tumtumus torom mot uni mot sa tasman a lingmulus ino, ma katu torotoro i ser wanpat taguni. <sup>22</sup> Osi ra a tene torotoro? O naro ra i ipul kut lena, o Iesu ausur a Karisito. O naro ra i watungi lenri, i a ebar anun o Karisito, uni i ipul ru o Tamano ma a Nutunu kai. <sup>23</sup> Osi ra i ipul ru a Nutun o God, o Tamano kai ke kis tomo nami. Ma osi ra i mulaot pas o Nutunu, o Tamano kai i kis tomo nami.

<sup>24</sup> I wakak ra a kum etowo rop ra mot sa longoro tari numugu in laun un mot. Ra in laun un mot, mot kai mot in laun un o Nutunu ma o Tamano. <sup>25</sup> Ma asau ra i liliman tari sur in pitari tandat, i a nilaun tukum.

<sup>26</sup> A tumus tar a kum utna ri torom mot, sur an utumarong mot un det ra det nem na ben raro mot. <sup>27</sup> A Tokodos na Nion, ra o Karisito i pitar tari torom mot, kura ut un mot, ra ka mot sibo sur taio in ususer mot. Uni a Tokodos na Nion i ususer mot una kum utna rop. Ma a utna ra i ususer mot uni i lingmulus, ma ausur a torotoro. Mot in nuk ukai a etowo ri, sur mot in kis tukum un o Karisito.

#### *A kum nutnutun o God*

<sup>28</sup> A kum nutnutung, mot in kis tukum un o Karisito, sur gong dat ngara ma gong dat maimai una nun a bung na inawan pat.

<sup>29</sup> Mot tasmani lena, o God a tene tokodos, ma mot tasmani kai lena, det rop ra det pam a tokodos na petutna, det a kum nutnutun o God.

### 3

<sup>1</sup> Tama ! A Tamandat, una labino marmaris anunu torom dat, i watung dat a kum nutnutunu. I lingmulus ut, dat a kum nutnutun o God. A taro tagun a rakrakon bual ka det tasman o God, lenkutkai ra ka det tasman dat lena dat a kum nutnutunu. <sup>2</sup> A kum wakak na paspasang, uniri dat a kum nutnutun o God, ma ke puaso utmakai lena, numur, dat in nanpat pepetlai. Ikut dat tasmani lena, numur ra o Iesu in nanpat, dat in elar ut nami, uni dat in tama mulusi maragom. <sup>3</sup> Osi ra i kis langlang nam a nurnur sur o Karisito, in waninar anun a

nilaun ma in utalapori elar nam o Karisito i tokodos.

<sup>4</sup>Osi ra i pam a sakino petutna, i lakai a warkurai anun o God, uni a sakino petutna, i a pukupuku una kum warkurai. <sup>5</sup>Ma mot tasmani lena o Karisito i wanpat sur in los ru anundat a kum sakino petutna, ma i ut, katu sakino petutna uni. <sup>6</sup>Osi ra i laun un o Karisito, ken ser pam a sakino petutna. Ma osi ra i ser pam a kum sakino petutna, ke tama i utmakai o Karisito, ma ke tasmani kai.

<sup>7</sup>A kum nutnutung, gong mot madek tar taio sur in ben raro mot. Osi ra i pam a tokodos na magirano, i tokodos elar nam o Karisito. <sup>8</sup>Ma osi ra i pam a sakino petutna, i anun o Satan, uni o Satan a tene pam a sakino turpasi ut una turturkibino. Ikut, a Nutun o God i wanpat sur in kamar ru a pinapam anun o Satan. <sup>9</sup>Det rop ra a kum nutnutun o God, ka det ser pami mo a kum sakino petutna, uni a nilaun anun o God i kis un det. Ka det in ser pam a sakino petutna, uni det a kum nutnutun o God. <sup>10</sup>Dat in tama lele a kum nutnutun o God ma a kum nutnutun o Satan lenri: Osi ra ke pam a tokodos na petutna, i ausur a nutun o God, lenkutkai ra torom i ra ke nem o tisinio.

#### *Dat in nem etetalai dat*

<sup>11</sup>A wasiso ri mot longoro i tagun numugu lena, dat in nem etetalai dat. <sup>12</sup>Ma gong dat elar nam o Kain, i ra anun o Satan, ra i um doko ru o tisinolik o Abel. Asau a kibino ra i um doko i? Uni a magirano i laulau, ma a magiran o tisinolik i tokodos.

<sup>13</sup>A kum tistising, gong mot kisin ra a taro tagun a rakrakon bual det in nget mot. <sup>14</sup>Dat tasmani lena dat sa wan gusun a minat, sur a nilaun, uni dat nem a kum tistisingdat. Ma osi ra kalako marmaris, i kis utmakai una minat. <sup>15</sup>Osi ra i nget o tisinio, i a tene um doko a taro, ra mot tasmani lena a nilaun tukum ke kis un det a kum tene um doko a taro.

<sup>16</sup>Dat in tasman a marmaris mulus lenri: O Iesu Karisito i pitar anun a nilaun ma i mat sur dat. I wakak sur dat kai, dat in pitar anundat a nilaun ma dat in mat sur a kum tistisingdat. <sup>17</sup>Ra taio anun a susut na utna, ma i tama o tisinio i sibo, ikut ke marisi nam tu utnalik, a marmaris anun o God ke kis uni. <sup>18</sup>A kum nutnutung, gong dat marmaris nam a wasiso, o nam a wandat kut. Dat in marmaris nam a wakak na pinapam ma a lingmulus ino.

<sup>19</sup>Ra dat in marmaris lenra, dat in tasmani lena dat anun a lingmulus ino, ma dat in balano molmol umatan o God. <sup>20</sup>Ra a nuknukindat in takun dat, a mananos anun o God i labo tauna a nuknukindat, ma i tasman a kum utna rop. <sup>21</sup>A kum wakak na paspasang, ra a nuknukindat ke takun dat, dat in balano molmol umatan o God. <sup>22</sup>Ma asau rop ra dat saringi suri, in pitari ut tandat, uni dat mur anun a kum warkurai, ma dat pam asau ra i ugasi. <sup>23</sup>A warkurai anun o God i lenri: Dat in nurnur una risan o Nutunu, o Iesu Karisito, ma dat in nem etetalai dat, elar nam anun a warkurai torom dat. <sup>24</sup>Osi ra i mur anun a kum warkurai, i laun un o God, ma o God kai i laun uni. Ma dat tasmani lena o God i laun un dat, uni a Tokodos na Nion ra i tabor dat nami, kuri ut un dat.

## 4

### *A utumarong una kum torotoro na poropet*

<sup>1</sup>A kum wakak na paspasang, gong mot nurnur oros un taio ra i watungi lena a Tokodos na Nion i pitar tar a wasiso toromi. I wakak sur mot in lari munung a kum nion, ra det tagun o God o awu. Uni, a susut na torotoro na poropet kuri det una rakrakon bual. <sup>2</sup>Mot in tasman lele a Nion o God lenri: Det ra det watungi lena o Iesu Karisito i wanpat a musano mulus, det ra tagun o God. <sup>3</sup>Ikut det ra det ipul kut, ausur tagun o God. A nion ra, tagun a ebar anun o Karisito, ra mot sa longoro tari lena in nanpat, ma uniri i sa wanpat nin una rakrakon bual.

<sup>4</sup>A kum nutnutung, mot anun o God, ma mot sa winim pas a kum torotoro na poropet, uni a Tokodos na Nion ra i kis un mot, i dekdek sakit tana nion ra i kis una taro tagun a rakrakon bual. <sup>5</sup>A kum torotoro na poropet det tagun a rakrakon bual, ma a wasiso anundet tagun a rakrakon bual, ma a taro tagun a rakrakon bual det longoro det. <sup>6</sup>Dat anun o God, ma osi ra i tasman o God i longoro dat. Ikut osi ra ausur tagun o God, ken longoro dat. Lenra dat in tasman lele a Nion ra i lingmulus, ma a nion ra i torotoro.

### *O God, i a kimkibin a marmaris*

<sup>7</sup>A kum wakak na paspasang, dat in nem etetalai dat, uni a marmaris i wan tagitiro tan o God. Det rop ra det marmaris, det a kum nutnutun o God, ma det tasman o God.

<sup>8</sup>Osi ra ke marmaris, ke tasman o God, uni o God, i a kimkibin a marmaris. <sup>9</sup>O God i ese anun a marmaris torom dat, ra i tulu ru o Nutunu, ara sot kut, urin una rakrakon bual, sur in pitar a nilaun torom dat. <sup>10</sup>A marmaris i lenri: O God ut i maris mugu dat. Ausur dat, dat maris mugu o God, awu. O God i maris dat, ra i pitar ru o Nutunu sur in mat ra in ulangolango pas dat gusun anundat a kum sakino petutna. <sup>11</sup>A kum wakak na paspasang, o God i maris doko dat lenri, i wakak sur dat kai, dat in nem etetalai dat. <sup>12</sup>Katutaio utmakai i tama tar o God. Ikut ra dat nem etetalai dat, o God kuri un dat, ma anun a marmaris i bukus un dat.

<sup>13</sup>Dat tasmani lena dat laun un o God, ma o God i laun un dat, uni i sa pitar tar a Niono tandat. <sup>14</sup>O Tamano i pitar ru o Nutunu sur in Tene Ulaun anun a rakrakon bual, ra met, met sa tama tari, ma met wasiso talapor uni. <sup>15</sup>Ra taio i wasiso puaso lena, o Iesu i a Nutun o God, o God i laun uni, ma i kai i laun un o God. <sup>16</sup>Ra dat ut, dat tasman a marmaris anun o God torom dat ma dat nurnur uni.

O God, i a kimkibin a marmaris. Osi ra i marmaris, i laun un o God, ma o God i laun uni. <sup>17</sup>Una kisapi ri, anun a marmaris i bukus un dat, ma ka dat in ngara una bung na warkurai, uni nin una rakrakon bual, dat laun elar nam o Karisito. <sup>18</sup>Katu nginara i kis una marmaris. Ra a marmaris in bukus un taio, in lakro ru a nginara. Ikut, ra taio i ngara, i ese i lena, anun a marmaris ke bukus, ma i nuki lena in iru una warkurai na minabalu.

<sup>19</sup>Dat nem etetalai dat, uni o God ut i nem mugu dat. <sup>20</sup>Ra taio i watungi lena, "A nem o God," ikut i nget a tisino, i a tene torotoro. Uni osi ra ke nem a tisino ra i tama i, ken nem lar pasi kai o God ra ke tama i. <sup>21</sup>I pitar tar a warkurai ri tandat, lenri: Ra taio i nem o God, in nemi kai o tisino.

## 5

### *A nurnur i winim pas a rakrakon bual*

<sup>1</sup>Det rop ra det nurnur un o Iesu lena i a Karisito, det a kum nutnutun o God. Ma det rop ra det nem o Tamano, det nemi utkai a kum nutnutunu. <sup>2</sup>Ra dat nem o God, ma dat mur anun a kum warkurai, dat tasmani lena, dat nem a kum nutnutunu.

<sup>3</sup>Ra dat nem o God, dat in mur anun a kum warkurai. Ma anun a kum warkurai, ke ngangitin sur dat in muri. <sup>4</sup>Uni det ra a kum nutnutun o God, det sa winim pas a rakrakon bual. A dekdek ra dat winim pas a rakrakon bual nami i lenri: anundat a nurnur. <sup>5</sup>Osi ra i winim pas a rakrakon bual? Det kut ra det nurnur un o Iesu lena, i a Nutun o God.

### *A wasiso talapor un o Iesu Karisito*

<sup>6</sup>O Iesu Karisito i wanpat nam a danim ma a gap\*. Ausur i wanpat kut nama danim, i wanpat nama danim ma a gap. A Tokodos na Nion i wasiso talapor un o Iesu Karisito, uni a Tokodos na Nion i a lingmulus. <sup>7</sup>Ra a tul, detul wasiso talapor uni: <sup>8</sup>A Nion, a danim, ma a gap, anundetul a wasiso talapor i takai kut. <sup>9</sup>Dat ser nurnur una wasiso talapor anun a taro, ikut a wasiso talapor anun o God i labo sakit tano. Uni, una tulu utna ri, o God ut i wasiso talapor un o Iesu lena, a Nutunu. <sup>10</sup>Osi ra i nurnur una Nutun o God, i sa utur ukai a wasiso talapor anun o God un in balano. Ikut osi ra ke nurnur una wasiso talapor anun o God, i nuki lena o God a tene torotoro, uni ke nurnur una wasiso talapor anun o God una Nutunu. <sup>11</sup>Anun a wasiso talapor i lena: O God i sa pitar tar a nilaun tukum torom dat, ma a nilaun ra, kura un o Nutunu. <sup>12</sup>O naro ra a Nutun o God i laun uni, i utur ukai a nilaun tukum. Ikut o naro ra a Nutun o God ke laun uni, ke utur ukai a nilaun tukum.

### *O Iesu i a nilaun tukum*

<sup>13</sup>A kum utna ri a tumusi torom mot, ra mot nurnur una risan a Nutun o God, sur mot in tasmani lena, mot sa utur ukai a nilaun tukum. <sup>14</sup>Ra dat wararing torom o God sur tu utna elar nam anun a nemnem, dat sa tasman mulusi lena, in longoro dat. Ra ka dat in ngara sur dat in saringi sur tu utna. <sup>15</sup>Ra dat tasmani lena, i longoro dat una kum utna rop ra dat sasaring suri, dat tasmani kai lena, in pitar asau ra dat saringi suri.

<sup>16</sup>Ra taio in tama o tisino i pam a sakino petutna ra ke wan sur a minat, in wararing torom o God, ma o God in pitar a nilaun tano. A niaring ri in warut det ra anundet a sakino petutna ke wan sur a minat. Ikut ka watungi sur mot in wararing un det

\* 5:6: A ramano kum tene mananos una Buk Tabu det nuki lena a danim i ukinalong a baptais ma a gap i ukinalong a minat. † 5:16: A ramano kum tene mananos una Buk Tabu det nuki lena a sakino petutna ra taio in mat tukum uni, ra i ipul ru o Iesu.

ra anundet a sakino petutna i wan sur a minat.<sup>†</sup> <sup>17</sup>A kum petutna rop ra ke tokodos, a kum sakino petutna. Ikut a ramano kum sakino petutna ke wan sur a minat.

<sup>18</sup>Dat tasmani lena det rop ra a kum nutnutun o God, ka det ser pam meleti mo a kum sakino petutna. Uni a Nutun o God i tamtamabat det ut, ra o Satan ke pet lar pasi sur in banlaulau det. <sup>19</sup>Dat sa tasmani lena, dat a kum nutnutun o God, ma a rakrakon bual rop i kis utuntudu ina warkurai anun o Satan. <sup>20</sup>Dat sa tasmani kai lena, a Nutun o God i sa wanpat, ra i tabor tar dat nam a mananos, sur dat in tasman o God ra i lingmulus. Dat laun un o God ra i lingmulus, uni dat laun una Nutunu, o Iesu Karisito. Ma i, a God ra i lingmulus, ma a nilaun tukum.

<sup>21</sup>A kum nutnutung, mot in tamtamabat mot gusun a kum torotoro na god.

## A Manru na Pas anun o Jon

### A wasiso talapor mugu

A pas ri o Jon i tumusi. I tumusi torom ara ino, ikut a susut na tene mananos det nuki lena a ino ma a kum nutnutunu a wasiso elelar una lotu ma a kum tene nurnur.

Una pas ri, i inanos det lena, det in nem etetalai det, ra det in tamtamabat det gusun a kum torotoro na tene ususer.

A inawan ina Manru na Pas anun o Jon:

A turturkibin ina buk ri (1-3)

A marmaris (4-6)

A utumarong una kum tene torotoro (7-11)

A tintinip na wasiso (12-13)

<sup>1</sup>Iau o Jon, ara mugumugu, a tumtumus torom ui, a ino ra o God i sa pilok pas ui, tomo nama kum nutnutum, ra a nem mulus mot. Ausur iau kut, met rop kai ra met tasman a lingmulus met nem mot. <sup>2</sup>Met nem mot kibino una lingmulus ra kuri un dat, ma in kis tukum un dat.

<sup>3</sup>A marmaris, a wakak na petutna ma a malmal tan o God a Tamandat ra o Iesu Karisito a Nutunu, in kis torom dat ra dat kis una lingmulus ma dat nem etetalai dat.

#### *Dat in nem etetalai dat*

<sup>4</sup>A gas doko ra a longoro i lena, a ramano kum nutnutum det mur a lingmulus, elar nama warkurai a Tamandat i sa pitar tari torom dat. <sup>5</sup>Uniri a saring ui, a ino, sur dat in nem etetalai dat. Ausur a tumus tu matok na warkurai torom ui, awu. A warkurai kut ra dat sa longoro tari tagun numugu. <sup>6</sup>Ra dat nem ara taro dat in ese i lenri: Dat in mur a kum warkurai anun o God. Anun a warkurai, ra numugu mot sa longoro tari i lenri, mot in mur a petutna na marmaris.

#### *Mot in tumarong mot gusun a kum tene torotoro*

<sup>7</sup>A susut na tene torotoro det sa wan sarara nin una rakrakon bual. Det ipul kut lena, o Iesu Karisito ausur i wanpat a musano mulus. A ngas na musano ra, i a tene torotoro, ma a ebar anun o Karisito. <sup>8</sup>Mot in tumarong mot sur gong mot ubek ru asau ra mot sa dekdek pasi. Mot in tur dekdek sur mot in los pas anumot a kudulano ikul. <sup>9</sup>Osi ra i wan gisen pas gusun

a kum etowo anun o Karisito ma ke muri, o God ausur kura uni. Ikut osi ra i mur a kum etowo ri, a Tamandat ma o Nutunu kura der uni. <sup>10</sup>Ra taio in nan torom mot nam tu ngas na etowo gisen, gong mot gas pasi ma gong mot ben ruki una numot a kum rumu. <sup>11</sup>Osi ra i gas pasi, i ara pasano una nun a kum sakino pinapam.

#### *A ururop na wasiso*

<sup>12</sup>A susut na utna ra an tumusi torom mot, ikut ka nemi sur an tumtumus una dono buk namin nepen. A nuki sur an nan ut torom mot, ma an wasiso torom mot, sur anundat a gasgas in bukus.

<sup>13</sup>A kum nutnutun a tisimino, ra o God i sa pilok pasi, det pitar anundet a marmaris torom ui.

## A Mantul na Pas anun o Jon

*A wasiso talapor mugu*

A pas ri o Jon i tumusi. I tumusi torom ara tene nurnur a risano o Gaius. I watung wakak toromi uni i warut a kum tene pina-pam ra det wan nama Wakak na Wasiso. I wasiso kai un ara musano a risano o Diotrepes, ra anun a petutna ke wakak.

A inawan ina Mantul na Pas anun o Jon:

A turturkibin ina buk ri (1-4)

O Jon i gas un o Gaius (5-8)

A petutna anun o Diotrepes ke wakak (9-10)

A petutna anun o Dimitrius i wakak (11-12)

A tintinip na wasiso (13-15)

<sup>1</sup> Iau, o Jon, a mugumugu, a tumtumus torom ui, o pasang o Gaius, ra a nem mulus ui.

<sup>2</sup> Pasang, a wararing un ui, sur anum a wakak na nilaun ma anum a wakak na kinkinis, elar nam a niom ra i laun wakak.

<sup>3</sup> A gas doko ra aramano kum tistisindat det wanpat, ma det wasiso kapo un ui lena, u mur a lingmulus ino, ma anum a nilaun i elar nami. <sup>4</sup> Ra a longoro i lena a kum nut-nutung, anundet a nilaun i mur a lingmulus ino, a gas doko, ma katu utna melet mo ra in ulabo anung a gasgas.

*A warut torom a kum tistisindat ra det wan nama Wakak na Wasiso*

<sup>5</sup> Pasang, u lingmulus una pinapam ra u pami torom a kum tistisindat, ra det usiro pat torom ui. <sup>6</sup> Ma ara taro tagun det, det wanpat nin, det wasiso kapo torom a taro na lotu una num a marmaris. I wakak ra un warut det nam lako kum utna una nundet a inawan. A petutna ra, o God i gas uni. <sup>7</sup> Det wan nama risan o Karisito, ra ka det los tu warut tan a taro ra ka det nurnur. <sup>8</sup> Lenra, i wakak sur dat in warut a ngas na taro ra, sur dat in papam tomo nam det sur a lingmulus ino in nan sarara.

*A nilaun anun o Diotrepes ma o Dimitrius*

<sup>9</sup> A sa tumus tar a pas torom a taro na lotu una num a tamon, ikut o Diotrepes i ra i nem doko i sur in mugumugu anumot, ke ser longoro met. <sup>10</sup> Ra an nanpat, an inanos mot una kum petutna ra i pampami, a kum

sakino wasiso eno i sa watung tari un met. Ma ausur i kut ra, i kai ri, ke ser gas pas a kum tistisindat ra det wanpat nam a Wakak na Wasiso, ma i turbat det ra det nem na gas pas det. Ra taio i nem na gas pas det, o Diotrepes in umana ru i gusun a lotu.

<sup>11</sup> Pasang, gong u tamtama ususer una sakino petutna, un muri kut a wakak ino. Osi ra i pam a wakak ino, i anun o God, ma osi ra i pam a sakino, ke tasman o God.

<sup>12</sup> A taro rop det watungi un o Dimitrius, lena i ara wakak na musano, ma a lingmulus ino kai i wasiso talapor uni. Met kai met wasiso talapor uni, ma u tasmani lena anumet a kum wasiso i lingmulus.

*A ururop na wasiso*

<sup>13</sup> A susut na utna ra an tumusi torom ui, ikut ka nemi sur an tumtumus torom ui nam in nepen. <sup>14</sup> Ikut a nuki lena milau dar in tamtama tomo, sur dar ut dar in wasiso.

<sup>15</sup> A malmal torom ui. A kum pas-pasam taginin, det pitar anundet a marmaris torom ui. Ra ui kai un pitar anung a marmaris torom a kum paspasandar rop ra det kis tiro iai.

## A Buk anun o Jud

### *A wasiso talapor mugu*

O Jud i tumus a buk ri. A susut na tene mananos det nuki lena o Jud i a tisin o Iesu ma o Jems. Tama Mt 13:55 ma tama i kai a wasiso talapor una buk anun o Jems.

I tumus a buk ri torom a kum tene nurnur. Ra i longoro i lena a kum torotoro na tene ususer det ben raro det, i tumtumus sur in utumarong det. Ma i watungi lena, a Labino in warkurai a kum tene sakino. I inanos det kai lena, det in mur a Wakak na Wasiso, ma det in tur dekdek una nurnur. A inawan ina buk Jud:

A turturkibin ina buk ri (1-2)

A ngasino anun a kum torotoro na tene ususer (3-16)

Dat in tur dekdek una nurnur (17-23)

A watung ulabo torom o God (24-25)

<sup>1</sup>Iau o Jud, a tultul anun o Iesu Karisito ma a tisin o Jems. A tumus a pas ri torom mot ra o God a Tamandat i sa kabo pas mot, ma i maris mot, ma mot kis una tamtamabat anun o Iesu Karisito.

<sup>2</sup>O God in pitar a warut, a malmal ma a marmaris, ra detul labo sakit, torom mot.

*Mot in tumarong mot gusun a kum torotoro na tene ususer*

<sup>3</sup>A kum wakak na paspasang, a nem doko i sur an tumtumus torom mot una pinapam anun o God ra i ulaun pas dat. Iikut uniri, a nuki lena an tumtumus sur an udekdek mot, sur mot in dekdek sur mot in tamtamabat wakak a Wakak na Wasiso gusun a kum ebar. A Wakak na Wasiso ra di sa pitar tari torom a taro anun o God, ra kataio in pukus lar pasi. <sup>4</sup>A tumtumus una utna ri, uni ara taro det sa ruk eno taru torom mot. Ka det mur a nemnem anun o God, ma det in iru una warkurai anun o God, elar nami ra di sa tumus tari numugu utmakai una Buk Tabu. Det pukus laulau pas a marmaris anun o God, ra det watungi lena, "I wakak kut ra dat in pam a kum petutna na pamuk." Ma det ipul ru i kut anundat a Mugumugu ma anundat a Labino o Iesu Karisito, i ara sot kut.

<sup>5</sup>Mot sa tasman tar a kum utna ri, ikut a nemi sur an inanos melet mot lena: A

Labino i ulaun pas a taro Israel tagitong o Ijip, ikut numur, i um doko ru det ra ka det nurnur. <sup>6</sup>Ma a kum ensel kai, ra ka det gas una kum pinapam ra o God i sa tibo tar det nami, det wan gisen gusun a kinkinis anundet. Ra o God i sa ker ukai tar det nama kum sen, ra in kis tukum. Ma det sa kis una dumirum ra det kis langlang pas a labino bung ra din warkurai det. <sup>7</sup>Lenkutkai ra torom o Sodom ma o Gomora, ma a kum tamon milau der. A taro tagitiro iai det pam a petutna na pamuk, ma det pam a laulau ino melet torom det ut a kum musano. Ra a kum tamon ra, det iru rop una sungun. Ma anundet a iniru i utumarong dat sur dat in tasmani lena a labino sungun ra ken mat, i kis sur a kum tene sakino sur din tun det uni.

<sup>8</sup>A taro ra det sa ruk taru torom mot, det kai det sakino elar nam det ra. Det nurnur un asau ra det tama i una kum ririon. Una nurnur ra, det udur a pinindet melet ut nama kum sakino petutna, ka det nemi sur det in kis utuntudu ina warkurai anun o God, ma det watung laulau a kum ensel tagisapat netes. <sup>9</sup>Ikut o Maikel, a mugumugu anun a kum ensel, ra der engaras nam o Satan una minatin o Moses, ke watung tar tu laulau na wasiso un o Satan. I watungi kut lena, "A Labino ut in balu i torom ui." <sup>10</sup>Ikut a taro ri det wasiso laulau una kum utna ra ka det talapor uni. Ma anundet a mananos i elar kut nama mananos anun a kum wewegua, ra det muri kut a nemnem ina pinindet. A utna ra, det in iru uni.

<sup>11</sup>In laulau doko torom det! Det mur a petutna anun o Kain\*. Ma det raro elar nam o Balam†, uni det pam a kum laulau na utna sur det in los a mani uni. Det in iru elar nam o Kora‡, ra i mugu pas a taro ra det rosumur gusun o God, ra det iru rop.

<sup>12</sup>Ra a taro ri det wangon tomo nam mot una anumot a kum inangon na marmaris, det elar kut nama dur na utna. Det tabor masmasur pas det ut, ma ka det urur sur a taro gisen. Det elar nama bakut ra a wuwu i wup tuptupukusi, ra katu utna i ubatbati. Det elar kai nama kum duwai ra ka det wu una kalang ra det ser wu uni, det sa mat. Ra di sa gat ru det, anundet a manru na minat mo ra. <sup>13</sup>Det elar nama labino top ra i tapak, ma nundet a kum sakino petutna na maimai ra ka det maimai uni, i wanpat

\* 1:11: Tama Stat 4:3-8 † 1:11: Tama Namba 22-24

‡ 1:11: Tama Namba 16

talapor elar nama busu na top. Ma det elar kai nama kum nangnang ra ka det kis una kinandet, det wan tuptupukus kut, ra o God i sa waninar tar a labino dumerum sur det, ma ken rop.

<sup>14</sup>Ma o Enok kai, a wonom mawit na kabo taro tagun o Adam, i sa watung tar a wasiso na poropet un det lena, “Tama i, a Labino in nanpat nam anun a ariparip na tokodos na ensel, <sup>15</sup>sur in warkurai a taro rop. Ma det rop ra ka det mur a nemnem anun o God det in iru una warkurai, una nundet a kum sakino pinapam ra det sa pam tari, ma una kum laulau na wasiso ra a sakino taro det sa watung tatari una Labino.”

<sup>16</sup>A taro ri, det a kum tene ururai ma a kum tene pukpukus. Det mur a kum laulau na nemnem anundet, ra det ulabo pas det ut. Det ugargas pasi kut a taro nam anundet a kum namnamin na wasiso, sur det in los tu utna gusun det.

*Mot in udekdek mot una nurnur*

<sup>17</sup>Ikut mot, a kum wakak na paspasang, mot in nuk pas a kum wasiso anun a kum aposel anun a Labino anundat o Iesu Karisito, ra det sa inanos mugu tar mot uni.

<sup>18</sup>Det sa inanos tar mot lena, “Una kum tintinip na bung, lako taro det in watung laulau o God, ra det in mur anundet a kum nemnem, ra ke elar nama nemnem anun o God.” <sup>19</sup>A taro ri, det a kibino ra mot a

kum tene nurnur mot tapagol. Det mur a nemnem kut anun a rakrakon bual, ma a Tokodos na Nion ke kis un det.

<sup>20</sup>Ikut mot, a kum wakak na paspasang, in wakak ra mot in udekdek mot una numot a tokodos na nurnur sur in lubung, ma mot in wararing nama dekdek ina Tokodos na Nion. <sup>21</sup>Mot in kis epotor una marmaris anun o God, ra mot kiskis langlang sur anundat a Labino o Iesu Karisito in tabor mot nama nilaun tukum. In tabor mot nami, uni i maris mot.

<sup>22</sup>Mot in ese a marmaris torom det ra i talara anundet a nurnur. <sup>23</sup>Ma mot in dat ulaun lakit pas ara taro ra kura mo una sungun. Ma torom ara taro kai, mot in ese a marmaris, ikut mot in ngara utkai, sako mot in mur a ngasino anundet. Ma mot in ngaran anundet a kum malu ra i dur nama nundet a kum sakino petutna.

*A wasiso na ululabo torom o God*

<sup>24</sup>Dat in watung ulabo pas o God, ra i pet lar pasi sur in tamtamabat mot sur gong mot puku, ma in utur mot umatan anun a minamar, nama labino gasgas ma katu etakun torom mot. <sup>25</sup>I ara sot kut anundat o God, ra i ulaun pas dat una minatin o Iesu Karisito anundat a Labino. Anunu ut a minamar, a kinkinis na king, a dekdek ma a warkurai, tagun numnumugu utmakai, uniri, ma ken rop. Amen.